

Milik Departemen P dan K  
Tidak diperdagangkan  
Untuk umum

# Hikayat Kureh Pari

Ramli Harun



Departemen Pendidikan dan Kebudayaan

# Hikayat KUREH PARI

Dialihaksarakan oleh  
**RAMLI HARUN**

Departemen Pendidikan dan Kebudayaan  
PROYEK PENERBITAN BUKU SASTRA  
INDONESIA DAN DAERAH  
Jakarta 1983

Diterbitkan oleh  
Proyek Penerbitan Buku Sastra  
Indonesia dan Daerah

Hak pengarang dilindungi undang-undang

PERPUSTAKAAN DIT. SEJARAH & NILAI TRADISIONAL	
Nomor Induk	: 1009/1984
Tanggal terima	: 8-8-'84
Beli/hadiah dari	: Proyek POSID
Nomor buku	:
Kopi ke	: 2

## KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuananya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, yang berasal dari Pusat Dokumentasi dan Informasi Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1983

Proyek Penerbitan Buku Sastra  
Indonesia dan Daerah

## **DAFTAR ISI**

Pengantar .....	9
Ringkasan .....	11
1. Kureh Pari Peuseutot Lumpoe .....	17
2. Seulindang Deulima di Gunong Peuranta Nila .....	34
3. Kureh Pari lam Rimba Raya .....	66
4. Meurumpok ngon Putroe .....	103
5. Kureh Pari keunong Bala .....	136
6. Di Taman Baduri .....	175
7. Kureh Pari Meukawen ngon Nuron Beureuhi .....	212
8. Gisa U Peuranta Nila .....	243
9. Meunikah ngon Seulindang Deulima .....	278
10. Prang Meuseunoh Putroe .....	313
11. Kureh Pari Peutalo Raja-raja Jen .....	351
12. Jeuet ke Raja Nanggroe Anda Peurdani .....	381

## PENGANTAR

Naskah hikayat Kuris Pari yang telah kami alih aksarakan ini kami dapati dari Pusat Dokumentasi dan Informasi Aceh bulan Juni 1982 dalam bentuk tulisan tangan, huruf Arab, bahasa Aceh. Tebal 258 halaman dengan ukuran 20 X 15 cm. Tiap halaman rata-rata terdiri dari dua puluh empat baris. Di halaman terakhir tercantum nama pemilik naskah yaitu Teungku Hasan, Muara Dua, Gampong Kandang Lhok Seumawe. Selesai ditulis pada tanggal dua Muharram 1378 H (19 Juli 1958).

Meskipun terdapat data tersebut di atas, agak sukar juga untuk mengetahui nama pengarang hikayat ini. Sebuah hikayat yang disimpan oleh pemiliknya, ada kalanya dipinjam oleh seorang untuk disalin. Penyalin kadang-kadang menyebutkan nama pemiliknya bukan nama pengarangnya, karena nama pengarang biasanya tidak tercantum. Demikianlah yang mungkin terjadi dengan hikayat ini. Hal semacam ini umumnya terdapat pada hikayat Aceh. Namun demikian, melihat masih banyak terdapat kata-kata lama yang digunakan pengarang, patut diperkirakan bahwa hikayat ini sudah disusun lama sebelum tahun penulisan yang terdapat pada baris-baris terakhir.

Sebagian besar hikayat ini mengisahkan perang perebutan dan mempertahankan putri. Imajinasi pengarangnya tertumpu pada kesaktian makhluk-makhluk halus. Bagi penggemar kesusastraan Aceh dan pengamat kesusastraan daerah umumnya, hikayat ini kiranya perlu dipelihara sebagai milik kebudayaan bangsa. Beberapa judul isi telah kami buat untuk memudahkan pembaca mengikuti jalan cerita hikayat yang panjang ini.

Jakarta, Maret 1983

Ramli Harun

## RINGKASAN CERITA HIKAYAT KURIS PARI

Kuris Pari adalah putra raja Ali Juhan yang memerintah di negeri Anta Peurdani. Dalam usia dua belas tahun ia sudah mahir dalam berbagai ilmu terutama ilmu agama.

Pada suatu hari Kuris Pari bersama dengan dua orang anak mentri bernama Alkikh dan Bahrum serta sejumlah pengiring pergi berjalan-jalan melihat keadaan negeri. Sebenarnya Kuris Pari hendak mencari gadis impiannya Seulindang Deulima. Di suatu tempat Kuris Pari beristirahat dan selain kedua anak menteri, semuanya disuruh pulang.

Tersebutlah sultan Ahmad yang berasal dari jin pari yang berkuasa di negeri Antara. Pada suatu hari sultan menemukan sebuah delima yang ketika dibelahnya terdapat seorang bayi di dalamnya. Bayi itu dipelihara oleh isterinya putri Diwi Beureuma, seolah-olah anaknya sendiri. Atas anjuran sejumlah jin pari bayi itu dinamakan Seulindang Deulima, dan ketika berusia tujuh tahun gadis itu diasingkan di sebuah istana di bukit Peuranta Nila dengan dijaga ketat oleh bangsa pari. Seorang menteri bernama Kilan mengumumkan bahwa barang siapa yang sanggup datang ke tempat tinggal Seulindang Deulima ialah yang akan menjadi tunangannya.

Dalam pengembaramnya, Kuris Pari bersama Alkikh dan Bahrum sampai di tepi sebuah laut yang diapit oleh dua buah gunung yang terjal. Mereka menemukan sebatang pohon delima yang sedang berbuah. Di dalam buah delima yang dipetik oleh Kuris Pari terdapat sebuah bungkusan berisi gambar Seulindang Deulima. Ketika Kuris Pari sedang tidur nyenyak Alkikh dan Bahrum berkhianat hendak membunuh Kuris Pari, tetapi malaikat datang dan melempar Alkikh ke dalam sungai dan Bahrum ke dalam hutan. Alkikh menjadi buaya dan Bahrum menjadi harimau. Kuris Pari melanjutkan perjalanannya seorang diri dan sampai di sebuah dusun dalam daerah kekuasaan sultan Ahmad. Di dusun itu ia tinggal di rumah seorang tua yang tidak beristeri dan anak, bernama Hasyim. Orang tua itu mula-mula melarang Kuris Pari men-

cari putri Seulindang Deulima karena tempatnya sangat berbahaya. Tetapi setelah Kuris Pari memperlihatkan gambar putri, Hasyim turut membantu. Dengan seekor kuda terbang bernama Janggi Keumala, Kuris Pari terbang menuju bukit Peuranta Nila. Di tengah malam tanpa diketahui para pengawal, Janggi Keumala hinggap di atas puncak istana Seulindang Deulima. Dengan menyamar sebagai seekor kumbang, Kuris Pari masuk ke dalam kamar putri lalu menjelma kembali seperti semula. Seulindang Deulima merasa heran bagaimana anak muda itu dapat masuk ke dalam istana yang dijaga ketat itu. Sebelumnya sudah banyak pahlawan yang menemui ajalnya dalam usaha mereka hendak mendapat Seulindang Deulima. Teringatlah ia akan janji ayahnya bahwa barang siapa yang sanggup datang ke istana itu dialah yang akan menjadi jodohnya. Sesudah berkenalan dan saling mengikat janji menjelang pagi Kuris Pari keluar dari istana dan terbang. Ketika itulah ia dilihat oleh para penjaga istana. Raja Kaha Pari dan Batee Beusoe yang ditugaskan menjaga putri segera mengejar. Kedua raja ini adalah adik sultan Ahmad sendiri. Kuris Pari jatuh ke dalam laut akibat ilmu sakti Kaha Pari. Ia terdampar di sebuah pulau dan Janggi Keumala hanyut sampai di pulau tujuh.

Seorang syiah menemukan Kuris Pari dalam keadaan pingsan dan sesudah sadar ia dibawa ke rumahnya. Di sana ia melihat beberapa orang syiah sedang membaca tasbih. Kemudian masing-masing mereka memberikan Kuris Pari sebuah azimat. Sesudah meninggalkan tempat itu Kuris Pari bertemu lagi dengan kudanya Janggi Keumala.

Ketika hendak mandi di kolam Taman Baduri, Kuris Pari melihat sebentuk cincin tertinggal di pinggir kolam itu. Dari seekor burung bernama Kadiman yang menjaga kolam itu, ia mendapat keterangan bahwa pemilik cincin itu ialah pemilik taman itu sendiri yaitu putri Nurun Beureuhi. Ayahnya seorang raja jin Islam bernama Kaha Zaman yang merintah di negeri Tufa. Baginda akan menikahkan putrinya dengan pemuda yang sanggup menyerahkan bunga pauh jingga tiga serangkai yang berada di pusat laut Sikatra sebagai mas kawin. Dengan perantaraan Kadiman, Kuris Pari mengirim sepucuk surat kepada Nurun Beureuhi,

menyatakan isi hatinya bahwa ia ingin mempersuntingnya sebagai isteri. Burung itu juga menceritakan kepada putri Nurun tentang kehebatan Kuris Pari dan tekatnya yang keras hendak mencari pauh jingga. Sesudah membaca surat Kuris Pari ia sangat terharu sehingga jatuh sakit. Mengetahui hal itu ayahnya sangat murka.

Dengan bantuan seorang syiah, Kuris Pari akhirnya dapat memiliki bunga pauh jingga. Dengan kuda Janggi Keumalanya ia menuju negeri Tufah. Dalam perjalanan, ia dihadang oleh pasukan raja Kaha Zaman. Perkelahian terjadi dan tentara Kaha Zaman dapat dikalahkan. Sesudah diberi pengertian oleh seorang syiah akhirnya raja Kaha Zaman bersedia menerima bangsa manusia sebagai menantunya. Teungku Syiah segera menyerahkan mas kawin berupa bunga pauh jingga kepada raja Kaha Zaman dan pada hari yang sudah ditentukan berlangsunglah pernikahan antara Kuris Pari dengan putri Nurun Beureuhi dengan segala upacara kebesaran.

Seulindang Deulima sudah tiga tahun ditinggalkan oleh Kuris Pari. Ia selalu dalam keadaan murung memikirkan nasib kekasihnya. Pengawal istana makin memperketat penjagaan karena putri sering menyebut-nyebut nama Kuris Pari. Ketika pulang dari bertamasya ke gunung Kasmi Diwi, bersama kudanya ia singgah di istana Seulindang Deulima. Jingga Keumala turun dan semua pengawal istana tertidur dengan nyenyak berkat ilmu sakti Kuris Pari. Alangkah terharunya Seulindang Deulima melihat kedatangan kekasihnya yang tidak disangka-sangkanya itu. Kuris Pari menceritakan semua pengalamannya kecuali perkawinannya dengan Nurun Beureuhi. Seulindang Deulima meminta kepada ayahnya supaya ia dinikahkan dengan Kuris Pari.

Mengetahui Kuris Pari sudah berada kembali di istana Seulindang Deulima, Kaha Pari dan Batee Beusoe amat marah. Empat orang penjaga malam dipecat dan dituduh bersekongkol dengan Kuris Pari. Mereka tidak menyetujui putri Seulindang Deulima dinikahkan sebelum menyaksikan kesaktian Kuris Pari. Dalam pertemupuran dahyat antara Kuris Pari yang dibantu oleh tentara saktinya dengan pasukan Kaha Pari dan Batee Beusoe, Kuris Pari beroleh kemenangan. Raja Ahmad memenuhi janjinya dan menikahkan

putrinya dengan Kuris Pari.

Adapun raja-raja bangsa jin setelah mendengar bahwa Seulindang Deulima sudah dinikahkan dengan bangsa manusia, mengadakan persiapan hendak menyerang Kuris Pari. Rencana mereka diketahui oleh Kuris Pari dan tak lama kemudian meletuslah pertempuran hebat antara pasukannya dengan balatentara bangsa jin yang datang menyerang. Dalam pertempuran itu Kuris Pari sempat terpelanting jauh dan jatuh ke dalam istana raja jin bernama Gangga Beurama di negeri Keulabee Tamam. Raja ini mempunyai seorang anak gadis bernama Din Keumala. Putri ini telah jatuh cinta kepada Kuris Pari dan tak lama kemudian ia dinikahkan dengannya.

Di negeri Antara perang masih berkecamuk memperebutkan putri Seulindang Deulima. Putri sangat cemas memikirkan nasib suaminya. Karena mendapat firasat tidak baik Kuris Pari segera pulang ke negeri Antara. Di sana ia langsung terjun ke dalam medan perang dan berkat kesaktiannya semua musuh dapat di-kalahkannya.

Sesudah negeri aman kembali Kuris Pari teringat akan kedua orang tuanya. Bersama Seulindang Deulima ia menuju negeri Anta Peurdani. Dalam perjalanan ia menjemput putri Nurun Beureuhi. Sesudah tujuh hari dalam perjalanan mereka tiba di Anta Peurdani disambut gembira oleh raja Ali Juhan bersama permaisurinya.

Tiada berapa lama kemudian Kuris Pari dinobatkan menjadi raja negeri Anta Peurdani menggantikan ayahnya yang sudah tua. Kedua putri sudah melahirkan masing-masing seorang putra dan putri. Delapan tahun kemudian barulah Kuris Pari menjemput isterinya yang ketiga yaitu Din Keumala di negeri Keulabee Tamam. Sesudah tinggal agak lama di Keulabee Tamam, Kuris Pari pulang ke Anta Peurdani bersama Din Keumala. Di sana mereka hidup rukun dan damai di bawah lindungan Tuhan Yang Maha Kuasa.

Hikayat  
KUREH PARI

Bismillahirrahmanirrahim

## I. KUREH PARI PEUSEUTOT LUMPOE

Alhamdulillah awai pujoe  
Tuhan sidroe nyang mula phon  
Nyang pumilek bak jeuep-jeuep syoe  
Dua nanggroe leungkap suson

Seulaweuet saleuem atueuh Nabi  
Nyang ka neubri di awai phon  
Keunan rahmat malam hari  
Ateueh Nabi nyang neupeutren

Lheueh nyan wareh dum ansari  
Keunan neubri nyang awai tren  
Abeh mumat ngon lon pujoe  
HambaNeu nyoe mohon lindong

Ngon ijazah guree kamoe  
Lheueh nyan keudroe mohon tulong  
Neubri mudah atueuh hamba  
Seugala kasad dalam jantong

Neubri bak deuh peungeuh mata  
Akan hamba that meulindong  
Lon meuiman lagee nyang ka  
Bek lupa meuube jarom

Nyan khuteubah sang mumada  
Hana guna panyang ujung  
Tapumeu'ah dum syeedara  
Nyoe calitra kamoe puphon

Pat nyang salah bek upat ceula  
Pat han gura bek neupeuhom  
Nyang jeuet meunan lon peugah had

Tukang surat kureueng mufom

Ngon teupaksa ulon surat

Seubab hajat wareh kawom

Bukon sayang siwah raja

Cit lam masa tren u bumoe

Amma bakdu bak phon mula

Saboh raja lon hareutoe

Gampong mupat meuri bangsa

Ateueh donya teuduek dukhoe

Ngon laseubah le lagoina

Ngon areuta hana bagoe

Tangan murah hana tara

Asoe donya bandum pujoe

Aneuk gampong mangat ate

Seugala be atueh nanggroe

Nama raja deungo lon rawi

E boh ate lon peutusoe

Ali Juhan sulton rani

Nan geurasi yoh saboh roe

Ngon rupa jroh hana sakri

Syah doli nyang peugang nanggroe

Nama judopi lon rawi

Bek han meuri singoh uroe

Lela Sikanda nama siti

Ngon rupapi miseue uroe

Ngon rancak that hana lawan

Ngon budiman hana bagoe

Cit lam laloe pubuet iman

Uroe malam deungon lakoe

Hana teudoh pujoe Tuhan

Cahya iman miseue uroe

Poteu raja leubeh deundam

Sulton ngon cut nyak putroe

Lam gampong neubri atoran  
Seukalian asoe nanggroe  
Han jeuet bacut meuambilan  
Dara agam han tom paloe

Poteu raja tinggai teutap  
Ngon cut ubat si nyak putroe  
Cit lam sabé meuen ladat  
Neugaseh that raja nanggroe

Han tom siblet na meularat  
Sapeue that raja ngon putroe  
Meunan sabé ampon deelat  
Cit lam ladat sabé laloe

Salah bacut poteu raja  
Aneuk hanapi meusidroe  
Goh neubri le Tuhan Esa  
Hana kada ateueh putroe

Nyankeu bacut salah banja  
Aneuk hana raja nanggroe  
Neumeulakee nibak Tuhan  
Geunap malam deungon putroe

Neubeuet do'a lheueh seumbahyang  
Keu Tuhan sabé neupujoe  
Ya Tuhanku keu lon neubri  
Geunap kali lon mohon droe

Neubri aneuk satu biji  
E ya Rabbi keu ulon nyoe  
'Oh mate lon soekeuh doli  
Sayang jibri asoe nanggroe

Sayang kuta ngon meuligi  
Ngon sipai abeh phang-phoe  
Teuboh gampong tan mufeuti  
Sayang reule asoe nanggroe

Ya Tuhanku nyang that gani  
Bak troh janji Hambateu nyoe  
Meunyo hana soe peurintah  
Sayang leupah asoe nanggroe

Meunan sabé di khalifah  
Ngon cut indah si nyak putroe  
Neumeulakee nibak Allah  
Khalifah ngon sira neumoe

Bandua neusujud seumbah  
Kalimah sabé neupujoe  
Hana teudoh beungoh seunja  
Ngon cut rakna neuleueng jaroe

Neulakee bak Tuhan Esa  
Padum masa sabé neumoe  
Yoh masa nyan raja raya  
Tuhan kada atueh putroe

Ka lam hame bungong jeumpa  
Po cut rakna ka meuasoe  
Mangat ate poteu raja  
Galak raya hana bagoe

Pujoe Tuhan hana reuda  
Beungoh seunja dalam dukhoe  
Neungieng po cut ka seujahtara  
Bak rupa neukalon keudroe

Neugaseh that leubeh bak nyang ka  
Keu cut rakna si nyak putroe  
Peue nyang hawa neubloe leugat  
Jak mita pat laen nanggroe

Po cut intan peutroh hajat  
Peue nyang mangat pajoh keudroe  
Bek roh apon jantong leukat  
Neutakot that bak mupaloe

Pat makanan ladat-ladat  
Raja deelat laju neubloe  
Nyankeu raja nyang that ingat  
Buet meularat that neupujoe

Yoh masa nyan Tuhan kada  
Padum masa si nyak putroe  
Sampoe buleuen po cut rakna  
Saket teuma cut sambinoe

Haba nyoe lon peutoe lanja  
Hana guna panyang tuloe  
Po cut intan geupumadeueng  
Bungong seupeung nyang meubudoe

Ka troh uroe maja neukheun  
Cut meugleueng geujak pumanoe  
U meuligoe peuek laju  
Bungong meulu sinyak putroe

Poteu raja ate rindu  
'Oh neueu rupa aneuk droe  
Neucok si nyak le tuanku  
Peiduek laju lam leumueng droe

Neukhem bacut raja doli  
Cut juhari that seureuloe  
Neujok pulang lom bak cut ti  
Mangat ate bandua droe

Tuan putroe meunoe neukheun  
Cut buleuen nyang baek budoe  
Wahe aneuk cahya buleuen  
Rambideuen dalam meuligoe

Nyopat nanggroe takeurajeu  
Beu jeuet takheun asoe nanggroe  
Jak he aneuk kutimang be  
Jeh beude peuneugot Cina

Laot darat jime wase  
Di akhe badai ayahda  
'Oh rayek aneuk boh ate  
Seugala be taduek raja

Buket menyang padang suwe  
Di pasi aron mubanja  
Beu jeuet aneuk tamat beude  
Jak prang kafe tatueng donya

Teuduek dilee haba timang  
Meunyo panyang hana gura  
Saket ate kande intan  
Kureueng imbang bak syeedara

Juhan Ali pangge syiah  
Pat na meugah dalam donya  
Troph le keunan dum meulangkah  
Bak deelat syah raja raya

Neukhanduri bri seudeukah  
Lheueh nyan pantah marit raja  
Wahe teungku dum sinaroe  
Aneuk kamoe neuboh nama

Poteu raja ba u ramoe  
Neujok jinoe bak syekhuna  
Ka neusambot pantah rijang  
Banta intan nyang got rupa

Neutilek deungon neuundang  
Abeh neufam banpeuet punca  
Teuma nujum neubet jaroe  
Ampon kamoe he meukuta

Keu hai si nyak bungong uroe  
Ka sampie ulon peunyata  
Abeh lon eu dalam kitab  
Wahe deelat poteu raja

Wahe raja payong nanggroe  
Deungo jinoe lon kheun nama  
Bak meutuah bungong uroe  
Samlakoe Kureh keumala

Nyankeu nama tuanku droe  
Uroe dudoe raja raya  
Poteu raja mangat ate  
Ka meusampe aneuk bak ma

Neuboh nama Kureh Pari  
Beureuhi putroe ngon raja  
Sang neujep ie mon hayati  
Meunan hi bak raja raya

Hingga teuma raja doli  
Kureh Pari peuek bak ma  
Nyopat si nyak he putroe ti  
Kureh Pari neuboh nama

Ban putroe deungo haba doli  
Beureuhi Lela Sikanda  
Mangat ate hana bagoe  
Samlakoe **neucom** ngon neuwa

Teutap sinan lam meuligoe  
Lam jaroe ibu ngon bapa  
Ho siuroe rayek leugat  
Miseue kulat ujeuen raya

Puteh kuneng ceudieng leukat  
Aneuk deelat tuah raya  
Ho siuroe usoe leugat  
Galak that-that ibu ngon bapa

Jimeututo tilo alang  
Pakri ngon ban di suara  
Raja gaseh leubeh sayang  
Keu cut intan banta muda

Sampoe umu dua blah thon

Putiek sukon aneuk raja

Ngon suara rupapi lhon

Deelat ampon ate suka

Puteh kuneng bungong jeumpa

Lam ceumara bee meudram-dram

Poteu raja jok lam aja

Mula-mula beuet Quruan

Ngon siat le jeuet po banta

Aneuk raja ate that trang

Abeh Quruan pubeuet kitab

Nyanpi siat sudah khatam

Abeh jawoe neubeuet arab

Alem leugat aneuk agam

Ngon ceureudek sidet sasat

Cut ubat Kureh analan

Jinoe siat hana laen

Nyang alem dalam nanggroe nyan

Ka meugah that bungong usen

Cut raja ben dalam makam

Cut putroe Lela Sikanda

Galak raya hana lawan

Neueu alem si nyak banta

Ngon pinta eleumee dalam

Raja salen Kureh banta

Ngon seugala dum pakaian

Teutap sinan lam meuligoe

Ngon ayah droe deelat makam

Grak teukeudi bak siuroe

Tuhan sidroe peutren rahman

Cit neubri doli samlakoe

Kareuna nyoe raja makam

Bala donya laba dudoe  
Bak sidroe-droe kheundak Tuhan  
Aneuk puyoh lam cintra intan  
Jeh layang angen raya ba

Kureh Pari bak simalam  
Cut intan leumah rahsia  
Neumeulumpoe samlakoe sang  
Meunoe ban dalam rahsia

Sang neujak kon deungon gaki  
Sang neulari kon ngon guda  
Saboh nanggroe neupeureugi  
Neukalon hi indah rupa

Han tom meunan nibak ate  
Han tom lahe lam rahsia  
Na nyum banta jeumeurang laot  
Meusangkot bak pulo raya

Ateueh gunong manyang beusot  
Cut tulet dalam rahsia  
Dalam pulo saboh meuligoe  
Indah han soe deungon rupa

Teungoh paya rimba jatoe  
Sinaroe beuluka raya  
Di leuen meuligoe nyang gura that  
Meuturab kulam ie raya

Saboh kulam sangat 'ajab  
Geuboh cap seugala rupa  
Ngon teudong leumah meulap-lap  
Cahya meucap nibak muka

Na nyum banta neukeun keunan  
U dalam meuligoe raya  
Neutamong laju u dalam  
Seukalian neupareksa

Abeh neueu macam-macam  
Hana saban satu apa  
Saboh bilek neulop dudoe  
Neueu sidroe duek bak geuta

Rupa cidah hana bagoe  
Si nyak putroe aneuk raja  
Sang-sang putroe jikheun meunoe  
Tuanku droe neutueng hamba

Neuba sajan adekneu nyoe  
Bek meunoe sampoe ngon tuha  
Lom ngon nama jipeugah droe  
Nan putroe Seulindang Deulima

Jimat tuboh po samlakoe  
Peiduek dudoe ateueh geuta  
Jibri ranup bate pudoe  
Sira putroe khem teurtawa

Meunan leumah dalam lumpoe  
Beungoh uroe jaga banta  
Kureh Pari meu'i neumoe  
Si nyak putroe neueu hana

Abeh neungieng keudeh keunoe  
Ka neugom droe ateueh tika  
Sang ka gila cut puteh di  
Kureh Pari moe meu'a-'a

Putoh asa bungong giri  
Ka ile deungan ie mata  
Teuma dudoe leumah pike  
Baro ate han le goga

Teutop ate po samlakoe  
Duek teupipoe hana haba  
Beureuhi that hana bagoe  
Teugoe-goe keu putroe muda

Meuna bulee neuteureubang  
Trok rijang neukalon rupa  
Yoh masa nyan bungong meulu  
Kon sigeutu panah raya

Kureh beudoh teuma laju  
Bak tuanku nyang ayahda  
**'Oh troh keunan bungong meulu**  
Seumbah laju teuot bapa

Neudeuk teuma bungong riwat  
Neuangkat ngon jaroe dua  
Wahe ayah raja deelat  
Neubri siat idin hamba

Lon keumeung jak kalon nanggroe  
Ulonteu nyoe jak eu banda  
Seureuta rakyat dum sinaroe  
Alkeh meuntroepi ulon ba

Keupeue ulon neubri dum umu  
Tan meulon eu nanggroe raya  
Ayah bri thee jeuep-jeuep pasu  
Sibuju keulileng donya

Jeuep kuala beu na kapai  
Beu na beukai di dalamnya  
Neubri surat jeuep pasokan  
Ulon tuan putra donya

Kureh Pari le ambilan  
Jipeugah han nyan rahsia  
Juhan Ali teuma jaweueb  
He intan jeuet nibak hamba

Akan teutapi bungong reudeuep  
Bek lanjot aneuk tagisa  
Bek trep aneuk tameulaloe  
Samlakoe ingat keu po ma

Hingga teuma haba nyang toe  
Neuhei meuntroe leh raja  
'Oh troh keunan teungku meuntroe  
Beuet jaroe u jeumala

Peuebu hajat tuanku droe  
Peugah jinoe pantah sigra  
Sabda raja neukheun meunoe  
Rakyat keunoe taseuranta

Alat cukop dum sinaroe  
Bek kureueng syoe satu apa  
Neubeudoh le teungku meuntroe  
Asoe nanggroe neuseuranta

Haba nyoe laju lon peutoe  
Bek that rampoe kureueng gura  
Bak masa nyan rakyat sampoe  
Beuet jaroe u jeumala

Poteu raja neukheun meunoe  
Gata dum nyoe ikot raja  
Keumah ase dum sinaroe  
Samlakoe Kureh keumala

Si nyak banta lanja peutoe  
Seumbah jinoe ibu bapa  
Raja neukheun meunoe bagoe  
He aneuk droe bek trep gisa

Kureh Pari seuot pantah  
Insya Allah he ayahda  
Bukon sayang minyeuk simplah  
Di dalam klah ro u lua

Kureh Pari neucok langkah  
Ka leupah u lua kuta  
Dum dendayang ate beukah  
Keu cut indah sayang raya

Bah teuduek teuplok dendayang

Meuriwang keu banta muda

Neujak laju banta intan

Bungong karang troh u lúa

Kureh Pari cut samlakoe

Alkeh meuntroe sajan neuba

Lom sidroe treuk aneuk meuntroe

Bahrom ragoe nyang keudua

Bungka laju cut juhari

Meuntroe wadi sama-sama

Sirot uneun Alkeh meuntri

Blah rot kiri Bahrom muda

Laen teuma meuntroe wadi

Han ek rawi panyang raya

Lon tueng mantong nyang meukeusud

Nyang lanjut lon tinggai saja

Seubab ate lon meuraweuet

Payah that jeuet bak rok haba

Bahkeu dumnan lon hareutoe

Lon kisah nyoe banta bungka

Kureh Pari po samlakoe

Neuduek keudroe atueuh guda

Neubeurjalan intan pudoe

Wadi meuntroe sama-sama

Ngon rakyat le hana bagoe

Sinaroe biek raja raja

Neujak laju bungong uroe

Hana sunyoe siklep mata

Sirot uneun Alkeh meuntroe

Blah rot wie droe Bahrom muda

Jak di likot biek meusoe-soe

Nyang le tuloe balatantra

Uteuen seumak jeuet keu padang  
Gunong manyang jeuet keu data  
Bak pihak le that angkatan  
Beurjalan sajan cut banta

Uroe geujak malam geudom  
'Oh beungoh lom laju bungka  
Padumna trep jak lam gunong  
Trok bungong bak saboh donya

Pade leukat yum ka murah  
Di Keudah hana le raja  
Kureh Pari laju langkah  
U Beurudah rab sampie ka

Neupioh le kande indah  
Ngon kafilah muploh laksa  
Neumarit banta meugumbak  
Neupeugah bak rakyat dumna

Hoka teungku meuntroe bujang  
Beusa seudang tuha muda  
Jinoe gata bandum riwang  
Ubak makam nanggroe bapa

'Oh troh keudeh wahe bujang  
Takheum saleuem bak ayahda  
Takheun ulon goh meuriwang  
Na peueu deundam lon lam rimba

Bri Tuhanmu umu panyang  
Lhee uroe tan troh meugisa  
Meunan takheun wahe bujang  
Bak sulton ayah hamba

Kareuna lon that sukaan  
Peulayaran laot raya  
Nibak haba ulon tuan  
Takheun beu trang bak ayahda

Bek weueh ate teungku ayah  
Lon langkah siuroe dua  
Meunan neukheun banta indah  
Meucep babah rakyat raja

Lam ate saket sileupah  
Nyoe ka cidah nibak raja  
Meuntroe seuot insya Allah  
Han peue salah e meukuta

Hingga teuma meuntroe wadi  
Keumbali beudoh jigisa  
Jiwoe laju jipeureugi  
Ubak doli raja raya

Hana pioh uroe malam  
Beurjalan di dalam rimba  
Haba nyan laju lon peutoe  
Troph neuwoe meuntroe bak raja

'Oh troh keunan teungku meuntroe  
Beuet jaroe u jeumala  
Ampon kamoe wahe doli  
Kureh Pari hana gisa

Na cit neukheun bak lon ini  
Tujoh hari abeh lama  
Nyankeu peusan banta ahli  
Bak kami neuyue kheun sabda

Tuanku bek sosah sinoe  
Deungon putroeneu bandua  
Meunan narit teungku meuntroe  
Lheueh nyan dudoe beudoh gisa

Tinggai raja deungon putroe  
Geunap uroe ro ie mata  
Lam sabe ate teugoe-goe  
Tuan putroe deungon raja

Wahe aneuk bungong geutoe  
Pajan tawoe keunoe bak ma  
Meunan neukheun tuan putroe  
Ro meutaloe ngon ie mata

Deungon sosah hana bagoe  
Sambinoe raja meukuta  
Teutap sosah raja nanggroe  
Laen jinoe lon peugisa

Keude Aron Tanoh Anoe  
Lhee meutaloe ngon Peudawa  
Jinoe laen kisah rawoe  
Leubeh keunoe nibak nyang ka

Bu leukat leukiet peusantan  
Jeh syeureuban teungku haji  
Amma bakdu teungku badan  
Kisah jalan Kureh Pari

Bukon sayang bintang malam  
Peungeuh alam cahya meuri  
'Oh leupah woe uleebalang  
Beurangkat jalan Kureh Pari

Neubeudoh le pirak hupam  
Lhee sajan ngon aneuk meuntri  
Abeh nanggroe masok hutan  
Beurjalan bintang juhari

Han neukira uroe malam  
Troh datang u bineh pasi  
Banta teungoh gunong manyang  
Cut budiman han mupeue le

Sianeuk bu han neumakan  
Pijuet badan bungong pade  
Uroe malam neubeurjalan  
Ngon suepot keulam han padoli

Bala donya laba dudoe  
Bak sidroe-droe kheundak Tuhan  
Aneuk puyoh lam cintra intan  
Jeh layang angen raya ba

Kureh Pari bak simalam  
Cut intan leumah rahsia  
Neumeulumpoe samlakoe sang  
Meunoe ban dalam rahsia

Sang neujak kon deungon gaki  
Sang neulari kon ngon guda  
Saboh nanggroe neupeureugi  
Neukalon hi indah rupa

Han tom meunan nibak ate  
Han tom lahe lam rahsia  
Na nyum banta jeumeurang laot  
Meusangkot bak pulo raya

Ateueh gunong manyang beusot  
Cut tulet dalam rahsia  
Dalam pulo saboh meuligoe  
Indah han soe deungon rupa

Teungoh paya rimba jatoe  
Sinaroe beuluka raya  
Di leuen meuligoe nyang gura that  
Meuturab kulam ie raya

Saboh kulam sangat 'ajab  
Geuboh cap seugala rupa  
Ngon teudong leumah meulap-lap  
Cahya meucap nibak muka

Na nyum banta neuek keunan  
U dalam meuligoe raya  
Neutamong laju u dalam  
Seukalian neupareksa

Abeh neueu macam-macam  
Hana saban satu apa  
Saboh bilek neulop dudoe  
Neueu sidroe duek bak geuta

Rupa cidah hana bagoe  
Si nyak putroe aneuk raja  
Sang-sang putroe jikheun meunoe  
Tuanku droe neutueng hamba

Neuba sajan adekneu nyoe  
Bek meunoe sampoe ngon tuha  
Lom ngon nama jipeugah droe  
Nan putroe Seulindang Deulima

Jimat tuboh po samlakoe  
Peiduek dudoe ateueh geuta  
Jibri ranup bate pudoe  
Sira putroe khem teurtawa

Meunan leumah dalam lumpoe  
Beungoh uroe jaga banta  
Kureh Pari meu'i neumoe  
Si nyak putroe neueu hana

Abeh neungieng keudeh keunoe  
Ka neugom droe ateueh tika  
Sang ka gila cut puteh di  
Kureh Pari moe meu'a-a

Putoh asa bungong giri  
Ka ile deungan ie mata  
Teuma dudoe leumah pike  
Baro ate han le goga

Teutop ate po samlakoe  
Duek teupipoe hana haba  
Beureuhi that hana bagoe  
Teugoe-goe keu putroe muda

Meuna bulee neuteureubang  
Trok rijang neukalon rupa  
Yoh masa nyan bungong meulu  
Kon sigeutu panah raya

Kureh beudoh teuma laju  
Bak tuanku nyang ayahda  
'Oh troh keunan bungong meulu  
Seumbah laju teuot bapa

Neudeuk teuma bungong riwat  
Neuangkat ngon jaroe dua  
Wahe ayah raja deelat  
Neubri siat idin hamba

Lon keumeung jak kalon nanggroe  
Ulonteu nyoe jak eu banda  
Seureuta rakyat dum sinaroe  
Alkeh meuntroepi ulon ba

Keupeue ulon neubri dum umu  
Tan meulon eu nanggroe raya  
Ayah bri thee jeuep-jeuep pasu  
Sibuju keulileng donya

Jeuep kuala beu na kapai  
Beu na beukai di dalamnya  
Neubri surat jeuep pasokan  
Ulon tuan putra donya

Kureh Pari le ambilan  
Jipeugah han nyan rahsia  
Juhan Ali teuma jawueub  
He intan jeuet nibak hamba

Akan teutapi bungong reudeuep  
Bek lanjot aneuk tagisa  
Bek trep aneuk tameulaloe  
Samlakoe ingat keu po ma

Hingga teuma haba nyang toe  
Neuhei meuntroe uleh raja  
'Oh troh keunan teungku meuntroe  
Beuet jaroe u jeumala

Peuebu hajat tuanku droe  
Peugah jinoe pantah sigra  
Sabda raja neukheun meunoe  
Rakyat keunoe taseuranta

Alat cukop dum sinaroe  
Bek kureueng syoe satu apa  
Neubeudoh le teungku meuntroe  
Asoe nanggroe neuseuranta

Haba nyoe laju lon peutoe  
Bek that rampoe kureueng gura  
Bak masa nyan rakyat sampie  
Beuet jaroe u jeumala

Poteu raja neukheun meunoe  
Gata dum nyoe ikot raja  
Keumah ase dum sinaroe  
Samlakoe Kureh keumala

Si nyak banta lanja peutoe  
Seumbah jinoe ibu bapa  
Raja neukheun meunoe bagoe  
He aneuk droe bek trep gisa

Kureh Pari seuot pantah  
Insya Allah he ayahda  
Bukon sayang minyeuk simplah  
Di dalam klah ro u lua

Kureh Pari neucok langkah  
Ka leupah u lua kuta  
Dum dendayang ate beukah  
Keu cut indah sayang raya

Bah teuduek teuplok dendayang  
Meuriwang keu banta muda  
Neujak laju banta intan  
Bungong karang troh u lúa

Kureh Pari cut samlakoe  
Alkeh meuntroe sajan neuba  
Lom sidroe treuk aneuk meuntroe  
Bahrom ragoe nyang keudua

Bungka laju cut juhari  
Meuntroe wadi sama-sama  
Sirot uneun Alkeh meuntri  
Blah rot kiri Bahrom muda

Laen teuma meuntroe wadi  
Han ek rawi panyang raya  
Lon tueng mantong nyang meukeusud  
Nyang lanjut lon tinggai saja

Seubab ate lon meuraweuët  
Payah that jeuet bak rok haba  
Bahkeu dumnan lon hareutoe  
Lon kisah nyøe banta bungka

Kureh Pari po samlakoe  
Neuduek keudroe atueh guda  
Neubeurjalan intan pudoe  
Wadi meuntroe sama-sama

Ngon rakyat le hana bagoe  
Sinaroe biek raja raja  
Neujak laju bungong uroë  
Hana sunyoe siklep mata

Sirot uneun Alkeh meuntroe  
Blah rot wie droe Bahrom muda  
Jak di likot biek meusoe-soe  
Nyang le tuloe balatantra

Uteuen seumak jeuet keu padang  
Gunong manyang jeuet keu data  
Bak pihak le that angkatan  
Beurjalan sajan cut banta

Uroe geujak malam geudom  
'Oh beungoh lom laju bungka  
Padumna trep jak lam gunong  
Trok bungong bak saboh donya

Pade leukat yum ka murah  
Di Keudah hana le raja  
Kureh Pari laju langkah  
U Beurudah rab sampoe ka

Neupioh le kande indah  
Ngon kafilah muploh laksa  
Neumarit banta meugumbak  
Neupeugah bak rakyat dumna

Hoka teungku meuntroe bujang  
Beusa seudang tuha muda  
Jinoe gata bandum riwang  
Ubak makam nanggroe bapa

'Oh troh keudeh wahe bujang  
Takheum saleuem bak ayahda  
Takheun ulon goh meuriwang  
Na peueu deundam lon lam rimba

Bri Tuhanke umu panyang  
Lhee uroe tan troh meugisa  
Meunan takheun wahe bujang  
Bak sultanan ayah hamba

Kareuna lon that sukaan  
Peulayaran laot raya  
Nibak haba ulon tuan  
Takheun beu trang bak ayahda

Bek weueh ate teungku ayah  
Lon langkah siuroe dua  
Meunan neukheun banta indah  
Meucep babah rakyat raja

Lam ate saket sileupah  
Nyoe ka cidah nibak raja  
Meuntroe seuot insya Allah  
Han peue salah e meukuta

Hingga teuma meuntroe wadi  
Keumbali beudoh jigisa  
Jiwoe laju jipeureugi  
Ubak doli raja raya

Hana pioh uroe malam  
Beurjalan di dalam rimba  
Haba nyan laju lon peutoe  
Trok neuwoe meuntroe bak raja

'Oh troh keunan teungku meuntroe  
Beuet jaroe u jeumala  
Ampon kamoe wahe doli  
Kureh Pari hana gisa

Na cit neukheun bak lon ini  
Tujoh hari abeh lama  
Nyankeu peusan banta ahli  
Bak kami neuyue kheun sabda

Tuanku bek sosah sinoe  
Deungon putroeneu bandua  
Meunan narit teungku meuntroe  
Lheueh nyan dudoe beudoh gisa

Tinggai raja deungon putroe  
Geunap uroe ro ie mata  
Lam sabe ate teugoe-goe  
Tuan putroe deungon raja

Wahe aneuk bungong geutoe  
Pajan tawoe keunoe bak ma  
Meunan neukheun tuan putroe  
Ro meutaloe ngon ie mata

Deungon sosah hana bagoe  
Sambinoe raja meukuta  
Teutap sosah raja nanggroe  
Laen jinoe lon peugisa

Keude Aron Tanoh Anoe  
Lhee meutaloe ngon Peudawa  
Jinoe laen kisah rawoe  
Leubeh keunoe nibak nyang ka

Bu leukat leukiet peusantan  
Jeh syeureuban teungku haji  
Amma bakdu teungku badan  
Kisah jalan Kureh Pari

Bukon sayang bintang malam  
Peungeuh alam cahya meuri  
'Oh leupah woe uleebalang  
Beurangkat jalan Kureh Pari

Neubeudoh le pirak hupam  
Lhee sajan ngon aneuk meuntri  
Abeh nanggroe masok hutan  
Beurjalan bintang juhari

Han neukira uroe malam  
Troh datang u bineh pasi  
Banta teungoh gunong manyang  
Cut budiman han mupeue le

Sianeuk bu han neumakan  
Pijuet badan bungong pade  
Uroe malam neubeurjalan  
Ngon suepot keulam han padoli

Bukon sayang bungong teuprom  
Ujeuen sumpom hana lanti  
Banta Kureh teujak teudong  
Neueu han tom gunong ngon gle  
Meugoh neuteumeung nyang neulumpoe  
Reuloh nanggroe han neuwoe le  
Teutap sinan po samlakoe  
Ban lhee droe ngon aneuk meuntri

Jinoe laen lon rheng sujoe  
Mangat tuloe miseue ruti  
Puteh-puteh bungon riwat  
Pot kulat bak bateueng raya.

\* \* \*

## II. SEULINDANG DEULIMA DI GUNONG PEURANTA NILA

Amma bakdu teungku liwat  
Leubeh mangat nibak nyang ka  
Lon seubot sulutan Ahmad  
Sideh teumpat di antara

Nyang jinoe ho laen teumpat  
Buet kudrat Wahidon Kaha  
Di Tunong Meuse neukeurajeuen  
Luah mideuen hana ngon sa

Rab ngon nyan gunong Hareumeun  
Sinan geukheun pari diwa  
Di raja nyan asai bak jen  
Dudoe salen manusia

Dua droe syeedara laen  
Saboh lem bak asai mula  
Neumeukawen saboh putroe  
Nama nyoe Diwi Beureuma

Teutapi na bacut paloe  
Cut putroe aneuk han tom na  
Nyankeu nyang na wahe adoe  
Bacut paloe poteu raja

Rupa cidah hana bagoe  
Ban uroe teungoh keulua  
Teutap dilee si nyak putroe  
Lon puwoe keudeh bak raja

Pahlawan le dalam nanggroe  
Laen meuntroe ube-be raya  
Lila Ahmad leubeh usoe  
Neumat nanggroe ade raya

Sidroe meuntroe lam nanggroe nyan  
Geuseubot nan Kilan Indra

Han tom musoh jiprang keunan  
Bak nanggroe nyan Ahmad Lila

Sebab meuntroe that budiman  
Bak gop nyan le that bicara  
Dua meuntroe that ceureudek  
Kilan Asyek nyang keudua

Barangpeue buet dum neusidek  
Neureutek ngon beuneung jangka  
Buet rakyat bandum meutimang  
Talo meunang bak neuraca

Neusasat deungon abeh ban  
Meuambilan bek sagai na  
Meunan raja bri atoran  
Meuntroe Kilan nyang kuasa

Lila Ahmad ade han ban  
Lam nanggroe nyan hana ngon sa  
Barat timu taklok keunan  
Sulotan ate that suka

Syeedaga le kaya han ban  
Lam nanggroe nyan hana ngon sa  
Salah bacut di junjongan  
Aneukneu tan ka rab tuha

Jeuep eelia neumeukaoi  
Goh neukabui nibak Esa  
Haba nyoe bek leupah cantoi  
Leubeh suson hana gura

Bak siuroe deelat makam  
Hajat deundam jak meurusa  
Neukeumeung jak peurburuan  
Dalam hutan meunankeu hawa

Bak masa nyan beurangkat tuan  
Deungon pawang ube-be raya  
Laen rakyat uleebalang  
Meuntroe Kilanpi seureuta

Pawang neuba that ceureudek  
Deungon lisek han saboh sa  
Peurtama phon pawang Asyek  
Nyang ceureudek bak let rusa

Nyang keudua pawang Alisek  
Nyanpi tarek hana nyang sa  
Ase keumah seugala ek  
Angkat tabek dum bak raja

Raja Ahmad neubeurjalan  
Angkatan han meudum neuba  
Deungon gajah mubalohan  
Peudieng keunan peue-peue nyang na

Sira nijak mupeurasan  
Neukoh padang gunong raya  
Siploh uroe buleuen Syakban  
Sulotan neuteungoh rimba

Seureuta ngon Kilan Asyah  
Nyang meujeulih ngon nibak raja  
Lom pahlawan kuat-kuat  
Ngon nyang me jeurat bandum rata

Nyang ladom me leumbeng bulat  
Nyang le tungkat ube-be pha  
Troph lam uteuen deelat makam  
Ngon pawang ube-be raya

Geumupioh teuma rijang  
Meuntroe Kilan nyang bri aja  
Ngon teumpat jroh hana lawan  
Kiri kanan sungoe raya

Watee malam he boh ate  
Ngon kande jipasang rata  
Peungeuh rimba seugala be  
Peunyaket gle han troh teuka

**H**ingga beungoh peurburuan

**B**eurjalan jak mita rusa

**G**alak ate hana macam

**K**eumakanan ricem rimba

**M**euنانك ban lam seumaroh

**R**usa ngon glueh han ek kira

**N**gon jimeusu tango kiroh

**M**euntroe utoh lon calitra

**D**ua deungan raja deelat

**N**eubeurangkat dalam rimba

**N**gon pahlawan siploh meuhat

**N**yang biek kuat teuga teuga

**N**eujak meuen di sulotan

**T**roh keunan bineh krueng raya

**N**eueu ngon ie jroh hana ban

**K**aronya Tuhan sidroe Esa

**B**atee pante pudoe intan

**H**an sapat tan mee tapeusa

**P**oteu raja hireuen han ban

**T**hat suakaan dalam dada

**B**andua ngon meuntroe Kilan

**S**ulotan hana le haba

**T**euma lheueh nyan na sikeujap

**N**eu...euucap poteu raja

**N**eujak laju raja deelat

**N**gon subra that dalam rimba

**C**cicem meusu keunong liwat

**J**roh mupangkat bak suara

**C**cicem uteuen macam-macam

**D**i sinan meuribee laksa

**N**gon jimeusu rindu han ban

**S**iulahan sang biula

Lale hireuen di sulotan  
Neudeungo macam meusuara  
Beudoh sinan jak ho laen  
Ate ngeuren poteu raja

Sinan laju meusu cicem  
Neudeungo laen lom suara  
Bandum cicem jimeuucap  
Nyankeu deelat ate suka

Beudoh sinan raja deelat  
Meundapat sibak geulima  
Bakjih indah that meusigak  
Puteh muprak miseue kaca

Bak bineh krueng sinan timoh bak  
That rampak hana saboh sa  
Bohji raya tuha masak  
Raja galak ate suka

Meuntroe Kilan akai rancak  
Troph u yup bak keunan teuka  
U dalam ie leumah bayang  
Hu sang bintang di antara

Neutanyong le raja sulotan  
Peue bubayang leumah nyata  
Meuntroe Kilan seuot nyoe ban  
Hana troh fam lon meukuta

Lheueh neukheun nyan raja neujak  
Leumah budak neueu rupa  
Di dalam ie sang meulantak  
Mustahak bak dali rupa

Bak ulon nyoe ka meurumpak  
Na tuah bak Diwi Beureuma  
Poteu raja neukheun nyoe ban  
He Kilan meuntroe seutia

Keu ulon nyoe tacok rijang  
Lon mupandang pakri rupa  
Ban meuntroe deungo kheun sulotan  
Pahlawan neumeuhei lanja

U dalam krueng jibeurjalan  
Jijak cok nyan budak deuh nyata  
Ka jiseunom dum pahlawan  
Sapeuepi tan jiteumeung na

Dum pahlawan akai sisat  
U darat jiteungoh lanja  
'Oh meuhadap jikheun teupat  
Ubak deelat raja raya

Hana sapeue na lon dapat  
Lon lihat dalam krueng raya  
Meunan haba pahlawan kheun  
Ate hireuen poteu raja

Sabda raja teuma siseuen  
Lom neukheun bak Kilan nama  
Abeh jieu dum pahlawan  
Sapeuepi tan lon eu hana

Bak ate lon pari mambang  
Kadang-kadang jen beurahla  
Dum umu lon goh kupandang  
Sigom alam lon eu hana

Teuma jinoe pakri reumbang  
He Kilan tapeugah sigra  
Soe nyang teumee budak intan  
Peue sukaan lon bri saja

Deungon pangkat lon pumanyang  
Soe nyang teumeung keuno jiba  
Lila Ahmad meunan kalam  
Meuntroe Kilan seuot sigra

Ampon e po raja deelat  
Pioh siat po meukuta  
Nyan budak lon keumeung lihat  
Wahe deelat bek le kubra

Atawa jen atawa ensan  
Untong nyan jeuneh beurahla  
Teuku meuntroe meunan kalam  
Syahi alam han le haba

Hingga teuma meuntroe Asyek  
Jitilek peuet panca indra  
Keudeh keunoe meuntroe balek  
Kilan Asyek le bicara

Bak pihak akai ceureudek  
Sang geupeutek han meutuka  
Lheueh nibak nyan meuntroe baek  
Jibet tabek ubak raja

He tuanku raja deelat  
Neucuba pot boh geulima  
Ho pahlawan kuat-kuat  
Tapot leugat boh geulima

Meunan sabda raja Ahmad  
Beudoh leugat pahlawan kha  
Boh geulima jipot leugat  
Ubak deelat jijok sigra

'Oh lheueh jipot boh di manyang  
Meuntroe yoh nyan lom pareksa  
U dalam ie meuntroe pandang  
Ka hilang hana le rupa

Bak masa nyan meuntroe Kilan  
Beuet tangan u jeumala  
Ampon e po deelat makam  
Bri Tuhan sampoe ban pinta

Hajat raja sudah khatam  
Ngon murahan sidroe Esa  
Boh geulima he sulotan  
Neupeuriwang u istana

Bek sinoe tuanku makan  
Di dalam nyan asoe ka na  
Meunan sampie meuntroe Kilan  
Raja makam ate suka

Neupujoe Khalikon alam  
Sang ka lham langet ngon donya  
Teuma haba lon peurijang  
Beudoh riwang poteu raja

Seureuta ngon dum pahlawan  
Meuntroe Kilanpi seureuta  
Boh geulima neume sajan  
Nibak tangan poteu raja

Dua uroe neubeurjalan  
Trok datang u istana  
Laju neukek u meuligoe  
Bak putroe Diwi Beureuma

Seureuta ngon teungku meuntroe  
Bandua droe neukek lanja  
Neupioh le raja nanggroe  
Ubak meuntroe neubeurkata

Wahe Asyek Kilan meuntroe  
Geulima nyoe taplah dua  
Teungku meuntroe sambot pantah  
Laju neuplah boh geulima

'Oh ban sare leumah teuhah  
Masya Allah hu meucayha  
Meucayha hu kulet badan  
Miseue intan meunan rupa

Poteu raja teumakot sang  
Neukheun rijang meunoe haba  
Wahe meuntroe nyang analan  
Lon tuan teumakot raya

Lem meuntroe bet jaroe rijang  
Ampon laman po meukuta  
Bek teumakot he sulton  
Nyankeu intan putroe muda

Nyang neulakee nibak Tuhan  
Uroe malam nyang neucinta  
Teuma jinoe syahi alam  
Buet Tuhan sidroe nyang Esa

Cidah rupa hana lawan  
Dalam alam han sapat na  
Hingga teuma haba nyang toe  
Bak putroe geupeuek sigra

Hireuen ate tuan putroe  
Han tom meunoe dilee nyang ka  
Neucok laju ka neuugon  
Ka-neucom deungon neuwa

Mangat ate putik sukon  
Neuseuon atueuh jeumala  
Hingga teuma meuntroe Kilan  
Neukheun padan nibak raja

He tuanku raja makam  
Bah neumadeueng putroe muda  
Teuma raja peugot dapu  
Peukek laju u istana

Tuan putroe neueh sulu  
Ate rindu aneuk ka na  
Kawom laen hana jithee  
Meulaenkan lhee ureueng saja

Raja marit meunoe lagee  
Neubri thee bak dendayang da  
Jibeudoh dua dendayang  
Bak sultan peurab lanja

Ampon e po syahi alam  
Peue na padan neukheun sigra  
Sabda raja neukheun meunoe  
Tuan putroe aneuk ka na

Dendayang dum teukap jaroe  
Hana sidroe teubiet haba  
Dum dendayang pike keudroe  
Pajan putroe aneuk ka na

Badan lipeh pijeut tuloe  
Pajan putroe pruetneu raya  
Raja di gle baro neuwoe  
Cut putroe aneukneu ka na

Nibak akai that mustahe  
Han troh pike Allah e ma  
Baro neuwoe raja di gle  
Putroe kande aneuk ka na

Kon meuulon syok bak ate  
Bah da kande salah sangka  
Meunan narit si Dara blang  
Cut ma Itam seuot sigra

Bek neupike kande intan  
Bek neupandang pruet han raya  
Grak teukeudi bri le Tuhan  
Han ek ensan boh had hingga

Tuan putroe meuh keureutah  
Pruet tan leumah aneuk ka na  
Kon ban miseue pruet si Munah  
Peue leumah ka ube raga

Dum dendayang beudoh jiplueng  
Bak cut meugleueng putroe muda  
Jieu cut ti eh seulinteung  
Cut inseuen di atueh geuta

Budak neuboh dalam tumpe  
Meuh meuure leumah cahya  
Nyak dendayang ate teupakoe  
Duek that laloe ban seulingka

Haba nyoe bek leupah laloe  
Kureueng asoe gadoh gura  
Teuduek 'oh noe putroe madeueng  
Cut meugleueng dalam istana

Mangat mupat haba jameun  
Tango bandum he syeedara  
Jak u pasi pot beuramoe  
Tapuwoe pajoh ngon sira

Amma bakdu gura tuloe  
Leubeh keunoe nibak nyang ka  
Nabi Yusuf yoh saboh roe  
Neutren neuwoe nibak tangga

Meurumpok ngon si nyak putroe  
Mat di jaroe ti geulima  
Bak neupandang ladat keudroe  
Sambinoe reubah teurhanta

Sret manikam teuma dudoe  
Bak kayee nyoe boh geulima  
Bak bineh krueng nanggroe Meuse  
Di dalam gle rimba raya

Lila Ahmad raja male  
Teungoh u gle jak meurus  
Bak geulima meuteumeung di gle  
Ka meusampe he syeedara

Sidroe meuntroe sajan deelat

Areh sangat hana ngon sa

Boh geulima jitu'oh had

Jitupeue krat di dalamnya

Jok keu raja teuma leugat

Troh u teumpat neuwoe raja

Madeueng putroe teuma leugat

Jeuet meuhat aneuk geukheun na

Meunan teuntee di lee abat

Lam hikayat geucalitra

Nyo deungon kon hom e sahbat

Han troh takat akan hamba

Keuneubah kawom ulon surat

Kon sahabat ngon pinta hambar

Bek atueuh lon kawom anggap

Gop riwayat dilee ka na

'Oh nan dilee keumbee leukat

Kureueng teupat hom syeedara

Lila Ahmad mangat surat

Mangat mupat haba raja

Neumeusabda tuanku dilee

Neubri thee bak balatantra

Tet meuriam meuulang lhee

Mangat jithee aneuk lon na

Dum pahlawan curam meuhee

Jikajee bak raja raya

Phon beungoh kon su meuriam

Troh ngon malam hana reuda

Rakyat jitren sigom alam

Na nyum leukang nanggroe raja

Tamong laju 'a-'u u dalam

Pahlawan ngon lem panglima

Deungon alat brat jigulam  
Ngon sulton meuhadap ka  
Pane nanggroe paloe ceukang  
Siri makam kreueh lagoina

Meuntroe ngon pang meunan peugah  
Khalifah neuseuot sigra  
Lon hei gata kon buet sosah  
Lon ka mudah bagoe cinta

Beu na tathee lagee lon peugah  
Aneuk lidah di lon ka na  
Teutapi kon ureueng lakoe  
Ureueng binoe aneuk hamba

Nyankeu haba wahe meuntroe  
Beudoh jak woe dum tagisa  
Abeh haba raja nanggroe  
Dum sinaroe beudoh gisa

Haba teungku laju bak toe  
Han got bagoe meule rayu  
Puteh kuneng cahya bulen  
Rambideuen jirawe sutra

Lon puwoe keu putroe meugleueng  
Ka lheueh madeueng di istana  
Bukon sayang bintang kala  
Han le cahya seupot nanggroe

Troh le ureueng keunan teuka  
Nibak bangsa jen sinaroe  
Ateueh tampong rumoh raja  
Seureuta ngon jikheun meunoe

He raja sulton Ahmad  
Nyoe amanat nibak lon nyoe  
Meuta pateh gata seulamat  
Meuhan ingat reuloh nanggroe

Aneuk gata meutuah that  
Wahe deelat raja nanggroe  
Nyankeu aneuk putroe ubat  
Nyang indah that lam donya nyoe

Seulindang Deulima nama taboh  
He raja beh pateh kamoe  
'Oh akhe lahe nekmat troh  
Putik pawoh aneukteu nyoe

'Oh troh umu meulu leusoh  
Bek raja beh keubah sinoe  
Takeubah u tunong Meuse  
Ateueh gle Peuranta Niloe

Cit na ureueng kawai akhe  
Biek jen pari Kaha Beusoe  
Soe nyang troh jak keunan hampe  
Bungong pade nyankeu lakoe

Nyankeu ureueng nyang budiman  
Ek jilawan baranggasoe  
Meunyo tatrho sinan sajan  
Jeuet 'aebar gata dudoe

Bak di akhe e sulotan  
Teuka gop prang dalam nanggroe  
Jen pari 'oh lheueh jikheun nyan  
Ka hilang jiwoe u nanggroe

Hingga teuma laju siang  
Deelat makam beudoh keudroe  
Laju u mon neubeurjalan  
Ie seumbahyang neutueng jinoe

Lheueh nyan riwang tajam leugat  
Dong ibadat keu Poteuh sidroe  
Lheueh seumbahyang raja deelat  
Ka teuingat haba bunoe

Kilan meuntroe neuhei leugat  
Ngon siat keunan le sampoe  
Deungon jaroe le jiangkat  
Ampon deelat payong nanggroe

Peue na haba neukheun leugat  
Toh pakat neumeuhei kamoe  
Sabda raja neukheun rijang  
Wahe Kilan teuku meuntroe

Teuka ureueng beuklam datang  
Bangsa mambang lon deungo bunyoe  
Na geupeugah bacut peusan  
Keu cut intan si nyak putroe

Raja peugah dum habaran  
Ujung uram meuduek adoe  
Teuma jinoe wahe Kilan  
Nyang reumbang bak gata sidroe

Teungku meuntroe laloe mandang  
Allah Tuhan pakon meunoe  
Abeh meuntroe lam pikeran  
Bak sulton jibet jaroe

Ampon e po syah beurdeelat  
Cit bida that payong nanggroe  
Meunyo nyang tan han geuurat  
Meukon laknat uroe dudoe

Jinoe e po mee taikot  
Narit patot troh ateueh droe  
Meutaubah untong karot  
Kadang gop tet singoh nanggroe

Jinoe nyang got he tuanku  
Jinoe laju peukara nyoe  
Bek tatinggai nyoe di leupu  
Jeuet karu 'oh uroe dudoe

Got jinoe laju tapinah  
Yoh goh reuloh asoe nanggroe  
Tapeugot nyang leubeh indah  
Bak takeubah si nyak putroe

Tayue jaga bak nyang meugah  
He khalifah payong nanggroe  
Haba nyoe lon peutoe rijang  
Bek that panyang jijak rampoe

Poteu raja cok keumunyan  
Neutet rijang bak euncien droe  
Mangat mubee u kayangan  
Bak sulotan raja lhee droe

Lheueh nyan raja neuhei tokang  
Beusa seudang dalam nanggroe  
Ngon siat le keunan datang  
Raja makam neukheun meunoe

Peugot keu lon saboh bale  
Meuh meuure dum teupatroe  
Utoh yoh nyan jiplah kayee  
Maseng lagee buet di jaroe

Haba.nyan bacut lon peuteuntee  
Lheueh bale ngon tajam tuloe  
Keumah ase dumpeue sudah  
Utoh bagah leugat jiwoe

Poteu raja neubri upah  
'Oh nan sudah peukara nyoe  
Lheueh nibak nyan di khalifah  
Peukeumah alat sinaroe

Neuyue ato ngon keurusi  
Peurmadani intan pudoe  
Lingka bale dum lahuri  
Nyang meuceuradi muploh bagoe

Keumah ase seugala be  
Tan kureueng le jeuep-jeuep sagoe  
Poteu raja neumeuase  
Neupreh hampe raja lhee droe

Nyang puteh bungong anuni  
Cit sabe aleh nyang gura  
Lagam balek titek basi  
Lon ulangi di atueuh a

Amma bakdu teungku rawi  
Lon ulang si lhee droe raya  
Saboh nanggroe that ugahri  
Geurasi Kayangan Indra

Bangsa nibak diwa pari  
Batee Beusi nyang peurtama  
Siribee nam biek majusi  
Bak doli tundok keupala

Ka jithee peuneusan doli  
Bee wangi meuganda-ganda  
Beudoh sigra raja doli  
Ngon sipai le that jiba

Siploh ribee nyang pahlawan  
Meuntroe bujang nam ribee sa  
Nanggroe luah hana lawan  
Di kayangan saboh raja

Na sidroe treuk nyang aduen nyan  
Leubeh lom krang nibak nyang na  
Nama geuboh Kaha Pari  
Lom ngon sakti lawan hana

Keubai sarong han lut beusi  
Kaha Pari cit geuthee na  
Mubee gahru ngon keumunyan  
Sulotan teukeujot raya

Neutanyong bak judo badan  
Soe tet beewan di istana  
Teuma seuot cut Areufan  
Di kamoe tan po meukuta

Hana saboh po junjongan  
Keumunyan han tom soe baka  
Beudoh raja nibak tido  
Neukheun laju bak judonya

Wahe po cut bungong meulu  
Ulon napsu tren u donya  
Bak syeedara ulon sidroe  
Di bumoe dilee ka lama

Lila Ahmad nan geupakoe  
Abang kamoe he adekda  
Batee Beusoe nama sidroe  
Gop nyan sinoe di antara

Lon di teungoh wahe putroe  
Rotdeh rotnoe gop nyan dua  
Taidin lon bungong sukon  
Siat lon tren nyan u donya

Raya hajat neumeuhei lon  
E bintang lhon idin gata  
Lheueh raja marit ngon putroe  
Pangge jinoe meuntroe tiga

Seureuta ngon Batee Beusoe  
Ka sampoe keunan bak raja  
Dua raja limong meuntroe  
Tren u bumoe yoh nyan sigra

Han padum trep lawet sampoe  
Raja nanggroe ka troh masa  
Deungan malam keujam tuloe  
Tamong jinoe dalam kuta

Neuek laju lam meuligoe  
Beudoh jinoe poteu raja  
Mubri saleuem mumat jaroe  
Pioh dudoe ateueh geuta

'Oh meusapat sikureueng droe  
Geubet jinoe idang raya  
Dum makanan keumang asoe  
Peue tamuproe meubuet raja

Banlhee raja makeuen yoh nyan  
Keusukaan ngon syeedara  
'Oh lheueh makeuen pinah idang  
Teuka puan keunan sigra

Pajoh ranup baro bicah  
Buka babah Ahmad Lila  
Wahe adek nyang meutuah  
Bandua sah deungo hamba

Keuhai aneuk ulon peugah  
Peurintah seugala-gala  
Awai akhe raja peugah  
Hana salah meusibanja

Raja dua ate teuhah  
Deungo peuneugah bak kakanda  
Raja Ahmad abeh hareutoe  
Buettan putroe cut Deulima

Bak maşa nyan dua adoe  
Hireuen laloe hana ngon sa  
Allah adek lon paban roe  
Haba nyoe 'ajaeb lagoina

Geuyue keubah si nyak putroe  
Bak gunong nyoe Peuranta Nila  
Hana troh jak baranggasoe  
Meunan adoe nibak haba

Abeh haba dum hareutoe  
Peukek adoe u istana  
Cut Deulima nyang sambinoe  
Peutren jinoe dalam kamba

Geupeudeuk le di hadapan  
Cut intan jibeudoh cahya  
Adoe raja ban geupandang  
Sang meulayang roh u lua

Teuku meuntroe paloe mandang  
Sang-sang pitam hanyot rasa  
Bitkeu han jeuet tatroh sinoe  
Uroe dudoe meugriet raya

Seudang ubit dumnoe bagoe  
'Oh rayek nyoe leubeh gura  
Dua raja meunan waham  
Troph neufam bak akhe masa

Lheueh nibak nyan raja makam  
Beudoh riwang bak teumpatnya  
Deungon aduen mumat jaroe  
Keudeh keunoe that mulia

Lakee idin bak aduen droe  
Beudoh neuwoe dua raja  
Seureuta ngon teungku meuntroe  
Bantujoeh droe sigra gisa

Dua raja leupah neuwoe  
Tinggai sidroe Ahmad Lila  
Ateueh bale neuduek bunoe  
Neumuproe ngon adek dua

Mayoh rindu napsu sampoe  
Tulong adoe jeuep peukara  
Meuhan sabe ate wa-woe  
Ngon sebab nyoe Ahmad Lila

Hingga haba ulon peutoe  
Han got bagoe panyang raya  
Lagi ngon lon sosah tuloe  
Teungoh adoe lon seumuga

Bukon sayang matauroe  
Reudok tampoe han le cahya  
Hingga teuma beungoh uroe  
Teuku meuntroe laju gisa

Tinggai sinan raja nanggroe  
Ngon putroe Diwi Beureuma  
Ngon aneuk rupa sambinoe  
Geunap uroe meuseusuka

Pot on ubi gule rampoe  
Aneuk kiroe mangat rasa  
Kureueng mufom suson padoe  
Ate lon nyoe teutap hana

Puteh kuneng bungong panjoe  
Angen tampoe barat daya  
Seulindang Deulima si nyak putroe  
Umu sampoe tujoh thon ka

Soe nyang kalon rawan wa-woe  
Hana sidroe nyang sa rupa  
Got that ruman keumbang uroe  
Lam nanggroe bandum jithee na

Seudang umu gohlom sampoe  
Han jeuet adoe taeu rupa  
Di yup langet atueh bumoe  
Hana sidroe rupa nyang sa

Sang-sang buleuen takheun bagoe  
Cut putroe meunan umpama  
Han ek abeh tuleh rampoe  
Keuhai putroe cut Geulima

Lila Ahmad ayah putroe  
Bak siuroe ingat teuka  
Haba jameun lom gop peusan  
Keuhai intan aneuk dara

Bak masa nyan di sulton  
Meuntroe Kilan neuhei sigra  
Deungon Asyek dua sajan  
Buka kalam poteu raja

Pakri nyang jroh wahe meuntroe  
Peukara nyoe rijang leungka  
Bah tapeusan dua adoe  
Tatanyong proe peue ka leungka

Ateueh gunong nyang seureuloe  
Meuligoe ka ase leungka  
Meunan neukheun raja nanggroe  
Seuot meuntroe sabet raja

Lheueh nibak nyan haba nyang rab  
Peukek surat keu adekda  
Neutanyong buet ka seurigap  
Keuhai teumpat Peuranta Nila

Bak takeubah aneuk jasad  
Ka siap adek keurija  
Meunan haba dum lam surat  
Pajan sa'at kamoe teuka

Abeh bandum neuriwayat  
Lheueh nyan surat kirem sigra  
Surat raja leupah jalan  
U kayangan bak adekda

Han padum trep sampoe datang  
Bak sulton raja Kaha  
Neumupakat dua gop nyan  
Ngon abang Batee Meulila

Keuhai teumpat putroe intan  
Bak gunong Peuranta Nila  
Bak takeubah aneuk intan  
Ngon cut abang Ahmad Lila

Meunankeu hai raja muproe  
Peukeumah droe raja dua  
Peugot teumpat nyang seureuloe  
Meuligoe deungon istana

Han padum trep lheueh seuleusoe  
Pari pindoe peue takira  
Pacang jiboh bandum beusoe  
Seureuloe lam awan migas

Hana daya soe meung eumpoe  
Ulah bagoe taeu rupa  
Tan lon peugah panyang tuloe  
Ka seuleusoe dum seugala

Raja dua beudoh neuwoe  
Bak teumpat droe ban biasa  
Lheueh nyan neuyue sidroe meuntroe  
Tren u bumoe bak kakanda

Sajan rakyat padum ploh droe  
Jak tueng putroe cut Deulima  
Han padum trep lawet sampie  
Treh u bumoe meuntroe raja

Dalam kuta dum meusapat  
Lila Ahmad peumulia  
Nibak adoe le that ingat  
Yakingeu that nibak rupa

Geupeujamee yoh nyan leugat  
Ban adat meujeulih raja  
Lheueh nibak nyan na sikeujab  
Meuntroe leugat peugah haba

Deelat ampon nyang meujak nyoe  
Suroh adoe po meukuta  
Neuyue jak tueng si nyak putroe  
Teumpat nyoe siap seudia

Meunan peugah teuku meuntroe  
Seuot meunoe Ahmad Lila  
Meunyo meunan tapeugah proe  
Beudoh jak woe dilee gata

Dang meuase kamoe sinoe  
Ubak adoe takheun haba  
Dua ploh peuet lam buleuen nyoe  
Jadeh sinoe kamoe bungka

Meunan neukheun raja nanggroe  
Beudoh meuntroe laju gisa  
U kayangan leupah geuwoe  
Ngon sinaroe geusyik panglima

Hingga sampie u kayangan  
Bak sulton raja Kaha  
Haba sinoe dum jipeutrang  
Peuneusan bak Ahmad Lila

Mangat ate dua sajan  
Teuku abang haba beuna  
Teuduek 'oh nan saboh syahdan  
Lon peuriwang Ahmad Lila

Takoh bak jok untok geundrang  
Peurasan kawom peumuda  
Lila Ahmad sambat kalam  
Neuyue bujang meuseuranta

Beude nubat hambat pasang  
Lhiet meuriam su nyang raya  
Sujih tanggoh nak troh tajam  
Uleebalang rakyat sama

Ban jideungo su meuriam  
Jitren yoh nyan rakyat raja  
Abeh bandum 'am-'um alam  
Mideuen dalam sarat raya

Lua dalam peunoh sarat  
Laen le that teungoh teuka  
Pioh nibak seusak teumpat  
Ban nyang babat atueh kada

Raja raja bak keurus  
Geusyik meuntri atueh tahta  
Haba nyoe lon peutoe rawi  
Hana got le panyang raya

**T**eungku meuntroe nama Kilan  
Yoh masa nyan buka haba  
**W**ahe raja uleebalang  
**M**euntroe bujang dan bentara

Ulon peugah haba nyang trang  
Keu cut intan ti Deulima  
Ka neukeubah le sulton  
Bak gunong nyang manyang raya

Soe nyang ek troh geujak keunan  
Nyan tunangan putroe muda  
Lila Ahmad nyang boh atoran  
Putroe intan keu judonya

Soe kuasa troh u dalam  
Bak teumpat nyan putroe muda  
Baranggasoe nyan jidapat  
Raja rakyat boh panglima

Nyan jeunamee putroe ubat  
Nikah leugat uleh raja  
Nibak raja nyan peuneusan  
Beu na rakan thee le gata

Beu tapakoe ngon taiman  
Nyan habaran nibak raja  
Meunan neukheun Kilan meuntroe  
Ban sinaroe deungo haba

Wadi raja asoe nanggroe  
Sabe keudroe mubicara  
Pakri laku dum geutanyoe  
Tatueng putroe cut Deulima

Beuthat jeuoh ngon meuligoe  
Beuthat rugoe ngon areuta  
Sang putroe nyan kuseuleuah  
Beuthat payah lon usaha

Padum manyang gunong luah  
Siploh ilah kuusaha  
Kutueng putroe rupa cidah  
Jih cabah jadeh ulon ba

Raja meuntroe meunan tuto  
Nyang rakyat le peue takira  
Bah bak kong kuta kuhanco  
Bungong kundo kucok saja

Taeu sigra ateueh kaso  
Lon tido ngon putroe muda  
Bek tagundah taeu buet lon  
Bah kuusong putroe muda

Allah he Po Tuhanku Rabbon  
Neutulong lon ya Rabbana  
Bak ek lon cok bungong tanjong  
Ngon tulong bandum eelia

Bukon sayang bungong asan  
Ateueh jalan ro meuriti  
Meuna tuah untong badan  
Cut intan beu roh keu kami

Di dalam gle aneuk tiong  
Di gampong na mirahpati  
Ya Tuhan ku bak neutulong  
Beu roh keu lon cut putroe ti

Bukon sayang jeumpa mirah  
Puteh leupah bungong giri  
Lon seubot keu raja meugah  
Barollah rakyat keumbali

Rakyat bandum abeh jiwoe  
Tinggai meuntroe nyang ugahri  
Dua ploh peuet tanggoh raja  
Di antara tren jen pari

Teungoh malam kira-kira  
Tamong kuta lop meuligi  
Meuntroe Kilan deungon raja  
Duek beursama deungon doli

Neueu jamee le that teuka  
Peumulia hana sakri  
Ngon makanan ka seudia  
Pajoh lanja dum khanduri

Lheueh makanan bandum jamee  
Neuyue me peuratah beusi  
Neuboh putroe bungong keumbee  
Cut mangat bee Lindang siti

Tuan putroe leubeh sosah  
Allah Allah he boh ate  
Wahe aneuk gata leupah  
Pat takeubah po ma ini

E he aneuk tangke badan  
Aleh pajan takeumbali  
Lon meung saweue hana jalan  
He intan han troh peureugi

Jak u gunong Peuranta Nila  
Tan kuasa lon peureugi  
Cit ka meunoe putroe gata  
Kheundak Esa sidroe Rabbi

Bukon sayang gaca hijo  
Peuraho jiwoe u pasi  
'Oh lon ingat he aneuk e  
Ie mata ro tiep-tiep hari

Teutap 'oh nan putroe bae  
Hana got le nyak intan ti  
Poteu raja ulon ato  
Neumeututo ngon putroe ti

Bek tagundah tuan putroe  
Uroe dudoe jikeumbali  
Seulindang Deulima 'oh na lakoe  
Jiwoe keunoe e putroe ti

Jinoe keudeh bahle siat  
Peutroh hajat diwa pari  
Putroe deungo haba deelat  
Ka seungap Beureuma Diwi

Lam peuratah peuek leugat  
Cut ubat Seulindang siti  
Jiba laju dalam awan  
Seureuta ngon raja doli

Padumna trep sampoe datang  
Tam ong rijang u meuligi  
Bak masa nyan Pari Kaha  
Keumala Miga judo doli

Bak masa nyan karu raya  
Lam istana mumat jari  
Lam peuratah teubiet putroe  
Jak seumbah nyoe teuot abi

Seureuta ngon po ma putroe  
Batee Beusoe Kaha Pari  
Lheueh nyan pioh bakoh keudroe  
Sambinoe rupa juhari

Lheueh nyan geubet ngon makanan  
Ngon idangan han soe tukri  
Neumakeuen le po junjongan  
Makanan di nanggroe pari

'Oh lheueh raja jep minoman  
Idangan nyan bawa keumbali  
Lila Ahmad Pari Kaha  
Seureuta ngon Batee Beusi

Meuntroe Kilan lom seureuta  
Laen teuma kanan kiri  
Cut Deulima bungong cuko  
Dendayang le kanan kiri

Jułar malam beudoh tido  
Top ngon pinto boh ngon gunci  
Haba nyoe bek panyang rungkho  
Po intan e sang kureueng kri

Hingga beungoh uroe siang  
Sulotan beudoh seundiri  
Neumeuheu le ngon angkatan  
Biek pahlawan diwa pari

Keumah ase seukalian  
Ngon sultan Kaha Pari  
Lila Ahmad meuntroe Kilan  
Lom sajan ngon Batee Beusi

Keumala Migapi jak sajan  
Ngon gunangan diwa pari  
Seulindang Deulima beurangkatkan  
Bak masa nyan han soe tukri

Sok ngon bajee dum teureubang  
Got that imbang bak peureugi  
Hana kureueng ube labang  
Lam awan cahya meuriti

Tangieng lale bagoe layang  
Hadapan bak gunong tinggi  
Han padum trep po lam hawa  
Peuranta Nila sampie doli

Troh sampie u dalam kuta  
Ngon lasyeuka dan sipai  
Raja Ahmad eu meuligoe  
Indah han soe hana sakri

Neueu kuta pacang beusoe  
Jroh hana soe taeu ngeuri  
Batee yakut geuboh silapeh  
Cahya puteh takalon hi

Cicem pala leubeh areh  
Nyang puteh rampuneue bangsi  
'Oh lon ingat liwat peudeh  
Bak teumuleh kureueng ahli

Bukon sayang bintang mirah  
Faja gajah peungeuh sare  
Putroe jitren di cong peuratah  
Tamong leupah u dalam puri

Duek bak geuta rupa indah  
Cut meutuah that ugahri  
Sang syeuruga rupa cidah  
Meunan niseubah dalam rawi

Raja neuek u meuligoe  
Laen meuntroe deungon wadi  
Sijuek ate kande putroe  
Po sambinoe pangkat tinggi

Teuka mayoh eu buet adoe  
Layah bagoe han soe ungki  
Raja neujak jeuep-jeuep sagoe  
Deungon meuntroe peurdana meuntri

Teutap suka raja nanggroe  
Ngon putroe intan biduri  
Seulindang Deulima Keumala Miga  
Dan raja ngon Batee Beusi

'Oh lheueh abeh kira-mira  
Poteu raja jatoh mufeuti  
Neukeubah tujoh dendayang  
Sajan intan Seulindang siti

Neubri cumboi nyang manikam  
Di dalam makanan nasi  
'Oh lheueh cukop dum neukeubah  
Peukakah keu putroe siti

Cut Deulima kheun bak ayah  
Ka neukeubah lon le abi  
Dalam awan bak meusiblah  
Neujak pinah bek leumah ri

Lon pabanbah Allah Allah  
Ma ngon ayah duek di neugri  
Kadang mate lon lam hawa  
Meusyen mata lon keu umi

Teuma seuot poteu raja  
Bek jeuet kubra jantong ate  
Neumarit nyan ngon ie mata  
Seureuta beudoh keumbali

Deungon rakan dum seugala  
Neutren lanja ngon jen pari  
Meuntroe Kilan Ahmad Lila  
Bandua neuwoe u bumi

Raja tamong lam meuligoe  
Beudoh putroe saleuem neubri  
Raja peugah dum hareutoe  
Keuhai putroe aneuk siti

Awai akhe rawe kheun proe  
Teumpat putroe that ugahri  
Mangat ate tuan putroe  
Po sambinoe that meusampe

Haba nyan laju lon peutoe  
Bek that **rampoe hana got le**  
Teutap raja neumat nanggroe  
Ngon cut putroe Beureuma Diwi

Bu leukat ngon ulee santan  
Makanan si nyak puteh di  
Laen pucok antok kalam  
Haba jameun muwoe rawi

Beudoh bek eh cut teh laman  
Nyoe habaran leubeh ahli  
Kuala lhoh meurok buya  
Krueng Peudada han le pasi.

\* \* \* \*

### III. KUREH PARI LAM RIMBA RAYA

Amma bakdu laju gura  
Lon calitra Kureh Pari  
Jameun dilee cre ngon tantra  
Aleh hoka neupeureugi

Deungon Alkeh Bahrom dua  
Jak han reuda malam hari  
Geunap suntok dawok bungka  
Raja muda seutot mimpi

Rakyat dilee teuntee gisa  
Cut banta teutap peureugi  
Teungoh gunong raya raya  
Neubloh paya uteuen duri

Ban lhee droe that seutia  
Hana nyang sa baranggari  
Pakri gunong manyang manyang  
Neutakot han cut puteh di

Malam uroe neubeurjalan  
Kheundak Tuhan Rabbon Jali  
Bineh laot awot datang  
Cut budiman neueu pasi

Nyankeu laot luah han ban  
Geuboh nan pucok krueng Meuse  
Umbak raya ma teungku e  
'Oh taeu meuhati-hati

Han tom kafilah rot nan lalu  
Siumu le dalam rawi  
Ureueng lhee droe keunan laju  
Leumah neueu luah kon le

Beukit puteh dum neulihat  
Luah sangat hana sabe  
Kureh Pari hireuen ladat  
'Oh neulihat beuttan Rabbi

Kon wayang geulumbang bakat  
Hana dapat soe meung ili  
Hana saho rot beurjalan  
Kiri kanan gunong tinggi

Manyang gunong troh lam awan  
Batee hitam dum meuriti  
'Oh takalon jroh meukilat  
Hana dapat soe peureugi

Sibak kayee hana mupat  
Lam asap keudeh meuwi-wi  
Jabai Kube geurasi nan  
Hana jalan tapeureugi

Hana sidroe soe ek keunan  
Meulaenkan ureueng nyang le sakti  
Banta Kureh ka teuceungong  
Neutanyong bak aneuk meuntri

Ho rot daya tabeurjalan  
Kiri kanan gunong tinggi  
Di hadapanpi ka laot  
Ho rot talop tapeureugi

Bahrom muda teuma seuot  
Got tasurop wahe doli  
Riwang u sot he meukuta  
Bah talingka gunong ini

Alkeh meuntroe seuot pula  
Han jeuet gisa le seukali  
Karonya Po sidroe Makbud  
Gunong laot peue padoli

Meuka u keue bek u likot  
Sang neutakot bak laku ri  
Bek ingat le sangkot-pawot  
U likot pantang keumbali

Nyang jinoe takheun tariwang  
Ingat tuan masa janji  
Ban neudeungo narit meunan  
Beudoh jalan taloe pasi

Meurumpok lom gunong hitam  
Lam laot nyan keudeh teupi  
Banta neujak neubeurjalan  
Rot bineh nyan neupeureugi

Neutamong rot bineh laot  
Gunong seupot hana sakri  
Neujak laju meulu rambot  
Nyan sa sagop han padoli

Teungoh gunong po samlakoe  
Banalhee droe meugriet han sakri  
Pakri ngon gla hana bagoe  
Teupipoe kanan ngon kiri

Lom ngon seupot hana bagoe  
Banalhee droe mumat-mat jari  
Keunong kareueng hana reunggang  
Luka badan pipak gaki

Bacut bacut neubeurjalan  
Lam ie tajam banta titi  
Deungan seupot hana macam  
Uleue biram palet gaki

Bukon sayang putik timon  
Ujeuen sumpom hana lanti  
Cut banta meurungkhom teugom  
Teujak teudong neubet gaki

Pakri uleue kala peusan  
Jikap badan po juhari  
Padumna trep neubeurjalan  
Deuh daratan bacut meuri

Leumah peungeuh di hadapan  
Ate seunang Kureh Pari  
Deungon mudah Allah gaseh  
Peureuseh hajat lam ate

Ka leupah banta beuladeh  
Leumah puteh anoe pasi  
Si nyak banta pioh siat  
Leumohneu that hana sakri

Di yup kayee neueh leugat  
Banalhee sapat ka meugule  
Na lhee buleuen lam beurangkat  
Meusiurat tan na ruji

Meuboh kayee tan neupajoh  
Pijuet tuboh ampon doli  
Sinan banlhee teuntee pioh  
Banta utoh Kureh Pari

Na sikeujap banta pansan  
Jaga yoh nyan cut juhari  
Ban neukalon kiri kanan  
Meureuntang laot sikati

Teupike Bahrom analan  
Bandua nyan aneuk meuntri  
Marit banta meunoe macam  
He cut abang jinoe peureugi

Toh pakat takheun bak rijang  
Peue jalan cuba takheun kri  
Gunong buket ka leupasan  
Seukarang peue leumah pike

Meunyo meunan gata cut bang  
Lon balek nan bek ban lawi  
Nama Bahrom bah geugisa  
Lon tuka bek ban di neugri

Lheueh nibak nyan banta muda  
Beudoh teuma cut juhari  
Taloe pasi neubeurjalan  
Cut intan banlhee seukali

Karonya Po sidroe Tuhan  
Deungo rakan ulon rawi  
Meurumpok sibak geulima  
Bohpi teuma le han sakri

Tuha masak le lagoina  
Bak cabeuengnya dum meuriti  
Leumah saboh got that rupa  
Hu meucayha that muble-ble

Si nyak banta yue ek leugat  
Bak sahbat Alkeh meuntri  
Beudoh Bahrom ka jilumpat  
Jipot leugat banlhee biji

Nyang cidah jijok keu banta  
Nyan dua teuma jibagi  
Maseng-maseng mat bak jaroe  
Ngon asoe mangat seukali

Di bantapi neuplah keudroe  
Lam asoe leumah le meuri  
Banta neucok neueu keudroe  
Saboh bagoe rupa meuri

Boh geulima nyang analan  
Bungkosan leumah sinan hi  
Hu meukilat sang beurlian  
Ngon tangan neubuka lagi

Rupa teudong sidroe putroe  
Bak ija nyoe gamba meuri  
Teuhah babah po samlakoe  
Lam ate droe han le meukri

Lam gamba cahya meusimplah  
Kaya Allah kheundak Rabbi  
Seulindang Deulima sinan leumah  
Hana ubah sigeutu hi

Si nyak banta laju reubah  
Sinan dasyah po juhari  
Nyang neulumpoe yoh saboh roe  
Nyankeu putroe rupa meuri

Sang meuhadap rotdeh rotnoe  
Lam meuligoe ngon si nyak ti  
Na nyum jikheun uleh putroe  
Ka troh sampoe bak adek ti

Meunan rasa po samlakoe  
Bak peunyum droe dalam mimpi  
Lheueh nyan banta jaga keudroe  
Neukheun meunoe nibak meuntri

Allah Allah he dalem droe  
Rab mupaloe hamba ini  
Han tom nyang ka dilee puroe  
Nyang meunoe rupa teurjali

Padumna trep jalan tanyoe  
Ka troh sampoe Tuhan neubri  
Lam boh kayee saboh rupa  
Manusia lahe dali

Rupa na ban bintang kala  
Bak ija sudah teurjali  
'Aeb ate bak lon rasa  
Goh biasa meunan meuri

Han tapateh he adekda  
Taeu rupa nyoe pat dali  
Alkeh meuntroe beudoh lanja  
Jak peunyata kalon pakri

'Oh ban leumah nyan jipandang  
Lam badan aruwah han le  
Salop jantong nafah meutham  
Ka ceukang jaroe ngon gaki

Han le tuto jih bandua  
Bahrom muda Alkeh meuntri  
Duek teuceungong hana haba  
Teukap saja dua bibi

Han tom meunan dilee nyang ka  
Jeuep-jeuep donya lon peureugi  
Bek antara lon deungo haba  
Lam rahsia han tom mimpi

Bak uroe nyoe ka lon pandang  
Sang teureubang nyawong kami  
Dua meuntroe meunan nyum sang  
Han meu'oh ban rasa ngeuri

Taweng teubee peugot gula  
Yum saka murah seukali  
Yoh masa nyan Bahrom muda  
Bandua ngon Alkeh meuntri

Hireuenji that ladat rupa  
Bantiga laloe han sakri  
Nibak jaroe neumat gamba  
Si nyak banta Kureh Pari

Puleh hireuen lheue seureuta  
Beudoh teuma lhee seukali  
Neujak laju neukek gunong  
Baroh tunong han le meuri

Gamba putroe neumat ngon kong  
Banta kalon that beureuhi  
Banlhee sare teujak teudong  
Lam gunong payah han sakri

Gadoh tawak bungong teuprom  
Neueu han tom jeuet that ngeuri  
Pat na uteuen roh neutamong  
Cut bungong tiga seukali

Uroe malam neubeurjalan  
Neukoh padang hana lanti  
Grak teukeudi bri le Tuhan  
Bak simalam Kureh Pari

Seubab payah bak beurjalan  
Reubah pangsan banta ahli  
Meuh ngon pirak ayeuem jaroe  
Cut sambinoe maen mata

Bak simalam Alkeh meuntroe  
Ngon Bahrom nyoe peugah haba  
Wahe adek peue geutanyoe  
Taboh nanggroe seutot raja

Tinggai ayah deungon umi  
Peue tacari dalam rimba  
Tajak peungon Kureh Pari  
Akhe jadi han sapeue na

Kadang-kadangpi sit mate  
Meunan pike lon adekda  
Kureh banta that meusampe  
Jak cari putroe jroh rupa

Lom ngon gamba ka bak jaroe  
Dudoe putroe akan nyang na  
Han saho roh cit geutanyoe  
Bandua droe han sapeue na

'Oh troh tawoe nyan u nanggroe  
Hapit jaroe mantong nyang na  
Banta Kureh puwoe putroe  
Di geutanyoe bohteu nyang na

Jiupat le asoe nanggroe  
Geutanyoe jikheun ceulaka  
Jinoe pakri wahe adoe  
Bak malam nyoe kheun le gata

Peue tajak lom atawa tawoe  
Takheun jinoe nyang meurasa  
Bahrom muda teuma seuot  
Akai sangkot patek hamba

Ban kheun abang ulon ikot  
Lon turot barang keurija  
Walee tawoe nyan u likot  
Ho nyang beusot lon teurima

Meunyo meunan wahe adoe  
Bak kamoe saboh bicara  
Atra cit ka taboh nanggroe  
Bah jinoe nak seumporeuna

Seulindang Deulima nyang sambinoe  
Bah geutanyoe tatueng dua  
Jinoe tacok gamba putroe  
Bak samlakoe banta muda

Bandua jinoe tajak boh droe  
Seutot putroe bintang kala  
Bak lon pakat meunan bagoe  
Wahe adoe pateh hamba

Meuna gamba nibak jaroe  
Nyang putroe meuteumeung saja  
Bahrom muda seuot lagi  
Dudoe pakri tabicara

'Oh meuteumeung cut putroe ti  
Roh pake geutanyoe dua  
Tanyoe dua putroe saboh  
Roh tamupoh akhe masa

Nyoepi bala he abang jroh  
Meuseunoh gata ngon hamba  
Lom Alkeh seuot meunoe  
Nyan adoe mangat takira

Asai meu ka troh putroe u jaroe  
Tapuwoe beu troh u tangga  
Hana sosah pike kamoe  
Asai putroe ka sajan na

Asai putroe ka na sajan  
Tabagian teuma dua  
Gata uroe ulon malam  
Putroe intan taboh jeumba

Meunan bak lon keunong ragam  
Bak gata nyan pakri teuma  
Lom Bahrom seuot meunoe  
Meunan bagoe hana gura

Teuntee putroe jeuet keu santan  
Uroe malam takeurija  
Akhe-akhe mate teuman  
Adat han jipoh droe teuma

Pat lom teuma keuseunangan  
Cut intan ka jeuet keu ruja  
Takoh kayee peugot rumoh  
Tameh teungoh cintramula

Aneuk cut akai goh peunoh  
Tan jitu'oh rugoe laba  
Hingga teuma keumah pakat  
Beudoh leugat ureueng dua

Yoh masa nyan ka jipeutoe  
Bak samlakoe banta muda  
Jikeuneuk poh batee ujoe  
Ngon Bahrom nyoe dua-dua

Tulong Allah Poku sidroe  
Samlakoe Kureh keumala  
Malaikat teudong sidroe  
Raya tuloe hebat rupa

Seureuta ngon neumat taloe  
Neudong sidroe hana haba  
Neuboh rante gaki jaroe  
Tuhan sidroe tulong banta

Gaki jaroe neuboh rante  
Tuhan Kade yue keurija  
Sebab baten hana got le  
Keunong rante ureueng dua

Laheji jroh baten deungki  
Tuhan Rabbi hana rela  
Hana rela zat Ilahi  
Sebab deungki dalam dada

Gaki jaroe neubeureukah  
Laju pantah neugeulawa  
Malaikat nyang peusiblah  
Neusrom bagah dalam rimba

Dalam gunong rimba jatoe  
Peuet blah nanggroe jih teurhanta  
Napsu han troh jih mupaloe  
Bandua droe ka binasa

Di Alkeh sret lam sungoe  
Di Bahrom nyoe sret lam rimba  
Jeuet keu rimueng Bahrom meuntroe  
Di Alkeh nyoe jeuet keu buya

Ka grak Allah 'oh noe janji  
Ka hana le ureueng dua  
Gamba syamsu buleuen hari  
Nyankeu dali nyang that raya

Teuduek 'oh nan ureueng deungki  
Kureh Pari lon calitra  
Hingga beungoh siang hari  
Cut ahli neubeudoh sigra

Banta neungieng kanan kiri  
Aneuk meuntri hana bandua  
Ka neumeuhei ngon abeh su  
Sira neueu lingka lingka

Yoh masa nyan bungong meulu  
Ate ragu si nyak banta  
Malaikat teuma meusu  
Bek le karu he meutia

Wahe aneuk Kureh Pari  
Bek tahei le ureueng dua  
Han jeuet keu ngon bungong giri  
Jeuoh neugri ka jibungka

Ka neupinah uleh Rabbi  
Jih nyan deungki nyan keu gata  
Ka jisalop akai ku'eh  
Tuhan beungeh ureueng dua

Jih sajan kah ka neupuweh  
Bek le tapreh jak tabungka  
Kureh banta deungo meunan  
Ile sajan ngon ie mata

Ban nyang kheundak kata Tuhan  
Hana troh fam hamba say  
Nyang na bacut lon weueh ate  
Han meusampe bacut nyang na

'Oh troh keunoe laen ate  
Jipike nyang hana beuna  
Lon pabanbah kheundak Tuhan  
'Oh noe jalan lon ngon gata

Jih ngon ulon laen jalan  
Nyan ban akai e syeedara  
He Tuhanku nyang po alam  
Nabi Tuhan Sulaimana

Neubri beu troh ban lon hajat  
Ngon beureukat dum eelia  
Po gamba nyoe bak lon dapat  
Tulong bak that ya Rabbana

Neubri seunang jalan tepat  
Bek singkat di dalam rimba  
Meunan banta neumeuhajat  
Ile ngon that dum ie mata

Lheueh nibak nyan bungong meurak  
Beudoh neujak po got rupa  
Lam uteuen leugat neupeutak  
Neurawak lom gunong raya

Ngon ie mata ro u tapak  
'Oh neujak meugisa-gisa  
Bukon sayang aneuk meurak  
Di atueuh bak langa dara

Kureh Pari ngeuri parak  
Sang ka phak bandum angeeta  
Sang ka hanco teupeuro phak  
Lom neupeutak ho langkah ba

Neujak laju umu sithon  
Bungong sukon dalam rimba  
Ka meurumpok saboh duson  
Ngon keubon ureueng ka tuha

Leumah kayee dum hijo on  
Cut banta tren keunan lanja  
Po keubon nyan he ya akhi  
Tadeungo he lon calitra

Ureueng agam umu lawi  
Pula ubi lam gle raya  
Peurumoh tan aneukgeu han  
Badan bujang sidroe saja

Teungku Hasyem geuseubot nan  
Po ladang nyan he syeedara  
Lila Ahmad nanggroe makam  
Nyan sulton geumeuraja

Kureh Pari ka troh keunan  
Bak ladang nyan tamong lanja  
Banta kalon dum buahan  
Di sinan macam dumpeue na

Si nyak banta that laparan  
Deuh makanan deukek neurasa  
Ka neupeurab keunan mameung  
Meuteumeung ngon ureueng tuha

Si nyak banta mubri saleuem  
Teungku neukheun mubahgia  
Nibak teuot le neuseumbah  
Leube dayah ro ie mata

Wahe aneuk nyang meutuah  
Pioh payah he aneukda  
Pioh bak lon aneuk teungku  
U leupu teumpat biasa

Leube dayah beudoh laju  
Jak taguen bu keu cut banta  
Mangat ate teuka rindu  
'Oh neueu banta got rupa

Masak ngon bu gule rampoe  
Po samlakoe neuhei lanja  
Wahe aneuk bungong geutoe  
Peurab keunoe e bentara

Jak pajoh bu e samlakoe  
Nyak mangat troe bek deuek gata  
Eungkot hana he boh ate  
Kamoe lam gle jarak banda

Na aneuk gule boh ubi  
Bek weueh ate lon ka tuha  
Seuot banta insya Allah  
Dang lon langkah he ayahda

Gule rampoe nibak ayah  
Bak lon sah lon niet srikaya  
Dua blah thon lon,cre nanggroe  
Uroe nyoe lon teumeung gata

Poteu Allah peutroh keunoe  
Uroe nyoe lon kalon mata  
Kureh Pari neuek leugat  
U rambat bak ayah tuha

'Oh lheueh makeuen pirak lipat  
Duek bak teumpat hekneu raya  
Leube dayah beudoh leugat  
Bak teumpat bungkosan ija

Ija beuneung cok seubiji  
Ka neubri keu banta muda  
Nyoe he aneuk ija lon bri  
Boh ate ngon top angeeta

Jampang manoe puteh licen  
Ngon meusalen he aneukda  
Banta sambot sira neukhem  
Bungong usen galak raya

Si nyak banta neujak manoe  
Samlakoe neujak uet leuta  
Gleh ngon badan miseue uroel  
Leumah dudoe glum bak dada

Cahya muka miseue pudoe  
Samlakoe rab muwoe teuga  
Lheueh meusalen woe u teumpat  
Tahe ladat ureueng tuha

Neueu rupa meusambot that  
Siploh lipat jiek cahya  
Ureueng tuha bri horeumat  
Keu cut ubat gaseh raya

Teutap sinan bungong riwat  
Marit leugat ureueng tuha  
Wahe aneuk meuh keureutah  
Ho meutuah peue tamita

Patbu nanggroe bunda ayah  
Pakon leupah dalam rimba  
Peue na aneuk saket ate  
Jeuet dalam gle meudiwana

Peuebu nama po ma rasi  
Ngon abi peue geuhei nama  
Peue tamita nyang beureuhi  
Cuba ci aneuk calitra

Teuma seuot Kureh Pari  
Neubeuot le jaroe dua  
Wahe ayah puteh bungong  
Lon niet nyawong ayah keu gata

Bah lon peugah ka neutanyong  
Deungo beu keunong bek meutuka  
Nama ayah Juhan Ali  
Nan umi Lela Sikanda

Nanggroe lon Anta Peurdani  
Nan kami Kureh Keumala  
Hajat ayah lon jak keunoe  
Seutot lumpoe dilee masa

Peue talumpoe he aneuk droe  
Kheun bak kamoe ayah gata  
Kadang aneuk ek na sinoe  
Tan lam nanggroe na lam rimba

Meunyo meunan ayah badan  
Deungo beu trang lon calitra  
Lumpoe lon ayah bak simalam  
Ngon grak Tuhan sidroe Esa

Miseue meuk lam mata hitam  
Meunan nyum sang lon umpama  
Hana sinoe bak lon waham  
Jeuoh makam ingat hamba

Sang malakat Nabi Sulaiman  
Meunan nyum sang lumpoe hamba  
Sang bak meunan ka lheueh janji  
Ngon grak Rabbi 'oh nan kada

Gohlom mate meugoh neubri  
He abi nyang lon jak mita  
Lon lumpoe lon jak saboh nanggroe  
Meurumpok nyoe saboh kuta

Ateueh gunong manyang han soe  
Hilang bumoe langet donya  
Nyum lon tamong lam meuligoe  
Deungon putroe meurumpok teuma

Kulet puteh miseue intan  
Cahya badan hana ngon sa  
Cidah rupa hana lawan  
Cut intan hana saboh sa

Miseue kande muble malam  
Sang bintang di langet donya  
Geuboh nama si nyak putroe  
Sambinoe Seulindang Deulima

Umu baro gohlom sampie  
Yup langet nyoe bit hana sa  
Na nyum jimat lon bak jaroe  
Peuduek putroe atueuh tahta

Jimeututo deungon kamoe  
Jikheun meunoe nentueng hamba  
Nyankeu ulon ate rangee  
Malam uroe lon jak mita

Rayek napsu ubit bumoe  
Troh lon puwoe sang u tangga  
Ubak ayah troh u nanggroe  
Ngon putroe sajan ulon ba

Ulon jaga beungoh uroe  
Pungo kamoe ro ie mata  
Nyankeu ulon tinggai nanggroe  
Seutot lumpoe he ayahda

Dua blah thon nyang ka lon jak  
Goh meurumpak putroe muda  
Meunan neukheun bungong meurak  
Neupeugah bak ayah tuha

Jinoe ulon sujud seumbah  
Keu bawah kidam ayahda  
Patkeu jinoe ayah peugah  
Cut indah nyan lon jak mita

Meunan neukheun bungong tuphah  
Bak ayah ureueng nyang tuha  
Yoh masa nyan leube dayah  
Teuhah babah ube raga

Ka mubalek mata mirah  
Teudong nafah ureueng tuha  
Na sang keunong þurong tujoh  
Nibak tuboh ureueng tuha

Nibak teuduek sinan layoh  
Hana roh neubuka haba  
Laju reubah leube dayah  
Aruwah meulayang raya

Na sikeujap puleh reubah  
Beudoh pantah ureueng tuha  
Ngon ie mata ile sajan  
Allah intan bek meuhawa

Gata aneuk muda seudang  
That lon sayang bijeh mata  
Keupeue aneukteu putroe nyan  
Hanco badan hilang nyawa

Bit na aneuk ban talumpoe  
Nan putroe Seulindang Deulima  
Beureuma Diwi ibu putroe  
Ayah gop nyoe Ahmad Lila

Lila Ahmad punya nanggroe  
Bak lon duek nyoe he aneukda  
Dua ploh droe raja taklok  
Wase jijok nyan keu raja

Bek he aneuk keunan tamasok  
Jeuet keu rabok tuboh gata  
Sireutoh peuet raja ka mate  
Seubab pië putroe muda

Aneuk raja dum ube-be  
Bak teungoh gle Peuranta Nila  
Bek aneuk tatueng putroe nyan  
Rot sukaran abeh nyawa

Bak gaki gunong han jeuet keunan  
Jihantam le pari diwa  
Na peuet laksa di pahlawan  
Bangsa mambang le that mintra

Silaksa lhee nyang bantahan  
Jaga intan hana reuda  
Ngon hekeumat he aneuk beh  
Gunong tujoh lingka paya

Gunong nyan manyang that apoh  
Seumeuloh lam awan mig  
Ateueh gunongpi le sakti  
Batee Beusi po keurija

Dua deungan Kaha Pari  
Di putro ti nyankeu apa  
Lingka gunong awan ujeuen  
Ngon tupeuen tajam lagoina

Soe troh keunan le jitinteueng  
Seumeureueng lam awan mig  
Dumnan sakti pari bajeueng  
Hana soe theun e bentara

Hana daya ek tatimpeueng  
Sret tuleueng lam laot raya  
Suroh raja Batee Beusi  
Lila Zanggi nyang that raya

Ateueh gunong leubeh lagi  
Nyanpi sakti awan meuputa  
Rupa that kha hana sakri  
Peurintah doli raja Kaha

Jih keupala bak dum Zanggi

Suarapi bumoe geunta

Lom binatang macam le ri

Ngon bisapi hana tara

Lom paya lingka meuligoe

Ngon asoe naga ngon buya

Soe nyang teuga keunan sapoe

Jiseudoe le inong buya

Le ban sakti lam meuligoe

Muploh bagoe sinanpi na

Nyankeu aneuk lon kheun bagoe

Pakri jinoe po bentara

Nyang got bak lon po samlakoe

Beudoh jak woe nanggroe bapa

Bek sosah ayah di nanggroe

Gila dudoe saboh masa

Meutan badan keupeue putroe

Samlakoe cuba takira

Meuna gata nyak di nanggroe

Siploh putroe keunan teuka

Han peue aneuk taboh nanggroe

Cit putroe jimita gata

Napsu leubeh bak gatanyoe

Urueng binoe raya donya

Meujikalon rupateu nyoe

Samlakoe gata jiraba

Leube dayah meunan kheun proe

Jawueub meunoe banta muda

Wahe ayah payong nanggroe

Harap nyoe udep lam donya

Nyang wajeb that cit tamate

Keumbali bak Tuhan Esa

Miseue neukheun lam tapeuse

Sinan dali nyan that raya

Mutu qablal mauti

Sinan dali tapeucahya

Tamate yoh gohlom teudu

Han peue rindu ayah gata

Bek tahukom buet goh taeu

Lam ileumu Tuhan Esa

Lam kheundak Po zat Tuhanku

Han troh soe eu na ngon hana

Tameuiman nyang ka jali

Lom ngon dali ka lheueh nyata

Bek neutakot lon peureugi

Ngon grak Rabbi laen hana

Meunyo sayang akan kamoe

Geunap uroe neuleueng do'a

Tulong Allah 'izzah Nabi

Diwa pari lon drop saja

Kada Allah han soe linteueng

Bak peudeueng nak mupeue meulila

Hana soe mat ingat takheun

Han ek linteueng sitree bena

Lon bek neutham teungku ayah

Seudeukah beu le that do'a

Lom neuseuot leube dayah

Lon pabanbah bijeh mata

Peue nyang teukheun dum tatulak

Ateueh rawak seuladan na

Bit troh aneuk keunan tajak

Ateueh layak tameuhaba

Keubit ayah ban ulon kheun

Nyoepat ruweueng neubri tanda

Nyoepat dali ngon meudeului  
Neukabui le Tuhan Esa  
Gamba putroe neupeuleumah  
Leube dayah kalon rupa

Ban neukalon masya Allah  
Sang lepah tamong seuruga  
Adat muda leube dayah  
Siploh ilah geubicara

Teuma banta neutop surah  
Leube dayah tan le haba  
Beudoh neutren le di rumoh  
Bak tanoh bineh mon tuha

Na sikeujap neupeuteungoh  
Kanot peunoh deureuham ka  
Neubileueng le na siribee  
Bungong kayee neuhei lanja

Nyoepat bak lon e bintang lhee  
Ho patot mee aneuk taba  
Ho nyang patot e bintang jroh  
Ho meugantoh aneuk bungka

Jak bloe guda aneuk saboh  
Jak u baroh jinoe gata  
Nak jeuet tajak tunong baroh  
Kadang ek troh hajat gata

Seuot banta puteh leusoh  
Kon ayah beh nyan lon mita  
Do'a ayah lon harap troh  
Geunap suloh meuseumpeuna

Beuthat meunan e samlakoe  
Bandua peue bak ulon na  
Bek meudawa he aneuk droe  
Pubuet jinoe kri nyang suka

Hingga teuma haba nyang toe  
Samlakoe Kureh Keumala  
Cok deureuham sikadakan  
Beurjalan banta u banda

Neuteubiet gle ili u blang  
Troh kenan bak duson raya  
Neueu sinan guda kawan  
Muploh macam rupajih na

Kureh banta laju peurab  
Neulihat neukalon rupa  
Neueu pusa ngon alamat  
Ngon tabi'at pantah bungka

Tan meuteumeung ban neuhajat  
Laen teumpat banta teuka  
Guda sinan meureutoh ploh  
Pijuet tuboh tumbonpi na

Hana keunongpi meusaboh  
Po banta jroh laen mila  
Bak neujak-jak po banta cut  
Leumah meuhuet saboh guda

Meuteumeung le guda pijuet  
Ngon raya pruet ube raga  
Meuek mata badan pijuet  
Banta cut tanyong hareuga

Pojih seuot hareuga troh  
'Oh sireutoh kureueng hana  
Cut banta hana meutanggoh  
Neubayeue troh nyan hareuga

Neucok guda neuboh taloe  
Neupuwoe laju bak kuha  
Peng nyang leubeh dum neupuwoe  
Neujok dum nyoe bak ayahda

Neusambot le deungon jaroe  
Deureuham nyoe tanom sigra  
Bungong meulu neungui putroe  
Sok ngon taloe beuneung sutra

Kureh banta teutap 'oh noe  
Ngon guda nyoe neupeulara  
Watee beungoh neuseumanoe  
Umpeuenpi troe bri cut banta

'Oh tee malam bungong peukan  
Neueh sajan deungon guda  
Karonya Po sidroe Tuhan  
Neubri jalan Kureh banta

Guda marit bak simalam  
Bak cut intan jikheun haba  
He raja keumala alam  
Keupeue laman tapeulara

Han ek di lon kutueng putroe  
Han jeuet kamoe balah guna  
Jinoe e po lon peugah proe  
Pateh kamoe wahe raja

Méunyoe bit-bit neutueng putroe  
Jak tueng jinoe saboh guda  
Nyan tuanku guda muprang  
Teumpatjih nyan dalam guha

Ateueh gunong saboh kulam  
Di dalam na saboh guda  
Bak takue meugatung josan  
Bak badan peulana ka na

Meukilat hu hana lawan  
Geuboh nan Janggi Keumala  
Masa Nabiyullah Adam  
Tinggi sinan saboh guda

Tuban Areh raja makam  
Nyankeu kandran dilee masa  
Meusyeuhu ban sigom alam  
Teuma raja nyan tinggai donya

Nyankeu raja that meuiman  
Nabi Tuhan jipeucahya  
Trep ka mate di raja nyan  
Tinggai kandran saboh **guda**

Keumala Janggi geurasi nan  
Guda nyan **gagah** peurkasa  
Areh Ajam 'oh lheueh mate  
Jiwoe u gle saboh guda

Sinan jinoe guda kande  
Cit lam sabe dawok lam tapa  
Akan teutapi lon bri ingat  
Nyoe isyarat bak drop guda

Naleueng komkoma neume leugat  
Cit neumat di uneun beu na  
Di tuanku bek teumakot  
Bek teukeujot ate lia

'Oh jideumpek jimeung surat  
U likot bek paleng muka  
Bek tuanku mumet tapak  
Bek meugrak gaki bandua

'Oh jideumpek bumoe meusak  
Sang ka phak tuboh ngon nyawa  
Dua lhee seun guda jigrop  
Su meubeuet u antara

Lheueh nyan e po ka meunurot  
Ka jisujud keunan guda  
Deungon uneun umpeuen neubri  
Ngon kiri keukang neuhila

Neupeuteungoh le u teupi  
Ampon doli pasang lanja  
Nyan tuanku beu kreueh ingat  
Jiplueng ngon that tajam raya

Hana neuthee bagoe kilat  
Jilumpat lam awan mig  
Tujoх lapeh awan meuhat  
Ngon sikeujap neuthee hana

Jiriwang le nyan u teumpat  
Meuna hayat mantong raja  
Nyan baro jeuet neupeurunoe  
Meudeh meunoe jeuet neuaja

Ka jituri dali po droe  
Tan le sapeue jiboh dawa  
Jinoe neujak po junjongan  
Taloe krueng nyan mudek lanja

'Oh meuteumeung gunong hitam  
Neuek keunan po meukuta  
Dua ploh peuet gunong saban  
Neupandang ban siseun lingka

Beungoh-beungoh neueu asap  
Meuklat gunong meucahya  
Keunan e po neuek leugat  
Bek seubat dalam dada

'Oh ka meuri nyan neulihat  
Neuek leugat po meukuta  
Na tuanku sinan kulam  
Pateh laman e meukuta

Abeh haba teungoh malam  
Teungeut yoh nyan si nyak banta  
Blang Asan gampong meutaloe  
Tanoh Anoe tho peunula

Hingga beungoh teubiet uroe  
Beudoh jinoe Kureh banta  
Ubak ayah neuhareutoe  
Idin kamoe siat bungka

Neumeukeumah banta ahli  
Neumudek le dalam rimba  
Ubak Tuhan neukheun diri  
Ya Rabbi neutulong hamba

Rot bineh krueng keunan neuili  
Cut juhari neukoh rimba  
Uroe malam neujak sabe  
Neuek gle nyang raya raya

Padum rimueng di hadapan  
Meurumpokkan deungon banta  
Badeuek gajah limpah kawan  
Dum binatang seugala rupa

Dum binatang asoe uteuen  
Han ek kheun meuribee laksa  
Neujak laju meubuleuen-buleuen  
Seutot ban kheun aneuk guda

Karonya Po sidroe tudum  
Padum buleuen banta bungka  
Meurumpok le di hadapan  
Guncung hitam miseue baja

Banta neuek le gunong nyan  
Gaki tangan abeh luka  
Keunong kareueng luka asoe  
Malam uroe neubloh rimba

Troh u pucak seupot uroe  
Pioh jinoe Kureh banta  
Banta neueh 'oh ka malam  
Beudoh teuman 'oh ka faja

Neupandang dum sigom alam  
Ateueh gunong manyang raya  
Saboh gunong deuh neulihat  
Leumah asap hu meunyala

Banta pike teuma siat  
Nyankeu asap nyang kheun guda  
Kureh Pari titi leugat  
Neupeuteupat bak hu raya

Neuke sunggoh hana lawan  
Sikhan buleuen troh ateuehnya  
Neueu teumpat jroh seuladan  
Saboh kulam neueu ka na

Meuteuratak hana lawan  
Keunong ragam nibak rupa  
Bak teupi na batee intan  
Kulam nyan di dalam guha

Banta neungieng kiri kanan  
U dalam neutamong lanja  
Neumeukeumah po samlakoe  
Neubet nyoe naleueng komkoma

Dalam kulam tamong jinoe  
Seunom keudroe si nyak banta  
'Oh leupah ie ka leumah hu  
Lheueh nyan laju leumah guda

Banta peurab leugat laju  
Hana kuyu bacut lia  
Bak batee puteh han sakri  
Beurdiri Janggi Keumala

Ban sare rab Kureh Pari  
Guda Janggi meugrak sigra  
Jideumpek le leubeh tanggoe  
Langet bumoe nyum meugisa

Ka tahe muda samlakoe  
Lam guha nyoe ie keulua  
Hanco kareueng reuleueng ka doe  
Ie Kulam nyoe tho seumua

Lom jideumpek tarek bak bunoe  
Samlakoe hana gli geunta  
Seupot mata sang ka paloe  
Raya tuloe entu guda

Lheueh nibak nyan guda Janggi  
Jisujud le ubak banta  
Deungon ampon laju neubri  
Naleueng neume nyang komkoma

Ngon jaroe wie neudrop keukang  
Neupasang pantah raya  
Guda beudoh jiteureubang  
Lam awan jipo meutaga

Awan hijo meusye datang  
Awan hitam muble rupa  
Awan ujeuen seumeurang trang  
Reudok tajam hampe guda

Teuma jitren lom u bumoe  
Jidong jinoe bak teumpatnya  
Ka neutren muda samlakoe  
Ka sampoe leupah bak mara

Deungon guda neumarit meunoe  
He ulon droe tulong hamba  
Hajat ulon nyang troh keunoe  
Lon jak tueng putroe deungon gata

Meuna gaseh deungon sayang  
Taba sajan lon le gata  
Ulon keumeung jak tueng bintang  
Di gunong Peuranta Nila

Seulindang Deulima nama putroe  
Ulon lumpoe lam rahsia  
Beu na gaseh gata sidroe  
Jak uroe nyoe he Keumala

Janggi deungo kheun samlakoe  
Jikhem keudroe raja guda  
Lheueh nibak nyan ka jimeusu  
Jikheun laju ubak banta

Insya Allah e tuanku  
Troph ban napsu cita-cita  
Ngon mukjizat Sulaiman sidroe  
Neueu sigo buet Keumala

Tulong Allah Po geutanyoe  
U meuligoe troh ulon ba  
Deelat ampon pajan langkah  
Cuba peugah po meukuta

Kureh seuot he meutuah  
Dak jeuet langkah jinoe lanja  
Meunyo meunan meukuta syah  
Jak meukeumah nak tabungka

Beu kong neumat taloe keukang  
Lon teureubang bek sret gata  
Hana lon ngieng kiri kanan  
Lam awan laju lon bungka

Keunoe e po neuek leugat  
Teungoh meuhat na kutika  
Nyoe tuanku bak kong mumat  
Beu kreueh ingat 'oh lon bungka

Si nyak banta neuek leugat  
Laju neumat keukang guda  
'Oh ka cukop banta pasang  
Laju teureubang Janggi Keumala

Ka meuhayak donya meulinggang  
Jipo meucrang dalam hawa  
Awan hijo ka muphang-phang  
Jibeukam gunong Peuranta

Lam awan di miyup ujeuen  
Cut buleuen dua ngon guda  
Jipo sabe hana leueueng  
Sikhan buleuen ka troh guda

Guda lingka awan hijo  
Jilalo mita kutika  
Awan reudok meutumpok le  
Meulabu gunong Peuranta

Awan sakti nyang mupalet  
Bak buket ban seulingka  
Raja guda cara sulet  
Jiapet jilingka-lingka

Jinak lumpat u beuladeh  
Guda areh preh kutika  
Hana sapat nyang na lipeh  
Awan puteh teubai raya

Banta kalon bangsa pari  
Dong meuriti jaga jaga  
Muploh ribee mee sipai  
Ngon beude babah u luan

Raya panyang deungon hebat  
Ngon kaut beurani teuga  
Hana reuweueng ube lalat  
Pari le that ban seulingka

Raja guda mita ruweueng  
Jimeung timpeueng dalam kuta  
Ro meulayang awan ujeuen  
Ban tupeuen pantah jigisa

Guda Janggi bacut lupot  
Jibalot le awan mig  
Han jiteumeung mameung jigrop  
Ka lupot tapaban teuma

Geulap gulita seupot hitam  
Masa nyan Janggi Keumala  
U laot jiawot tajam  
Siga karam deungon banta

Han neuteumeung neukheun Tuhan  
Peue tapaban 'oh nan kada  
Kakeu hanyot Kureh Pari  
Banduapi deungon guda

Lam laot awot seumbunyi  
Keunong sakti pari diwa  
Bukon sayang bungong geutoe  
Keunong uroe abeh mala

Si nyak banta hana le droe  
Ka mupaloe bak laot raya  
Bak peuseutot takbi lumpoe  
Abeh droe-droe keunong beuncana

Lam laot jibeudoh ie ju  
Sinan meulu abeh daya  
Bakat intat barat timu  
Allah teungku sayang raya

Bukon sayang bungong kawet  
Jipalet bak kayee raya  
Luroh asoe ka bhoe kulet  
Cut bintang phet lam seungsara

Dalam laot meukayoh-kayoh  
Puteh leusoh deungon guda  
Sama teungoh dalam aroh  
Han le tuboh si nyak banta

Deungon bakat liwat tanggoh  
Jipoh rapoh banta muda  
Padum lawet trep lam laot  
Cut tulet dua ngon guda

Angen barat got that jipot  
Ka hanyot banta jroh rupa  
Ho tajam ie keunan hanyot  
Jibapot le bakat raya

Kheundak Allah zat Ilahi  
Cut ahli leupah bak mara  
Banta hanyot taloe pasi  
Bungong giri deungon guda

Puleh tuboh dong beurdiri  
Jimarit le aneuk guda  
He tuanku raja deelat  
Pioh siat po meukuta

Mita umpeuen meusigo brat  
Lon ka deuek that padum lama  
Banta neujak bineh uteuen  
Jak koh naleueng nyan komkom

Ka neupuwoe leugat mameung  
Pajoh umpeuen raja guda  
Lheueh nibak nyan Janggi bajeueng  
Deumppek siseun ngon meutaga

Teuka reudok angen tupeuen  
Nam meulion ka troh guda  
Lam reudok nyan taeu leumah  
Sujud pantah dum u donya

Raja Janggi kheun le pantah  
Tan kuhei kah jakleh gisa  
Rakyat guda yoh nyan gaeb  
Deungon siklep han meuho ka

Kureh Pari ngeuri 'ajaeb  
Cut bintang phet eu buet guda  
Lom neumarit po samlakoe  
Pakri jinoe he Keumala

Beukit tajak peukeumah droe  
Peue lom laloe jak udehta  
Bek tagundah he sulotan  
Rot lam awan lon tamong saja

Jinoe e po lon teureubang  
U manyang rot awan mig  
'Oh ka gadoh donya hilang  
Inbat beu kong he meukuta

'Oh abeh lon ek u manyang  
Lon tren teuman dalam kuta  
Bek deuh jieu le edeurang  
Uleh kawan pari diwa

Keumah pakat ngon guda plang  
Banta intan lom meuhaba  
Jinoe siat he raja cut  
Lon kheun bacut nibak gata

Jak tariwang bak yah seubot  
Na meukeusud he Keumala  
Si nyak banta lheueh meututo  
Ek laju ateueh rueng guda

Aneuk guda ka jitajo  
Jipo meusye dalam hawa  
Han jan siat sampie sudah  
Guda meutuah jitren lanja

Si nyak banta peurab pantah  
Teungku dayah neucom sigra  
Wahe aneuk bak meutuah  
Pioh payah e bentara

Kureh Pari leugat pioh  
Peureubah tuboh atueh tika  
Teungku dayah bu neujak reuboh  
Masak neuboh keu cut banta

Makeuen aneuk bek le pioh  
Nyoepat lon boh peue peue nyang na  
'Oh lheueh makeuen banta indah  
Beudoh pantah jak bak guda

Pajoh umpeuen he meutuah  
Leube dayah galak raya  
Guda dileepi ka cidah  
Nyang neukeubah uleh banta

Leubeh gaseh teungku ayah  
Keu cut indah Kureh banta  
'Oh malam deungon ayah droe  
'Oh uroe lale ngon guda

Teutap sinan padum uroe  
Guda jinoe kheun bak banta  
Ampon e po deungo kamoe  
Bahle jinoe ulon tapa

Hana that trep tuanku droe  
Peuet blah uroe mantong saja  
'Oh lheueh idin bak samlakoe  
Guda jinoe masok tapa

Siblah gaki jidong jinoe  
Nyang lhe nyoe jilipat teuma  
Cicem nuri rupa cidah  
Nyáng that pantah siwah raja

Teutap sinan banta indah  
Bak tok dayah ureueng tuha  
Jak u ladang pula jagong  
Top tupong peugot halua

Ya Tuhaniku ion neutulong  
Neupeuampon seugala deesya  
Bak ion rika haba tupon  
Kadang langsung leupah haba

Seubab hana tajam mufom  
Silap ulon roh meutuka  
Jeuet ion harap bak that ampon  
Got bak kawom ubit raya

Bak na meu'ah seugala don  
Akan ulon tukang rika  
Takoh pade sadeuep tajam  
Ingit intan tamse ka na

Kureh Pari rawi jalan  
Teutap sinan padum masa  
Puleh asoe muwoe badan  
Ate seunang leubeh bak nyang ka

Teungku Hasyem ate wa-woe  
Keu samlakoe gaseh raya  
Leubeh nibak nyan aneuk droe  
Geunap uroe jarak hana

\*\*\*

#### IV. MEURUMPOK NGON PUTROE

Jinoe keuhai banta indah  
Ngon guda cidah lon calitra  
Peuet blah uroe umu sudah  
Ka jibeudoh dalam tapa

Si nyak banta keunan peutoe  
Marit meunoe deungon guda  
Wahe ulon guda ragoe  
Pajan uroe nak tabungka

Meugoh meuteumeung deungon putroe  
Ate lon nyoe mantong goga  
Keumala Janggi ka jijawueub  
Ban meukeusud jadeh saja

Jinoe sampoe ban nyang meuheut  
Cut putroe cut lon cok saja  
Neuk keunoe e raja cut  
Nak sampoe buet lon keurija

Si nyak banta deungo meunan  
Kiri kanan tueng kutika  
Aneuk guda hayak badan  
Neuk meusyam po nyak banta

Yoh masa nyan ka jidapan  
Jipo meurang dalam mig  
Jipo laju manyang han ban  
Banta pandang han le donya

Jipo leupah awan hijo  
Ka kuyu Kureh Keumala  
Lam ate yoh nyan meuto-to  
Meugo-go sang-sang ka lupa

Guda jipo leubeh tajam  
Meukeumang awan meugisa  
Sang kilat 'oh teungoh malam  
Mublet hitam dalam miga

Dua buleuen guda jijak  
Meurumpak ngon saboh bala  
Leukang bulee bak tangkurak  
Ka seungkak guda jroh rupa

Ubak banta jikheun sikrak  
Han jeuet le jak po meukuta  
Bek le manyang meurang awak  
'Oh noe jarak sang mumada

Awan beusoe ka meulantak  
Meurumpak awan teumaga  
Jideungo su malaikat  
Jimeungucap istigfara

Banta deungo suara mangat  
Hireuen ladat bak peurasa  
Lagam paseh basa Arab  
Sang mangat bagoe biula

That laloe cut aneuk deelat  
Rab lheueh neumat keukang guda  
Janggi jikheun pantah rijang  
Bek that bimbang po meukuta

U bumoe jinoe lon riwang  
Meutrep tadong jeuet binasa  
Keumala Jaggi ka jisujud  
Bacut-bacut han that lanja

Kureh banta sang ka hayut  
Meutuep-tuep sabe lam dada  
Raja guda laju sujud  
U miyup jitren meutaga

Grak teukeudi sidroe Tuhan  
Deuh di daratan tantra diwa  
Jitren laju guda hitam  
U ateueh nyan buket raya

Guda jitren han that tajam  
Jibangkang Peuranta Nila  
Guda areh hana lawan  
Mita jalan nyang seujahtera

Deuh jieu pucak meuligoe intan  
Lam awan keudeh meucahyu  
Keumala Janggi jitakat nyan  
Sigeutu han na meuriba

Rot teungoh lam awan ujeuen  
Tan jikalon pari diwa  
Teungoh malam watee sunyi  
Troph Janggi ateueh istana

Bak pucak guda beurdiri  
Kureh Pari marit sigra  
He guda Keumala Janggi  
Pat taseumbunyi nyan di gata

Bek jikalon uleh pari  
Cuba kheun kri wahe guda  
Ampo e po bek neugundah  
Han leumah bek sosah gata

Jinoe raja tamong pantah  
Tamong bagah bek le lama  
Guda Janggi kheun sipatah  
Mangat leupah sironpi na

Bukon sayang lon eu kipah  
Sayang beukah dalam jaroe  
Padum banya lon peuleupah  
Lon keubah gata bak putroe

Aleh peue na keu lon balah  
Peunayah pie deungon budoe  
Meunan jikheun guda mirah  
Banta indah teukhem keudroe

Wahe Janggi idin keu lon  
Jinoe kutren ubak putroe  
Meutan idin gata keu lon  
Han jeuet lon tren he ulon droe

Untong gata saket ate  
Han meusampe hajat kamoe  
Masa udep hingga mate  
Lon pike guna gata nyoe

Saket mangat dak jeuet bek cre  
Beu na sabe gata sidroe  
Meunyo hana ban ulon kheun  
Kon lon ureuteng udep sinoe

Ngon gata bek le meuteumeung  
Troph ngon jameun uroe dudoe  
Meunan narit bungong seupeueng  
Seuot mameung guda ragoe

He tuanku bek amarah  
Lon peugah rot wayang kamoe  
Bak lon tuan hana ubah  
Bek meusumpah payong nanggroe

Di tuanku na cit dumnan  
Di lon tuan leubeh bak nyoe  
Goh meularat deelat makam  
Neueu teuman 'oh saboh roe

Nyoe buet bacut po junjongan  
Meubala Tuhan kon siuroe  
Langet manyang han troh tasrom  
Bungong teuprom dalam peutoe

Si nyak banta puleh reudom  
Teusinyom 'oh leumah gigoe  
Raja guda lom meututoe  
Tuanku e beudoh jinoe

Jak tamong bak dara baro  
Bek le tuto manyang uroe  
Jinoe jak ek bek le peutheun  
Sayang buleuen jieh sidroe

Tinggai ulon han peue hireuen  
Jeuet lon timpeueng bak nyang sunyoe  
Yoh masa nyan po raja cut  
Neulop muplup lam meuligoe

Neubet langkah bacut bacut  
Neuseurubut keudeh keunoe  
Rot jeundila laju neulop  
Pinto teutop teuhah keudroe

Tiree rawa dum neusalop  
Banta neulop seugala sagoe  
Troph lam bilek jieh cut meulu  
Bee meuharu hana bagoe

Neueu lampu peungeuh bandrang  
Ureuengpi tan sapat hana  
Banta neujak rot bubayang  
Neulop teuman laen kama

Banta jeungeuk lam kama nyan  
Neueu sinan soe na rupa  
Na tujoh droe teueh dendayang  
Ija dum tan bak angeeta

Rupa cidah hana lawan  
Ban sikawan dara dara  
Si nyak banta ate that weueh  
Neueu peungeuh han sapeue na

Banta neuek lapeh ateueh  
Neutuweueh seugala kama  
Sinanpi tan bungong aneuh  
Neukalon deuh bungong nyang na

Neueu bungong di sinan jroh  
Meurawoh ate cut banta  
Di teungoh nyan gamba saboh  
Seumeuloh ban siseulingka

Hireuen mandang Kureh Pari  
Ladat ate po got rupa  
Puleh tahe po juhari  
Kumisi ho laen teuma

Leumah pinto hana gunci  
Banta ahli laju buka  
Tamong laju po juhari  
Beurdiri bak bineh tika

Tahe mandang po samlakoe  
Neueu bagoe rupa rupa  
Tilam kasos dum meusujoe  
Teumpat putroe meuseusuka

Kureh Pari keunan neupeutoe  
Leumah putroe eh teurhanta  
Lam keuleumbu nyang meureumboe  
Jieh sidroe meuh teuupa

Banta salop deungon jaroe  
Samlakoe teukeupak raya  
Sang jiteubiet roh lam badan  
'Oh neupandang putroe muda

Reubah laju bineh tilam  
Mabantai ngon kasos sutra  
Na dua jeuem banta teueh  
Lheueh nyan puleh po got rupa

Lop keuleumbu lom silapeh  
Putroe areh leumah pula  
Deuh cuaca tujoh reutak  
Tuboh cut nyak hana ngon sa

Yoh masa nyan bungong meurak  
Neungadu bak Tuhan Esa  
Allah e Po Ilahon Hak  
Gata tulak banya donya

Padumna trep nyang ka lon jak  
Nyang galak uroe nyoe ka na  
Neubri e Po keu lon nekmat  
Ka lheueh laknat lon peurasa

Lheueh meulakee banta deelat  
Rahop leugat jaroe bak muka  
Neupeurab lom bungong geutoe  
Neupeutoe bak putroe muda

Ija gamba mat bak jaroe  
Ngon putroe banta jak peusa  
Meusigeutu hana ubah  
Ngon cut indah putroe muda

Po samlakoe pujoe Allah  
Sulaiman sah Nabi mulia  
Si nyak putroe yoh masa nyan  
Teungeut pangsan hana jaga

Dirui tuboh meunyum bak badan  
Bungong keumang yoh nyan jaga  
Kureh Pari yoh masa nyan  
'Oh neupandang putroe muda

Teukeujot that po samlakoe  
Sret bak jaroe ija gamba  
U lua laju neuboh droe  
Bek putroe jikalon rupa

Yoh masa nyan putroe indah  
Beudoh pantah meuh teuupa  
Keuleumbupi jieu ka teuhah  
Aruwah rasa keulua

Nibak tilam beudoh pantah  
Meuh mirah meugisa-gisa  
Jieu tilam dum ka ubah  
Maken sosah putroe muda

Hana sapeue roh jipeugah  
Teuma leumah ija gamba  
Tuan siti cok ngon jaroe  
Po sambinoe kalon rupa

**Sinan teudong sidroe putroe**  
Sang rupa droe sa lagoina  
Tahe hireuen bungong uroe  
Sambinoe teuhah lam dada

Nyang puteh breueh pade raden  
Eungkot kareng asam sunti  
Buhu balek titek jitren  
Ragam laen ulon kaji

Si nyak putroe sambinoe licen  
Teugeureuhing leumah gusi  
Ka teuingat bareng bareng  
Na nyang canden leubeh ahli

Pane ureueng dumnoe rajen  
Jeuet jisalen rupa kami  
Pane ureueng keunoe datang  
Ngon gambaran hamba ini

Bit ureueng nyoe ragoe ajam  
Jeuet jiragam rupa kami  
Han tom meunan lon deungo gah  
He ya Allah Pøku Rabbi

Ureueng peugot neubri leumah  
Neubri beu sah lon kalon hi  
Meunan lakee bungong kipah  
Sira jojah putroe ngeuri

Neubri beu troh hajat kamoe  
Bak malam nyoe lon kalon hi  
Meunan jikheun si nyak putroe  
Sira jimoe han teudoh 'i

Bak meuteumeung deungon kamoe  
Malam nyoe beu troh e Rabbi  
Lheueh meulakee si nyak putroe  
Lam meuligoe le jicari

Dalam bilek jipareksa  
Cut bungong la rindu kon le  
U likot tilam ka jimita  
Ka neuraba juep sagoe be

Cut Deulima ate wa-woe  
Sira jimoe sayang kon le  
Hana sapeue na di dalam  
U lua nyan jiteubiet le

Jeuep-jeuep bilek jitilek pandang  
Han sapeue sinan rupa dali  
Sang ka mabok elok intan  
Jeuep sarokan putroe ungki

Abeh jiploh peue meubungkoh  
Cut aloh sunggoh han sakri  
Troph jijak bak dayang tujoh  
Jieu tumboh u seurambi

Dayang teungeut dum di sinan  
Cut intan hana padoli  
Ija sikrak tan di badan  
Di sinan meugule-gule

'Oh tan sinan putroe pandang  
Neuriwang ateueh keurus  
Duek bak geuta bungong lawang  
Ate deundam hana sakri

Keu po gamba cut la bimbang  
Aleh pajan lon kalon hi  
Cut putroe paloe that bak sang  
Teutap meunan moe meu'i-i

Kureh Pari haba ulang  
Nyanpi meunan leubeh ngeuri  
Bak teumakot awot tajam  
Jak som badan nibak siti

Nibak pasu bungong kareueng  
Neulop keunan Kureh Pari  
Neumeulakee nibak Tuhan  
Neupeutroh ban pinta kami

Neubri beu jeuet lon keu bambang  
Lon peugang bak bungong wali  
Lheueh meulakee banta seudang  
Jeuet keu kumbang Kureh Pari

Jilop kumbang dalam bungong  
Sinan jidong droe seumbunyi  
Jipot angen blah seulatan  
Karam tungkang di Beutawi

Lon seubot putroe Seulindang  
Ate rawan hana sakri  
Teuingat ureueng po gamba  
He Rabbana ho lon cari

Si nyak putroe sosah raya  
Ngon ie mata sabe ile  
Jibeudoh duek bungong jeumpa  
Meh-moh raya cut juhari

Jimeusujo seubot nama  
Cut rakna yoh nyan meusyae  
Allah hai Po nasibku ini  
Tidak dapat barang kucari

Di mana tuan diri seumbunyi  
Euntah keumana euntah keumari  
Jikalee tidak dalam meuligi  
Di mana teumpat aku meuncari

Apakah untong hambanya ini  
Empunya gamba tidak di sini  
Keumana lagi hamba carikan  
Akan meulihat rupanya tuan

Asyek beureuhi hamba lihatkan  
Apalah daya hamba carikan  
Padamlah cahya bintang yang tinggi  
Mudah dilihat payah di cari

Bukonlah sosah hamba meuncari  
Umpama pungguk hambanya ini  
Meunan syae si nyak putroe  
Sira jimoe ngon meu'i-i'

Teuma beudoh po sambinoe  
Jeuep-jeuep sagoe jijak cari  
Lingka bilek putroe pandang  
Jipeugang bak bungong wangi

Leumah sinan saboh macam  
Saboh kumbang jroh han sakri  
Si nyak putroe that sukaan  
Neupot rijang bungong wali

Bukon 'ajab lon eu kumbang  
Jijak dong bak bungong ini  
Baroekon han tom lon lihat  
Meuleukap kumbang bak isi

Pane kumbang sang hekeumat  
Bak adat leubeh that sakti  
Teuma laju putroe puwoe  
Lam biled droe cong keurus

Nibak tilam jiduek putroe  
Mat bak jaroe gamba diri  
Ladat mata rasa seungkoe  
Si nyak putroe leubeh ngeuri

Ateueh langet awan puteh  
Jeh bareh lam kuta pasi  
Lon seubot cut banta Kureh  
Nyang teueh bak bungong wali

Langet mirah jilop uroe  
Seupot nanggroe ka rab meuri  
Yoh masa nyan kumbang sroe-broe  
Teubiet jinoe sayeuep gaki

Na sikeujap gadoh kumbang  
Jeuet keu bambang mirahpati  
Deungon raya hana lawan  
Ka mandang putroe juhari

Na sikeujap teubiet kalam  
Pakon meunan ka laen hi  
Na trep bacut jiteureubang  
Ka leukang sayeuep ngon gaki

Tajak u blang pot geureupoe  
Tapuwoe taguen ngon sira  
Sret ngon bulee timoh ngon jaroe  
Teuma dudoe deuh keupala

Ka mandang putroe sambinoe  
Pakon meunoe ya Rabbana  
Hantom lon eu nyang lagee nyoe  
Siumu droe udep lam donya

Teubiet jaroe deungon gaki

Teurjali Kureh Keumala

Mantong likot atueuh cut ti

Lheueh nyan lagi banta gisa

Hu seumeuloh miseue uroe

Kulet asoe hana ngon sa

Yoh masa nyan si nyak putroe

Hana le droe bak nyan masa

Han mupue le bungong keumbee

Sang ka seudee cut bungong la

Lah na bacut teuka malee

Meuhan lagee hom syeedara

Banta Kureh keudeh geumeuse

Sang kayee teudong meupula

Leumah pike si nyak putroe

Po gamba nyoe ka troh teuka

Bak Tuhan lon lakee bunoe

Ka sampoe dalam istana

Deungon rupa cidah han bagoe

Hana sidroe ngon tapeusa

Sang meuk apui sret u bumoe

Lam donya nyoe laen hana

Ka troh geujak ubak kamoe

Ubak adoe cut Deulima

Keubit leubeh tinggi meurtabat

Ngon pangkat bangsa eelia

Padum le pahlawan hebat

Jaga teumpat meuligoe hamba

Dum ek leupah awan ujeuen

Nyang laen dum tan beurapa

Le that sakti bahya meutheun

Padum ka cateueng aneuk raja

Han ek leupahpi meusidroe  
Nyang gop nyoe pakri han lupa  
Patot judo ulonteu nyoe  
Bah jinoe lon peumulia

Kaoi ayah yoh saboh roe  
Yoh di bumoe geukheun le bapa  
Soe nyang troh jak u meuligoe  
Nyankeu lakoe cut aneukda

Ka bri Tuhan keu ulon nyoe  
Bek wa-woe ate lam dada  
Meunan putroe pike reumbang  
Jibuang ija di dada

Jitiek sawak ija lindang  
Bajee kutang nyang na saja  
Beudoh meusyop salop intan  
Jitatang puan meucintra

Di dalam nyan ranup batang  
Bungong lawang jiboh lingka  
Ka jiseumbah po samlakoe  
Ngon jaroe leumoh lagoina

Seureuta jibet di atueuh dhoe  
Jikheun meunoe putroe muda  
Taek u gle koh peureulak  
Takoh sibak meudang ara

Teungku ampon ka troh neujak  
Neupioh bak kaso sutra  
Di dalam blang puyoh meulet  
'Oh tee seupot jiwoe lam cintra

Si nyak banta teuma seubot  
Neuseuot kalam adekda  
Kru seumangat bintang tujoh  
Lon nyoe ka troh lam syeuruga

Saleuem po cut puteh leusoh  
Ulon boh atueuh jeumala  
Bukon sayang bungong sukon  
Di dalam on abeh mala

Kureueng meujeulih kamoe duson  
Cit ban lon tren di dalam rimba  
Mudek u gle jak tak geutah  
Ek u judah pula lada

Limong blah thon ka lon langkah  
Lon keubah ayah ngon cut ma  
Dalam uteuen peugot keubon  
Ikat ayon ija sutra

Lon seutot gata he bungong rom  
Nyoe baro phon lon eu rupa  
Di langet buleuen ngon uroe  
Cahya keunoe u atueuh donya

Bak masa nyan si nyak putroe  
Mat bak jaroe banta muda  
Jipeuduek bak tilam sujoe  
Sira putroe com di muka

Tapumeu'ah payong nanggroe  
Adekteu nyoe han ek saba  
Seulaseh di gunong hijo  
Aneuk tulo woe lam rimba

Nyoe tuanku ranup ka tho  
Han le hijo kureueng gura  
Ranup tho pineung tuge lhom  
Bruek tirom lon boh keu gapu

Bek tuanku muka reudom  
Bak neujak lom 'oh lon jak eu  
Meunan jikheun putroe bungong  
Maneh reunom sang ie madu

Si nyak banta bungong teuprom  
Allah bungong bri tuanku  
Reudok di gle ujeuen han tom  
Aleh pakon peue kareuna

Reuloh ate soe jeuet kalon  
Pihak bungong seubab ka na  
Bek le po cut tameurawon  
Reuloh mantong cut bang gata

Meunan neukheun banta Kureh  
Bungong laseh cawan piala  
E cut abang deungo beu gleh  
Bek seudeh singoh ngon lusa

Teubiet u blang theun beuriyeueng  
Koh naleueng keu umpeuen guda  
Meuna meuheuet keu cut mugleueng  
Peunyukeueng bak punca ija

Lam lampoh tapula mane  
Boh pae lam puteng bara  
Teungku ka sep beukai neume  
Bek jiteumee le pari diwa

Meuna galak tapeugot lampoh  
Beu sunggoh tapula lada  
Di lon teungku sang bek jeuoh  
Bah lon boh lam puetoe kaca

Cempala cut woe cot uroe  
Jak manoe bak kulam tahta  
Meuna neugaseh keu cut putroe  
Peulara droe po meukuta

Bek jikalon le barangsoe  
Roh mupaloe akhe masa  
Pinta han troh tuanku droe  
Lom ngon rugoe han meudumna

Miseue haba yoh saboh roe  
Peuneugah nyoe ureueng tuha  
Haba Afan tuanku droe  
Dua nyoe ngon Balukia

Padumna trep geubeurjalan  
Keumudian gop nyan fana  
Nyoepi meunan syahi alam  
Ban Afan ngon Balukia

Nyang jeuet e po that lon ngeuri  
Raya sakti dua apa  
Padum raja ka lheuh mate  
Bak teungoh gle Peuranta Nila

Peue sebab gurana buleuen  
Ladom geukheun bala nyang raya  
Ladom geukheun uroe meuteumeung  
Ladom geukheun nekmat ka teuka

Nyoepi meunan he pangulee  
Bek meuthee bak teungku apa  
Bek meugah deungon jitubee  
Lon malee singoh u lua

Meunan jikheun si nyak putroe  
Samlakoe ladat peurasa  
Puleh tahe neukheun meunoe  
E sambinoe deungo hamba

Si nyak banta rasa layoh  
Deungon cut aloh peugah haba  
Di cong gaja geutheun puyoh  
Leukek utoh jiwoe lam cintra

Bek peukeujot lon intan beh  
Ka lon troh nyawong lam gaca  
Jak u pasi pot beuramoe  
Ie meunanoe lam piala

Bek po cut peutakot kamoe  
Tujoх nanggroe ka lon bungka  
Ija puteh geupok kasab  
Nyang cakap tangkulok sutra

Ubak Tuhan ulon harap  
Han le ingat rugoe laba  
Manok puteh bijeh Kuantan  
Nyang boh nan bujang juara

He po cut bek takheun meunan  
Nyoe abang Kureh Keumala  
Breueh leukat pasoe lam kude  
Peugot tape po cut hawa

Teugo taeu ulon lape  
Breueh siare ek lon peuna  
On peutek taguen gule phet  
Seurindet cintra meugisa

Bek tabri ate lon saket  
Siblet-blet lon jak bak gata  
Meunan neukheun bungong rusep  
Lam lam saket mangatpi na

Teuma seuot bungong sukon  
Neudeungo lon po meukuta  
Minyak gahru baunya hirom  
Pokok ditanam di dalam kuta

Kucinta sudah beurteumu beulon  
Hate di dalam sangat beurcinta  
Meunan jikheun pade raden  
Sira jikhem putroe muda

Deungon mata sabé sureng  
Jikeureuleng atueuh banta  
Bukon sayang gule labu  
Han jeuet lon eu masen raya

Si nyak putroe beudoh laju  
Jak bri bu Kureh Keumala  
Jicok cumboi mat u jaroe  
Si nyak putroe ka jibuka

Han jan siat meusyap sampoe  
Idang bu nyoe sinan keulua  
Lheueh nibak nyan buleuen peuet blah  
Jibet pantah jaroe dua

Makeuen teungku peue na mudah  
Sebab reuah jarak teka  
Sira tabeue campli putik  
Eungkot ciriek hana sira

Bek tuanku neuteuoh biek  
Gule pliek ngon reubong kala  
Reusam kanun han lon turi  
Lon dalam gle jarak banda

Han sapeue na hamba faki  
Lom adek ti gasien raya  
Meunan jikheun putroe meulu  
Tuanku neutaleh haba

Nibak po cut dumnan lagee  
Nyang nibak kee han sapeue na  
Pajoh ranup ampon deelat  
Rasa ladat jeuep angeeta

Si nyak putroe teuduek sapat  
Meukeunong that nibak rupa  
'Oh lheueh makeuen bungong riwat  
Cumboi leugat putroe buka

Jiwoe idang ubak teumpat  
Cut kasab tinggai ngon raja  
Dalam jaroe ranup lipat  
Peu'ap leugat keu cut banta

Sira po cut seunda wayang  
Jikheun nyoe ban nibak raja  
E tuanku lon that deundam  
Bek jeuet masam cara seunda

Bak dada tagantung pawon  
Bak aron di mieng kuala  
E tuanku patbu neutren  
Peugah bak lon meusibanja

Peue nan geukheun bunda abi  
Soe geurasi nan meukuta  
Patbu makam nanggroe siri  
E doli neukheun bak dekda

Cuba peugah meusilapeh  
Mangat puleh ate luka  
Meunan jikheun putroe areh  
Banta Kureh seuot teuma

Wahe po cut tango beu gleh  
Tapileh jinoe lon buka  
Nan nanggroe Anta Peurdani  
Juhan Ali nama bapa

Sikanda Lela nama umi  
Kureh Pari nama hamba  
Nyankeu nama lon adek ti  
Di gatapi ci kheun nama

Di adek budiadari  
Soe geurasi geuheu le ma  
Pat daerah gampong nanggroe  
Ayahteu soe geuheu nama

Peugah po cut ubak kamoe  
Nak lon tusoe singoh lusa  
Peue buet sinoe gata sidroe  
Meuligoe soe po areuta

Pakon geutroh gata sinoe  
Peue seubab nyoe asai mula  
Cuba peugah po sambinoe  
Kheun bak kamoe nyang sibeuna

Yoh masa nyan si nyak putroe  
Jikheun meunoe bak cut banta  
Nama ayah raja Ahmad  
Sideh teumpat atueh donya

Nyang keurajeuen timu barat  
Geuleungkap di padang 'ala  
Peurmaisuri nama ibu  
E tuanku dilee masa

Ulon tuan teuma laju  
Nan meusyeuhu siti Deulima  
Masa dilee yoh saboh roe  
Neukheun meunoe le ayahda

Soe nyang troh jak bak teumpat nyoe  
Ngon hana peue hali mara  
Nyankeu judo ulonteu nyoe  
Barangsoe han meuceh raja

Nyankeu sebab roh lon keunoe  
Bak teumpat nyoe dilee masa  
Kaha Pari Batee Beusoe  
Nyan di kamoe teungku apa

Nyankeu ureueng jaga kamoe  
Di bumoe ngon dalam hawa  
Bek jeuet tamong baranggasoe  
Bak putroe siti Deulima

Teuma jinoe di tuanku  
Neukheun laju bak adekda  
Di lon ate sabe rindu  
Tuanku han jeuet le gisa

Meugohlom pueh lon mat lon eu  
Bah di lepu ngon adekda  
Meunan jikheun bungong meulu  
Seuot teungku banta muda

Jeumpa puteh bineh kulam  
Palinggam bate mareuma  
Cuba takheun pirak hupam  
Bak cut abang nyang sibeuna

Jeuet meukawen ngon lon tuan  
Meutungan laen kana  
Di lon kutiek nanggroe makam  
Nyang deundam rupa adekda

Meunan neukheun banta seudang  
Seuot intan putroe muda  
Seulayang di dalam awan  
'Oh malan jitren u donya

Pakon teungku neukheun meunan  
Bek syok waham judo lon na  
Ateueh gle tapula campli  
Boh ubi pajoh ngon gula

Bek tuanku le meucakri  
Suami di lon meukuta  
Hana hajat lon barangri  
Bah meuseuki raja raya

Keupeue jeuet le ie dalam blang  
Ie seumbahyang saboh tima  
Kepeue jeuet le uleebalang  
Meusidroe tan budi basa

Nyoe tuanku bungong salop  
Jeuet neupot barangian suka  
Hana soe tham ngon jiceugot  
Meunyo got keunong di mata

Han apon tuanku di rot  
Roh bak got idang neubuka  
Watee reumbang troh keumari  
Raseuki mudah lagoina

Nyoe ka troh teungku nyang faki  
Khanduri mula phon buka  
Nyang laen han ek ulon bri  
Cut adek ti gasien raya

Nyoekeu nyang na ulon bagi  
E doli neutueng adekda  
Bek tuanku le meucakri  
Di lon ate sang ka luka

Nyang sayang di lon bak ate  
Keu doli Kureh Keumala  
Jinoe ka troh nyoepat bagi  
Ho nyang neume ate rela

Si nyak putroe bungong usen  
Sulet sang jen bungong jeumpa  
Jimeututo sureng-sureng  
Jikeureuleng banta muda

Jipura ngieng le ho laen  
Sira jikhem hana reuda  
Si nyak banta hana le su  
'Oh neueu putroe poh cakra

Ka ngop jantong jiek napsu  
Di cut meulu jikhem lanja  
Banta Kureh bak masa nyan  
'Oh neupandang putroe muda

Teuglong mata seungkak dalam  
Laju pangsan banta muda  
Ateueh kaso le meuleupam  
Putroe intan jidrop sigra

Putroe jimoe laju meukram  
Leupah sayang hana ngon sa  
Allah he Po lon he Tuhan  
Pakon meunan e meukuta

Peue na salah bak pandangan  
Peundeungoran laen peue na  
Ek troh bak reubah pagsan  
E sultanan asoe tika

Bak masa nyan putroe intan  
Mawo rijang cok lam gaca  
Jilabo ubat atueuh badan  
Jisiram sampoe u muka

Puleh nibak nyan bungong peukan  
Nibak pangsan jaga banta  
Si nyak putroe nyang bangsawan  
Mat jitayang laju sigra

Banta Kureh ban neupandang  
Sang maluan bak adekda  
Lheueh nibak nyan neukheun rijang  
He buleuen trang deungo hamba

Gata ngon lon ka saboh fam  
Jinoe teuman lon jak gisa  
Bak rayek idin puteh licen  
Bah lon jak tren yoh goh jula

Yoh nyan uroe rab sampoe tahrem  
Leumah bak jen hana le gura  
Tabri mangat ate po lem  
Mangat ladem lom lon teuka

Meulhee uroe putroe linteng  
Troph ulon tren woe u tangga  
Lon niet gata rot geunireng  
Nak bek mireng jipo guda

Meunan neukheun banta linteng  
Panyot lilen ro ie mata  
Si nyak putroe bungong rampeng  
Ka meuleng-leng ngon ie mata

Bak jipike kande licen  
Teungku lem han le meugisa  
Dilee Jameun yoh saboh roe  
Lagee nyoe nyang ragoe raya

Muwoe haba keu po samlakoe  
Ngon putroe cut ti keumala  
Leumah pike si nyak putroe  
Sambinoe jitupeue basa

Meuka jeuoh pane lom toe  
Meuka neuwoe pat neugisa  
Meunan pike kande licen  
Teungku lem jipeulheueh hana

Putroe jimoe ka meuleng-leng  
U geunireng jipaleng muka  
Si nyak banta teuka ngeuren  
Sira cut ben meunoe haba

Bintang timu hu seumeuloh  
Bintang tujoh peungeuh donya  
Wahe adek puteh leusoh  
Lon peutroh janji ngon gata

Lon niet gata dada tuboh  
Bek jeuoh ate cut rakna  
Adat lon woe nyan u baroh  
He adek beh lom lon gisa

Siat lon woe bungong keumang  
He intan keumala donya  
Bek e kande ate leukang  
Troph lon riwang keunoe bak gata

Meuna umu bungong peukan  
Ngon rijang lon woe bak gata  
Bak lon takat uroe siang  
Laheran bak apa gata

Meunan neukheun banta Kureh  
Rab puleh ate cut rakna  
Rumeh bacut po cut puteh  
Meunoe meudeh neukheun le banta

Si nyak putroe bungong leubue  
Bak takue jiwa cut banta  
Jilhok jaroe jimeusintue  
Banta jihue atueh geuta

Meupuluen-puluen banta ngon putroe  
Bandua droe sapeue that hawa  
Si nyak putroe lheueh nyan meunyanyi  
Miseue bangsi deungon biula

Mangat that tapajoh kanji  
Minyeuk sapi nyang meurasa  
Jinoe abang jarak ka lon bri  
Ingar janji bek talupa

Baranggasoe jiubah janji  
Troh bak titi hitam muka  
Meunan neukheun uleh Nabi  
Barangri umat lam donya

Nyankeu lon kheun wahe doli  
Bek neubri ate lon luka  
Bukon sayang lon eu panjoe  
Timoh duroe meucula-cula

Adat teungku rijang neuwoe  
Nyoe putroe han teungeut mata  
Pakri neujak neutiek putroe  
Mate sinoe soe eu hana

Meunan putroe dum meuato

Ngon jibae lagee raya

Jiwa jicom linto baro

Ateueh kaso meuhue-hila

Hana reuda jimoe bae

E judo pakon neubungka

Kureh Pari buka tuto

Dara baro bek le rugha

Bak ipok di dalam kulam

Di manyang jiduek bangguna

Bak seulamat intan beukai

Gata tinggai lon kubungka

Si nyak banta meunan kalam

Cut intan jiseuot sigra

Bukon sayang lon eu bam bang

Jiteureubang u antara

Beu seulamat tuanku abang

Bak beurjalan bek na mara

Banta Kureh bungong meurak

Neusigak beudoh bak tika

Neukeumeung tren neubet tapak

Cut manyak jimat bak ija

Jicom sigra nibak talak

Ka neujak di tupon muda

Ka neukeubah puteh muprak

Allah Po hak puteh mata

Allah e Po Tuhan kamoe

Neutiek sinoe le kakanda

Han neuba lon tuanku droe

Mate keudroe 'oh tan gata

E cut bang bek dilee neutren

Mantong meusyen cut adekda

Si nyak putroe ka meuleng-leng  
Teungku lem jipeulheueh hana  
Ya Tuhanku neubri mate  
Bek lon eu le langet donya

Nibak tunu rangoe ate  
Got reule tuboh ceulaka  
Keupeue udep han meusampe  
Di gop geucré geuwoe bak ma

Di cut abang seunang sabé  
Ho nyang ate geujak lanja  
Di lon putroe sinoe mate  
'Oh hana le meukuta donya

Yoh masa nyan Kureh Pari  
Neueu cut ti rugha raya  
Hana jeuet le neubet gaki  
Lam ate sayang lagoina

Neucom sigo nibak ulee  
E mangat bee ka mumada  
Bek le tamoe bungong keumbee  
Dumnan ka mee peulheueh hamba

Neucok putroe ka neuugon  
Lam ayon neupeueh sigra  
Banta Kureh beudoh neutren  
Beudoh cut mbon lom ka jiwa

Leubeh-leubeh daleh phon-phon  
Cut sadon rusakjih raya  
Mata sabé bak tu ampon  
Neuba ulon he kakanda

Bek neuukeubah 'oh lheueh apon  
Meuhat ulon tinggai donya  
Yoh nyan banta han jeuet le tren  
Neueu cut mbon tumbok dada

Ka neudong bak abah pinto

Ka tahe miseue geupula

Neueu po cut got that bae

Meusye-sye lam kaso sutra

Han jeuet neujak seungkak tahe

Sang-sang ka ro tuboh angeeta

Putroe jikheun ruweueng-rungkho

E judo e bek han neuba

Bukon sayang lon eu peutoe

Teiduek keudroe gunci han le

Leupah judo tren uroe nyoe

Lon di sinoe teuntee mate

Lon pabanbah tuah dumnoe

'Oh na lakoe han meusampe

Bukon sayang lon eu labu

Teungoh leuhu abeh mate

Bukon sayang lon eu teungku

Teungoh rindu ka hana le

Nyankeu tanda ya Tuhanku

Han troh napsu teutap mate

Di putroe meurawé laju

Di tuanku han jeuet dong le

Bak masa nyan banta seudang

Teuka sayang han mupeue le

Neueu putroe moe meuguncang

Ka neuriwang neucok kande

Neucok putroe boh lam leumueng

Sira neukheun bek tamoe le

Wahe adoe taloe reukueng

Nyoe ka bajeueng bak lon pike

Pakon cut dek han ek tatheun

Cuba takheun pheuet meuuke

Banta Kureh meunan neukheun  
Putroe buleuen jiseuot le  
Bukon sayang lon eu buleuen  
Rambideuen sutra jirawe

Teungku leupah woe u mideuen  
Nyoe bayeuen umpeuen hana le  
Laju pijuet tirut tuleueng  
Plok umpeuen sinoe hana le

Lon duek lon eh lipih peunyum  
'Oh kureueng umpeuen boh awe  
Bukon sayang lon eu ranup  
Bak reudeuep keu tawo sabe

Di lon teungku tuwo neubeuet  
Nyang ka jeuet sikrak tafeuse  
Bukon sayang lon eu tiong  
Woe u gampong 'asa akhe

Jinoe di lon asa apon  
Untong-untong han neuwoe le  
Meuhat jinoe di lon deuek troe  
Teungku neuwoe nyan ú Meuse

Peue nyang lon mat lheueh bak jaroe  
Lon ingat nyoe ampon doli  
Meunan jikheun bungong meurak  
Meutimplak tuto jimise

Di tuanku laju neujak  
Ka pueh galak peunoh ate  
Ulon tuanpi ka rusak  
Ampon neujak sipanyang be

Wahe teungku Kureh Pari  
Jinoe pakri nyang meusampe  
Jinoe neuwoe idin lon bri  
Keumari pajan lom hampe

Cuba peugah nyang meuseuti  
Nak lon bri tuanku neucré  
Sira putroe jitanyong kri  
Beureuhi hana seunabe

Putroe jikap nibak bibi  
Kureh Pari arat kon le  
Sira neukheun bek he putroe  
Saket tuloe hana sabe

Han jideungo po sambinoe  
Maken putroe jilho sabe  
Banta Kureh bungong ceuko  
Ka talo ngon panyot kande

Ka reubah di ateueh kaso  
Dara baro hana lheueh le  
Si nyak banta hana le su  
'Oh jiburu pheuet meuuke

Ka teueh dalam keuleumbu  
Seungap 'a-'u Seulindang juhari  
Si nyak putroe lom jimeusu  
Peue tuanku neueh sabe

Meuna meuheat keu jeubeuet madu  
Neukheun laju bek seungap le  
Lon eu mandang han sagai su  
Peue neueu galak di ate

Meunan jikheun pade raden  
Ka teukhem-khem Kureh Pari  
Allah cut puteh areh licen  
Nyang canden keu ubat ate

Jinoe po cut idin tabri  
Yoh goh hari peungeuh sare  
Bek jieu le Kaha Pari  
Batee Beusi bek deuh lahe

Ulon takot keunong sakti  
Jibuni ulon eu kande  
Nyankeu lon kheun he putroe ti  
Bek seukali reuloh ate

Bek tatakot he meuh uroe  
Troh ulon woe lom bak kande  
Hana troh meutujoh uroe  
E putroe keunoe lon woe le

Wahe po cut bungong jiem-jiem  
Keu lon tangieng meuube pade  
Banta neucom sigo bak mieng  
Gata idin lon ka lon cre

Si nyak putroe seungkoe teuhing  
Ka lon idin jantong ate  
Teutapi he teungku ampon  
Bek asa lon reuloh sabe

Bek neuukeubah meugantoe thon  
Sayang apon sinoe mate  
Meunan jikheun meugleueng sabon  
Banta neutren ngon bagah le

Guda Janggi ka jimarit  
Sang meugriet he ampon doli  
Kareuna uroe ka jiteubiet  
Jikeumiet le Kaha Pari

Neuek laju banta seudang  
Teureubang Keumala Janggi  
Meuligoe yoh nyan meuguncang  
Meuhayak ban geumpa bumi

Teukeujot putroe bangsawan  
Kon wayang bak teungku ili  
Si nyak putroe beudoh meusyap  
Bak tingkap peurab jeungeuk le

Deuh jieu banta beurangkat  
Meulap-lap ngon guda sakti  
Si nyak putroe hireuen ladat  
'Oh jilihat banta ili

Bit that areh ngon hekeumat  
That hebat cut abang kami  
Bitkeu troh bak lon neupeurab  
Ek neusingkat Kaha Pari

Hana laen bak lon pandang  
Teungku abang Kureh Pari  
Meutuah that ulon tuan  
Roh tunangan biek meusakti

\* \* \*

## V. KUREH PARI KEUNONG BALA

Si nyak putroe teutap mandang  
Banta seudang kisah rawi  
Puteh timu beungoh uroe  
Meuligoe hana meuho le  
  
Raja guda bungka sampoe  
Tajam tuloe e boh ate  
Jilalu rot ujung gunong  
Jitamong rot awan muble  
  
Jibilok rot awan gunong  
Meudeungong sibagoe suwe  
Yoh masa nyan banta bungong  
Teukeunong ngon grak Ilahi  
  
Teungoh neupo sangat tajam  
Meuteuntang ngon bangsa pari  
Tantra raja Batee Hitam  
Pahlawan ngon meuntroe wadi  
  
Tujuh ribee nyang saktian  
Ngon hebatan hana sakri  
Kaha Pari keupala prang  
Nyangaan putroe siti  
  
Batee Beusoe nyang adoe nyan  
Di cut intan apa wali  
Bak masa nyan dum pahlawan  
Deuh jipandang Kureh Pari  
  
Kaha Pari seuot leugat  
Ayoh tangkap jih pancuri  
Bek taduek le lambe leugat  
Laju ikat si yahudi  
  
Tujuh ribee jisuet peudeueng  
Ka jilinteueng Kureh Pari  
Nyang biek beuhe useueng-useueng  
Jilet meureung kanan kiri

Meuteuntang ngon intan buleuen  
Sira jikheun he pancun  
He ureueng muda samlakoe  
Namateu soe nyang geurasi

Riwang dilee yoh goh paloe  
Raja kamoe suroh nanti  
Guda deungo meunan ratoh  
Ngon beureutoh jiklik Janggi

Hanco awan ujeuen teudoh  
Ban guroh geulanteue jadi  
Pahlawan jen tungeng luroh  
Meureutoh ploh yoh nyan mate

Lila Kaha kalon meunan  
Busu intan mat u jari  
Jipeulheueh le ngon saktian  
Lam awan jijak meuti-ti

Teuka reudok seupot hitam  
Angen tajam tupeuen lagi  
Langet donya bandum seupot  
Jiek sagop han le meuri

Raja guda ka jibalot  
Lam sagop angen peunari  
Han jeuet jipo ka meusangkot  
Jibalot le angen sakti

Lom jitamah raja Kaha  
Deungon caka aneuk api  
Jeuet keu rante beusoe meulila  
Janggi Keumala ka meurante

Bandua ngon si nyak banta  
Meusingkla jaroe ngon gaki  
Hana jeuet le jiteureubang  
Banta intan guda Janggi

Ka layoh raja guda plang  
Lam awan meuhalie-halie  
Mubapot lam awan puteh  
Ka teueh dua ngon Janggi

Keumala ngon banta Kureh  
Ka abeh bak rupa dali  
That sayang bungong rambot  
Puyoh meulet lam seurahi

Bandua ka sret lam laot  
Po raja cut deungan Janggi  
Jaroe gaki ka mubalot  
Cut tulet abeh raseuki

Sinan hanyot dalam laot  
Kisah teutop 'oh nan e ti  
Hanyot keudroe lam angen pot  
Dalam ribot laot tuwi

Lam geulumbang manyang jibet  
Sinan hanyot han tatukri  
Ho jime le ie nyang tajam  
Jihantam u ate bumi

Yoh masa nyan ngon grak Tuhan  
Banta intan cre ngon Janggi  
Saboh saho han le karang  
Jibuang le bakat dulmi

Bukon sayang bungong siyueng-yueng  
Di reukueng boh jara mani  
Si nyak banta sret seulinteueng  
Meukaleueng ngon udeueng pasi

Badai guda nyankeu udeueng  
Jibaplueng seugala tuwi  
Bukon sayang bungong teuprom  
Ujeuen sumpom ro u pasi

**B**ukon sayang bungong teuprom  
**J**ipeuseunom kanan kiri  
**J**euep lebok meurungkhom teugom  
**B**akat sumpom hana lanti

**Y**oh masa nyan udeueng tima  
**H**ana reuda jijak sabe  
**A**beh jilop jeuep-jeuep paya  
**A**beh jiba jeuep-jeuep tuwi

**B**ukon sayang bungong tajok  
**J**eh bidok di bineh pasi  
**U**deueng jiba jeuep sagoe lhok  
**B**anta elok Kureh Pari

**H**ana teutap beungoh seupot  
**U**deueng peulop seugala be  
**A**beh asoe palo atot  
**B**anta cut 'oh nan teukeudi

**A**beh asoe tinggai tuleueng  
**D**awok udeueng jipeunari  
**Y**oh masa nyan mate udeueng  
**S**eubab umpeuen han jeuet cari

**S**i nyak banta sret seulinteueng  
**L**am ie paseueng bineh pasi  
**K**a jilambong uleh bakat  
**T**imu barat taeu bla-ble

**A**beh putoh jeuep-jeuep urat  
**K**a teupat banta meugule  
**H**o tajam ie hanyot leugat  
**L**am bakat takalon ile

**K**aya Tuhan sidroe Esa  
**K**eu cut banta Kureh Pari  
**S**aboh pusong hanyot banta  
**K**eunan lanja ka meugule

Miseue bateueng ie raya ba  
Si nyak banta atueuh pante  
Teueh sinan atueuh anoe  
Samlakoe rupa ka mate

Han tom ureueng keunan sidroe  
Uteuen tuloe sampoe u gle  
Si nyak banta bungong uroe  
Teueh sidroe atueuh pante

Bukon sayang bak geurupheueng  
Ateueh ateueng jih geupula  
Harah balek titek meulheueng  
Jareueng-jareueng sigo tuka

Keunong lagee watee takheun  
Galak ureueng deungo lingka  
Meunan ragam karang geukheun  
Tanda useueng ureueng rika

Bek lagee sot han got reubeueng  
Bosan ureueng teungku baca  
Nyoe lon kisah keu po udeueng  
Ka jiplueng u laot raya

'Oh han le banta atueh rueng  
Beudoh jiplueng udeueng tima  
Bitpi jiplueng han le ingat  
Han jitupat satu apa

Udeueng tima 'oh nan teutap  
Lon hikayat Janggi guda  
Bayu patah angen bapot  
Puyoh meulet dalam cintra

Guda Janggi rawi seubot  
Nyang dilee sret deungon banta  
Di jih karam dalam laot  
Teukeujot Janggi Keumala

Ka timue Janggi meutuah  
Ingat pantah nyan keu banta  
Di ateuuh rueng han le leumah  
Ho ka leupah gata raja

Wahe raja bungong pade  
Gata han le ho leupah ka  
Yoh nyan Janggi jimita le  
Sajan ile ngon ie mata

Euntah udep sabet mate  
Ho lon cari gata raja  
Janggi langue dalam laot  
Taeu jilop bakat raya

Jijak seutot culot ka sret  
Jeuep-jeuep laot langue lanja  
Guda langue keunoe keudeh  
Mita Kureh raja guda

Pijuet tuboh awoh reugeh  
Hana jieh siklep mata  
Padumna trep lawet jalan  
Meuteumeung tan Kureh banta

Dua buleuen lam laot nyan  
Sret guda nyan bak saboh rimba  
Bak rimba nyan pulo tujoh  
Keuanan ka troh raja guda

U bineh leugat jipioh  
Ngon tuboh leumoh lagoina  
Peurtama phon pulo Syetan  
Keudua nan pulo Beurhala

Pulo Cicem keulhee geuboh nan  
Keupeuet teuman pulo Naga  
Pulo Hantu keulimong meuhat  
Keunam muktamat pulo Bue kra

Nyang keutujoh pulo keuramat  
Sinan le that dum eelia  
Guda hanyot keunan leugat  
Ubak teumpat pulo raya

Nama geukheun pulo Hantu  
Keunan laju sret po guda  
Jiteungoh le pantah mupru  
Jak mita bu deuekjih raya

Guda meurot lam pulo nyan  
Naleueng sinan dum komkoma  
Teukeudi Po sidroe Tuhan  
Keu Janggi nyan teuka bala

Teungoh-teungoh rot makanan  
Teuka keunan saboh rupa  
Bangon eungkong rupa hitam  
Jilumpat yoh nyan ateueh guda

Ka jigiduek ateueh ulee  
Janggi geudee asek lanja  
Teuma eungkong sret bak abee  
Laen lagee teuma teuka

Laen ka troh macam-macam  
Jiek keunan ateueh guda  
Raja guda lumpat tajam  
Singa hitam lom ka teuka

Na sikeujap laen ka troh  
Mawah lapoh laen teuka  
Lom ka jiek meureutoh ploh  
Janggi utoh jiplueng lanja

Sira jiplueng ngon jideumpek  
Maken jiek le lagoina  
Yoh nyan guda rasa rahek  
Jibalek lam laot raya

Guda langoe silagoe ek  
Jitilek pulo nyang dua  
U darat laju jipeutoe  
Ka leupah droe nibak bala

Teutap sinan dua uroe  
Puleh asoe raja guda  
Naleueng jirot pruetjipi troe  
Sinan laloe po Keumala

Nyoe ho laen meuriwang-rawoe  
Adek putroe bek le subra  
Peunoh buleuen peuet blah uroe  
Peungeuh nanggroe trang cuaca

Mewoe ratoh yoh saboh roe  
Lon kisah nyoe Kureh banta  
Keunan meulu nyoho muwoe  
Nyang saboh roe keunong bala

Deungon kheundak grak bak sidroe  
Po geutanyoe sangat kaya  
Teuka keunan sidroe pakeh  
Pangkat leubeh atueuh donya

Deungon sakti ahli saheh  
Akai sareh ngon eelia  
'Oh neuteupok dua jaroe  
Teudong nanggroe apui teuka

Teuka ujeuen neuleueng jaroe  
Ngop nanggroe teuka ie raya  
Neutop muka reudok sampoe  
Seupot tuloe geulap-gulita

Hana meuri gop deungon droe  
Nyankeu bagoe pakeh eelia  
Tan soe linteueng bileueng nanggroe  
Baranggasoe gadoh bisa

Eelia jak bak siuroe  
Meuteumeung nyoe Kureh banta  
Teungku pakeh nyan keuramat  
Neulihat banta teurhanta

Teuka enseueh weueh neuingat  
Bak nyan siat di eelia  
Neungieng u langet neuleueng paleuet  
Teungku neubeuet saboh do'a

Si nyak banta mata teubleut  
Nibak teungeut beudoh lanja  
Ka teiduek muda samlakoe  
Ateueh anoe abee sira

Baro leumah langet bumoe  
Cut banta nyoe ingat teuka  
Baro peungeuh mata ate  
Muwoe pike po jroh rupa

Baro neuthee droe ka mate  
Ban lahe neupandang donya  
Banta neungieng keudeh keunoe  
Leumah sidroe nyan eelia

Ka neubeudoh po samlakoe  
Seumbah jinoe nyan eelia  
Po banta cut com di gaki  
Ampon kami e meelana

Gata teungku badai abi  
Suroh Rabbi akan hamba  
Hana laen lheueh bak syekhi  
Neutueng kami hamba hina

Bak masa nyoe keurelaan  
Ban hukoman ya syekhuna  
Ilah hana upaya tan  
Dalam badan nyawong hana

Asoe darah ka lon pulang  
Bawah kidam ya meelana  
Neupeuudep neupumate  
Ban nyang pike ayah hamba

Meunan neukheun pheut meuuka  
Eeliapi seuot lanja  
Kru seumangat he boh ate  
Keunoe hampe peue seubab na

Pakon aneuk bak polo nyoe  
Soe tiek keunoe dilee masa  
Pat daerah gampong nanggroe  
Namaneu soe ayah bunda

Soe nan gata po samlakoe  
He aneuk droe cahya mata  
Cuba peugah he bintang sret  
Baci seubot asai mula

Si nyak banta teuma seuot  
Jaroe neubet u jeumala  
Nama nanggroe Anta Peurdani  
Juhan Ali nama bapa

Lela Sikanda nama umi  
Nama kami Kureh Keumala  
Nyang jeuet datang ulon keunoe  
Saboh roe seutot rahsia

Bak simalam ulon lumpoe  
Sidroe putroe Seulindang Deulima  
Rupa indah hana bagoe  
He teungku droe guree hamba

Limong blah thon lon cre nanggroe  
Hingga sampoe ban lon cinta  
Troh lon teuka saboh nanggroe  
Nama nyoe Sukaran Indra

Ateueh gunong manyang han soe  
Meunan lumpoe lam rahsia  
Di gunong nyang manyang tinggi  
Geurasi Peuranta Nila

Keunan ulon troh peureugi  
Deungon Janggi raja guda  
Troh lon tamong lam meuligoe  
Deungon putroe meurumpok teuma

'Oh lheueh abeh lon meujanji  
Lheueh nyan kami beudoh gisa  
Lon ek guda lon teureubang  
Hajat pulang he ayahda

Lam awan teukeudi Tuhan  
Meurumpok ngon saboh tantra  
Lon jimeuheu jiyue riwang  
U beulakang uleh raja

Guda Janggi tan padoli  
Jilari leubeh bak nyang ka  
Teuma jiboh saboh sakti  
Keunong rante deungon guda

Guda Janggi hilang kuat  
Sret leugat sigo bandua  
Lam laot sinankeu teumpat  
'Oh nankeu had lon thee nyang na

Di Janggi aleh ho nanggroe  
Di kamoe aleh ho donya  
Aleh udep Janggi sidroe  
Sayang lon nyoe akan guda

Seuot teungku bek tagundah  
Janggi indah ka lam tapa  
Gata aneuk bek that sosah  
Neubri le Allah meurumpok teuma

Jinoe aneuk di pulo Jen  
Dang jisalen le Beureuma  
Raja guda sinan cut ben  
Han peue ngeuren dapat teuma

Cit lam tapa han tom jitren  
Troh bak musem lahe teuma  
Jinoe leubeh nibak dilee  
Le eleumee nibak nyang ka

Bek tagundah batee ulee  
Lom meuteumee deungon gata  
Jinoe aneuk lon peugah had  
He cut ubat deungo hamba

Gata aneukpi troh hajat  
Beureukat Sulaiman raja  
Bah lon ba u pulo keuramat  
Peue nyang hajat ase pinta

Bukon sayang putik langsat  
Ujeuen barat luroh mala  
Haba nyoe lon peutoe leugat  
Bek panyang that hana gura

Bukon sayang pade bijeh  
Abeh jipeh uleh bana  
Kureh Pari rawi saheh  
Ikot pakeh ho nyang neuba

Teungku neumat nibak tangan  
Neuba yoh nyan banta muda  
Neupet mata bungong keumang  
Neujak sajan nyan eelia

Wie ngon uneun han neupandang  
Neueu sinan rupa-rupa  
Eelia dum duek meusapat  
Lam ibadat pubuet taqwa

Masya Allah indah teumpat  
Banta lihat hireuen mata  
Si nyak banta akai dasyat  
Neueu teumpat jroh lagoina

Pakeh bunoe keunan datang  
Pioh teuman bak teumpatnya  
Yoh masa nyan neuseumulang  
Neubri yoh nyan dum pusaka

Nibak jaroe le neutatang  
Neupulang keu Kureh banta  
Neubri ija laju sikrak  
Bungong pirak dum meutia

Nyankeu ija nyang that gunjak  
Ate galak si nyak banta  
Bungong teungoh dum meusurat  
Isem keuramat banpeuet punca

Po banta cut neucok leugat  
Puteh lumat nyankeu nyang na  
Jampang aneuk tameusalen  
Puteh licen manoe gata

'Oh tamuprang intan ngon jen  
Nyoe lom tuben saboh caga  
Sireutoh peuet sinoe kasiет  
Pat nyang meugriet le tacinta

'Oh lheueh tapeh nyan tawasiet  
Ngon sigo klep gaduh rupa  
Teuka laen teuma sidroe  
Keu samlakoe neubri do'a

Nye he aneuk bak tasiboe  
Hekeumat nyoe publa mara  
Watee tase tiga kali  
Cit gaduh le aneuk gata

Jen ngon ensan han leumah le  
He boh ate meugoh nyata  
Yoh nyan Kureh neupeurunoe  
Siat sampoe jeuet le lanja

Jeuet eleumee po samlakoe  
Teungku nyoe leupah neugisa  
Teungku bunoe ka leupah woe  
Troph lom sidroe nyan eelia

Nyoe he aneuk bak lon sidroe  
Josan nyoe lon bri keu gata  
Watee tatiek dalam laot  
Puyoh meulot jeuet keu data

Pulo nyan teuma mubeuet  
U langet keudeh lam hawa  
Jeuet taboh nan pulo josan  
Aneuk badan bak lon nyang na

Lheueh neubri nyan teungku hilang  
Na siat nyan laen teuka  
Hana meukon keunan **sampe**  
Deungon kande saboh neuba

Nyoe na bak lon pheuet meuuke  
Boh ate lon bri keu gata  
Pajan meugriet bungong pade  
Tasumpom le atueuh donya

Na sikeujap geumpa datang  
Rakyat lam prang bandum gila  
'Oh ka ase ban **dapatkan**  
Cok u tangan nyan gulita

Langet peungeuh bumoe teutap  
Leumah rakyat sigom donya  
Nyokeuh bak lon pirak lipat  
Sambot leugat banta muda

Lheueh nibak nyan teuma dudoe  
Nyan neuwoe laen ka teuka  
Saboh cumboi mat bak jaroe  
Neujok jinoe keu cut banta

Nyoe hai aneuk bak lon saboh  
Jampang gop poh po bentara  
Le that kasiet buleuen peunoh  
Peue tareuloh ase pinta

Deuh takalon asoe nanggroe  
Jeuoh ngon toe sinan nyata  
Leumah taeu urat bumoe  
Donya nyoe tatupat punca

Laot darat seugala syoe  
Lam cumboi nyoe leumah nyata  
Peue nyang hajat ase sinoe  
E samlakoe troh ban pinta

Peue na hajat keunan sampoe  
Tuhan sidroe bri keu gata  
Kureh banta sambot rijang  
Neubet manyang u jeumala

Di teungku nyanpi ka neuwoe  
Laen dudoe teuma teuka  
Dalam asap reudok tampoe  
Di dalam nyoe guroh teuka

Si nyak banta sang teupipoe  
Neudeungo bunyoe laen rupa  
Na sikeujap banta hanyot  
Ka teudong peuet droe eelia

Nyang keupala lam kawan peuet  
Nyang leubeh jeuet nibak dumna  
Si nyak banta lama sujud  
Neucom ban buet nyan eelia

Masa nyan teungku meuuke  
Ka neubri saboh keumala  
Saboh euncien hana sabe  
E boh ate nyoekeu nyang na

Cahya limpah hana mise  
Muble-ble leumah cahya  
Nyoekueh euncien wahe intan  
Ngon tatahan sangga mara

Jitakot seugala hewan  
Jipantang seugala bangsa  
Rayek kasiet bit lam alam  
Peue cintaan dalam dada

Watee napsu jak lam laot  
Sampoh bacut bak buminya  
Jeuet keu jalan leumpang beusot  
Puyoh meulet jeuet jak gata

Meunyo napsu tateureubang  
Mat bak tangan nyan keumala  
Jeuet rupa ban cicem subang  
Laen nibak nyan peue nyang hawa

Peue nyang hajat ate deundam  
Bak euncien nyan hajat cinta  
Lom ka neubri saboh busu  
Aneukjih hu ban neuraka

Sireutoh neuk hana jampu  
Ho tatuju sampoe saja  
Nibak aneuk ka meusurat  
Setan laknat gadoh bisa

Lom ka neubri saboh tungkat  
Nyan hekeumat balek mata  
Bak ujongjih ismu adalam  
Nibak uram ismu basa

Di teungoh-teungoh ismu 'adam  
Nyan kalam hekeumat donya  
'Oh tatunyok atueh sitree  
Jeuet keu batee ban seumua

Watee tapoh bungong keumbbee  
Jeuet keu abee laot raya  
Rakyat teuma jeuet keu laot  
Puyoh meulet nyankeu guna

Si nyak banta ka neusambot  
Cut tulet ka galak raya  
Ateueh bumoe 'oh neulinteueng  
Jeuet keu kreung nyang leubeh raya

Hana sidroe jeuet jeumeurang  
Iejih tajam hana ngon sa  
Pakri ile ban boh sungkam  
Di dalam nyan buya naga

Han ek peugah kasiet intan  
Guna laen meurupa-rupa  
Lom saboh payong cap alam  
Napi sajan saboh caga

Nama caga panca logam  
Nama alam panca warna  
Soe nyang mate lam puprangan  
Taba keunan udep sigra

'Oh lheueh cukop dum neupeusan  
Sibarang neutupat dum ka  
Yoh masa nyan teungku han le  
Hireuen ate si nyak banta

Na sikeujap he boh ate  
Ka sampe seupot lam donya  
Seupot seupeuet han deuh uroe  
Langet bumoe yoh nyan geumpa

Si nyak banta hireuen laloe  
Peue bala nyoe ya Rabbana  
Ban neukalon banta deelat  
Laen teumpat kon ban nyang ka

Neueu jalanpi luah that  
Hireuen ladat po got rupa  
Neujak laju bungong meurak  
Neupeunap bak jalan raya

Tanoh puteh peureuseh pirak  
Meutambak batee suasa  
Meuato batee palinggam  
Laen bak nyan batee mareuma

Seugala buet banta pandang  
Saboh padang luah raya  
Hireuen ate kande intan  
Han tom meunan neueu rupa

Kureh neujak nampak tajam  
Lam padang luah lagoina  
Padum buleuen neubeurjalan  
Meusapeue tan meurumpok na

Neujak sabe uroe malam  
Sikeujap tan pioh hana  
Neupeujok droe ubak Tuhan  
Nyang laen tan na kuasa

Uroepi han ujeuenpi tan  
Umpama ban kayee raya  
Deukekneu hana banta seudang  
Lam meunan nekmat neurasa

Padum na trep neubeurjalan  
Trok keunan bak labang donya  
Kureh Pari nyang meutuah  
Trok Buket Kaf nyan neuhalo

Neueu gunong masya Allah  
Manyang leupah troh lam hawa  
Koh kayee peugot meunasah  
Bak syiah pubeuet agama

Kureh Pari kheun bismillah  
U buket Kaf ka troh banta  
Dum neueu peuneujeuet Allah  
Nyang that limpah dalam donya

Di sinan neukalon sudah  
Masya Allah Po karonya  
Barang nyang tan soe pandangan  
Di sinan neukalon rupa

Deungon kheundak Poku Tuhan  
Keu cut intan Kureh banta  
Deuh saboh krueng rupa hebat  
Jalalat geurasi nama

Ie di gaki jiek u pucak  
Karonya Hak Kadim Baka  
'Ajaeb ate kande pirak  
Akai seungkak dalam dada

Meunan meunan buet di Tuhan  
Gaduh waham manusia  
Ek beureuhi soe nyang pandang  
Seulamat iman nyang troh teuka

Buket syeuruga nyan Buket Kaf  
Soe troh langkah han le deesya  
Nibak donya dumpeue mudah  
Dudoe leumah lam syeuruga

Kureh banta troh u atueuh  
Neueu peungeuh ban seumua  
Seugala dum neukalon deuh  
Bungong aneuuh Kureh banta

Meuteumeung ngon wali wali  
Ngon pari kayangan diwa  
Banta neujak kanan kiri  
Ngon janggi meurumpok teuma

Yoh masa cre keunong sakti  
Tuhan bri meurumpok teuma  
Guda sujud nibak gaki  
Ampon kami raja hamba

Padumna trep ulon ka cre  
Wahe doli keumala donya  
Uroe nyoe meuteumeung doli  
Ngon grak Rabbi lon ngon gata

Kudrat Tuhan gaseh Nabi  
Ka neubri meuteumeung dua  
Jinoe teuma he khalifah  
'Oh na langkah po meukuta

Ulon tuan ikot titah  
Ho peurintah lon jak saja  
Hana ubah sampoe page  
Han lon cre barangjan masa

Meunan jikheun uleh Janggi  
Kureh Pari seuot teuma  
Wahe guda nyang meubudoe  
Tuah kamoe bagi gata

Yoh nyan Janggi jikheun meunoe  
Ampon kamoe raja muda  
Bak Tuhan bek deesya kamoe  
Lon sidroe bek roh meureuka

Peurasaan lon hana le  
Ka mate lam laot raya  
Meuteumeung lom gaseh Rabbi  
Ngon doli raja di hamba

Teuma jinoe ho beureuhi  
Nanggroe siri neumeung bungka  
Atawa neuwoe u kayangan  
Bak cut intan putroe muda

Pakri nyang got bak ingatan  
He sulotan pike sigra  
Soe got tawoe u kayangan  
Tatueng bintang aneuk raja

Putroe tacok nanggroe taprang  
Taguncang Sukaran Indra  
Tapoh raja Batee Beusoe  
Aduen adoe raja Kaha

Seubab ku'eh raja pindoe  
Geutanyoe jiboh enaya  
Kureh seuot teuma meunoe  
Ban patot nyo he Keumala

Meuka abeh pike pakat  
Meuka teupat niet lam dada  
Nyang bak ulon bek tanyong proe  
Bak ingat droe he Keumala

Meunan neukheun po samlakoe  
Jaweueb meunoe raja guda  
Meunyo meunan tuanku droe  
Na bak kamoe saboh do'a

Bek taja cok dilee putroe  
Bak jinoe tuanku bungka  
Tajak u gunong Kasmi Diwi  
Teumpat Nabi meuseusuka

Mangat taeu seugala be  
Ateueh gle gunong mulia  
Hana tom troh soe beurjalan  
Di sinan teumpat eelia

Laen nibak dum roh ensan  
Nyang na iman keu Rabbana  
Meunan jikheun le guda plang  
Banta intan jawueeb pula

Wahe Janggi pat gunong nyan  
Tabeurjalan padum lama  
Adat tajak deungon gaki  
Padum lawi bak buketnya

Guda seuot hana jeuoh  
Na tujoh ploh thon tabungka  
Na ureueng jak nyang limong ploh  
Na nyang lhee ploh na nyang dua

Ladom teuma na mupeuet thon  
Nyang ladom meusithon hana  
Meunan meunan teungku ampon  
Nyang di ulon hana lama

Meunyo cukop ie ngon umpeuen  
Dua buleuen troh lon bungka  
Na ureueng jak sikhan buleuen  
Na nyang siseun siklep mata

Laen nibak nyan nabi nabi  
Troh peureugi sikeujap saja  
Meunan jikheun Keumala Janggi  
Kureh Pari seuot teuma

Meunyo meunan wahe sakti  
Peureugi geutanyoe dua  
Cukop pakat bandua si  
Banta ahli beudoh bungka

Laju neumat taloe keukang  
Teureubang Janggi Keumala  
Ateueh buket jiteureubang  
U manyang ngon gadoh donya

Jipo tajam miseue kilat  
Ngon sikeujap han meuho ka  
Gadoh bumoe han le mupat  
Dalam asap jipo saja

Uroe malam jalan ceupat  
Deuh mubakat saboh rupa  
Peuet ribee droe jiteureubang  
Payong keumang bandum rata

Nibak bangsa jen eseulam  
Kilu Zaman nyang keupala  
Meuntroe raja Kaha Zaman  
Jak seumeu'en aneuk raja

Lam peuratah mumanikam  
Putroe intan got that rupa  
Deungon payong meuribee ban  
Beurlian nyang hu meucayah

Nan putroe Nuron Beureuhi  
Ubat ate manusia  
Cahya badan miseue kande  
Tan seunabe seugala donya

Soe nyang eu Nuron Beureuhi  
Meugule sinan lam tika  
Sapai dua turon sabe  
Hana mise ngon tapeusa

Abeh putroe dalam alam  
Nyang meunan sang sidroe hana  
Cut Kureh teungoh teureubang  
Di jalan meurumpok teuma

'Oh ban sare deuh meuteuntang  
Meuriwang Kureh Keumala  
Wahe Janggi soe di deupan  
Cuba kalon supo tantra

Jiseuot Keumala Janggi  
He doli meukuta raja  
Ampoñ e po han lon turi  
Aleh pane tantra teuka

Meunyo meunan wahe Janggi  
Tacuba ci keunan lanja  
Mangat taeu peue angkatan  
Got that kawan lon eu rupa

Keumala Janggi jiteureubang  
U manyang atueh kawan bha  
Troph u atueh po samlakoe  
Neueu putroe indah rupa

Leumah cahya miseue kande  
Muble-ble keunong cut banta  
Sebab got that Nuron Beureuhi  
Ngon siti Seulindang Deulima

Neupo laju cut juhari  
Neulari leugat neubungka  
Padumna trep neuteureubang  
Neueu padang luah raya

Pulo nyan di dalam awan  
Meugantung nyan taloe hana  
Baduri pulo lam awan  
Teuinpap intan putroe muda

Hana meugrak tan meuhayak  
Ka meunan hak Allah karonya  
Si nyak banta keunan neujak  
Neupeurab bak pulo raya

Neukalon seugala awak  
That galak Kureh Keumala  
Tanoh puteh miseue pirak  
Mubhak-bhak leumah meucayha

Si nyak banta neujak keunan  
Troph bak taman neueu rupa  
Neungieng bale saboh sinan  
Indah han ban ngon tapeusa

Aneuk rinyeun intan pirak  
Hu mubhak peungeuh cahya  
Banta Kureh ate galak  
Rinyeun pirak mupeurmata

Lam bilek keurusi saboh  
Nyang leubeh jroh nibak nyang na  
Di tengoh peuratah saboh  
Analana jroh hana nyang sa

Lingga bale masya Allah  
Han jeuet kisah he syeedara  
Bungong peukan ngon rawatu  
Meujampu bungong seulanga

Got meujudo watee taeu  
Cut meulu hireuenneu raya  
Meulu meurak ngon sitahon  
Lam keubon mubanja-banja

Kayee meuh bandum hijo on  
Meususon dua lhee banja  
Di leuen bale saboh kulam  
Meuragam batee suasa

Nama geuboh Hayat kulam  
Ie di dalam dua janna  
Seunayan Hameh na di dalam  
Laen nibak nyan iejih hana

Kulam Hayat bale Gadeng  
Ie geupeutren di antara  
Uroe laen tho didalam  
'Oh Seunayan baro teuka

Karonya Po Tuhan Rabbi  
Nyang that suci Kadim Baka  
Jipot angen timu padang  
Karam tungkang laot barat

Kureh Pari beureuhi bimbang  
Laju keunan le neupeurab  
Dalam taman cut banta jak  
Neueu sigak dum lat-batat

Bineh kulam banta singgrak  
Neueu layak seugala hebat  
Neungsieng atueuh batee budak  
Meuteuratak sinan got that

Deungan rupa gura sigak  
Sang pirak meukilat-kilat  
Saboh euncien leumah mubhak  
Cut banta jak keunan peurab

Euncien putroe Nuron Beureuhi  
Bak jak mandi dilee silap  
Bak masa nyan Kureh Pari  
Euncien siti neucok leugat

Neukucup na tujoh kali  
That beureuhi banta deelat  
Sok di gitek tangan kiri  
Jibeudoh le cahya meulap-lap

Lom meutamah leubeh sakti  
Banta ahli jiek hebat  
Ateueh bale neupeureugi  
Bak keurus i pioh leugat

Suet pakaian po juhari  
Neujak mandi ploh keurawat  
Neujak manoe suci badan  
Teungoh rijangle u darat

Ka neukek ubale yoh nyan  
Pioh teuman nibak teumpat  
Na sikeujap lheueh nibak nyan  
Trok keunan saboh alamat

Burong nuri nan Kadiman  
Jidong sinan atueh tingkap  
Rupa indah hana lawan  
Banta intan le jihadap

Deungon panton jikheun rijang  
Ngon meujeulisan nibak adat  
Sudah datang bintang peureuseh  
Masok keu taman seumayam diri

Sudah datang tuannya areh  
Dudok di geuta turon beureuhi  
Teureubang meurak dari Asahan  
Jatoh keu taman batara puri

Tuannya sayang hamba di hutan  
Rindu teurpeundam di dalam hate  
Aneuk meurak di padang timu  
Kuceng keutam bunga meulati

Tuan umpama seupohon kayu  
Teureubang burong turon beureuhi  
Meunan jikheun le Kadiman  
Mangat ngon nan rupapi tari

Cidah rupa diwata nyan  
Ngon budiman hana sakri  
Mandang tahe banta intan  
Neueu macam cicem nuri

Banta seuot teuma lheueh nyan  
He cicem soe nan geurasi  
Toh ureueng po kah ulon droe  
Pane nanggroe teumpat siri

Tohbu gampong tapeugah proe  
Pat putroe Nuron Beureuhi  
Cuba peugah he ulon droe  
Ngon taman nyoe tapeugah kri

Meunan jikheun po samlakoe  
Seuot meunoe cicem nuri  
Deelat ampon payong nanggroe  
Deungo jinoe lon peuturi

Saboh nanggroe di Buket Kaf  
Mideuen Tufah nan geurasi  
Kaha Zaman nyang khalifah  
Peurintah seugala neugri

Laen teuma ureueng meugah  
That barollah meuntroe wadi  
Nibak bangsa jen eseulam  
Sulotan lhee aneuk boh ate

Aneuk tuha Nuron Asyek  
Nyang adek Nuron Kasmi  
Teuma nyang keulhee he cut baek  
Nyang cantek Nuron Beureuhi

Dua aneuk bak ma Jariah  
Nyang saboh sah bak cut nyak ti  
Sireutöh peuet ribee nyang meugah  
Khalifah bangsa beurani

Bandum gagah ngon peurkasa  
Laen teuma dum sipai  
Nyang dua he po meukuta  
Judo ka na ayahgeu bri

Nyang hana lom he meukuta  
Cut rakna Nuron Beureuhi  
Nyang kulam nyoe nyan po atra  
Bak meuupa cut intan ti

Bak nam buleuen sigo datang  
Bak kulam putroe jak mandi  
Sajan geuba Kilu Zaman  
Nyan harapan raja doli

Tujuh ploh droe ngon dendayang  
Teureubang sajan ngon putroe ti  
Putroe cidah ngon ceureudek  
Ban geupeutek beuneung peuti

Fam kutika nyang that tarek  
Cut baek leubeh beureuhi  
Goh na judo bungong usen  
Hana kawen cut Beureuhi

Soe nyang kalon ek beureusen  
Got that linteng wahe doli  
Nyang na bacut salah banja  
Keu peuha putroe juhari

Han ek soe bri ube nyang ka  
Payah raya bak tacari  
Kureh tanyong peue keu peuha  
He diwata cuba kheun kri

Ampon e po nyang mustahak  
Kon meuh pirak peuha cut ti  
Hana neutueng bah lhee cupak  
Hana galak dum nyang tabri

Meunan dilee lon deungo haba  
Yoh teuka ureueng seulangke  
Jeuep-jeuep nanggroe teuka raja  
Bandum peuha han ek jibri

Peuha putroe he meukuta  
Nyang suka ayah cut ahli  
Di teungoh laot Sikatra  
Geukheun peuha pawoh janggi

Lhee sikarang nyang goh mala  
Nyankue peuha soe nyang ek bri  
Hana meuceh aneuk raja  
Beuthat bala geusyik waki

Neutueng laju uleh raja  
Seureuta neupulang cut ti  
Siblah nanggroe lom neupulang  
Le sulotan ayah cut ti

Meunan janji raja makam  
Di hadapan na ngon saksi  
Meunan jipeugah le Kadiman  
Bak cut seudang Kureh Pari

Si nyak banta yoh masa nyan  
Tahe mandang atueuh nuri  
Teuingat keu bungong pawoh  
Bit that jeuoh bak rupa ri

Bak watee nyan haba putoh  
Banta pioh neuseumike  
Pike syawe syeedara beh  
Bungong pawoh nyang meuseuke

'Oh lheueh siat haba putoh  
Haba teudoh Kureh Pari  
Lom neumuproe ngon diwata  
Keuhai peuha Nuron Beureuhi

Bungong pawoh jeuoh raya  
Soe jak mita e ya Rabbi  
Pakri tacok bandum rupa  
Akan peuha putroe siti

Bukon jeuheat yah cut rakna  
Nyang kon rupa soekeu ek bri  
Yoh masa nyan ka teuingat  
Amanat peuneusan syekhi

Ka neucok cumboi hekeumat  
Neulhoh leugat neukalon kri  
Cumboi sakti ka jigisa  
Leumah nyata pawoh janggi

Di pusat laot Sikatra  
Deuh rupa di sinan meuri  
Ateueh ulee naga raya  
Hana ngon sa dalam neugri

'Oh surot ie keunan tamang  
'Oh paseueng keunan cit ile  
Peureudee ngon ujung cabeueng  
Jak ureueng lhee buleuen ili

Ma geureuda sinan umpung  
Soe meudieueng jipajoh le  
Bungong pawoh jaga bandum  
Hana kureueng saban hari

Le that bangsa bala uteuen  
Soe meudieueng jipajoh le  
Abeh neueu seukalian  
Neupandang lam cumboi sakti

Teuma neukheun bak Kadiman  
Pioh kaman siat nanti  
Si nyak banta neujak leugat  
Neupeurab bak guda Janggi

Meunan neukheun banta deelat  
Haba mangat dum neurawi  
Wahe ulon nyang meutuah  
Lon ka leupah kumeujanji

Ulon ka teulanjo lidah  
Poh beurakah deungon nuri  
Lon kheun lon tueng putroe indah  
Nan jipeugah Nuron Beureuhi

Lom jeunamee ka jipeugah  
Bungong cidah pawoh janggi  
Abeh bandum banta kisah  
Asailiah ubak Janggi

Guda Janggi that teukeujot  
Ka meugrop lhee langkah gaki  
Jideungo kisah puyoh meulet  
E raja cut peue ro rawi

Lheueh nibak nyan ka jisujud  
Wahe po cut Kureh Pari  
Pakon meunan neupubuet buet  
Kon bacut peukara ini

Hana pike buet keumudian  
He sulotan keunong sakti  
Padum payah patah badan  
Ngon 'aeban malee keuji

Hingga keunoe sret meulang-lang  
Sebab bintang Deulima siti  
Teuma jinoe di sulotan  
Lom peurasan neumeung cari

Han sep dilee adee timphan  
Buet sulotan Batee Beusi  
Dalam laot awot karam  
Buet saktian Kaha Pari

Nyang ka teuhah gohlom tatop  
Lom tameung cet bungong wani  
Allah teungku napsu peuturot  
Han lon ikot hana meukri

Hom e raja han lon ikot  
Dudoe lucot hana meukri  
Sang lon tuan bantahan sret  
Han lon turot gata doli

Nibak Tuhan teu meureuka  
Buet di gata han lon rali  
Atra cit ka neumeucakra  
Ngon diwata cicem nuri

Tameung surot malee mata  
Tameung lingka takot keuji  
Bahkeu kaman lon seureuta  
Wahe banta Kureh Pari

Buet ka leupah teulah sang ka  
Teumeung gisa malee sang ri  
Nyang na bacut nyoe buet raya  
Meunan kira patek ini

Meunan jikheun raja guda  
Seuot banta Kureh Pari  
Wahe ulon nyang meutuah  
Lon pabanbah teulanjo bibi

Deungon bayeuen meukheun leupah  
Kon meutuah seungaja kami  
Gata ngon lon beungeh bagah  
Cit le leupah bak mita kri

Nyoesa di gop ka beulisah  
Lon deungo cidah Nuron Beureuhi  
Di kah sidroe sampoe marah  
Sang bukon kah guda sakti

Nyan ube buet aweuet leupah  
Peue cit meugah deungon ahli  
Meunyan nanggroe paloe sosah  
Teusia nan kah guda Janggi

Peue cit tarek ceureudek kah  
Pajan leumah gagah ahli  
Meunan neukheun buleuen banta  
Raja guda khem meuhi-hi

Meunyo meunan wahe guda  
Buet nyoe sigra lon atasi  
Lon peukeumah ngon diwata  
Jinoe sigra lon koh janji

Abeh tuto banta muda  
Bak diwata lom neusudi  
He meutuah cicem bayeuen  
Nyoe ulon kheun tapeugah kri

Keuhai putroe nyan di mideuen  
Pakri reweueng jaweueb tabri  
Jih deungon lon rot meu teumeung  
Cuba takheun wahe nuri

Atawa kaba lon u mideuen  
Bak cut buleuen u meuligi  
Cuba peugah pantah bayeuen  
Ek meu teumeung lon ngon siti

Meunan banta haba neukheun  
Seuot bayeuen cicem nuri  
Nyang got bak lon ampon deelat  
Saboh surat tuanku bri

Neukheun haba seugala had  
Neupeuteupat seugala kri  
Bek syok ate kande teulhat  
Asai deelat deungon neugri

'Oh ka mufom ujung ayat  
Putroe ubat kadang rali  
'Oh ka abeh pileh sasat  
Kadang teutap Po tallah bri

Meunan bangon keunong takat  
Bak lon ingat wahe doli  
Meunan bayeuen jikheun teupat  
Meurok leugat Kureh Pari

Yoh masa nyan banta seudang  
Neumat kalam le u jari  
Meunoe bak phon tupon neukarang  
Intan badan tadeungo kri

Alhamdulillah phon lon pujo  
Tuhan sidroe sifeuet gani  
Lom sealaweuert lon beuet dudoe  
Keupada nyoe lon meunabi

Lheueh nibak nyan kalam sampoe  
Keu cut putroe Nuron Beureuhi  
Kaha Zaman nyang seureuloe  
Raja nanggroe ayah cut ti

Nyang surat nyoe lon peusampoe  
Nibak kamoe Kureh Pari  
Aneuk raja Ali Juhan  
Bak makam Anta Peurdani

Bak masa nyoe putroe intan  
Tinggai lon tuan pulo Baduri  
Nibak keubon tanglong badan  
Bak taman gata adek ti

Teuma jinoe lon peugah trang  
Cut abang rindu seukali  
Akan adek baek reumbang  
Napsu cut bang keu esteuri

Kon lon hajat sahbat meunan  
Bek salah fam adek siti  
Bak ek rasi ngon bri Tuhan  
Bak meukarang ngon si nyak ti

Meuna rahim halim intan  
Tatueng cut bang sidroe faki  
Kareuna lon saboh dagang  
Baro datang bak teumpat siti

Taniet po cut daruet di blang  
Untok makan cicem nuri  
Untok bungong keu ngon malam  
Jampang-jampang ngon poh cakri

Na soe ron broh sampoh tilam.  
Nakeu jampang cut khanduri  
Meunan cut niet bak bit sang-sang  
Kadang-kadang ek na bagi

Meunan e cut sujud lon tuan  
Bak intan burak meunari  
Bukon sayang keunarang drien  
Boh meukuwien rasa masam

Gata bak lon tanglong jiem-jiem  
Lon niet euncien mata intan  
Gohлом lon sok dawok lon ngieng  
Dumnan yakin e buleuen trang

Sang-sang bak lon tanglong ngon dhien  
Dumnan yakin lon eu intan  
Silapeh treuk he adekda  
Keuhai peuhha gata intan

Na jipeugah le diwata  
Pawoh jingga nyang hajatkan  
Nyanpi cut dek ek lon peuna  
Ngon do'a gata he buleuen trang

Asai dilee teuntee haba  
Lon ngon gata bak saboh fam  
Surat lon jok bak diwata  
Lon yue ba bak gata intan

Meunyo jadeh sareh haba  
Balah sigra deungon rijang  
Bek trep tanggoh buloh bangka  
Jarak raja lon jeumeurang

Buleuen di gle muble cahya  
Peungeuh donya sigom alam  
'Oh noe abeh tuleh haba  
Kureh banta neucap rijang

Harah potong teudong banja  
Titek tiga deuh meureuntang  
Boh lam sarong gulong sigra  
Bak diwata neujok tajam

Gampong Hagu paya meujen  
Lhok Rambideng ganong tapa  
Buuhu balek titek gandeng  
Han ek le reng lagee nyang ka

Ulon ci boh suson laen  
Kadang jitem keunong haba  
Tadeungo lon kheun bayeuen cicem  
Beudoh jitren laju sigra

Banta Kureh abeh kirem  
Bale gadeng meuseunia  
Neutren neuek balek gureng  
Neupreh cicem troh jigisa

Muwoe haba Diwata cicem  
Teungoh tahrem leugat jibungka  
Jipo laju jiteureubang  
Jibeukam u nanggroe raya

Tan jipioh teudoh jalan  
Diwata nyan sang pueh rupa  
Nanggroe putroe deungon taman  
Troh lhee malam cicem bungka

Bukon toe-toe adoe badan  
Ngon teumpat nyan e syeedara  
Teuduek dilee nuri Kadiman  
Teungoh jalan hana reuda

Nyoeho laen jitren kalam  
Nyoeho intan sang ka gura  
Kon lon peugah beurakah sang  
Rakan badan cuba baca

Leuek jikutru di cong u mirah  
Cut theun geutah di cong bugeng  
Haba raja teuduek kisah  
Bah lon peugah haba laen

Bah lon pioh teudoh payah  
Lom ngon reuah utak puseng  
Bukon sayang lon eu peutoe  
Jeh bak sagoe ka meupunggeng

'Oh lon kalon inong jinoe  
Jisom lakoe di geunireng  
Di jih gaduh bloh lam duroe  
Laloe keudroe ngon gob laen

'Oh malam reumbang ngon lakoe  
'Oh uroe keunong ho **laen**  
Cit ka meunan reusam jinoe  
Saboh sidroe na jigandeng

Hana meuceh tunong pasi  
Neucuba ci teungku bandeng  
Dalam keude ulee ili  
Cit ngon kensi di geunireng

Nyang le that lam keude kupi  
Hana sakri bak peugot hieng  
Meunyo hana bak taturi  
Kon seukali ngon soe laen

Laju tafam nyankeu lakoe  
Rupa bagoe bak tabandeng  
Nyankeu bangon inong jinoe  
Ureueng lakoe jiniet mie breng

Han peue teungku salah pike  
Sebab jahe kon peue laen  
Hana iman dalam ate  
Meuube pade hana ngeuren

Kon e teungku buhu mise  
Pasai gambe saboh musem  
Masa Jeupang ka trang lahe  
Sinan kande jeuet neubandeng

Timu barat le that hade  
Meukat cipe sibeugeurheng  
'Oh seupot jilop geritan  
Cit meukawan linteng-linteng

Taeu soseue jeuep pageue blang  
Cong-cong rangkang dum meupunggeng  
Nyankeu inong ganong sajan  
Teugah Tuhan tan be leubeng

Bek intan jroh rumoh setan  
Sayang badanteu nyan linteng  
Nyankeu rupa lam donya nyoe  
Ureueng binoe bak lon bandeng

Hana salah bit sah meunoe  
Na sidroe-droe nyang hana jen  
Abeh intan lon peurunoe  
Haba bunoe ulon sareng

\*\*\*

## VI. DI TAMAN BADURI

Allah he do doda idi  
Di pasi timoh drang jawa  
Amma bakdu laju rawi  
Nuron Beureuhi lon calitra

Aneuk raja Kaha Zaman  
Doli sulton bangsa diwa  
Dalam nanggroe Mideuen Tufah  
Teutap dasyah lam istana

Rupa elok han tok peugah  
Siulah buleuen purnama  
Hana tulok ngon seunipat  
Timu barat tajak mita

Mata leubui bak meulihat  
Ek ladat soe kalon rupa  
Soe nyang kalon bungong ubat  
Meusiat bek cre di mata

Boh idong rancong meukilat  
Sang beutakap e syeedara  
Adat meukon bacut malee  
Ka lheueh ngon kee he syeedara

Nyang neunan han tom meutemee  
Jameun dilee lon eu nyata  
Ok di ulee patah lipat  
Takue bulat jroh lagoina

Bak lon eu hi dali adat  
Aneuk deelat raja Kaha  
Watee jikhem meuleng kilat  
Sang kiamat he syeedara

Han lagu bak timu barat  
Payah that bak tajak mita

Lam meuligoe laloe teutap

Han tom siat jak u lua

Poteu raja ate mangat

Aneuk jasad hana cidra

Ngon lasyeuka laksa ribee

Meu'ee-'ee di lingka kuta

Han tom sosah leupah sitree

Bandum batee troh lam hawa

Si nyak putroe paloe mubee

Lam juree meusuka-suka

Teuduek 'oh nan cut man balee

Laen lagee lon calitra

Leukek bangguna got meuuroe

Ayeuem putroe cidah rupa

Nuri Kadiman lon hareutoe

Malam uroe dawok bungka

Troh lhee uroe ulah bangon

Deuh jikalon kuta raja

Aneuk cicem rheng jitamong

Bak cut bungong putroe muda

Jidong laju nibak taloe

Jieu putroe peugah haba

Ngon dendayang ban sinaroe

Hana sunyoe kiam subra

Jisyen meuhop grop bak tabeng

Deuh jingieng dendayang bena

Jikheun nibak meurak usen

E cut linteng ampon hamba

Han lon tune jeh me cicem

Nibak tabeng lon eu ka na

Matajih hu sang peureuleng

Mubreng-breng leumah bak hamba

Na sikeujab jeh pat e ti

Lagee nuri ka jeuet rupa

Jiseuot cut Nuron Beureuhi  
Cuba ci tajak drop sigra  
Beudoh keumah pantah dayang  
Jidrop rijang nuri rimba

Yoh nyan karu meulu intan  
Dua lhee nam jidong lingka  
Ateueh tiree ka jiteugom  
**Sret meusumpom** ateueh tika

Jipo bacut meuhtet jidong  
Tan jiteumeung bayeuen rimba  
Bayeuen dong bak baho putroe  
Lheueh nyan dudoe meusuara

Yoh nyan bayeuen jikheun meunoe  
Ulonteu nyoe namiet gata  
Nyang jaga Taman Baduri  
E intan ti nyokeu hamba

Na peue bacut meuheut e ti  
Lon keumeung bri saboh haba  
Ulon cut jroh saboh waki  
Na seubiji kalam lon ba

Nyoepat po cut saboh surat  
Alamat di keubon gata  
Si nyak putroe laloe hebat  
Sambot surat kucup sigra

Jiploh laju meulu leukat  
Jibeuet leugat peuebu haba  
Putroe jibeuet bacut bacut  
Sira po cut jiboh makna

Peurasa nyum ureueng teungeut  
Ngon seumeungeup raya raya  
Sang intan teugian candu  
Bak ri laku tangieng rupa

Abeh jifam ban sibuju  
Cut meulu jiek peurasa  
Yoh nyan sosah reubah laju  
Gaduh ngon su teuglong mata

Seubab napsu rindu han ban  
Roh lam badan leupah bungka  
Got that seungkak galak han ban  
Goh jipandang jideungo saja

Baro adoe sampoe kalam  
Gaduh peujam ngop bicara  
Bandum sifeuet ureueng binoe  
Lam donya nyoe meunan rupa

Cut nyak ubat teutap paloe  
Di meuligoe atueuh tahta  
Bak rasa buet cut mupaloe  
Sang-sang putroe leupah bungka

Sang meuteumeung ureueng sidroe  
That seureuloe hana ngon sa  
Nuron Beureuhi mubri jaroe  
Nyum lom neuwoe u istana

Lheueh nyan jaga mata intan  
Nuri Kadiman neuhei sigra  
He meutuah kapeugah rijang  
Laju beu trang nyang ubena

Patbu jinoe muda seudang  
Jak tueng rijang keunoe kaba  
Seuot cicem e canden mubee  
Ureueng jamee baro teuka

Sideh lam gle rimba kayee  
Ban lon teumee jak meurus  
Ngon rupa got culot tari  
Hana sabe lon eu bena

Adat neueu le meulu ti  
Seukali-kali han ek neusaba  
Meunan jikheun bayeuen nuri  
Cut Beureuhi jiek geumpa

Jiek ladat urat seundi  
Cut ahli leungo angeeta  
**Kaba** ulon wahe bayeuen  
Lon meung jak tueng jamee teuka

Bek trep sinan dalam uteuen  
Bah u mideuen lon peugisa  
Ate patek han ek le theun  
Sebab kakheun got that rupa

Po cut ampon bak lon pike  
Hana ase **bak** lon kira  
Han patot peuturop ate  
Gop ruhe singoh u lua

Bek neupateh gureh ate  
Roh akhe rugoe mubara  
Gata sidroe po cut kamoe  
Gop pujoe seugala donya

Phon dilee kon troh 'an jinoe  
Goh po cut droe neuboh kada  
Lam meuligoe laloe tinggong  
Sang tiona lam cintra mula

Suntok sabe kande lam kurong  
Bungong tanjung lam gop puja  
Treh 'an jinoe sambinoe tren  
Bek po cut lon neuboh kada

Gata e cut ija kasab mbon  
Trep-trep siseun neungui raja  
Meunyo cut ti tangui meuthon  
Po cut ampon tan hareuga

Pike pocut bacut kheun lon  
Meunyoe neutren han le laba  
Masa jinoe putroe neujak  
Sang cut manyak rugoe raya

Nyang got saba peunuta pirak  
Bahle lon jak namiet gata  
Neuthee sampoe bagoe rindu  
Trok ban napsu hajat gata

Akan banta bek le a-o  
Lam kaso neuthee nyang dua  
Jak peutarek leupek keundo  
Lam keuleumbu bek na leuta

Neuthee nyang troh bungong kundo  
Leukek hijo jak saweue cintra  
Jak peukeumah he buleuen trang  
Asoe idang sianeka

Bek le neumoe he cut intan  
Euntreuk malam jamee teuka  
Neujak peugleh bak eh cut bang  
Ija tilam salen sigra

Meunan jikheun bayeuen nuri  
Nuron Beureuhi khem teurtawa  
Teuma seuot cut tulet ti  
Pioh nuri siat gata

Lheueh nibak nyan Nuron Beureuhi  
Jikarang le surat sigra  
Bahaha ini satu surat  
Alamat dari adekda

Nyang meusyeuhu timu barat  
Nan geulakab Nuron Peulita  
Bawah kidam cut bang deelat  
Teurhadap Kureh Keumala

Mulia bak cut bungong keumbee  
Ateueh ulee e kakanda  
Nyang surat nibak pangulee  
Lon niet mee asoe syeuruga

Kru seumangat rahmat lon tueng  
Jaroe lon leueng lon teurima  
Na lon peukek taloe reukueng  
Tanda lon tueng cut bang teuka

Nibak jaroe cicem bayeuen  
Tuanku tueng bek syok sangka  
Keu geulantoe jaroe meuteumeung  
Cut adek teueng u jeumala

Lon harap dapat cut abang  
Euntreuk malam beu troh teuka  
Hana lawon bak lon ingat  
Nama deelat nyang lon cinta

Bak tuanku nyang lon harap  
Bek teulat tuanku teuka  
Bu lon pajoh jatoh mangat  
Teuingat akan kakanda

Euntreuk malam jadeh lon preh  
Hana lon eh troh ngon faja  
Bek lon tunggu tuanku sideh  
Cut aleh han teungeut mata

Nyankeu narit bak bit abeh  
Cut nyang pileh salah beuna  
Abeh sampoe putroe surat  
Jilipat jipate dua

Harah potong jiteken cap  
Soe nyang lihat hireuen raya  
Ubak nuri jibri leugat  
Nyoel leupeue pat he seutia

Wahe ulon aneuk bayeuen  
Beu troh kakheun bak kakanda  
Cut potrue ti neubri umpeuen  
Cicem bayeun pajoh sigra

Wahe nuri nanti kukheun  
Banta buleuen beu troh kaba  
Nyoe euntuek lon jaramani  
Keu doli tajok le gata

Bek han jeuet han nyang meuseuti  
Bek seukali gata lupa  
Gop nyan beu troh euntreuk kakheun  
Han jeuet meutheun meu'oh lusa

Kakheun patek han ek kutheun  
Kaoi jameun leupah raya  
Ka peugah bek basi eungkot  
Han jeuet lon top sange hana

Meuhan neujak seungkak lucot  
Cut bungong sret putoh asa  
Kaba tajam bek jan seupot  
Han meuho lop panyot hana

Hajat kaoi lon khanduri  
Lon meujanji ngon eelia  
Nyoe ka teuka alem faki  
Kaoi janji peulheueh lanja

Meunan euntreuk ka peugah kri  
Bak doli cut abang hamba  
Seuot bayeuen han peue salah  
Ban peuneugah han meutuka

Lam meuligoe jipo bagah  
Ka leupah u lua kuta  
Jiteureubang na ban siwah  
Sang juandah jiwoe lam rimba

Bukon sayang bak peureulak  
Patah sibak angen tipma  
Burong nuri leupah jijak  
Lon peugah bak putroe muda

Nuron Beureuhi cut ti pirak  
Nyang meusigak cidah rupa  
Seulawet cre nuri jijak  
Bungong meurak layee raya

That meuleupah cidah gadeng  
Mupateng bak rumoh raja  
Lawet langsung burong cicem  
Cut linteng jiro ie mata

Keurusi meuh bak duek seumurat  
Bu leukat lawan srikaya  
Nuron Beureuhi meunyum arat  
Dum geuceupat cahya ie muka

Jiduek jidong han tom teutap  
Teuingat nama cut banta  
Nyang baroekon han tom cacat  
Sang ie ubat lam piala

Lawet datang keunan surat  
Nama deelat Kureh banta  
Cut putroe jimoe meurep-rep  
Cut bintang phet tunu raya

Dalam ate sabe saket  
Seulawet nuri jigisa  
Bu jipajoh hana tom troe  
Lam jaroe surat cut banta

Uroe malam karam jimoe  
Ingat nyoe Kureh Keumala  
Ho siuroe putroe bungong  
Teujak teudong lam istana

Saket badan bak sang geukheun  
Meutamah miruen teungeut hana  
'Oh teuingat keu deelat bungong  
Meusumpom lam tiree rawa

Ie mata ile han le teudong  
Muka reudom han le cahya  
Intan meulu jimupanton  
Meualon lam kaso sutra

Meunoe jikhem meugleueng sabon  
Sijuek sang on di suara  
Sayang keurisi di dalam laot  
Mate teusangkot bak mata kawe

Badanku tumbon rasa ka awoh  
Rupa seumeuloh akan beureuhi  
Do'aku banyak keupada tuan  
Supaya leukah datang keumari

Putik pawoh deulima intan  
Anak ikan teurluncat keu batu  
Adinda suka abangpun suka  
Kapan beurasa beurdapat teumu

Ya Ilahi Tuhanku teebat  
Intan beurcahya teurlalu beurkilat  
Seungsara saket ate teuringat  
Kudeungo sudah beulom kulihat

Aernya madu rasanya ladat  
Lihat kuminom tuan tak dapat  
Badanku ini lalu meularat  
Seubeulom datang nyang bawa ubat

Meunan jikheun cut bintang sret  
Jiseubot nama cut banta  
Ngon dendayang ceupet urot  
Ladom nyang pot deungon ija

Sinan dum toe uroe malam  
Lam jikhadam putroe muda  
Jibeudoh le cut Meuriam  
Jisawak pinggang jiruet ija

Di meuligoe jitren rijang  
Jijak tajam ubak raja  
Bak yah putroe Kaha Zaman  
Bak sulton maharaja

Ban sare toe sampoe seumbah  
Ka jipeugah dum peukara  
Tuanku ampon nyawong darah  
Raya salah patek hamba

Po cut ampon Nuron Beureuhi  
Bak laku ri tinggai donya  
Saket larat that bak dali  
Leupah ngeuri han tom nyang ka

Ban raja deungo kheun dendayang  
Neuheu rijang Nur Peulita  
Meukeumah le di sulton  
Neujak kalon bijeh mata

Tuan putroe sampoe sajan  
Nyang geukheun nan Nur Peulita  
Laen teuma ban atoran  
Kilu Zaman meuntroe raja

Lom dendayang beudoh teuman  
Teureubang jak kalon cut da  
Jak eu cutda bungong rubek  
Laju jiek u istana

Seumbah laju Nuron Asyek  
Ngon adeh Nuron Beureuma  
Teuma jipeugah cutneuh saket  
Beudoh sabet teuma gisa

Jak beursama bungong kawet  
Han padum trep laju bungka  
Teuma dayang datang jiwoe  
Trok sampoe u dalam kuta

Na sikeujap teutap 'oh noe  
Raja nanggroe troh ngon cut da  
Ka meusapat u meuligoe  
Bak putroe nyang saket raya

Raja peurab leugat keudroe  
Neueu bagoe pat na cidra  
Sajan nyan deungon ma putroe  
Neukalon proe nyan aneukda

Hana mumet jaroe gaki  
Gundah doli lagee raya  
Neumarit le raja doli  
Ubak wadi got panglima

Teungku nujum maklum tabri  
Datang sini jangan lama  
Abehit jitren nujum ahli  
Keumari masok lam kuta

Seumbah jaroe sampoe gaki  
Teumpat neubri doli raja  
Ubak nujum maklum neubri  
Neupeugah le buet aneukda

Wahe teungku guree ahli  
Aneuk kami ka binasa  
Saket leubeh aleh sang brat  
Neuci leugat nyan usaha

Meunan neukheun mideuen deelat  
Buka kitab dum ulama  
Abehit jieu meulu seubab  
Jitupat asai ngon punca

Haba maklum nujum lihat  
Ngon mupakat dum ulama  
Jitop kitab angkat jaroe  
Ampon kamoe po meukuta

Seuot raja haba tanggoe  
Neukheun meunoe ubat ek na  
Seuot nujum payong nanggroe  
Brat han bagoe ubat cut na

Lom ngon jeuoh muploh nanggroe  
Ubat putroe sinan ek na  
Nyang na bacut lon kheun mise  
Ubat ate raja peuna

Meunyo ngon nyan cit rasi le  
Ngon jinoe le puleh sigra  
Seuot raja ngon sigra le  
Keupeue mise teungku buka

Bek teungku kheun meulinteueng se  
Tunu ate lon han tara  
Neukheun beu trang nyan bak leumah  
Neupeugah bek meusom punca

Yoh nyan nujum meunyum sosah  
Beuet pantah jaroe dua  
Ampon e po di yup gaki  
Ubat cut ti lon kheun beuna

Ubat po cut Nuron Beureuhi  
Kureh Pari aneuk raja  
Nyankeu ubat leugat rasi  
Ngon jinoe le puleh sigra

Masa putroe jak u taman  
Meurumpok nyan di rot raya  
Putroe neuwoe banta riwang  
Di sinan meurumpok dua

Di cut tanglong di cong peuratah  
Jak di ateueh aneuk raja  
Di masa nyan meuteuntang sah  
Sinankeu sah meungieng mata

Lheueh nibak nyan lom peureugi  
Pulo Baduri ka troh banta  
Meurumpok ngon saboh nuri  
Geurasi burong Diwata

Deungon banta jimeujanji  
Lom jibri ngon saboh haba  
Haba jibri he khalifah  
Kon buet salah po meukuta

Nyang jilakee meuteuntee sah  
Rot meunikah laen hana  
Kon na hajat buet nyang salah  
Banta indah putroe muda

Jalan kawen deungo leupah  
Meunan sah jikirem haba  
Jinoe raja neueu keudroe  
Surat nyoe bak putroe muda

Pakri haba po banta nyoe  
Laba rugoe sinan nyata  
Kaha Zaman hiram tuloe  
Beudoh keudroe jak peunyata

Neueu surat jimat keudroe  
Lam jaroe jipuweh hana  
Raja seungkak rinthak keudroe  
Neukalon proe pea dum haba

Mupo aneuk mupat nanggroe  
Lompi meusoe meuri bangsa  
Yoh nyan beungeh Kaha Zaman  
Sabet meunan ban kheun gata

Jiek bisa muka biram  
Neukeumeung cang putroe muda  
Bit paleh som untong jalang  
Jibuang nama ugama

Jiboh bangsa dara 'asi  
Kupoh mate si ceulaka  
Neukeumeung'cang Nuron Beureuhi  
Beudoh umi deungon cutda

Geudrop raja geucok peudeueng  
Karu ureueng lam istana  
Ladom peurab nyang liwat plueng  
Nujum king-keueng jak seumubla

Pioh dilee pangulee midan  
Kilu Zaman tamong tuha  
Yoh nyan deelat that mupop-pop  
Neuyue jak drop si cut banta

Hana neutueng bajeueng karot  
Bangsa lucot manusia  
Raja marit keubit meudhot  
Ho meuntroe hop beudoh sigra

Leugat himpon yue tren seupot  
Nak tajak drop aneuk raja  
Bek biasa haba karot  
Kukeumeung top si ceulaka

Sira titah mirah mulot  
Geunta janggot bak suara  
Meunan titah Kaha Zaman  
Dum pahlawan ase dum ka

Keubah cawan simpan pingan  
Boh minoman jamee teuka  
Meunyo raja Kaha Zaman  
Cit lawan Kureh Keumala

Ie dalam gle ile malam  
Mate karam asoe nanggroe  
Tuto balek titek meutham  
Laen ragam ayat muwoe

Bek lagee sot han got lagam  
Jeuet keu bosan agam binoe  
Lon ci adu lagu Siam  
Lon ci karang meulhee taloe

Bek that gundah leupah geuncang  
Ka bri Tuhan utak meunoe  
Peue ka seungkak bak lon karang  
Teungku Hasan buetgeu meunoe

Adat keubeue lheue geulanggang  
Sigom alam ka jitusoe  
Adat lon som meugompi han  
Bahle kaman teuhah jinoe

Seuluroh Aceh sareh ka trang  
Pueh lon paban intan putroe  
Bah boh pakhok bak rok lagam  
Neuci pandang bak jeuep sagoe

Neuweuek leupah tamah bek han  
Harap meunan bak barangsoe  
Bukon sayang bungong rampeng  
Hu meuleng-leng 'oh ka uroe

Meuna meuheut neumeung salen  
Be leubeng bek ubah rawi  
Sebab abeh ka lheueh lon leng  
Hana mireng bak tafeuse

Abeh lon kheun meugleueng linteng  
Jeuet salen bena di sini  
Han le leubeh lileh mireng  
Ingar dalem walee putri

Cot Geurutee kayee rampak  
Di ujung bak umpung unoe  
Teuduek dilee keumbee masak  
Jeh ma si nyak gohlom manoe

Kaha Zaman 'oh nan seungkak  
Sajan awak rakyat nanggroe  
Cicem nuri rawi jijak  
Jipo keuprak malam uroe

Jipo sunggoh pioh tidak  
Troh sampaie hak bak saboh roe  
Siploh malam siploh hari  
Taman Baduri jipioh droe

Meuteumeung ngon Kureh Pari  
Peusambot le surat putroe  
Po banta cut sambot leugat  
Kucup angkat u ateueh dhoe

Buka laju teungku meusyap  
Neueu ayat pakri bagoe  
Leumah-leumbot turot payu  
Sang ie madu tuto putroe

Deungon kande ate seuu  
Leubeh rindu malam uroe  
Ngon ie muka meucahya hu  
Raja meulu geunta asoe

Neucok euntuek jaramani  
Neubet lagi u ateueh dhoe  
Neukhem meuhah leumah gusi  
Banta ahli han le seungkoe

Ulon singoh kucok langkah  
He meutuah taba kamoe  
Seuot bayeuen insya Allah  
Hana payah tuanku droe

Bah lon ba u Mideuen Tufah  
Meuh mirah keudeh bak putroe  
Jinoe e po jak meukeumah  
Hajat sudah tuanku droe

Nak tabungka wahe raja  
Bak cut rakna u meuligoe  
Meunan jikheun bayeuen rimba  
Si nyak banta peukeumah droe

Yoh masa nyan Kureh Pari  
Teuingat le po samlakoe  
Neusuet euncien nibak jari  
Neusap le laju keudroe

Teuka seupot ribot han ban  
Han le malam deungon uroel  
Hana meukon intan badan  
Lam seupot nyan teudong sidroe

Sidroe teungku guree intan  
Eelia nyan areh tuloe  
Sinyak banta tajo leugat  
Neuhoreumat neucom jaroe

Peiduek laju ubak teumpat  
Teungku leugat marit meunoe  
Wahe aneuk taloe pusat  
Peue na hajat tahei kamoe

Cuba peugah pantah leugat  
Khen bak teupat he samlakoe  
Eelia meunan seumudi  
Kureh Pari seuot meunoe

Wahe teungku guree kami  
Leupah janji ulon sidroe  
Deungon cicem saboh nuri  
Meunoe ban kri bak lon muproe

Dalam wayang kalam kami  
Lon kheun lon bri peuha putroe  
Lon meuhajat bungong pawoh  
Peuha tujoh si nyak putroe

Keu jeunamee keumbee haloh  
Lon nyang peutroh lon kheun bunoe  
Nyankeu hajat lon teungku beh  
Jeuet lon uroh guree keunoe

Meunan neukheun Kureh Pari  
Tamim Ebni seuot meunoe  
Allah aneuk bungong giri  
Bek weueh ate po samlakoe

Si nyak putroe Nuron Beureuhi  
Aneuk doli raja nanggroe  
Kaha Zaman bit na janji  
Masa lawi ubit putroe

Neumeukheun nibak diwa pari  
Seugala be lam nanggroe droe  
Bungong pawoh soekeu ek bri  
Nyan suami si nyak putroe

Nyang jilakee teuntee intan  
Di kayangan bak bangsa droe  
Kon bak gata bangsa ensan  
Kon budiman bak geutanyoe

Bitpi meunan e cut banta  
Deungon karonya Allah sidroe  
Han cit apon tanglong gata  
Cut bentara han soh jaroe

Deungon do'a guree hamba  
Preh aneukda siat jinoe  
Lheueh nibak nyan di eelia  
Beudoh bungka laju sidroe

Han jan tangieng ka neugisa  
Seureuta bungong neupuwoe  
Bungong kayee lhee meukarang  
Rupa na ban mata uroe

Ka neujok keu aneuk agam  
Bri he intan keu peuha putroe  
Si nyak banta suka han ban  
Bungong nyan neumat bak jaroe

Teutap ladat si nyak agam  
Eelia nyan ka leupah woe  
Lheueh neuwasiet dum peukara  
Si nyak banta tinggai cdroe

Bandua ngon aneuk guda  
Di keubon bunga teutap jinoe  
Teungoh banta neumeucakra  
Trok Diwata keunan jiwoe

Jijok surat leugat sigra  
Si nyak banta sambot keudroe  
Sira neucom ugon lanja  
That mulia hana bagoe

Neuploh mameung neukheun sigra  
Jroh that haba bak cut putroe  
Kureh Pari banta muda  
That geumbira hana bagoe

Abeh mufom ujung haba  
Lheueh nyan banta peukeumah droe  
Neupeurab bak aneuk guda  
Seureuta neuba ngon bungong nyoe

Keumala Janggi rali suka  
Jikheun teuma narit meunoe  
Pajan deelat nak tabungka  
Seuot banta singoh uroe

Jak meukeumah he Keumala  
Bek le lama taduek sinoe  
Teuma seuot raja guda  
Wahe banta deungo kamoe

Neupreh lon hei saboh raja  
Soe ba peuha si nyak putroe  
Bek neume le po meukuta  
Han got rupa tuanku droe

Meunanpi jeuet kheun cut banta  
Tahei lanja bek le laloe  
Yoh masa nyan guda Janggi  
Jiklik le ngon geunta bumoe

Jimeusu that liwat bunyi  
Batee Baduri jeuet keu anoe  
Sigo saho lom jigisa  
Ka jeuet dua guda ragoe

Nama geukheun Kilat Faja  
Bak banta jisujud jinoe  
Teuhah babah Kureh Pari  
Neueu Janggi sangat ragoe

Ka jimarit guda Janggi  
Gata nyang me peuha putroe  
Gata nyang me wahe Faja  
Nak tabungka bak uroe nyoe

Di lon tuan kume raja  
Lhee saja tawoe bak putroe  
Nyankeu po di lon he Faja  
Nyang lon jaga malam uroe

Bek tadawa peue nyang titah  
Bek tabantah peue hareutoe  
Kilat Faja seuot pantah  
Han peue salah di atueh dhoe

Hana bak lon puteh mirah  
Ban peuneugah ikot kamoe  
Lheueh meututo bandua blah  
Hingga sudah seupot uroe

Puteh kuneng mubreng malam  
Ateueh tilam cut seumujoe  
Haba raja lon peurijang  
Bek that panyang jijak taloe

Beungoh puteh mureh siang  
Banta intan lon hareutoe  
'Oh lheueh **wuduk** bungong keumang  
Seumbahyang muda samlakoe

Saleuem laju kanan kiri  
Kureh Pari beudoh jinoe  
Bungong pawoh neuboh sajan  
Lam bungkosan pasoe keudroe

Neupeudeuk ateueh guda plang  
Jimeunan kilat cot uroe  
Teuma cicem nuri Kadiman  
Laju keunan le jipeutoe

Hingga keumah seukalian  
Bungka yoh nyan po samlakoe  
Si nyak banta dua kandran  
Peuet tuan ngon burong putroe

Neucré taman neubeurjalan  
Rot lam awan bungka jinoe  
Hana pioh uroe malam  
Banta seudang woe bak putroe

Cicem batee bulee hijo  
Leuk talo meulot di banda  
Teungoh neuwoe linto baro  
Ka tahe siat lam hawa

Rumoh teuduek guruek bajoe  
Bak sagoe cintra cempala  
Nuron Beureuhi lam meuligoe  
Preh woe lakoe Kureh Keumala

Lam jiingat geunap uroe  
Dawok jimoe hana reuda  
Teuduek siat teutap putroe  
Lon puwoe angkatan raja

Na peuet ribee teuntee adoe  
Wadi meuntroe pahlawan kha  
Suroh raja Kaha Zaman  
Neuyue jak prang Kureh banta

Banpeuet ribee teuntee garang  
Hana lawan nibak rupa  
Teungoh jipo hana reunggang  
Uroe malam pioh hana

Suroh raja deelat makam  
Neuyue jak **tham kureh banta**  
Nibak rupa hana soe tham  
Han ek lawan banta muda

Nibak bangsa jen kayangan  
Ngon saktian hebat raya  
Bungka laju buru tajam  
Ubak taman hadap muka

Kuantan ngon bireng masak  
Lam utak tuah bandua  
Sideh jiek sinoe jijak  
Ka meurumpak dua tantra

Rajawali meunoe tinjak  
Meurumpak ngon leukek bangguna  
Kilu Zaman bireng masak  
Bireng pirak Kureh banta

Hingga rab le ngon angkatan  
Kadiman jikheun bak banta  
Ampon e po sang laen ban  
Angkatan lon eu di muka

Nibak dali bak ri sang jen  
Bak dandeng angkatan raja  
Ngon alam meulaen-laen  
Sang tuben jijak poh gata

Got tuanku peukeumah droe  
Peugah jinoe nibak guda  
Yoh masa nyan po samlakoe  
Neukheun meunoe nibak guda

Sang-sang musoh e beh sampoe  
Geutanyoe jitham bak rupa  
Janggi seuot tuanku e  
Bek that karu po meukuta

Teungoh-teungoh geumeututo  
Trok lalo lasyeuka raja  
Ka meurumpak sigak po e  
Bungong cuko Kureh banta

Kilu Zaman simban tuto  
He raja e ho tabungka  
'Oh na langkah peugah lalu  
Kheun sigeutu nibak hamba

Po banta cut seuot mupru  
Peue peureulu tapareksa  
Peue na heundak tajak sasat  
Cokma bulat lon eu taba

Basyah Alam seuot leugat  
Bek that jeungkat manusia  
Me noe jaroe pasoe ikat  
Nak leugat kuba bak raja

Si nyak banta geunta ate  
Neutarek le busu caga  
Neutakat bak ulee ate  
Laju jeuet le apui teuka

Basyah Alam karam reule  
Han mupeue le bak nyan masa  
Apui busu buru tajam  
Jen kayangan tutong dumna

Meuntroe raja Basyah Alam  
Ingar tajam dalam dada  
Jimat panah pantah tajam  
Balah rijang atueh banta

Keunong busu guda indah  
Apui mirah hu meunyala  
Rasa tutong keumbong darah  
Janggi pantah deumpek sigra

Teuka ujeuen meureuleueng darah  
Apui mirah lem seumua  
Guda lumpat leugat meusyam  
Lam kawan pari ngon diwa

Yoh nyan jitrom sigom kawan  
Jen kayangan dum meupula  
Taeu luroh jatoh karam  
Lam awan meubura-bura

Alam Basyah lom jipeurab  
Jinak ikat banta muda  
Kureh banta beungehneu that  
Lom ka neumat busu caga

Neutakat bak ulee ate  
Cit keunong le putuh dua  
Basyah Alam karam mate  
Sret bangke lam laot raya

Dum bangsa jen mireng ate  
Jihudom le si nyak banta  
Jitop jicang guyang kon le  
Bungong pade arat raya

Guda meuhong jitrom sabé  
Jen reule meukeuba-keuba  
Di cut banta raja meulu  
Ngon busu sabé neulunta

Yoh nyan mate biek jen hantu  
Meutabu di dalam hawa  
Ka troh laen gandeng bantu  
Han jeuet taeu bangsa raya

Biek jen bulat le that meuri  
Kureh Pari jilet sigra  
Bak lakukan sang han lheueh le  
Ateueh dali taeu rupa

Keumala Janggi ka jilumpat  
Ateueh rakyat raja Kaha  
Yoh nyan mate miseue lalat  
Ladom teupat beukah dua

Bak guda trom meugom leuhap  
Le that ranap pari diwa  
Lam uteuen meulinteueung teupat  
Nyang meukeumat cong-cong ara

Bak masa nyan Kureh Pari  
Neubaca le saboh do'a  
Yoh nyan gadoh han leumah le  
Saket ate jen ceulaka

Banta neucang ngon meupuseng  
Arat that jen leumah hana  
Yoh nyan sosah meuleumpah jen  
Ka abeh len dua laksa

Peudeueng pajoh guda sipak  
Tangkurak ban bruek lam raga  
Raja meuntroe ka paloe phak  
Mubalak hanco u donya

Na saboh treuk meuntroe rancak  
Beungeh nibak rimueng bangka  
Nyankeu meuntroe leubeh tungang  
Gaseh sayang poteu raja

Nibak nyang laen leubeh gop nyan  
Peurintah prang jih keupala  
Di yup raja nyankeu meuntroe  
Leubeh ragoe bijaksana

Meuntroe Asyek yoh saboh roe  
Nyang jinoe ka laen nama  
Kilu Zaman masa jinoe  
Masa nanggroe lheueh prang raya

'Oh jikalon han got bagoe  
Beungeh tuloe po ceulaka  
Jimeukeumah ngon bagah le  
Jieu mate tantra raja

Ureueng got got abeh mate  
Saket ate silagoina  
Abeh ingat deungon pike  
Jibeudoh le himpon tantra

Pakri jinoe adoe kande  
Raja doli sang ka cidra  
Nyang got bak lon he meutuah  
Deelat syah bek teuhah ija

Adat tatem taseuleuh  
Tamupayah bena kuasa  
Jiseuot le sare bagah  
Insya Allah u jeumala

Seuot teungku Kilu Zaman  
Meunyo meunan jak udehta  
Tapileh nyang tem meuiman  
Nyang malahan bah bek taba

Yoh masa nyan pileh rakan  
Nyang seudang na dua laksa  
Kilu Zaman that analan  
Undang-undang hebat raya

Jituri nyang beuhe tungang  
Jituban nyang geusuen raya  
Ase keumah jikeumeung ek  
Peudeueng leuntek dum di luar

Ngon rupa jroh silagoe ek  
Han peue cut dek lon calitra  
Kupiah got dum meuculek  
Ngon ceureudek bandum sama

Nyang biek raja saboh sagoe  
Dijaroe jireugam cokma  
Pakaian got nibak asoe  
Wadi meuntroe beungeh sama

Nyang pahlawan hiram leupek  
Ka jicek-cek cokma raya  
Jideungo su guda deumppek  
Jireutek busu teumaga

Mat di uneun peudeueng leuntek  
Nyang cantek ulee suasa  
Rakan jroh-jroh ugoh teuntee  
Srui bulee soe kaon rupa

Siploh kawan siploh ribec  
Nyang jak dilee meuntroe raja  
Jiek meusyup santeut ulee  
Meu 'ee-'ee miseue seureungga

Han ek kupah peugah lagee  
Teungku kee meuhayak donya  
Jiek laju dalam awan  
U manyang keudeh lam hawa

Han jeuet surah peugah macam  
Meukeumang lasyeuka raja  
Meuntroe raja ka haselan  
Banta seudang lon calitra

Kureh banta lanja jalan  
Meuteuntang ngon meuntroe raja  
'Oh ban leumah deuh jipandang  
Jilet rijang banta muda

Banta kalon jikeumeung cang  
Taloe keukang neupeugisa  
Kilu Zaman bek meuayang  
Nyang got riwang woe bak raja

Ban jideungo meunan macam  
Meuntroe Zaman beungeh raya  
Teugom laju buru jicang  
Yoh masa nyan arat banta

Kureh Pari uji tajam  
Saktian laju neucinta  
Teuka peudeueng mameung reugam  
Meuntroe Kilan neutheun sangga

Bak masa nyan got that imbang  
Neumeucang ngon meuntroe raja  
Banta neugrop neulop keunan  
Ngon keukang neuhila gisa

Gohlom lileh teupeh badan  
Sang-sang imbang nibak rupa  
Miseue got-got meulet di blang  
Cut intan ngon meuntroe raja

Hana saho talo meunang  
Mantong timang blah keudua  
Banta Kureh yoh masa nyan  
Beungeh na ban uleue bisa

Deumpuk sigo ngon meuguncang  
Ngon saktian le neucinta  
Na lhee ribee sigo ceukang  
Nyang mumang na dua laksa

Ka meuseuk-meuseuk aneuk jalang  
Lam awan meugisa-gisa  
Banta kalon jen dum mumang  
Yoh nyan neucang neupet mata

Saboh sagee paloe lapang  
Lhee kawan abeh seureupha  
Kilu Zaman mumang han ban  
Jieu rakan le that fana

Maken jilet seupet tajam  
Ngon rakan jikarat lanja  
Ho nyang neugrop banta intan  
Meureuntang jilet di lingka

Kureh Pari ngeuri bak sang  
Han ek neucang jen ceulaka  
Han meudum le reule simpan  
Jen hitam le that ka fana

U dalam gle gule meutimphan  
Banta neucang neupet mata  
Kureh Pari ahli laku  
Maken seuu nibak nyang ka

Ubak jaroe neumat busu  
Peulheueh laju lam kawan bha  
Meuntroe ngon pang karam teudu  
Sulu-sulu dalam hawa

Kilu Zaman hana ngilu  
Jimaju leubeh bak nyang ka  
Han jitakot meusigeutu  
Jicang laju banta muda

Kureh banta cinta sakti.  
Teurseumbuni nibak mata  
Han leumah le Kureh Pari  
Bak pari ngon bangsa diwa

Apa meuntroe paloe ngeuri  
Cut juhari leumah hana  
Yoh masa nyan jen yahudi  
Arat kon le si ceulaka

Kilu Zaman yoh nyan ngeuri  
Jikeumisi banta muda  
Ka jiingat leugat sakti  
Deuh jieu le banta muda

Jiteugom lom miseue biri  
Jitak meuci banta muda  
Nyanpi sidroe meuntroe ahli  
Deungon sakti hebat lagoina

Yoh masa nyan Kureh Pari  
Lom sakti neuulang sigra  
Han leumah le meuntroe pandang  
Yoh masa nyan arat raya

Sosah kon le meuntroe jalang  
Banta intan leumah hana  
Kilu Zamanpi that ahli  
Saboh sakti lon jicinta

Ka leumah lom bungong giri  
Jirapat le lagee nyang ka  
'Oh rab keunan meuntroe ahli  
Saboh sakti jibeuet sigra

Jibeuet sakti lahe diri  
Kureh Pari teugom sigra  
Banta deelat silap bacut  
Mubalot ngon jeue meulila

Han neutukri puyoh meulet  
Roh lam peungeut meuntroe raja  
Meuntroe kalon roh meucarueh  
Jiek atueh muploh laksa

Po banta cut beuet seuleusoh  
Ka luroh cintra meulila  
Deungon tulong Tuhan utoh  
Abeh luroh jeuet keu sira

Meuntroe bajeueng jikeumeung poh  
Jieu tijoh beusoe cintra  
Po cut banta ka neubeudoh  
'Oh reuloh beusoe jiureukha

Han jitukri mita jalan  
Kilu Zaman sosah raya  
Bit aneuk nyoe that pahlawan  
Ngon saktian leubeh ula

Kureh banta beungeh han ban  
Dalam kawan neuteureupa  
Deungon busu neupeunari  
Saboh sakti lom neucinta

Yoh masa nyan intan ate  
Troph keunan le saboh rupa  
Teuka peudeueng han meudum le  
Keunong lihe pari diwa

Putoh takue meuhue ile  
Yoh nyan mate han meudumna  
Keunong muka bungka lihe  
Sosah ate meuntroe raja

Ngon pahlawan karam kon le  
Abeh mate peudeueng seuba  
Plueng teureuban nyang han mate  
Han ek theun le po ceulaka

Ureueng got-got hanyot bangke  
Kuyu ate meuntroe raja  
Tinggai meuntroe han jidong le  
Jieu reule biek meunama

Kilu Zaman nyum teumakot  
Jisurot jiwoe bak raja  
Deungon ate sang geubapot  
Rab-rab lupot hilang nyawa

Teutap jiwoe meuntroe ujob  
Meutuep-tuep ate lam dada  
Yoh masa nyan Kureh Pari  
Neubeudoh le peugot rupa

Bak sot dilee neukeumbali  
Ngon nuri ngon raja guda  
Nibak bale Nuron Beureuhi  
Pulo Baduri meuseunia

Pioh dasyah cut syah ahli  
Sebab lawi prang that raya  
Manoe siram badan suci  
Pujoe Rabbi ban biasa

Teutap haba banta ahli  
Di taman Baduri dalam rimba  
Leuk puteh kutru di manyang  
Leuk hitam kua di bumoe

Kisah lon ba Kilu Zaman  
Jiwoe curam nyan u nanggroe  
Ate sosah hana lawan  
Bak sulotan le jipeutoe

Ampon e po syahi alam  
Hana jalan dum kamoe nyoe  
That beurani aneuk ensan  
Jimuprang hana sibagoe

Guda saboh hana lawan  
Pantahjih ban kilat uroe  
Tacang tatop han tom keunong  
Ulah bangon liwat ragoe

Saktijih le hana bangon  
Han keunong watee takiloe  
Basyah Alampi ka teudu  
Keunong busu tuanku droe

Laenpi le biek meulaku  
Meutabu mate di bumoe  
Di jih bulee hana reubah  
That pantah si aneuk bisoe

Kilu Zaman meunan peugah  
Jiek juah raja nanggroe  
Muka puteh gareh mirah  
Sang aruwah sret lam asoe

Neudeungo mate le nyang meugah  
Buet ube drah ek mupaloe  
Yoh nyan raja yue krah rakyat  
Peukek surat jeuep-jeuep nanggroe

Kilu Zaman yoh nyan siat  
Jikrah rakyat malam uroe  
Haba nyoe lon peutoe leugat  
Ase rakyat wadi meuntroe

Raja mideuen neukheun leugat  
Wahe rakyat asoe nanggroe  
Gata nyoe dum le that teupat  
Keunong tangkap si aneuk nyoe

Padum nyang ka sudah mate  
Han ek theun le gata dum nyoe  
Jih pantah that hana mise  
Han ek ase tapupaloe

Sebab meusom hana lahe  
Nyang jeuet mate le gata nyoe  
Nibak akai bubai pike  
Aleh pakri peukara nyoe

Bak lagee eleumee sihe  
Bak Pari Kureh samlakoe  
Bujang peugah pantah nyoe ban  
Ampon laman tuanku droe

Panglima prang neuyue peusan  
Nyang bak gunong sihe pindoe  
Jibri ureueng ubak sihe  
Hingga troh le keunan sampoe

Troh bak raja keunan hampe  
Salen jibri dum sinaroe  
Keumah haba seugala be  
Ka ase seugala meuntroe

Poteu raja neukhanduri  
Meuanji ngon raja nanggroe  
Meuhan talo Kureh Pari  
Hareuem nasi ulon sidroe

Si Kureh nyan ulon gasi  
Cit keunoe le ulon puwoe  
Meunyo dudoe ubah janji  
Lon tagunci tuanku droe

Meudua droe rakan neubri  
Soe me ruti laen bagoe  
Keupeue ureueng dum meureutoh  
Nyang na rioh sikhan nanggroe

Keupeue teungku manok pupoh  
Neuboh taroh dum galak droe  
Kon teungku cut buet lon puboh  
Neungieng beu troh siblah nanggroe

Meunan jikheun dum jiratoh  
Aneuk bioh pumeugah droe  
Kilu raja bak masa'nyan  
Peusabetkan haba gop nyoe

Nibak layah ka sah meunan  
Ek sipadan bak lon eu proe  
Kureh Pari ek jilawan  
Tupang Canggang that bit usoe

Meuntroe seuot hana troh fam  
Buet Tuhan nyang tupeue jeuep syoe  
Gampong Talon ngon Ulee Blang  
Lhee meureuntang Teupin Ara

Harah balek titek dalam  
Kureueng imbang lagee nyang ka  
Teiduek dilee Tupang Canggang  
Teungku rakan goh beh teuka

Leukek jimeulet ateueh peutoe  
Puyoh manoe dalam cintra  
Kureh Pari rawi jinoe  
Samlakoe di keubon bunga

Deungon guda bandua droe  
Ngon cicem nyoe nan Diwata  
Takoh buloh taboh bangsi  
Nanggroe Idi jak seumuga

Allah e Po Tuhan Gani  
Keu lon neubri na kuasa  
Neubri tajam karang rawi  
Sayang wali tunggu hamba

Bukon sayang lon eu raket  
Urot palet ban seulingka  
Lon teungku cut buet meuseupet  
Hana siblet nyang na reuda

Lon duek lon dong lam mupalet  
Lam seulawet meunoe donya  
Hana seunang mube pijet  
Nyang jeuet keu trep tamat haba

Jeuet ngon sahbat le that sulet  
Nyang sabet beulanja hana  
Teuduek 'oh noe karang singklet  
Laen palet ulon buka

\* \* \*

## VII. KUREH PARI MEUKAWEN NGON NURON BEUREUHI

Bangka Ulu lalu aroh  
Bakat tujoh Tanjong Cina  
Amma bakdu laju tanggoh  
Bek le riuh ban seulingka

Kureh Pari rawi lon boh  
Lam bungkoh neucok keumala  
Neucasap le po samlakoe  
Seupot nanggroe siklep mata

Lam seupot nyan intan meuntroe  
Troph sidroe raja eelia  
Cit neudong le lahe keudroe  
Po samlakoe seumbah sigra

Teungku Tamim neukheun meunoe  
He aneuk droe peue na hawa  
Peue buet aneuk taduek sinoe  
Gohlom tawoe bak cut muda

Po banta cut seuot nyoe ban  
Keusukaran he ayahda  
Hana geutueng ulon tuan  
Ka geujak prang di rot raya

Hinga teuma lon meulawan  
Ka jeuet keu prang padum lama  
Teungku Tamim neujawueub le  
Boh ate bek sosah gata

Pioh bacut pheuet meuuke  
Jinoe bahle lon usaha  
Bah lon jak bak Kaha Zaman  
Bak sulton yah cut rakna

Pakon bak jeuet surot bak han

Ngon bungong nyanpi ka lheueh na  
Tinggi gata bungong peukan  
Lon intan kujak bak raja

Teungku Tamim neubeurjalan  
U makam bak kuta raja  
Na sikeujap sampoe datang  
Tamong rijang u istana

Ban raja eu teungku datang  
Beudoh rijang peumulia  
Neupeudeuk le atueh keurus  
Raja doli neudeuk sama

Teuma marit Tamim Ebni  
Tadeungo he raja Kaha  
Soe tameung prang wahe deelat  
Lon eu alat cukop raya

Ngon pahlawan hebat hebat  
Siri teumpat taneuk ngaza  
Raja Kaha seuot nyoe ban  
Aneuk ensan ya meelana

That beurani hana lawan  
Jipoh rakan kamoe bena  
Ulon tuan jipeu'aeb  
Surat jipeuek keu aneukda

Jijak lakee jimeukawen  
Lam baton watee lon bungka  
Hana lon tueng seubab ensan  
He sulotan ya meelana

Meunan neukheun Kaha Zaman  
Tamim yoh nyan masam muka  
Wahe raja jen eseulam  
Pakon meunan narit gata

Raja gata Nabi Sulaiman  
Bangsa ensan manusia  
Na leubeh laen nyang nibak nyan  
Ci ingatkan uleh gata

Neukeurajeuen sigom alam  
Jen ngon ensan manusia  
Ulon jinoe keu utosan  
Nyang jeuet datang ubak gata

Kureh Pari lon ba keunoe  
Aneuk kamoe tateurima  
Meuhan tatueng takheun beu trang  
Lon jak riwang bek le haba

Ban neudeungo le sulotan  
Lam badan sang nyawong keulua  
Teumakot that hana lawan  
Kareuna nyan raja eelia

Ngon keuramat hana sabe  
Di akhe ulon meureuka  
Meuhan lon tueng laju mate  
Nanggroe reule jeuet keu sira

Raja Kaha seuon jaroe  
Neupeutoe neuseumbah lanja  
Neupeuampon ulonteu nyoe  
Tan jinoe ulon meudawa

Tan lon turi aneuk syekhi  
Kureh Pari si nyak banta  
Lon seumbah keu bawah kaki  
Ya saidi ban hukom gata

Nyang ka leupah lon seukali  
Yup gaki gata syekhuna  
Si nyak putroe Nuron Beureuhi  
Ya syekhi ban hukom gata

Neupeunikah ngon cut ahli  
Kureh Pari ngon cut rakna  
Poteu raja meunan kalam  
Eelia nyan seuot teuma

Meunyo meunan he sulotan  
Putroe intan nyopepat peuha  
Nyoe jeunamee Nuron Beureuhi  
Pawoh janggi bungong tiga

Raja sambot suka ate  
Hireueun kon le poteu raja  
Han tom neueu bungong pawoh  
Padum reutoh umuneu ka

Neupeuleumah bak cut haloh  
Ate mayoh putroe muda  
Neupeuduek dalam meuligoe  
Miseue uroe hu meucahya

Abeh jieu wadi meuntroe  
Raja nanggroe peukeuk teuma  
Teuma neujok ubak putroe  
Lam peutoe neupasoe lanja

Teungku Tamim neukheun nyoe ban  
He sulotan peue lom haba  
Bak dua blah hari bulan  
He suiotan linto lon ba

Jinoe gata peukeumah droe  
Gaca putroe taboh sigra  
Seuot raja insya Allah  
Ban peurintah ya meelana

Lheueh meututo teungku gadoh  
Neuwoe ka troh bak cut banta  
Neupeugah bak bungong mirah  
E meutuah ka seumporna

Tawoe linto bak dua blah  
He cut indah ka lheueh peuha  
Abeh narit bak khalifah  
Jak meukeumah he bentara

Teungku Tamim lon peugah proe  
Ngon jaroe neuprok bandua  
Ngon sikeujap jeuet meuligoe  
Ngon kuta nyoe peunoh lingka

Ngon rupa got hana bagoe  
Lam nanggroe hana pat peusa  
Na sikeujap teuma dudoe  
Seupot nanggroe siblah donya

Teuka rakyat ma teungku droe  
Hana soe boh had hingga  
Inong agam ban sinaroe  
Meuligoe peunoh ngon kuta

Hana panyang lon riwayat  
Beu lon that panyang haba  
Keumah ase deungon pakat  
Raja rakyat ase dum ka

Geupreh watee troh nibak had  
Nak leugat linto geupuba  
Jilop buleuen teubit uroe  
Peugeuh nanggroe trang cuaca

Teuduek dilee po samlakoe  
Hareutoe sulutan Kaha  
Poteu raja lon kheun bagoe  
Neuhei meuntroe ngon bentara

Pakri laku meuntroe canden  
Tapeukawen putroe muda  
Hanco nanggroe meuhan tatem  
Buet Tamim raja eelia

Seuot meuntroe Kilu Zaman  
Nyokeuh meunan he meukuta  
Bak lon tuanpi that reumbang  
Lam undang lon kira-kira

Meunyo meunan tapeugah kri  
Jak peuase peue-peue nyang na  
Yoh masa nyan he ya akhi  
Meuntroe wadi jak keurija

Peue nyang kureueng jipeuase  
Buet khanduri dum jijaga  
Maseng-maseng buet di jaroe  
Malam uroe hana reuda

Poteu raja lon hareutoe  
Neukheun proe bak putroe muda  
Wahe judo bako ujoe  
Meuligoe peuase lanja

Wahe aneuk Nuron Beureuhi  
Jak mandi wahe aneukda  
Malam singoh woe suami  
He aneuk ti bek le rugha

Meunan neukheun uleh umi  
Nuron Beureuhi beudoh lanja  
Lheueh Jimanoe bungong uroe  
Sambinoe Jimeungui lanja

Jisok gleueng meuh gaki jaroe  
Jingui jinoe pawon Ierupa  
Keunong euntuek jaramani  
Meuriti 'oh peunoh dada

Soe nyang kalon bungong giri  
Meugule sinan lam tika  
Lheueh geupeungui dara baro  
Peunganjo peuduek bak geuta

'Oh roh subang mata hijo  
Meulo-lo cahya bak muka  
Cut Beureuhi ate deundam  
Bungong keumang rumeh raya

Jipreh-preh woe teungku abang  
Sulotan Kureh Keumala  
Dalam ate hana le bokbang  
Kon ban macam nyan baroesa

Jilhoh-lhoh droe bak ceureumen  
Ate ingen cut bungong la  
Ie muka hu ban ceureumen  
Dawok jikhem hana reuda

Cut Beureuhi ate puleh  
Keunoe keudeh jimeuseunda  
Hana meunyum asoe peudeh  
'Oh jieh teukeuta-keuta

Teuingat keu banta Kureh  
He geunaseh peue treb raya  
Di lon sinoe han ek kueh  
Meuhana jeh geumpa Ierupa

Meunan jikheun cut peureuseh  
Keunoe keudeh publoe mata  
Jikhem sabe jiduek jieh  
Ate keudeh sang jibungka

Si ny<sup>nk</sup> putroe nyang meutuah  
Teutap dasyah lam istana  
Ubak dilee muwoe kisah  
Lon peugah banta got rupa

Puteh kuneng bungong geltoe  
Keunong uroe abeh leukang  
Teungku Tamim lon hareutoe  
Bak samlakoe neukheun rijang

Wahe aneuk batee ujoe  
Beudoh jinoe he buleuen trang  
Ubak raja nyang beurpangkat  
Ka troh bak had bek le lintang

Meunan neukheun raja deelat  
Beudoh leugat panglima prang  
Jak peukeumah peue goh ase  
Seugala be beudoh rijang

Jak intat banta bak siti  
Meukeumah le inong agam  
Neuba rakyat nam ploh ribee  
Nyang pangulee nam laksa nam

Soe nyang kalon ek srui bulee  
Meu'ee-'ee han putoh reuntang  
Bandum rakyat maseng sukee  
Nyang jak dilee uleebalang

Di keue inong linto baro  
Bungong kundo nyang elokan  
Hingga teuma he teungku e  
Lon ato bek panyang kalam

Ka sampoe bak kuta baro  
Tamong laju le u dalam  
Mumat jaroe dum peunganjo  
Bale hijo duek meureuntang

Hana panyang lon calitra  
Cut banta peuek u dalam  
Di seuramoe ateueh tahta  
Ireng lingka uleebalang

Seureuta-meureuta Tamim eelia  
Raja Kaha di hadapan  
Beudoh teuma lhee droe teungku  
Neudeuk laju rab sulotan

Lheueh nibak nyan di tuanku  
Bak teungku wakilah rijang  
Lheueh nyan raja beudoh minah  
Peurab syiah bak cut intan

Neumat jaroe lakee meu'ah  
He khalifah deelat makam  
Neucok le ie neusrah babah  
Ngon bismillah neukheun rijang

Keu tuanku lon peunikah  
Cut indah aneuk sulotan  
Nibak ulon neuwakilah  
Gantoe babah deelat makam

Si nyak banta seuot pantah  
Milek lon sah putroe intan  
'Oh lheueh ijab kabui nikah  
Teungku syiah neucom tangan

Neuleueng amin rahop jaroe  
'Oh nan adoe hana panyang  
Neucok banta nibak jaroe  
U meuligoe peukek rijang

Maja peuduek ateueh kaso  
Linto baro nibak tilam  
Teuma geucok dara baro  
Geuba laju jak com tangan

Lheueh seumeumah bungong usen  
U geunireng peuduek rijang  
Jibeudoh cahya mubreng-breng  
Neukeureuleng banta intan

Neungieng po cut got that linteng  
Bit ban cicem peugah ruman  
Cut Kureh Nuron beureuhi  
Han ubah hi 'oh tee neukhem

Soe nyang kalon rindu ate  
Roh that uke ngon sipadan  
Han roh sapeue ta peugah le  
Bak ate seureuta pandang

Teutap dilee dara baro  
Ureueng nyang le lon peugah ban  
Rakyat nyang jak peungon linto  
Geubri bu le uleebalang

Abeh bandum ka seuleusoe  
Hana adoe panyang kalam  
Teungku Tamim neuprok jaroe  
Rakyat jiwoe lam saktian

Teungkupi ka leugat neuwoe  
Gaduh keudroe dalam kawan  
Tahe hireuen , ureueng nanggroe  
Teukap jaroe dum sulton

Bit areh that po samlakoe  
Hana soe nyang leubeh bak nyan  
Teutap dilee ureueng nanggroe  
Sambinoe lon peugah macam

Si nyak putroe Nuron Beureuhi  
Si nyak ti baro guransang  
Dengon lakoe Kureh Pari  
Nyang ugahri miseue mambang

Lam meuligoe cong keurus  
Cut ahli ngon deelat makam  
Uroe malam that beureuhi  
Lale ate ngon cut intan

Malam uroe lam meuriah  
Pajoh gapah sie bak meugang  
Rotdeh sarong rotnoe siwah  
Sabe basah beulangong nyan

Rotdeh asoe rotnoe kuah  
Leumiek meutah sit di dalam  
'Oh ka beungoh jak seumeurah  
Deelat syah ngon cahya intan

Lheueh neumanoe neukeumbali  
U meuligi cahya intan  
Bandua ngon ampon doli  
Rindu ate uroe malam

Han tom jarak meusipade  
Lam sabe di atueuh tilam  
Si nyak putroe Nuron Beureuhi  
Abeh kri ngon deelat makam

Cit lam teukhem muka rumeh  
Han tom beungeh meusimalam  
Lam sabe neupajoh mameh  
Si nyak eh lam mangat badan

Di bantapi ate ceundrong  
Geurancong meuen tee malam  
Si nyak putroe nyang meutuah  
Galak leupah hana lawan

Hana reuda pajoh lincah  
Phet that babah tan makanan  
Bandua droe mayoh meusyen  
Han tom ceuken meusimalam

Teuduek dilee si nyak putroe  
Raja nanggroe lon peuriwang  
Kaha Zaman nyang tuan droe  
Bak siuroe raja makam

Neueu aneuk ate dukhoe  
Bandua droe ate girang  
Poteu raja kheun bak wadi  
Lom bak meuntri nyang pahlawan

Wahe meuntroe nyang ugahri  
Tadeungo he lon peugah ban  
Tajak siat u meuligoe  
Bak samlakoe aneuk badan

Takheun saleuem ulonteu nyoe  
Lon nak gantoe keu sulotan  
Meunan hajat lon beureuhi  
Nyang meuseuti hana jeuet tan

Lheuh nibak nyan teungku meuntroe  
Beudoh jinoe tamong u dalam  
Neuek laju u meuligoe  
Bak samlakoe banta intan

Lheueh nibak nyan teungku meuntroe  
Neukheun jinoe amanat sulotan  
Ampo e po payong nanggroe  
Bak kamoe suroh syah alam

Kirem saleuem bak ayah droe  
Bak kira nyoe neubet sulotan  
Neumeung pulang gampong nanggroe  
Sinaroe deungan pahlawan

Bujang geusyik wadi meuntroe  
Laeen bagoe uleebalang  
Teungku ayah umu ka tuha  
Tan kuasa mat hukoman

Meulaenkan harap seumata  
Keu aneukda deelat makam  
Nyankeu he po lon peuseumbah  
Keu bawah judo cut intan

Nyankeu haba nibak meuntroe  
Samlakoe neuseuot rijang  
Haba ampon ayah kamoe  
Bak lon sidroe hana reumbang

Ateueh ulee ulonteu nyoe  
Sinaroe narit sulotan  
Kon lon keubah u yup gaki  
Narit doli ayah laman

Na bacut akan teutapi  
Hantroh pike ulon tuan  
Lon duek raja hana meukri  
Hamba ini le sosahan

Hajat ulon woe keumbali  
Meuneubri idin bak Tuhan  
Do'a ayah keu lon neubri  
Bak Rabbi lakee bak reunggang

Meunan neukheun Kureh Pari  
Bak meuntri neupeugah dum trang  
Teungku meuntroe woe keumbali  
Bak doli raja sulotan

He tuanku raja doli  
Di yup gaki deelat makam  
Narit e po hana jadi  
Kureh Pari kureueng seunang

Sebab ate that beulisah  
That payah keurija malam  
Hana suka mat peurintah  
Hajat langkah woe bak makam

Hajat saweue teungku ayah  
Got that sosah lam seulindang  
Meunan e po neuyue peugah  
Keu bawah kawoh junjongan

Teuma seuot ampon deelat  
Pakri nyang got jinoe kaman  
Lon harap keu pirak lipat  
Nyang rindu that uroe malam

Got lon iem droe eu peurasad  
Dang mangat ate cut intan  
Untong ate gohlom teutap  
Bah lon lihat dang-dang seunang

Ban peurintah Allah Ahad  
Raja teutap lam pandangan  
Dalam nanggroe Mideuen Tufah  
Raja meugah Kaha Zaman

Di banta ngon putroe indah  
Neuduek dasyah lam sukaan  
Meung u lua han tom leupah  
Cut indah han jeuet beurjalan

Meung neuke tren neukeumeung jak  
Cut manyak jimat bak pinggang  
He tuanku meuen cut nyak  
Ho neumeung jak neubeurjalan

Peue saket that sinoe bak lon  
Neumeung tren peue neumeung pandang  
Han ek sagai duek lam ayon  
Tuampon peue neuhajatkan

Meunankeu hai putroe siti  
Ngon doli dawok peugot prang  
Meuen ladat dalam puri  
Ngon siti rupa elokan

Han jeuet lon eu bungong giri  
Di pasi timoh bak hagu  
Bak siuroe Kureh Pari  
Beureuhi ate tuanku

Masa dilee neumeuanji  
Ngon Janggi guda meulaku  
Neumeututo bungong giri  
He Janggi raja meusyeuhu

Takheun dilee tapeureugi  
Gunong Kasmi takeumeung eu  
Jinoe pakon han padoli  
Peue lom lanti beudoh laju

Meunan neukheun po samlakoe  
Guda ragoe seuot laju  
Di tuanku sabe wang-woe  
Keu putroe Deulima bungsu

Nyanpat ka na sajan ngon droe  
Peukeuh putroe lom meunapsu  
Seuot Kureh teuma meunoe  
Kon putroe lon keumeung jak eu

Nibak ate lon that seungkoe  
Jipupaloe ingat malu  
Padum keunong deungon sakti  
Kaha Pari nyang peulaku

Nyang got bak lon bek le lanti  
Peureugi tabeudoh laju  
Meunan neukheun cut juhari  
Guda Janggi lom jimeusu

Meunyo meunan esok hari  
Peureugi ikot ban napsu  
Ie masen pasoe lam guci  
Lam seurahi boh ie madu

Neumeututo Kureh Pari  
Ngon siti putroe mangat su  
He po cut budiadari  
Idin tabri lon he bungsu

Rijang lon woe lon keumbali  
Meung Tuhan bri panyang umu  
Han jeuet han seukali-kali  
Wajeb tabri he cut meulu

Seuot si nyak putroe siti  
Han ulon bri cre sigeutu  
Han jeuet ampon neupeureugi  
Adek ti goh pueh napsu

Ho nyang neujak lon peureugi  
He doli lon seutot laju  
Dalam leumueng Kureh Pari  
Cut Beureuhi ka jisulu

Jicom sigo nibak pipi  
Ampon doli jiwa laju  
Lheueh nibak nyan beudoh lanja  
Bandua deungon tuanku

U meuligoe neukek teuma  
Seumbah raja deungon ibu  
Neutanyong le poteu raja  
He aneukda peue peureulu

Tapeugah he cahya mata  
Peue that raya tameunapsu  
Meunan tanyong poteu raja  
Si nyak banta seuot laju

Ulon ampon he ayahda  
Kon rahsia he tuanku  
Nyang troh langkah kamoe dua  
Na haba bak lon sigeutu

Ulon harap bak paduka  
Na hawa raya that napsu  
Bukon sayang meudang ara  
Di kuala Banjamasen

Meunan tuto Kureh Keumala  
Putroe muda di geunireng  
Ulon tuan jarak bungka  
Na bicara nanggroe laen

Meuna umu rijang gisa  
Meutan fana nyawong lon len  
Meuka mate patek hamba  
Putroe muda neupeukawen

Abeh narit nibak banta  
'Oh nan saja di lon kutren  
Cut Beureuhi jideungo haba  
Ie muka miseue panyot len

Meusigeutu han le cahya  
Bungong jeumpa got that ceuken  
Lah malee takot keu raja  
Meuhan jiwa le jigureng

Teuma seuot poteu raja  
Ho tabungka nyang that meusyen  
Meunyo tajak he aneukda  
Sajan taba putroe linteng

Bek takeubah nibak hamba  
Akhe masa sret pungo jen  
Bak lon nyang got meutabungka  
Nyang jroh taba bek jeuet meusyen

Kon aneuk han lon teurimong  
Takot keunong jitamong jen  
Got ba sajan intan bungong  
Ban nyang keunong di lon kutem

Bitpi meunan ban nyang keunong  
He bungong bek ate sureng  
Teuma seuot Kureh bungong  
Ate nyawong kon ho laen

Meulaenkan sinoe nyang keunong  
Jitamong watee lon bandeng  
Rijang lon woe lon teurimong  
Lon cok bungong bek jilop jen

Teuma seuot poteu raja  
Bak bunda jak peugah tuben  
Takheun ubak po meukuta  
Tacalitra sangat ngeuren

Jitren sinan seumbah bunda  
Bandua ngon putroe linteng  
Lheueh seumbah peugah ngon haba  
Pasai bungka kon peue laen

Teuma seuot putroe tuha  
Kah hai dara bek turot jen  
Peue buet kajak sajan banta  
Hana gura roh bak gop khem

Bah tinggai geutanyoe dua  
Bah jibungka laju po lem  
Cut Beureuhi beudoh gisa  
Ngon ie mata ro meuleng-leng

Yoh masa nyan leupah gura  
Di istana meuen runggeng  
Cut kureh teuduek bak geuta  
Putroe muda di geunireng

Hingga uroepi ka seunja  
Bandua jilop lam tabeng  
Ka neueh lam tiree rawa  
Ngon cut rakna pade raden

Beungoh uroe teubiet faja  
Jaga banta beudoh neutren  
Neukek teuma u istana  
Bandua ngon putroe linteng

Neupajoh bu jep minoman  
Cut intan sira neukhem-khem  
Si nyak banta ngui pakaian  
Sileungkapan ban sigo tren

Si nyak putroe 'oh jipandang  
Teungku abang got that linteng  
Allah he Po lon he Tuhan  
Asoe badan leupah neutren

Keupeue guna udep badan  
Aruwah han le lam dihen  
Di tuampon neujak jinoe  
Di putroe manoe lam tabeng

Jinoe ulon meuhat deuek troe  
'Oh hana droeneu e tuben  
Meunan jikheun si nyak putroe  
Sira jimoe ngon meuleng-leng

Banta neucok putroe muda  
He bungong la bek le that jen  
Lheueh neucom neuduek bak tika  
Bek le rugha lon ka lon tren

Meunan neukheun po got rupa  
Putroe muda lom jigureng  
Jimupanton lulon sutra  
Ngon suara meuek meutren

Keudidi di Pante Raja  
Leukek bangguna di cong usen  
Ka lon idin he meukuta  
Neugisa bek troh bak musem

Di cong hagu aneuk rawa  
Jisama jijep ie masen  
He teungku neuningat guna  
Di istana dalam tabeng

Ija puteh bajee mirah  
Nyang cidah ija sandusen  
Teungku ampon neucok langkah  
Pat neukeubah putroe linteng

On murong keu gule rampoe  
Taboh asoe on rambideng  
Jinoe di lon sabe deuek troe  
Tahe keudroe han soe sunteng

Hokeuh lon jak ya Tuhanku  
Got that tunu ate ngeuren  
Jinoe sabe hana te'uet bu  
Plok susu leupah bak tuben

Meusiuroe hana lon eu  
Mate laju lon lam tabeng  
Si nyak putroe meunan jikheun  
Neucom bak keueng le cut linteng

Di cong meudang umpung bayeuen  
Rambideuen jirawe sutra  
He putroe bek meunan takheun  
He buleuen bek ro ie mata

Hana lupa lon adek ti  
Tiep hari lon ingat gata  
Meunan neukheun Kureh Pari  
Cut Beureuhi jicom jiwa

Cut putroe com lom di gaki  
Klik meu'i-'i peulheueh meusyen  
He judo jakleh keumbali  
Ka ulon bri idin neutren

Teutapi oh leupah gata  
Lon eu raja ate ngeuren  
Nyang nyawong sajan meukuta  
Ie mata tinggai lam tabeng

Banta neutren troh oh pinto  
Linto baro lam teukhem-khem  
Si nyak putroe ka jibae  
Bungong kundo laju neutren

Troh bak guda bulee hijo  
Neumeututo raja malem  
Aneuk puyoh dalam cintra  
Cempala jiwoe di barat

Neumeututo deungon guda  
Beudoh gisa bek le lambat  
Tahei keunoe Kilat Faja  
Soe nyang ba seugala alat

Guda deumpek sigo raya  
Keunan teuka raja Kilat  
Seumbah sujud bak Keumala  
Peue he raja na meularat

Hana sapeue he seutia  
Heundak bungka ampon deelat  
Gata nyang me bandum barang  
Beukalan raja beurangkat

Makanan nibak sulotan  
Bungkosan neuwoe di barat  
Kureh neukek ateueh Janggi  
Cut ahli neumat taloe klat

Neumat keukang siblah kiri  
Guda Janggi ka jilumpat  
Di likot nyan Kilat Faja  
Jiteureupa laju meucrap

Meucring-cring jimeusu geunta  
Putroe muda deuh neulihat  
Neueu lakoe leupah bungka  
Ngon guda rupa malakat

Leukang ate putroe muda  
Ro ie mata ban geuceupat  
Sira jimoe jikheun do'a  
Wahe raja beu seulamat

Beu troh neujak deungon neuwoe  
Beu sampoe pinta ngon hajat  
Teungoh neungieng gadoh keudroe  
Han meuho gadoh lam asap

Teutap tahe putroe bako  
Guda nyang po lon riwayat  
Lam awan laju meusyo-syo  
Siat saho timu barat

Pat nyang han ek pajoh umpeuen  
Di yup ujeuen jibeurangkat  
Hana sapeue lom mubayeuken  
Lapan buleuen ka cre teumpat

Raja guda 'oh lheueh makeuen  
Miseue tupeuen jipo leugat  
Trok sampoe dua blah buleuen  
Ka mubayeuken leumah asap

Leumah gunong di hadapan  
Guda plang jipioh siat  
Jipeugah bak banta intan  
He sulotan nyoekeuh teumpah

Cuda jidong atueh bumoe  
Bungong uroe neutren leugat  
Neungieng keudeh neungieng keunoe  
Neueu bagoe saboh teumpat

Ateueh buket saboh sungoe  
Hana bagoe ie tajam that  
Ngon ceureumen rotdeh rotnoe  
Ngon batee nyoe dum meusurat

Bandum jeuet kheun wahe adoe  
Tulesan nyoe basa Arab  
Soe na iman jeuet jimanoe  
Dalam sungoe jitren leugat

Meutamah kha ngon beurani  
Beureukat Nabi pangulee umat  
Abeh neukheun Kureh Pari  
Ngon Janggi neumarit leugat

Lheueh nibak nyan bintang pari  
Dong di teupi batee meusurat  
Tren jak manoe bungong giri  
Ngon Janggi guda hekeumat

Meurasa seugala seundi  
Neujep lagi jeuet keu ubat  
Mangat asoe ngon beureuhi  
Neutiti laju u darat

'Oh troh neudong ateueh reuleueng  
Neueu ureueng hana sapat  
Di guda jipajoh umpeuen  
Bak rasa nyum teugajih that

Si nyak banta tahe siseun  
Bungong seupeueng neumeuucap  
Saboh neukheun pujoe Tuhan  
Nyang kayaan Rabbon 'Ibad

Ka lon dapat seukalian  
Lua dalam phui deungon brat  
La ilaha illallah  
Gata nyang sah cukop leungkap

Si nyak banta neubet gaki  
Peureugi ho laen teumpat  
Bak teuratak lom neutiti  
Hana sakri rupa hebat

Batee intan dum bak teu  
Ngon lahuri dum meukilat  
Cabeueng reundah bakji tinggi  
Deungon bohpi mameh ladat

Lom banta hireuen seukali  
Hana sakri ate teurangkat  
Teuma Kureh neuhei Janggi  
Neusudi le banta deelat

Nyoe nyo teumpat Nabiyullah  
Nyang tapeugah dilee meuhat  
Guda jikheun nyo he doli  
Nyang lon rawi lon peugah had

Lom ka hireuen Kureh Pari  
Neutiti u ateueh leugat  
Leupah ateueh bungong giri  
Kanan kiri dum meuasap

Na nyumi laot sang di gaki  
Ngon luahpi han troh lumpat  
Saboh kubah le teurjali  
Kanan kiri dum meusurat

Dum teuseubot nama nabi  
Di teupi leumah dum meucap  
Ka neupeurab Kureh Pari  
Neukalon le peue meusurat

Neueu pinto dum meugunci  
Meuh meuuri dum meulap-lap  
Saboh kulah nyan di teupi  
Ie kasturi bee mangat that

Ngon batee saboh di gaki  
Hana sakri hu meukilat  
Peurab keunan Kureh Pari  
Neutiti laju neulihat

Nyang tajam po rajawali  
Mirahpati carong kilah  
Tueng ie seumbahyang Kureh Pari  
Neuriwang le bak batee lintah

Sare keunong ie bak badan  
Rasa pangsan laju reubah  
Hingga cukop suci badan  
Cut intan neuteukui bagah

'Oh lheueh saleuem banta seudang  
Pinto yoh nyan laju teuhah  
Neubeudoh le bintang pari  
Peureugi bak pinto kubah

Neueu han le dum meugunci  
Ngon teukeudi sidroe Allah  
U dalam heundak peureugi  
Lam ate meunoe meulintah

Neumohon le nibak Rabbi  
Neujok diri ubak Allah  
Neubet langkah dua gaki  
Neutiti u dalam sudah

Meusuara le di manyang  
Bek jak keunan muda indah  
Meunyo ate tajak keunan  
Blah seulatan tameulangkah

Jak manoe dilee bak kulam  
Jak meukawan ngon jariah  
Jariah nyan dum dendayang  
Rupa na ban uroe beukah

Miseue uroe teungoh siang  
Meunan macam rupa cidah  
Cut Beulukeh po dendayang  
Judo Sulaiman raja meugah

Keunan gata dilee jalan  
'Oh woe sinan tamong kubah  
Ban neudeungo le cut intan  
Ate bimbang cut meutuah

Bak guda laju neuriwang  
Neujak peutrang asailiah  
Lon tren teuma blah seulatan  
'Oh lon riwang tamong kubah

Sinoe gata peurheuntian  
Lon surohan ikot titah  
Teuma guda iem beurdiri  
Hana ungki ban peuneugah

Teuma neujak Kureh Pari  
Seun seubiji neubet langkah  
Neutren buket blah seulatan  
Batee hitam puteh mirah

Kureh pari that sukaan  
Cut intan ateneu dasyah  
Neueu naleueng dum hamparan  
Ngon tanoh ban sare leupah

'Oh ban neueu blah seulatan  
Leumah gunong sangat indah  
Keunan laju neubeurjalan  
U hadapan troh neulangkah

'Oh sare troh u bineh kulam  
Bungong keumang hireuen dasyah  
Sangat 'ajaeb bak neupandang  
Yoh masa nyan siat dasyah

Leumah jieu le dendayang  
Pane tuan keunoe langkah  
Seuot teuma Kureh Keumala  
Ulon teuka ikot titah

Troh bak lon saboh suara  
Lon deungo haba nibak kubal<sup>1</sup>  
Keunoe ulon neuyue teuka  
Patek hamba seubab leupah

Neuyue manoe deungon gata  
Keunoe sigra tameulangkah  
Dendayang deungo meunan haba  
Beudoh lanja jitren pantah

Jimanoe ngon ureueng muda  
Ate suka rindu dasyah  
Dendayang tren bak teuratak  
Cawan beudak meuh meutatah

Lom jime deungon kheulumbak  
Wangi beudak han peue peugah  
Dum jipeuduek bak meusigak  
Lam pirak cawan meutatah

Ka jitren laju jimanoe  
Sambinoe ngon bungong mirah  
Mupoh-poh ie keudeh keunoe  
Nyang uet asoe nyang seumeurah

Samlakoe cut badan meurasa  
Jeuep angeeta mangat leupah  
Sang teuploh urat sineuna  
Mangat raya han peue peugah

'Oh lheueh manoe bungong karang  
Teungoh rijang laju pantah  
Mat bak jaroe le dendayang  
Jijulang peuek u ateueh

'Oh lheueh salen lap basahan  
Neuduek sinan pioh payah  
Teuma neutanyong Kureh Keumala  
Pareksa le tanyong pantah

Supo kubah jeh nyang dua  
He syeedara cuba peugah  
Lon eu siseun mublet cahya  
Ngon meutia dum meutatah

Dendayang jiseuot sigra  
Ureueng muda deungo lon peugah  
Saboh kubah Cut Beulukeh  
Judojih Sulaiman meugah

Nyang saboh bak batee puteh  
Tanda rotdeh nyang that meugah  
Sabon kubah jeh nyang indah  
Deungo lon peugah Sulotan Syah

Ka lon peugah he budiman  
Peue lom teuman tanyong pantah  
Teuma seuot bintang peureuseh  
Banta Kureh nyang meutuah

Jeh nyang manyang that aleukeh  
Peue kubah jeh cuba peugah  
Supo teumpat bungong puteh  
Beu abeh bak lon takisah

Dendayang jiseuot lanja  
Jicalitra bak asailiah  
Nyankeu teumpat dum eelia  
Dum seugala Nabiyullah

Keunan neujak meuseusuka  
Kon peurbula ulon peugah  
Nibak teupi dum meusurat  
Seureuta cap dum geukeubah

Sithon sigo neubeurangkat  
Keunan sapat ubak kubah  
Sinan neutroh saboh kitab  
Meusurat ngon ie meuh mirah

Tulesan ngon basa Arab  
Nyan kitab Sulaiman keubah  
Riwang tuan jak meungaji  
Takeumbali ubak kubah

'Oh nan saja jipeugah kri  
Di Kureh Paripi laen ulah  
Bak ate suka seukali  
Beureuhi keu putroe indah

Laen ate Kureh Pari  
Nyang keutahui sidroe Allah  
Hingga meusu raya han ban  
Di hadapan pinto kubah

Ube guroh dalam awan  
Yoh masa nyan glap sileupah  
Bangon geumpa umpama sang  
Ngon seupot klam han le leumah

Na siat ka peungeuh bandrang  
Ka meuriwang bungong mirah  
Bak kubah sang·ka meuriwang  
Sibarang pinto dum teuhah

Neutamong laju u dalam  
Ate bimbang cut meuh mirah  
Leumah pinto saboh sinan  
Ngon tangan laju neupeuhah

Saboh loh neucok u tangan  
Yoh masa nyan neulhoh pantah  
Ngon ie meuh bandum geureubeueng  
Banta buleuen ate teuhah

Kureh banta laju neukheun  
Ate hireuen cut meutuah  
Ngon ate ka rab meureubeueng  
Baro neukheun lhee boh harah

Bak ate laen teuingat  
Hana teutap nyum ka ugah  
Teuma meusu han neutupat  
Teubiet leugat nyak meutuah

Bek tadong le gata sinoe  
Akhe paloe nyawong sudah  
Tacok peuet neuk batee intan  
Peuet sagoe nyan pinto kubah

Nyang dua neuk tame sajan  
'Oh na lawan tasrom bagah  
Gadoh bandum seukalian  
Jen ngon ensan teuhah babah

Nyang sineuk taboh bak guda  
Peue hajat na rijang mudah  
Nyang sineuk taboh bak lihe  
Buetteu ase ho nyang tasah

Jeuet keu panyot watee meuseuke  
Dum ho ase tacok langkah  
'Oh abeh ka seungap haba  
Teubiet sigra banta indah

Ngon teumakot ate lia  
Jak cok lanja ban peuneugah  
Nyang sineuk gantung bak dada  
Ubak guda meunan ulah

Sira neukheun ubak guda  
Udeh bungka he meutuah  
Mita umpeuen cukop leungka  
Banta bungka faja gajah

Hingga beungoh uroe lanja  
Bungong jeumpa neucok langkah  
Dua deungon raja guda  
Kilat Faja ka neukeubah

Neuteureubang dalam miga  
Sampoe hingga awan mirah  
Awan hijo leupah banta  
Hilang sangka gadoh kubah

Reudok sagop glap-gulita  
Banta muda ate sosah  
Neumat keukang taloe guda  
Seutia Janggi meutuah

Teutap guda dalam awan  
Banta seudang Kureh Pari  
Neupo sabé uroe malam  
Guda plang Keumala Janggi

---

### VIII. GISA U PEURANTA NILA

Lon seubot ho laen syahdan  
Ngon beuklam leubeh nyoe tari  
Amma bakdu ban lheueh andam  
He rakan leubeh lom sakti

Saboh nanggroe blah seulatan  
Sulutan pangkat nyang tinggi  
Saboh aneuk di raja nyan  
Cut intan rupa juhari

Seulindang Deulima geurasi nan  
Cut intan rupa ban kande  
Geunap uroe ate sosah  
Lawet leupah banta juhari

Ie mata ro peunoh limpah  
Sayang leupah Kureh Pari  
Janji dilee cit lhee buleuen  
Jinoe pakon trep keumbali

Aleh peue na jeuet keu linteueng  
Aleh jitheun le jen pari  
Peue jeuet trep that troh neugisa  
He Rabbana ulon pakri

Bukon sayang lon eu tabee  
Meu'ee- 'ee jipo u pasi  
Neukeubah lon dalam juree  
Meuhat layee sinoe rule

Adat meunyo meunan lon thee  
Bah di juree lon boh rante  
Wahe raja asoe juree  
Neupeungeut kee sabe sabe

Bah sinoe lon pangkee-pangkee  
Lon peudatee malam hari  
Hana patot buet meutipee  
Batee ulee han nuewoe le

'Oh lheueh putoh janji dilee  
'Oh noe watee gohlom hampe  
Keubit lheueh that apoh ulee  
Di lon layee sinoe sabe

Cut putroe cut seudee ratee  
Gui-gui ulee antok sabe  
Inbat banta gohlom pulang  
That sayang budiadari

Dawok mabok ate bimbang  
Seulindang jigule-gule  
Ngon ie mata ro meukubang  
Cut intan reuloh that ate

Geunap uroe dawok bokbang  
Hana reunggang meusipade  
Jimeusyaem dum dendayang  
Cut intan peulale ate

Jiseubot nama cut bintang  
Akan raja nyan Kureh Pari  
Hoka saleh bungong jeumpa  
Apon mata puteh ate

Aleh pajan troh neuteuka  
He Keumala raja sakti  
Yoh neutren dua ngon guda  
Puteh mata lon kalon hi

He tuanku putoh asa  
Lon seutia peutang pagi  
Bukon sayang siwah raja  
Nyang that gura mirahpati

Aneuk bantai deungon tika  
Sayang raya dum meugule  
Ulon preh jan troh neugisa  
Hana reuda lon keumisi

Pat nyang kuto lon peureuseh  
Lon duek lon eh ingat janji  
Meunan sabe putroe areh  
Hana jieh malam hari

Dum dendayang teungeut abeh  
Cut puteh gadoh meurawi  
Lingka kuta dum jikawai  
Got that jai sidadu pari

Hana jarak meusijeungkai  
Ingat keuhai Kureh Pari  
Di putroe sabe meuafai  
Nyan si kawai han padoli

Meunan meunan sabe ulah  
Lem upah jideungo bunyi  
Bak raja teuma jipeugah  
Peuseumbah bak Kaha Pari

Po cut ampon he deelat syah  
Lon deungo sosah hana sakri  
Keunar sabe lam geuingat  
Nyang nan mangat Kureh Pari

Deuh lon deungo nyan u lúa  
Suara dalam meuligi  
Raja deungo meunan haba  
Ka hu mata Kaha Pari

Deungon kuat jiyue jaga  
Uleh raja bak sipai  
Hana mate si ceulaka  
Uroe jeh ka keunong sakti

Ka troh keunoe lom jiteuka  
Kajaga beu kreueh seukali  
'Oh kateumeung kadrop lanja  
Keunoe kaba ubak kami

Meunan suroh nibak raja  
Nibak apa Seulindang siti  
Jikawai kreueh hana tara  
Jipareksa han beureunti

'Oh teungeut nyan laen jaga  
Meunan aja keupala meuntri  
Di putroe sabe meurika  
Ureueng jaga han padoli

Di cut nyak ate ngon mata  
Keu cut banta Kureh Pari  
Jameun dilee nyankeu putroe  
Nyang that wang-woe malam hari

Boh rambot nyang mangat raya  
Boh pala pajoh ngon campili  
Hingga pangsan putroe muda  
Lam peurasa ingat budi

Neulumpoe le bungong jeumpa  
Na nyum teuka Kureh Pari  
Bandua ngon raja guda  
Teungoh bungka malam hari

Lam nanggroe Sukaran Indra  
Rab sampoe ka lam meuligi  
Meunan leumah lam peurasa  
Gohlom jaga putroe siti

Teutap pangsan putroe muda  
Lon calitra Kureh Pari  
Lon seubot kureh Keumala  
Ngon guda Keumala Janggi

Guda jipo hana reuda  
Jibungka Keumala sakti  
Jisujud lam awan mig  
Dum seugala han padoli

Neusrom sineuk batee intan  
Wasiet ban bak kubah nabi  
Han deuh jieu seukalian  
Le kawai jen Kaha Pari

Lam jijaga hana teudoh  
Leupah musoh lam meuligi  
Seupot mata dum jen bioh  
Nyang na rioh kiam bunyi

Guda sujud le u baroh  
Di jeuoh jitren jititi  
Seubab na panyot beurlian  
Atra nyan bak kubah nabi

Ngon kheundak Po sidroe Tuhan  
Hana trang nibak jen pari  
Guda sujud u hadapan  
Nibak teumpat tamong meuligi

'Oh ban jidong guda hitam  
Meuguncang meuligoe siti  
Lam teungeut neubeudoh rijang  
Han peue tanyong neumeurawi

Wahe raja asoe badan  
Ate leukang di lon sabe  
'Oh noe uroe goh neuriwang  
Hana meujan di lon mate

Ya Tuhanku nyang po alam  
Neubri datang Kureh Pari  
Soe ek theun droe geunap malam  
Di cut abang han neuwoe le

Neubri mate lon beu rijang  
Meuhan datang Kureh Pari  
Ulonteu nyoe geupeuayang  
Le cut abang neumeuanji

Abeh lagee di cut abang  
Ngon lon tuan han meusampe  
Abeh sosah putroe intan  
Hana reunggang lam meu'i-i

Soe nyang deungo meunyum sayang  
Ngon badan pijuet seukali  
Leuek bangguna di cong asan  
Di cong mancang umpung nuri

Neupinah lon uleh mawang  
Bek jiprang uleh barangri  
Soe troh langkah keunoe datang  
Nyan neusahkan hamba ini

'Oh noe had trep lon lam awan  
Meusidroe tan lon kalon hi  
He Tuhanku nyang po alam  
Han le datang abang kami

Nyang teuga po cicem subang  
Gura linggang mirahpati  
Ka troh keunoe dilee datang  
Teungku abang Kureh Pari

Jinoe hoka neubeurjalan  
Han neuriwang 'oh lheueh janji  
Tuboh lon nyoe paleh malang  
Meuh lam tangan jeuet keu beusi

He Tuhanku nyang zat maujud  
Neupeutroh buet hamba ini  
Neubri sampoe ban meukeusud  
Ngon do'a cut ma di kami

Si nyak putroe ka teuseungeut  
Bungong teuet hawa keu ruji  
Lam ate ka teuka meuheuet  
Meureubeuet-reubeuet minyeuk bee wang

Jieh han ek mata teubleut  
Meuheuet-heuet keu Kureh Pari  
Ka meuantok ngon teupako  
Ie mata ro troh u gaki

Abeh teuboh bajee hijo  
Neumoe bae putroe siti  
Bukon sayang aneuk tulo  
Peuraho teubiet u pasi

Lon seobot keu keumang hijo  
Linto baro Kureh Pari  
Ngon Janggi banta meututo  
Lon kulalo lam meuligi

Sayang lon that dara baro  
Lam jibae hana khali  
Raja guda teuma seuot  
Lon neupeulop dalam sakti

Lam hekeumat neupeulop lon  
Jakleh neutren bak si nyak ti  
Sayang raya cut ma ubon  
Ka lhee thon jitahan diri

Cut banta neucok manikam  
Boh u dalam guda Janggi  
Laju neutren banta intan  
Teungoh malam watee sunyi

Rot jeundila banta lalu  
Neulop laju lam meuligi  
Dendayang bandum teupako  
Sinan sulu teueh meuriti

Si nyak banta tamong meusyo  
Bak kaso tilam meusuji  
Bak peuratah meuh manek ro  
Neulalo banta juhari

Neueu kande dum meuato  
Ngon pinto hana meugunci  
Bak geuta laju neutajo  
Bak kaso jieh si nyak ti

Meusipak bate suasa  
Meugeunta teukeujot cut ti  
Jitanyong le pantah sigra  
Siapa masok keumari

Cut putroe beuet keupala  
Leumah banta Kureh Pari  
Ka teudong bak gaki geuta  
Hana haba meusibiji

Putroe beudoh laju jiwa  
He raja ulon ka mate  
Jicom preh-proh bak keupala  
Putroe muda putoh ate

Ngon jibae lagee raya  
E hai raja maen ate  
Jikap bak mieng com di muka  
Ka jiwa bak takue sabe

Hana le droe putroe muda  
Ngon ie mata sabe ile  
Jipeudeuk teuma bak geuta  
Seureuta ngon jibet bate

Jibri ranup teuma lanja  
Ate suka hana sakri  
AmpoN he po he meukuta  
Makeuen sigra sireh bak ti

Tuanku bek masam muka  
Hana lupa meuseukali  
Beungoh seupot lon meucinta  
Hana reuda peutang pagi

Bu lon pajoh han meurasa  
Simasa dalam teungku cre  
Bak ulon tan laen kira  
Keu meukuta di lon ate

Deungon teungku janji nyang ka  
Ubah hana lon he doli  
Seuot Kureh nyang Keumala  
He adekda jantong ate

Kru seumangat po jroh rupa  
Bak lon hana ubah janji  
Bak lon seutot bintang kala  
Abeh rasa lon adek ti

Gata sidroe hana dawa  
Tan lupa di lon seukali  
Pajoh ranup banta muda  
Seupah teuma jok keu cut ti

Putroe pajoh mangat raya  
Mangat rasa hana sakri  
Teukhem sabé putroe muda  
Ngon raja atueh keurusí

Na sikeujap idang teuka  
U keu raja meuceuradi  
Putroe beuet jaroe dua  
He meukuta makeuen nasi

Peue na mudah bak adekda  
Sira buta deungon campli  
Kru seumangat kheun cut banta  
Bak gata na dumnoe po ti

Nibak ulon ka syeuruga  
Mangat raya troh lam ate  
Beudoh keunoe he bungong la  
Ngon gata lon makeuen nasi

Lon meuhajat beungoh seunja  
Bu meurasa troh lam ate  
Seuot si nyak ulon sutra  
E meukuta tinggai kami

Pakri ngon lon pajoh dua  
Gohlom masa Tuhan neubri  
Jeuet lupot meuteumeung deesya  
Bak Rabbana teuma pakri

Seuot banta Kureh Keumala  
Tidak apa buet seukali  
Meuka lon kheun bek tadawa  
Ek lon peuna hadih Nabi

Beudoh meusyup putroe muda  
Ngon banta neumakeun nasi  
Neusrah jaroe le bandua  
Peutroh kada bak khanduri

Hingga makeuen Kureh banta  
Meurasa enak seukali  
Got that seudap hana tara  
Nekmat raya troh lam ate

'Oh lheueh makeuen pinah idang  
Buet dendayang aneuk pari  
Neumakeuen sireh seukarang  
Seupah neupulang keu putroe ti

Peugah haba meuen wayang  
Cut intan burak meunari  
Duek meusapat ngon cut abang  
Poh rantam putroe juhari

Si nyak putroe jikheun nyoe ban  
He sulotan gaseh dek ti  
Aneuk tulo di cong bugak  
Meusawak atueuh bak campli

Teungku pakon trep that neujak  
Sang tan galak bak laku ri  
Dum seugala abeh apak  
Lon preh neujak troh keumari

Bak janji lhee buleuen saja  
Nyoe teuma pakon that lawi  
Peue na gadoh jeuet trep raya  
Woe kakanda bak esteuri

Pakri ek theun di meukuta  
Di adekda sang ka mate  
Meunan jikheun cut Deulima  
Seuot teuma Kureh Pari

Di lon adek bak tren sinoe  
He sambinoe keunong sakti  
Keunong sakti apa gata  
Nama raja Batee Beusi

'Oh troh lon lam awan mig  
Phon kakanda keunong sakti  
Bandua he bungong jeumpa  
Ngor guda Keumala Janggi

Ulon sret lam laot hitam  
Lon pangsan di sinan lam ie  
Di guda saho beurjalan  
Saboh makam di jih ile

Padum lawet lon lam laot  
Sret bak eungkot udeueng pasi  
Riyueuk poh di lon meusangkot  
U bineh laot lon meugule

Beudoh sinan lon beurjalan  
Ngon grak Tuhan sidroe Rabbi  
Abeh pulo lon masokkan  
Uroe malam he adek ti

Ulon sampoe u Buket Kaf  
Ngon grak Allah ulon neubri  
Di gudapi meunan ulah  
He cut indah nyang juhari

Hingga padum lama sudah  
Di Buket Kaf meuteumeung Janggi  
Muwafakat lon teureubang  
Ubak bintang gata e ti

Ate lon nyoe sangat sayang  
Sebab that kong lon meujanji  
Guda teuma jimeulangkah  
Ngon grak Allah sidroe Rabbi

Padum lama deukek deungon grah  
Tan meusinggah sineuk ruji  
Teuma guda lom jipeugah  
Pakat langkah u gunong Kasmi

Keunan laju lon teureubang  
Dalam awan deungon Janggi  
Meurumpok saboh angkatan  
Geukheun nan Nuron Beureuhi

Aneuk raja jen eseulam  
Kaha Zaman nan geurasi  
Jiseumeuen uleh rakan  
Bak kulam Taman Baduri

Meunan geuyue le sultana  
Bak pahlawan meuntroe wadi  
Pulo Baduri dalam awan  
Di hadapan lon peureugi

Sang ka reudok dalam awan  
Han jeuet tuan lon peugah kri  
Ulon tanyong nibak guda  
Jikheun tantra putroe siti

Kamoe ka roh dalam kawan  
Pahlawan jijak keumisi  
Jipareksa hana lawan  
Jitahan dua blah hari

Jieputamong lam tutopan  
Nasib badan lon adek ti  
Hana daya lon meulawan  
Di gop rakan han meudum le

Lon sidroe hamba teubosan  
Ban jipadan ulon asi  
Teuma leupah nibak tahan  
Beurjalan laju peureugi

Padum lama lon lam sake  
Ka dua blet ulon keuji  
Bupi hana ie tan lon jep  
Troph u buket nama Kasmi

Abeh lon eu syoe nyang gaeb  
Ateueh buket teumpat nabi  
Nyankeu po cut nyang jeuet keu trep  
Kon seudiket bala kami

Abeh dum lon rasa saket  
Bak lon jak pot bungong wali  
Meunan neukheun si nyak banta  
Neupeuhaba bak putroe ti

Putroe yoh nyan ro ie mata  
Allah raja ulon pakri  
Untong na hu gohlom mala  
Sie keureuma hana basi

Jinoe ka troh nyang po jeumba  
Nyoe areuta nibak kami  
Wahe po cut cahya mata  
Lon ngon gata jinoe pakri

Bek tapeugah laen haba  
He cut rakna bek that 'a-'i  
Toh rot jinoe takeulua  
Tajak mita hukom Rabbi

Di ulonpi arat raya  
Puasa arat seukali  
Di tupon mangat neubuka  
Bek dahaga neuwoe lam hari

Yoh na sunat hana deesya  
Meunan sabda kheun le Nabi  
Na lon eu lam saboh banja  
Na lon baca yoh meungaji

Yoh na putik gohlom tuha  
Yoh na pasa cut adek ti  
Miseue e po bungong jeumpa  
'Oh ka mala han gura le

Yoh na seuuem han soe suka  
Pura-pura nibak bibi  
Cut putroe jisaja-saja  
Jipeukra raja syah doli

Di tuanku bak lon kira  
Hana hawa le khanduri  
Untong ka lheueh bak neubungka  
Soe saleh na peulheueh janji

Bak ate lon han jeuet hana  
Bak rupa lon kalon dali  
Teutap ka lheueh di rot raya  
Soe saleh na kaoi janji

Lon kalon that rumeh muka  
Jiek cahya nibak bibi  
Meuhan pane pura-pura  
Peue neubuya lon adek ti

Meunan jikheun putroe intan  
Di hadapan Kureh Pari  
He adek cut nyawong badan  
Keu Tuhan harap seukali

Padum lawet lon beurjalan  
Bak Tuhan langkah raseuki  
Han lon takot he cut intan  
Keu sulton Kaha pari

Han lon malee keusaktian  
Lon hantam ngon do'a cut ti  
Hana ujob ngon teukabo  
Kuhanco sulton Beusi

Han lon takot keu le angkatan  
Taeu teuman he putroe ti  
Si nyak banta meunan tuto  
Ka tahe bintang juhari

Leupah narit dara baro  
Ie mata ro troh u gaki  
Ka teuingat keumbang hijo  
Jitajo jikap di bibi

Jieu beungeh linto baro  
Leupah tuto nyak putroe ti  
He adek cut dara baro  
Bek le a-o budiadari

Bahle sigo ulon hanco  
Lon nak eu raja kap beusi  
Lon meung kalon soe nyan beuhe  
Nyang na le lon kalon sakti

Nyanpat taeu dara baro  
Bah hanco cut Kureh Pari  
Jinoe nyang got he cut intan  
Bak sulton jak peugah kri

Meuhan geutueng he cut intan  
Seureuta nan tapeugah kri  
Deungon tulong sidroe Tuhan  
Sulton beureukat Nabi

Sinan meuri beuhe tungang  
He intan bak ujung bari  
Nak meuri nyoe aneuk ensan  
Cuco Adam entu nini

Meunan neukheun banta seudang  
Seuot intan nyang juhari  
Nyokeuh meunan he sulton  
Bak lon tuan roh seukali

Keumah meunan pakat sampoe  
Samlakoe ngon bungong giri  
Hingga seupot le ngon uroe  
Sambinoe neubet khanduri

Pajoh ngon bu bandua droe  
Wahe adoe mangat kon le  
'Oh lheueh bu pajoh ranup  
Neulop po cut dalam puri

Neueh leugat po raja cut  
Putroe neubeuet le seumudi  
He tuanku lon that meuheut  
Na bacut lon keumieung sudi

Peugah tupon meuube teuet  
Nyoe po cut rindu seukali  
Seuot banta nyang budimán  
Peue he intan tameung sudi

Si nyak putroe jikheun rijang  
Nyoe sulton hadih Nabi  
Saboh cicem po lam awan  
Ie na sajan han geutem bri

Cuba peugah he sulton  
Pakri ban cuba boh takbi  
Meunan tanyong putroe intan  
Seuot rijang Kureh Pari

Wahe po cut batee badan  
That dalam eleumee cut ti  
Hana troh pike ngon undang-undang  
He cut intan gata kheun kri

Meunan neukheun banta intan  
Putroe seudang ka jigule  
Ka jiek atueh cut bang  
Ka jikuran nibak lihe

Meunankeu buet cut meusubang  
Bak malam nyan meulho sabe  
Hana pioh siminet jam  
Meuriam jimeusu sabe

Si nyak putroe hanco karam  
Mubacut han neuingat le  
Si nyak putroe bungong sukon  
Peulheueh apon kaoi janji

Nyankeu baro jirasa phon  
Peunoh jantong puah ate  
Di bantapi han peue tanyong  
Sang bangon di dalam dodi

Bandua han sakri keunong  
Geupeutamong lam ulah giri  
Hana teungeut troh 'an beungoh  
Got that meh-moh bandua si

Di bantapi sit that leumoh  
Buleuen peunohpi meugule  
Kuku' manok patang-patang  
Beudoh rijang pheuet meuuke

Tren jak manoe suci badan  
Ngon cut intan sare-sare  
Beudoh neuwoe u istana  
Bandua ngon ceudieng pade

Duek meusapat lom lam kama  
Bak tahta keurus i awe  
Si nyak putroe rumeh raya  
Galak raya dalam ate

Baranggapeue han le suka  
'Oh ka na asoe keurusi  
Lheueh nibak nyan putroe muda  
Teuingat ka dalam pike

Bah kukirem saboh haba  
Keu teungku apa Batee Beusi  
Lom saboh keu raja Kaha  
Lom teuma keu ayah kami

Meunan pike dalam dada  
Meunan kira dalam ate  
Puteh kuneng bungong geutoe  
Angen tampoe sret meuleua

Cut Deulima si nyak putroe  
Sambinoe nyang cidah rupa  
Jicok kalam nibak jaroe  
Cut putroe jikarang haba

Saleuem seumbah ham ba ir.  
Dari sini cut Deulima  
Seumbah hadap u yup gaki  
Akan doli nyang mulia

He apa maklum ulon bri  
Dan lagi akan ayahda  
Lon harap meuribee kali  
Sujud sawi lon aneukda

Beu rayek meu'ah wahe doli  
That tinggi harap mulia  
Lon peugah nyoe saboh dali  
Patot kami nyang mupinta

Ulon ka sep di dalam had  
Jinoe harap bak paduka  
Sidroe raja troh di barat  
Ka jiragap lon ayahda

Kureh Pari nan geulakab  
Rupa hebat hana ngon sa  
Lagi beuhe deungon kuat  
Ngon pangkat tinggi bak gata

Aneuk raja Juhan Ali  
Nan umi Lela Sikanda  
Nama nanggroe Anta Peurdani  
Keumari bak lon geuteuka

Geujak seutot hamba ini  
Lahe takbi lam rahsia  
Nyankeu sebab maklum lon bri  
Jinoe pakri he ayahda

Mee neupubuet ube janji  
Neupeugah kri wahe raja  
Jeuet lon tanyong han lon tukri  
Meunyo jadi neujak sigra

Ayah neukheun yoh di nanggroe  
Na kamoe meudeungo haba  
Soe nyang troh jak u meuligoe  
Nyankeu lakoe lon aneukda

Meunan neukheun yoh saboh roe.  
Baranggasoe na kuasa  
Walee raja peukong nanggroe  
Beuthat meuntroe boh panglima

Jinoe apa pakri bagoe  
Neukheun jinoe nyang meurasa  
Nyoho ka troh bungong geutoe  
Jeuet keu lakoe lon ayahda

Cuba pike he ayah droe  
Meuhan nanggroe jeuet keu sira  
Lagi sebab ureueng meusoe  
Sakti tanggoe hana ngon sa

Nyankeu narit nibak putroe  
Ka seuleusoe he ayahda  
Teuma putroe hei dendayang  
Keunoe rijang siat cutda

Dendayang jibeudoh pantah  
Peurab bagah bak cut rakna  
Cut putroe jok surat bagah  
Bak upah keudeh neuyue ba

Kayne jok keu raja meugah  
Kapeugah ayah ngon apa  
Ban lhee boh maseng jumeulah  
Lom neupeugah keu teungku wa

Dendayang jiplueng le bagah  
Jihei upah ureueng jaga  
Abang siat keunoe langkah  
Peurintah bak putroe muda

Teuma beudoh teungku upah  
Meulangkah u pinto kuta  
Nyoepat surat putroe yue jok  
Lhee pucok lhee ho geuyue ba

'Oh jikalon bak alamat  
Teuma leugat laju jiba  
Ka troh sampie han jan siat  
**Bak deelat Batee Meulila**

Raja sinan duek meusapat  
Musyawarat ngon bentara  
'Oh ban neueu lhee boh surat  
Tanyong leugat pane teuka

Ampo deelat nibak putroe  
Meuligoe Peuranta Nila  
Han tom nyang ka dilee puroe  
Di meuligoe surat teuka

Ate raja kureueng seunang  
Neuploh rijang neuyue buka  
Neubaca le neukheun meucrang  
Ngon habaran gura raya

Banlhee raja neubeuet keudroe  
That seureuloe neudeungo haba  
Abeh narit ka seuleusoe  
Neuheu keudroe banlhee raja

Teuduek tahe sikhan uroe  
'Oh dudoe teubiet suara  
Pakri lagee teuma jinoe  
Tahue jinoe ureueng jaga

Ka rusak nama geutanyoe  
Toh jinoe daya-upaya  
Banlhee raja meusoe-gumoe  
Toh jinoe daleh tamita

Ulee upah raja pangge  
Troph keunan le peuet keupala  
Jibet jaroe angkat tinggi  
Jiduek le hadapan raja

Jiseumbah sama seukali  
Nibak gaki sri paduka  
Jiduek banpeuet le meuriti  
Kaha Pari le pareksa

Deungon muka juah han sakri  
Umpama hi gajah meunta  
Raja neukheun ubak upah  
Teusia kah jaga jaga

Rugoe kubri bajee mirah  
Kapeuleupah manusia  
Patot leupah Kureh Pari  
Meukon kabri rot jiteuka

Teusia kah kubri gaji  
Kuboh meuntri ngon keupala  
Sigeutu hana keumisi  
Pajoh gaji mantong nyang na

Laen teuma uang peurmisi  
Di gaji rab sireutoh ka  
Kon biek mita pangkat tinggi  
Biet kuli di nanggroe diwa

Beudoh jak koh kayee api  
Peureugi keudeh lam bangka  
Pulang keunoe pluek keumbali  
Lom lagi peudeueng suasa

Jinoe bandum ka lon leupah  
Jak keubah pakaian sigra  
Beungeh raja han jeuet peugah  
Allah Allah he syeedara

Dum sidadu that teumakot  
Ngon mupot-pot banpeuet raja  
Hana bangon neuceumarot  
Muka krot ban boh kruet tuha

Dum sipai abeh neudhot  
Rimueng angkot badeuek seuba  
Meunan raja amaran  
Di dalam nyan mangatpi na

Teuma raja duek mupadan  
Neumita ban ilah daya  
Neumita rot ngon amilan  
Bek cupaan nama bangsa

Lagi bek jeuet keu 'aebar  
Bek salahan akhe masa  
Ngon kakanda bek dawaan  
Ngon sulutan Ahmad Lila

Teuma leumah lam ingatan  
Meunoe sang pike meurasa  
Tapeukek surat keudeh keu abang  
Takheun taprang ureueng teuka

Takheun ka troh judo bintang  
Aneuek cut bang keumuen ham ba  
Teutapi han tateurimong  
Lon tanyong dilee bak gata

Neukheun rijang phet ngon meuhong  
Meunan bangon pakri gura  
Banlhee raja seuot keunong  
Sang jitamong bak lon kira

Apabila geuteurimong  
Bek jeuet keunong nibak haba  
Hingga keumah pakat meunan  
Kireman laju geuyue ba

Geuyue sidroe aneuk rubek  
Nyang jimubiek raja Meulila  
Laju jipo jiteureubang  
Troph datang ngon siklep mata

Na siat meulayang-layang  
Tamong rijang dalam kuta  
Aneuk rubek ka troh datang  
Ngadap rijang raja raya

Peue na haba putroe cantek  
Bak adek Sukaran Indra  
Aneuk meuntroe beuet tabek  
Saleuem euncek patek bawa

Saboh surat raja peuek  
Bak adek akan paduka  
Raja Lila ban neutilek  
Neubalek neubuka sigra

Poteu raja neu beuet surat  
Hingga tamat abeh haba  
Neudeungo narit mangat han ban  
Sulotan ateneu suka

Keupeue jeuet prang nyan di adek  
Kadang han ek pakri teuma  
Ate kamoe hana meukri  
Pakon han jipeukap lanja

Jipeukawen deungon siti  
Nyoe pakri meunanggong deesya  
Beukit meunan wahe meuntroe  
Ulon jak droe bak adekda

Teuma raja peukeumah droe  
Deungon putroe sajan neuba  
Neusok bajee le u asoe  
Ban neungui droe raja indra

Banlhee teuma neulayang droe  
U nanggroe Sukaran Indra  
Hingga teuma troh bak adoe  
Horeumat nyoe raja teuka

'Oh sare lheueh sudah makan  
Pasai nyan meututo raja  
Tapeukawen ngon sambinoe  
Bek le nyoe meunanggong deesya

Takheun ka troh raja sidroe  
Di meuligoe sajan gata  
Pakon han laju tapuwoe  
Ngon cut putroe keumuen gata

Raja Kaha seuot meunoe  
Bak lon nyoe ateueh jeumala  
Lagipi ka janji tuan  
Ulon paban nyang han suka

Hana daya lon ingatan  
Meulaenkan ngon suka raya  
Na bacut ulon pikeran  
Pakri reumbang bak paduka

Bah tauji dilee muprang  
Meunyo meunan leubeh eela  
Meunyo talo bak tamuprang  
Keupeue keunan tabri jeumba

Tapreh sinoe laen datang  
Nyang tungang beurani teuga  
Meunyo talo Kureh Pari  
Bek taasi janji nyang ka

Meukek meunang putroe tabri  
Sebab janji leupah kata  
'Oh lheueh kawen deungon putroe  
'Oh tapuwoe dalam kuta

Meugah putroe nanggroe jeuoh  
Sireutoh peuet ploh raja teuka  
Jiprang teuma deungon sunggoh  
Tawajoh ate lam dada

Meunyo kon na sakti utoh  
Nyang musoh putroe sit jiba  
Nyoe tuanku lon peugah troh  
Nyang putoh ingat kakanda

Meunan tuto Kaha Pari  
Ngon doli Batee Meulila  
Seuot teuma Batee Beusoe  
Neukheun keudroe bak Ahmad Lila

Raja Ahmad seuot meunoe  
He adoe ban hukom gata  
Di lon aneuk di gata keumuen  
Ban takheun lon ikot saja

Ateueh ulee ulon tuan  
Ban nyang padan ingat gata  
Keumah pakat meunan simpan  
Bri utosan keu cut rakna

Aneuk rubek neuhei sidroe  
U meuligoe tajak gata  
Tapeugah bak si nyak putroe  
Yue tren jinoe ureueng teuka

Han kutueng seukali-kali  
Kureh Pari yue keulua  
Meuhan jijak jipeureugi  
Peukong sakti deungon kuta

Kamoe meujak u meuligoe  
Ngon ayah droe Ahmad Lila  
Ulon heundak jak eu putroe  
Ate kamoe seunang hana

Meunan takheun aneuk rubek  
Sigeutu bek na meutuka  
Aneuk rubek beudoh laju  
Jilalu bak putroe muda

Deungon siat troh jilalu  
Tamong laju pantah sigra  
Duek jipioh atueuh bangku  
Putroe meulu tanyong lanja

Ho tameung jak wahe teungku  
Peue peureulu tapeuhaba  
Ampoñ po cut nyang mangat su  
Yue tuanku raja Kaha

Neuyue peugah nyang meuteuntee  
Ureueng jamee neuyue gisa  
Po cut pinah asoe juree  
Han got lagee kheun le raja

Neuyue jak woe Kureh Pari  
Meunan doli yue peuhaba  
Hana neutueng uleh doli  
Keu suami judo gata

Meuhan neupateh jeuet keu paloe  
Troh neujak droe keunoe raja  
Hajat saweue gata putroe  
Ngon ayah droe baro teuka

Meunan neuyue kheun hareutoe  
Di lon kuwoe ubak raja  
Aneuk rubek leugat jiwoe  
Keu cut putroe lon calitra

Jipeugah bak Kureh Pari  
Jinoe pakri po meukuta  
Ayah ngon apa ka troh keumari  
Hana neubri lon keu gata

Fuet meukawen hana jadi  
Fa geungki uleh raja  
Toh eleumee wahe doli  
Lon pakri daya-upaya

Toh eleumee wahe doli  
Jinoe pakri geutanyoe dua  
Hana patot geuubah janji  
Uleh doli teungku apa

Meunan jikheun putroe siti  
Moe bak gaki raja muda  
Pakri laku teungku abang  
'Oh troh datang teungku apa

Kadang geupoh deungon geucang  
Ngon lon tuan sigo dua  
Nyang got teungku neutren rijang  
Seukarang yoh gohlom teuka

Meuka troh keunoe wahe cut bang  
Jeuet lapang nama agama  
Di gop geujak deungon tungang  
Di cut abang sidroe saja

Bahle tinggai ulon sidroe  
Saba kamoe marah teuka  
Walee geupoh deungon camcoe  
Ulonteu nyoe theun keupala

Seumbah ampon tuanku droe  
Surrot jinoe bek binasa  
Surrot rijang peusiblah droe  
Bek paloe watee troh apa

Di lon cut bang ban hukom Po  
Baranggapeue ulon saba  
Putroe jimoe ngon jibae  
He teungku e pakri hamba

Bukon sayang rambot hijo  
Meujudo ngon bak bungongta  
Saleh pakri lon Tuhan e  
'Oh troh laku teungku apa

Bukon sayang bungong cuko  
Boh meuato le han tara  
Di geunjreng linto baro  
Jibae lam leumueng banta

Sayang leupah meuh manek ro  
Sang hanco 'oh jieu banta  
Neupumeu 'ah lon he judo  
Ka hanco 'oh tan le gata

Kureh Pari neukheun sayang  
Bek he intan ro ie mata  
Bek le tamoe intan karang  
Bak Tuhan talakee do'a

Bek that sosah adek badan  
Beudoh intan bek le rugha  
Bit taeue sidroe cut abang  
Bek sosahan ate gata

Beudoh adek bungong peukan  
Eu peurasan buet kakanda  
Cut putroe beudoh jisumpan  
Di hadapan Kureh Keumala

Neiduek sapat teungku abang  
Cut intan putroe got rupa  
Kureh Pari beudoh rijang  
Neudong nyan bak pinto kuta

Neusuet euncien nibak jaroe  
Ateueh bumoe neutiek lanja  
Lheueh neuasap ngon keumunyan  
Neutiek sinan di leuen kuta

Di leuen meuligoe putroe intan  
Tahe mandang putroe muda  
'Oh ban sret euncien bak bumoe  
Ka jeuet jinoe saboh kuta

Lam kuta saboh meuligoe  
Cukop asoe sianeka  
Lingka kuta pacang beusoe  
Sinaroe mupageue lingka

Lheueh nyan banta beuet hakeumat  
Neumeuhajat bak eelia  
Trok le datang keunan leugat  
Ngon sikeujap teungku teuka

Teungku neuduek le di sinan rab  
Neukheun leugat meunoe haba  
Wahe aneuk peue sukaan  
Wahe intan peue na suka

Seuot banta bungong peukan  
Lon sosahan nibak mara  
Geukheun raja apa intan  
Trok bak laman keunoe teuka

Geuneuk jak poh bungong peukan  
Ngon lon tuan sigo dua  
Nyankeu teungku ulon peusan  
Toh jalan daya-upaya

Di lon gadoh akai hilang  
Sang lupaan dum peukara  
Meulaenkan ngon gaseh sayang  
Peukara nyan deungon raja

Yoh nyan teungku seuot rijang  
Bek sosahan aneuk gata  
Raja meugah peue tapike  
Boh ate bek duka-cita

Ulon nyang preh bungong pade  
Peue nyang ase lon bri lanja  
'Oh lheueh Tamin jok malakat  
Peuduek leugat di leuen kuta

Ka meugisa na sikeujap  
Troph le asap blah utara  
Lam asap nyan dum sinaroe  
Troph siploh droe aneuk raja

Dalam kuta tamøng jinoe  
Jingadap nyoe raja eelia  
Ban siploh jibeuet jaroe  
Ampon kamoe keupeue hamba

Peue na pakat tuanku droe  
Nyang jeuet kamoe neuseuranta  
Tamim peugah ulah bagoe  
Ubak gop nyoe raja teuka

Beu na deungon bujang meuntroe  
Ban adat nyoe prang tapuga  
Raja Kaha teuka keunoe  
Bah geutanyoe peumulia

'Oh ban abeh Tamin peugah  
Beudoh pantah siploh raja  
Jideumpek le jihah babah  
Barollah apui meunyala

Lam apui nyan taeu ulah  
Han peue peugah rakyat teuka  
Siploh raja siploh macam  
Bandum meunan rakyat teuka

Ngon pakaian laen dum ban  
Hana macam rupa-rupa  
Ladom puteh ladom hitam  
Nyang mirah ban hijopi na

Ladom kuneng ngon lam bayong  
Nyang ladom hilam warnanya  
Rakayat le that teungku ampon  
Keutupong bandum jih rata

Muploh laksa ngon meulion  
Muploh kawom ribee laksa  
Di pahlawan tanggoh-tanggoh  
Ngon bajee goh bandum rata

Nyang di meuntroe meureutoh ploh  
Ngon utoh hana saboh sa  
Wadi meuntroe deungon bujang  
Le nyang tungang beuhe raya

Ngon alat cukop di badan  
Lam kuta nyan peunoh raya  
Peunoh kuta lua dalam  
Ban patot nyan jaga jaga

Laen rakyat kuta sakti  
Bangsa pari deungon diwa  
Teuma beudoh Tamim ini  
Lom neujadi saboh rupa

Di leuen kuta neupeujadi  
Teudong bale saboh raya  
Teumpat pioh raja sakti  
Dan lagi meuntroe bentara

Neupeugot lom gunong hitam  
Rimba Tuhan seumak raya  
Han that manyang po ma badan  
Seurupa ban deungon kuta

Ateueh pucak bak buket nyan  
Saboh krueng sinan leupah raya  
Ie di dalam ile mudek  
Reuleueng baek intan ratna

Saboh teupin bukon canden  
Sibak maken ngon ceundana  
Ie dalam krueng tabeue masen  
That canden raja eelia

Bak gaki gunong sibak siren  
Sinan po ben bale raya  
Teumpat pioh dum raja jen  
Bak meusalen balek rupa

Di gaki nyan saboh nawang  
Saboh padang jadi rupa  
Nyankeu mideuen teumpat muprang  
'Oh jan datang raja Kaha

Sinan teudong saboh kulam  
Nama sinan Kureh Keumala  
Di miyup nyan dum peurasan  
Han tatuban peugah rupa

Le that bagoe deungon macam  
Meuribee ban ulah bangsa  
Ase sudah sileungkapan  
Neuhei yoh nyan Kurek Keumala

Nyoe leupeuepat aneuk badan  
Dum angkatan abeh leungka  
Ulon aneuk keumbalikan  
'Oh troh bak jan ulon teuka

'Oh ase meukeusud datang  
Lon tapeusan he bentara  
Han peue aneuk tulong Tuhan  
Troph ase ban hajat pinta

Gata aneuk taduek keudroe  
Na ureueng nyoe ilah daya  
Gata taduek sajan putroe  
Bek sosah nyoe bungong jeumpa

Meuna gata hana kuyut  
Intan cut Seulindang Deulima  
Hana atejih meutuep-tuep  
Hana hiruep putroe muda

Meunan aneuk lon kheun sifeuet  
Bek ubah buet deungon haba  
Rijang ase troh meukeusud  
Manyang miyup dum seugala

Abeh haba Tamim peugah  
Kureh seumbah teungku eelia  
Ampon tuanku ikot titah  
Hana ubah nibak ham ba

'Oh lheueh seumbah Kureh Pari  
Tamim ini han meuhoka  
Laju gadoh bak beurdiri  
Tinggai siti deungon kuta

Kutaraja deungon Sigli  
Meuriti ngon Pasi Raya  
Muwoe kisah Kurah pari  
Ngon siti Seulindang Deulima

Duek meusapat deungon siti  
Bak keurus i mutiara  
Lop tingkap meuligoe putroe  
He adoe tangieng u lua

Ban putroe eu 'ajab han soe  
Teukap jaroe mandang mata  
Mandang tahe sikhan uroe  
Hana sapeue na beurkata

Muwoe pike ate putroe  
Bit that usoe ureueng muda  
Bitkeu ek troh geujak keunoe  
Patot kamoe esteurinya

Putroe kalon meunan bagoe  
Teukhem putroe atueh banta  
Baro rumeh bintang pari  
Hana le gli rumeh muka

Suka galak hana bagoe  
Sang beu jinoe neucom neuwa  
Sebab alem tuan putroe  
Le that bagoe na lam dada

Ek jisaba buet amarah  
Ek jipinah nibak daya  
Ubak banta jikheun pantah  
Bit meutuah raja muda

Hana teuboh dum tuampon  
Tet ate lon tiep-tiep masa  
Meunan jikheun cut ma ubon  
Deelat ampon khem be raya

Neueu po cut peugot burong  
Neupok gulong di cut banta  
Teutap dilee sinyak putroe  
Laen jinoe lon calitra

---

## XI. MEUNIKAH NGON SEULINDANG DEULIMA

Bukon sayang bungong jeumpa  
Leuke bangguna tuah han le  
Lon seubot sulton Lila  
Seureuta banlhee sirungke  
  
Keumah pakat sabé raja  
Beudoh teuma bandum sare  
Ulee balang raja raja  
Ikot sama seugala be  
  
Neucok langkah banlhee raja  
Ngon muka mirah han sakri  
Neubeurangkat laju sigra  
Bak kuta nyang baro jadi  
  
Deungon rakyat meulaksin laksa  
Dum lasyeuka meuntroe wadi  
Geujak laju hana kira  
Rab sampoe ka geupeureugi  
  
Hingga laju troh le lanja  
Leumah kuta di atueuh gle  
Leumah neueu uleh raja  
Neukheun teuma nibak wadi  
  
Neumarit ngon raja Kaha  
He syeedara siat lanti  
He raja dum tuha muda  
Seumua dilee beureunti  
  
Bah tauji dilee cuba  
Ngon bicara dilee tací  
Teuma pioh dum seugala  
Keudeh mata dum kalon hi  
  
'Ajaeb that ureueng muda  
Ek jeuet kuta di meuligi  
Pioh rakyat seukalian  
Jiboh alam ngon.pupanji

Teutap raja pioh sinan  
Lon karangan laen rawi  
Ie rabin nyang leumak raya  
Nyang got rupa bungong peukan

Lon seubot Kureh Keumala  
Raja muda nyang bangsawan  
Neumeututo peugot rupa  
Deungon raja uleebalang

Bek le taduek beudoh lanja  
Jehpat raja ka troh di blang  
Jibeudoh seugala raja  
Tuha muda bentara blang

Jideumpek sigo nyang raya  
Rakyat teuka ngon peunoh blang  
Cukop alat ngon seunjata  
Peudeueng cokma dum jigulam

Got meuriti lingka kuta  
Sinan teuma troh u padang  
Bandum alat got meusigak  
Jipreh meugrak ureueng lawan

Nyang got manyang gunong Peureulak  
Di pucak na guha sarang  
Bah lon peuduek saboh pihak  
Lon peugah bak ureueng datang

Teuma marit Kaha Pari  
Beudoh antri dum pahlawan  
Pakri laku wahe meuntri  
Tapeugah kri uleebalang

Teuma seuot meuntroe wadi  
Jangan lagi ingat panjang  
Taprang laju bek le lanti  
Sinan meuri talo meunang

Soe nyang leubeh le ngon sakti  
Sinan meuri aneuk agam  
Jinoe beudoh bek le lanti  
Ayoh antri uleebalang

Meunan jikheun meuntroe wadi  
Kaha Pari beudoh rijang  
Jipeugah bak Batee Beusi  
Jiantri aneuk puprangan

Beudoh raja Kaha Pari  
Jikeumisi di beulakang  
Yup seurumpet ngon napiri  
Han soe tukri meusu geundrang

Ngon tumbak panyang han sakri  
Dan lagi ngon sakin panyang  
Tarek alam ngon pupanji  
Meubunyi deungon geundrang prang

Jisurak ngon jihei sare  
Sang mise donya ka leukang  
Rakyat le that han peue pike  
Asap beude ka seupot blang

Jiek leugat ka rab hampe  
Jihei sare ban saboh blang  
Rotdeh rotnoe yoh nyan mate  
Su beude han putoh reuntang

Yoh masa nyan he boh ate  
Su beude meuguncang alam  
Rakyat raja Kaha Pari  
Meunyum undi bak laku sang

Le that mate nyang beurani  
Jitadi le rakyat mam bang  
'Oh jikalon mate that bha  
Beungeh raja hana lawan

Jigrop lambong jiteupok pha  
Troh teuka rakyat meukawan  
Muploh lion ribee laksa  
Ngon eokma bandum jigulam

Han soe tu'oh peugah rupa  
Rakyat raja ka peunoh blang  
Yoh nyan ka prang leubeh raya  
Lasyeuka jiek meukeumang

Keudeh keunoe hana lia  
Ngon nyang ka leubeh meulumbang  
Pahlawan nyang teuga teuga  
Deungon cökma jipeulinggang

Jimupoh-poh di keupala  
Got that gura soe nyang pandang  
Keudeh keunoe meuhue hila  
Yoh nyan masa meutang-ilang

Wadi meuntroe tarek tarek  
Peudeueng leuntek jipeulinggang  
Rotdeh rotnoe jimeuek-ek  
Nyang tarek panglima tibang

Nyang di rakyat han peue kira  
Leubeh gura jiek lam prang  
Ngon busu bleuet jigeulawa  
Ateueh tantra banta intan

Lom ngon rante jeurat meulila  
Laen teuma lom seunapang  
Ie di laot puteh puteh  
Aneuk bileh dalam sungoe

Jinoe beudoh bangsa blah Kureh  
Saktijih muda samlakoe  
Siploh ribee beudoh rotdeh  
Ngon bareh laju jipasoe

Prang uroe nyan gura abeh  
Rakyat teueh jeuep-jeuep sagoe  
Han padoli uroe seunja  
Han le gura nyang ka paloe

Jiek laju ban sirungka  
Raja Kaha beungeh tuloe  
Jikheun ubak raja raja  
Nibak raja Batee Beusoe

Pakri jinoe tabicara  
Meugriet raya sang geutanyoe  
Jiseuot le han peue mara  
Kheun le raja Batee Beusoe

Raja Kaha that beurani  
Deungon sakti hana bagoe  
Deungon adoe Lila Pari  
Leubeh lagi Batee beusoe

Lagi beuhe ngon beurani  
Bak teumaki tajam tuloe  
Jideumpuk sigo nyang that-that  
Teuka asap seupot nanggroe

Hana leumah bandum rakyat  
Sebab asap ka glap tuloe  
Lam asap nyan apui teuka  
Hu meunyala dum sinaroe

Trang apui dalam tantra  
U antara troh meubunyoe  
Sama teungoh bak padang prang  
Hireuen mandang soe eu bagoe

Surak rame that meuguncang  
Angen datang yoh nyan sampoe  
Apui nyan beudoh teureubang  
Meulayang ateuh meuligoe

Deuh neueu le Kureh Pari  
Dong beurdiri po samlakoe  
Ngon putroe rupa juhari  
Neueu sakti Batee Beusoe

He putroe bungong awe  
Jinoe pakri he sambinoe  
Lheueh neukheun nyan banta ahli  
Neupeujeuet le saboh bagoe

Neucok saboh tungkat sakti  
Nyang teungku bri yoh saboh roe  
Ateueh bumoe sumpom rijang  
Yoh masa nyan le jeuet keudroe

Teuka seupot sang ka malam  
Hana le trang matauroe  
Lam seupot nyan wahe teelan  
Angen datang tajam tuloe

Apui bunoe len sibarang  
Peungeuh bandrang alam nanggroe  
Lom banta cok saboh manikan  
Neutiek rijang ateueh bumoe

Jeuet le laot deungon rijang  
Ngon geulum bang raya han soe  
Laot luah teungku abang  
Tajeumeurang dua ploh uroe

Tahe hireuen putroe intan  
Neukalon ban buet samlakoe  
Apui padam rakyat mate  
Saket ate Batee Beusoe

Le that rakyat tinggai bangke  
Meuntroe wadi dum sinaroe  
Laot leumah apui han le  
Sosah ate hana bagoe

Teuma jikheun bak keupala  
Ubak raja nyang seureuloe  
Jimeunan Batee Meulila  
Nibak raja ka gop tusoe

Ngon beurani lagi teuga  
Utoh raya sakti tanggoe  
Ban jideungo meunan haba  
Yoh nyan masa beungeh tuloe

Yoh masa nyan Batee Meulila  
Laju sigra jilayang droe  
Teureubang lam awan mig  
Ban geureuda ulah bagoe

Saboh gunong laju leukang  
Raya han ban ube nanggroe  
Lam laot meusumpon rijang  
Bak masa nyan laot ka doe

Teuka rakyat di beulakang  
Peunoh padang rame tuloe  
Laju teuma lom jimuprang  
Han tatuban peugah bagoe

Macam-macam le that datang  
Meuribee ban taeu bagoe  
Jimuprang leubeh bak nyang ka  
Yoh nyan masa taeu phang-phoe

Rotdeh rotroe mate that bha  
Han ek kira lon hareutoe  
Deuh neueu Kureh Keumala  
Le that fana blah rakyat droe

Neukalon rakyat meugisa-gisa  
Cut banta teuingat keudroe  
Neucok teuma saboh tungkat  
Neutop leugat lam kawan doe

Puteh kuneng bungong riwat  
Nyang gura that meulu cina  
Jeuet keu batee bandum rakyat  
Hana sapat manusia

Meusidroe han le meuungkap  
Bandum rakyat Batee Lila  
Lom banta cinta hekeumat  
Teudong leugat alam fana

Saboh payong lom ka jadi  
Hana sakri cidah rupa  
Hana nyang sa ngon barangri  
Ka jadi ngon siklep mata

Banta peuduek lam meuligoe  
Ngon cut putroe meuen seunda  
Tantra raja Kaha Pari  
Bandum ase bate rupa

Hana meugrak jaroe gaki  
Bak rupa ri han le nyawa  
Neumeututo Kureh Pari  
Rakyat mate dum neuyue ba

U yup payong cap sagoe lhee  
Nyang ka padee keunan geuba  
Muwoe nyawong miseue dilee  
Bungong keumbee neumeusabda

Rakyat puleh he pangulee  
Lon kheun lagee si nyak banta  
Tantra le that hana lagee  
Ban on kayee dalam rimba

Yoh masa nyan teungku payong  
Jigrop lambong leubeh bak ka  
Ngon cokma jiayon-ayon  
Jikeupong biek sukee Kaha

Rakyat pioh di yup payong  
Jimeutudong ngon bandera  
Uroe tarek sangat tutong  
Nyang ladom jiek meubura

Nyang blah raja Batee Beusoe  
Arat tuloe lam blang raya  
Ureueng patot meuntroe meuntroe  
Limong ploh droe tinggai saja

Raja lhee droe teuduek tahe  
Meunyum talo bak jikira  
Kaha Pari nyang meututo  
Bah lon hanco he syeedara

Hingga jibeuet saboh sakti  
Troph jile nyan ie raya  
Ateueh rakyat Kureh Pari  
Ie sare di ateueh donya

Tahe raja Batee Beusi  
Lom lagi Batee Meulila  
Tan patot seukali-kali  
Ie ile di ateueh kuta

Ateueh kuta bandum ile  
Abeh reule dum seugala  
Dalam ie nyan teuka asap  
Ngon seupot that hana tara

Lam asap nyan teuka rakyat  
Ngon alat meuribee laksa  
Ngon pahlawan hebat hebat  
Jiek karat ateueh guda

Kureh banta ban neulihat  
Neutop tungkat u antara  
Jiteureubang bandum rakyat  
Dum sileungkap kuta kuta

Ka tinggai ie atueuh bumoe  
Ngop rakyat droe raja Kaha  
Tantra Kureh ka teureubang  
Lam awan meureuntang kuta

Meuligoe mantong nibak sot  
Hana lom ngop bak neusangka  
Deungon rupa leubeh that got  
Cut culot gadoh meuseunda

Rakyat lam ie dum ka tahe  
Ka teupako tan suara  
Hana sapeue jimeututo  
Lom ka tahe raja Kaha

Raja Lila jideumpek that  
Teuka asap le bak nyang ka  
Lam **asap** nyan bandum rakyat  
Jiek leugat u antara

Jimuprang ngon tantra Kureh  
That bit areh raja Kaha  
Si nyak banta ban neupandang  
Dum meulayang balatantra

Jeuet keu cicem rupa dum sang  
Bukon ajam raja Kaha  
Abeh bandum jiteureubang  
Jipulang bak dilee nyang ka

Saboh pulo teuma jadi  
Bak beureunti cicem dumna  
Tantra raja Kaha Pari  
Ban suwe lam awan migia

Neucinta lom Kureh Pari  
Angen jadi tajam raya  
Awan teudong dum jilari  
Tantra pari ka angen ba

Hana meuho dum teureuban  
Marah yoh nyan raja Kaha  
Nyang ladom ka jeuet keu batee  
Allah hai kee pakri daya

Meunang talo hana teuntee  
Sangat malee raja Kaha  
That juah lon kalon meurak  
Jilikak di ateueh batee

Yoh masa nyan meunyum seungkak  
Gadoh lagak raja banlhee  
Raja Ahmad le meusabda  
He adekda batee ulee

Tadeungo lon peugah haba  
Han le guna le adek kee  
Hana guna le tamuprang  
Jeuet keu lapang akhe malee

Lagi teuhah nama irang  
Panglima prang le that layee  
Taeue rakyat dum ka hilang  
Nyang ladom ka jeuet keu batee

Keupeue e po lom talawan  
Akhe ceukang jeuet keu abee  
Peue tacuba Kureh Pari  
Taeu sakti ban on kayee

Hana guna adu sakti  
Bahle tabri bungong keumbee  
Bah taseumbah u yup gaki  
Dan lagi han jeuet keu malee

Meunan neukheun Lila Ahmad  
Keunong that bak neuboh lagee  
Ban nyang pike nibak deelat  
Ikot meuhat kamoe banlhee

Lon seureuta ban nyang pakat

Wahe deelat batee ulee

Keumah pakat raja deelat

Lila Ahmad lon peuteuntee

Neutarek ngon alam taklok

Neumasok bak bungong keumbbee

Lam tantra laju neumasok

Ngon meundok neumat bak ulee

Neujak laju u meuligoe

Cut putroe leumah eu doli

Neukheun nibak cut abang droe

Pakri jinoe he pangulee

Ayah ka troh keunoe datang

Bak laku sang laen lagee

Meututo cut putroe bintang

Ngon cut abang asoe pangkee

Neueu raja teungoh datang

Bungong keumang neukheun lagee

Raja tuha dong di hadapan

Ngon tangan neubet di ulee

Wahe aneuk bungong peukan

Lon ka datang batee ulee

Si nyak banta beudoh rijang

Ngon intan putroe mangat bee

Di istana putroe neutren

Ngon tuampon ubat ulee

Bandua ate that cundrong

Laju neutren jak meuteumee

Duek di bale Lila Ahmad

Banta peurab laju meuhee

Si nyak banta ka neupeurab

Seumbah leugat gaja banlhee

Deungon putroe sigo neuleuhap  
Mulia that hana lagee  
'Oh lheueh seumbah seukalian  
Peiduek sinan meureuntang lhee

Raja Ahmad neumarit le  
He boh ate batee ulee  
Bak uroe nyoe troh ban janji  
Hana ungki kamoe dilee

Jinoe aneuk judo lon bri  
Bek weueh ate bungong teubee  
Ulon deesya nibak Rabbi  
Meulon ungki janji dilee

Meunan neukheun raja doli  
Ubak siti aneuk pangkee  
Di hadapan Kureh Pari  
Raja kheun kri narit dilee

He banta cut bungong giri  
Nyanpat bagi aneuk bak kee  
Hana bak lon ubah janji  
Putroe ti ka lon bri dilee

Teuma seuot Kureh Pari  
Wahe abi neupreh dilee  
Neupreh siat ampon doli  
Gohlom abi lon peuteuntee

Lon harap meuribee kali  
Bak abi tanggoh lon lakee  
Bah 'oh troh Tamim wali  
Tuanku bri bungong teubee

Ban raja deungo nama ini  
Ateneu gli raja banlhee  
Lila Amahd teuma sujud  
He intan cut batee ulee

Hajat ulon nyang meukeusud  
Manyang miyup ulon lakee  
He intan peupuleh sigra  
Rakyat raja nyang jeuet keu batee

Deungon rakyat dalam miga  
Han meuho ka siploh ribee  
'Oh neudeungo tuto raja  
Sayang raya hana lagee

Si nyak banta seupot tungkat  
Muwoe rakyat miseue dilee  
Nyang lam awan ka meusapat  
Ngon rakyat nyang jeuet keu batee

Bandum jiwoe ubak deelat  
Raja rakyat dum meuree-ree  
Abeh jiwoe bandum rakyat  
Raja Ahmad lom meulakee

Wahe aneuk rupa cantek  
Harap patek muploh ribee  
Bah lon puwoe putroe akek  
Lon peukek keudeh u juree

Di lon aneuk sinoe han ek  
Sret mubalek akan malee  
Bah u donya tameukawen  
He tuben nyang ulon lakee

Adat keudeh he cut canden  
Kon ho laen he mangat bee  
Bah lon puwoe bak ayahda  
Got bak apa meuh karang lhee

Bak nanggroe Sukaran Indra  
Bak syeedara bungong keumbee  
Di kayangan nanggroe diwa  
He meutia nyang lon lakee

Sinan aneuk tatreng linto  
Dara baro ulon lakee  
Nyankeu aneuk harap lon le  
He aneuk e kheun bak teuntee

Seuot banta bungong kundo  
Lon harap le muploh ribee  
Bukon sayang dum boh kundo  
Bohjih le teungoh cot uroe

Ka han sinan jadeh linto  
Hé aneuk e boh ate droe  
U nanggroe Sukaran Indra  
Ubak apa po sambinoe

Sinan e po meukeurija  
Bek le lama laju jinoe  
Tujoh uroe lon meutanggoh  
Meudang troh guree di kamoe

Amma bakdu 'oh nan teudoh  
Puteh leusoh po samlakoe  
Bukon sayang bak geulumpong  
Ie bak uram keunong uroe

Raja Ahmad lom meukalam  
Bak cut intan si nyak putroe  
Wahe aneuk bungong keumang  
Beudoh intan nak tajak woe

Bahle aneuk siat leukang  
He cut intan meusiuroe  
Teuma beudoh bungong puteh  
Tinggai Kureh di meuligoe

Putroe peurab bak ayah wa  
Seureuta bak apa droe  
Po cut intan seumbah lanja  
Peumulia po sambinoe

Laen bandum sama rata  
Dum seugala seumbah putroe  
Teuma beudoh dum peureugi  
Keumbali geupuwoe putroe

Uroe malam tan beureungi  
Ngon rakyatpi muplo katoe  
Hingga sampoe Tuhan neubri  
Kaha Pari woe u nanggroe

Tamong kuta raja doli  
Bak esteuri neukheun meunoe  
Bak putroe Beureuma Diwi  
Dan lagi cut da ngon adoe

Teuma beudoh Keumala Miga  
Nyankeu cut wa tuan putroe  
Neucok putroe peumulia  
He aneukda cahya uroe

Cut intan jicom cut wa  
Seureuta deungon cut ma droe  
Macut-macut dum seugala  
Banseumua dum wareh droe

Teupong tawa nibak tangan  
Ateueh intan seupreuke jinoe  
Teuma geubri dum makanan  
Dum haluan jeuneh bagoe

Dum seugala ngon minoman  
Peunajoh nyan le that bagoe  
Beureuma Diwi neukheun nyoe ban  
Wahe intan ka troh tawoe

Ulon teuoh uroe malam  
Hana reunggang bandum kamoe  
Hana teudoh lam cintaan  
Hana intan siat sunyoe

Lon meukaoi beu troh judo  
Dara baro beu na lakoe  
Bit meutuah bungong kundo  
Troph jilalo u meuligoe

Jinoe hoka linto baro  
He bungong tho kheun bak kamoe  
Seuot si nyak keumbang hijo  
He bunda e di meuligoe

Hana sahopi lom neutren  
Rupa canden hana bagoe  
Hajat napsu kon peue laen  
Heundak kawen ngon lon jinoe

Ayah bunda lon nyoe ka troh  
Ka lheueh tanggoh tujoh uroe  
Meunan neukheun puteh leusoh  
Geumoe rior dum sinaroe

Keumala Miga kheun bek kiroh  
Tapioh bek panyang rampoe  
Ka abeh neutilek haloh  
Neueu tuboh si nyak putroe

Dum neukalon nibak tanda  
Hana cupa po sambinoe  
'Oh neueu bak iku mata  
Nibak muka troh nibak dhoe

Hana ubah bacut cidra  
Tan binasa po sambinoe  
Hana teupeh meusikali  
Bak neueu hi le bunda droe

Nyang putoh thee Tuhan Rabbi  
Nyang keutahui jeuoh ngon toe  
Teuduek siat ulon lanti  
Lon rawi rakyat nyang ka woe

Teuma marit raja doli  
Nibak wadi dan bak meuntroe  
Meusidroe bek takeumbali  
Tabeureunti tujoh uroe

Ulon hajat meung khanduri  
Alem faki sidroe bek woe  
Meunan sabda Kaha Pari  
Nibak wadi bujang meuntroe

Meusidroe hana keumbali  
Sajan doli malam uroe  
Nyang haba nyan 'oh noe lanti  
Laen mise lon hareutoe

Bitpi laen teum on tadi  
Lon rawi keu asoe nanggroe  
Judo meuntroe deungon wadi  
Dan lagi nyang meusoe meusoe

Bandum geume peurseumbahan  
Jak eu intan baro neuwoe  
Bu leukat beureuteh timphan  
Meunan macam adat nanggroe

Bandum rata seukalian  
Mumat tangan deungon putroe  
Beudoh teuma bandum pulang  
Maseng tuan bak rumoh droe

Tinggai putroe dalam kuta  
Deungon cut ma di meuligoe  
Kaha Pari le meusabda  
Ubak nisa tuan putroe

Wahe putroe jak leueng kita  
Meukeurija bak uroe nyoe  
Si nyak putroe taboh gaca  
Nak gura gaki ngon jaroe

Bak dua blah phon tamula  
Beu troh hingga tujoh uroe  
Meunan neukheun raja Kaha  
Bak seugala ureueng binoe

Neuheu ureueng jaga jaga  
Nubat lila neuyue pasoe  
Yoh nyan jitet ngon meutaga  
Rakyat teuka asoe nanggroe

Troh le keunan ubak raja  
Neujok jeum ba maseng jinoe  
Nyanpat lum o deungon unta  
Nyanpat kuta ngon meuligoe

Ulon hajat meukeurija  
Lon boh gaca si nyak putroe  
Ban jideungo sabda raja  
Dum bentara geusyik sagoe

Jipubuet le dum seugala  
Peue nyang hana lam meuligoe  
Ngon jeumbatan lingka kuta  
Bak plueng guda bak grop uroe

Peugot laen peuet boh kuta  
Cukop rupa deungon asoe  
Teumpat saman ngon biula  
Di lingka tiree meusujoe

Ka mumada buet peurasan  
Hana panyang lon hareutoe  
Lon seubot keu bungong keumang  
Cut intan putroe sambinoe

Geuboh gaca gaki tangan  
Bungong peukan rumeh tuloe  
Na lhee uroe deungon malam  
Gaca hitam gaki jaroe

Macut macut ireng sajan  
Seukalian ban sinaroe  
Ka geupeungui dara baro  
Keumbang hijo si nyak putroe

Deungon andam ka meulo-lo  
Cahyajih ro lam meuligoe  
Ngon dendayang ireng sajan  
Rupa na ban matauroe

Hingga cukop han le kureueng  
Cut meugleueng nyang baek budoe  
Jibeudoh le dayang tari  
Jimeunari lam meuligoe

Ureueng inong nyang tari tari  
Peulale putri lam meuligoe  
Yoh masa nyan he ya akhi  
Kiroh sare lam meuligoe

Hana reuda malam hari  
Beureuhi bandum sinaroe  
Rame sabé hana sakri  
Barangri galak sinaroe

Dendayang dum tari tari  
Bak keurusí ireng putroe  
Nyang leubeh that bungong giri  
Hana sabé dalam nanggroe

'Oh roh jikhem hana lanti  
Beureuhi teungku ka rab woe  
Peue han rumeh leumah gusi  
Cintra nuri ka meuasoe

Teuduek dilee dara baro  
Teungku linto lon hareutoe  
Hijo-hijo naleueng sambo  
Peuraho jiwoe u pasi

Lon pioh blah dara baro  
Blah rot linto jinoe rawi  
Bukon sayang bungong ceuko  
Jeh tulo jieh ngon nuri

Han jeuet lon eu bungong jeumpa  
U kuala jipo nuri  
Lon seubot Kureh Keumala  
Banta muda nyang ugahri

Ngon rupa jroh hana ngon sa  
Lagipi na jalan sakti  
Rakyat dilee abeh gisa  
Musoh hana le keumbali

Ka neucok euncien keumala  
Neuhei sigra deungan sakti  
Neuasap le ngon keumunyan  
Neukang-kang banta juhari

Deungan siat datang keunan  
Masa nyan Tamim Ebni  
'Oh ban teudong di hadapan  
He intan keupeuteuh kami

Seumbah Kureh ampon laman  
Ka meunang ulon he abi  
Meunang kamoe nibak muprang  
Talo gop nyan Kaha Pari

Lhee seun saho muwoe ulang  
Dum sibarang adu sakti  
Hingga sampoe dalam awan  
Ngon raja nyan wahe abi

Na padum trep ulon muprang  
Lheueh nibak nyan raja lari  
Abeh bandum banta peutrang  
Ngon cut intan ka keumbali

Ka geulakee uleh raja  
U donya geupuwoe siti  
Geukheun bak lon meukeurija  
Nibak nyang ka peuet blah hari

Malam singoh phon keurija  
Meunan haba ayah siti  
Nyankeu teungku hajat hamba  
Laen hana he ya saidi

Abeh peugah banta muda  
Eelia seuot beugini  
Insya Allah he aneukda  
U jeumala hamba ini

Yoh masa nyan di eelia  
Ka neucinta saboh sakti  
Han jan tathee siklep mata  
Peuet droe raja le teurjali

Neupeugah hai dum peukara  
Nibak raja eumpat jadi  
Ban jideungo kheun meelana  
Lom jicinta raja sakti

Jideumpek sigo nyang teuga  
Rakyat teuka deungon wadi  
Na peuet ribee rakyat teuka  
Peunoh kuta ngon meuligi

Saboh kawan pakaian hitam  
Saboh kawan mirah bibi  
Nyang kunengpi saboh kawan  
Nyang hijo nyan rupa meuri

Deungon guda meunan macam  
Maseng kawan maseng bagi  
Cukop deungon dum angkatan  
Gong ngon canang lom napiri

Seureuta lom ngon peurasan  
Han sapeue tan ulah bagi  
Teuma sujud raja peuet droe  
Bak Tamim nyoe teungku sakti

He meelana raja kamoe  
Rakyat ka doe dum keumari  
Peue peureulee teuma jinoe  
Hobu nanggroe lon peureugi

Seuot Tamim teuma rijang  
Aneuk agam hajat keumari  
Lon nak puwoe bungong peukan  
Ubak tuan Kaha Pari

Ban jideungo meunan kalam  
Cinta rijang raja sakti  
Teudong laju dum peurarakan  
Seukalian ka teuisi

Hingga sudah u hadapan  
Indah han ban soe kalon hi  
Di dalam nyan han sapeue tan  
Dum buahan nanggroe pari

Dum rukon meuh deungon intan  
Beurlian deungon biduri  
Teuma neuyue le sulton  
Jak srah badan Kureh Pari

Putroe bunoe seukalian  
Nyang dalam meuligoe sakti  
Laioe di gop mupeurasan  
Sinoe tuan meukhanduri

Jak seumanoe linto baro  
Nyan ban laku ureueng pari  
Si nyak banta keumbang hijo  
Han jeuet taeu miseue nuri

Jiseumanoe banta intan  
Bungong keumang baek budi  
Lheueh seumanoe banta seudang  
Basahan salen seu kali

Tiawah uroe deungan bulan  
Cut intan jiek beureuhi  
Deungan gaca taeu hitam  
Canek awan jaroe gaki

Hana tulok ngon teuladan  
Ngon cut intan Kureh Pari  
Teuma neungui le pakaian  
Ija nyan teuka di pari

Meusambot ngon kupiah syam  
Beurlian euncien bak jari  
'Oh lheueh meungui banta muda  
Satu apa tan kureueng le

Banta peurab bak eelia  
Bak raja Tamim Ebni  
Neumarit le raja eelia  
Ho guda Keumala Janggi

Neuseuot Kureh Keumala  
Sajan hamba wahe abi  
Banta teupok sigo bak pha  
Jikeulua guda sakti

Ka teudong di hadapan banta  
Raja guda umpeuen neubri  
Guda jieu rakyat le that  
Teuingat bak dilee janji

Haba nyoe lon peutoe leugat  
Bek panyang that ulon rawi  
Pajoh ranup ngon boh pala  
Boh bungongta puteh hijo

Yoh masa nyan he syeedara  
Tamim raja neumeututo  
Dong meusapat dum lasyeuka  
Beude raya nibak baho

Maseng-maseng deungon guda  
Le lagoina he teungku e  
Di gunoñg Peuranta Nila  
Phon geuba sali walo

Deungon rakyat han ek hingga  
Ngon rupa pakaian hijo  
Nyang jak di keue peuet droe raja  
Nyang bawa peurarakan linto

Di likot nyan nyang meuguda  
Bandum sama bajee hijo  
Ngon bunyian tango suara  
Hana reuda geundrang tambo

Bak rupa ri prang nyang raya  
Bak suara sali walo  
Di teungoh saboh meuligoe  
Indah han soe he teungku e

Sinan ka jeuet saboh teumpat  
Hana sapat ngon rakyat le  
Di likot nyan lom meuligoe  
Ureueng binoe duek meurungko

Neubungka watee cot timang  
Leupah gunong ka neulalo  
Hingga troh Sukaran Indra  
Bak kuta po dara baro

Ka mubayeuen leumah kuta  
Hana reuda sali walo  
Jitet beude nubat lila  
Poh nukara deungon tambo

Peh hareudap ngon biula  
Seuot rata deungon a-o  
Bak geuampeueng got that gura  
Bangon rupa ureueng mupho

Peuet pasukan peuet boh raja  
Dua tantra sambot linto  
Deungon usong peuet boh geuba  
Bak duek raja keumbang hijo

Meukasap meuh dum mutiara  
Ban seulingka dum geusado  
Di keue linto ureueng binoe  
Rotdeh rotnoe rakyat nyang le

Ban adat reusam nanggroe nyoe  
Ureueng binoe keu ngon linto  
Taeu ngon gleueng ube tungkat  
'Oh talihat cahyajih ro

Meusapat dum uleebalang  
Teupat reuntang dum meurungko  
Jimeusu le mula-mula  
Blah raja cut dara baro

Bukon sayang bak seumantok  
Keutok-tok manoe lam cintra  
Bandua ka sapeue anggok  
Meui ~~ub~~bok jiwoe u tangga

Ka rab jilop dalam umpung  
He teungku dum tuha muda  
Phon geusapa rakyat bandum  
He kawom ubit ngon raya

Taek u gle koh peureulak  
Takoh sibak meudang ara  
Peue jeuet jula teungku neujak  
Kamoe galak meukeurija

Bantai kaso dum ka apak  
Lon preh neujak teungku teuka  
Peue jeuet seubab reudok awan  
Teungoh trang hana le cahya

Pakon teungku jula datang  
Abeh masam kuah saka  
Boh ceumpeudak mangat asoe  
Boh panjoe pajoh ngon cuka

Nyang jeuet keu trep kamoe laloe  
Gaduhan kamoe meukeurija  
Beukit meunan teungku meuntroe  
Bek trep kamoe dong di luar

Hingga teuma haba nyang toe  
Sinaroe tamong lam kuta  
Geubri teumpat ban laku droe  
Nyang meuntroe u bale raya

Ateueh tika nyang meusujoe  
Sinaroe pioh panglima  
Si nyak linto po samlakoe  
Laen nyoe teumāt ka lheueh na

Hingga teuma haba nyang toe  
Bek that rampoe panyang raya  
Lon peugah muda samlakoe  
'Oh sampoe u dalam kuta

Raja neuhei teungku syiah  
Yue peunikah putroe muda  
Deungan Kureh rupa cidah  
Neupeusah milek cut banta

Teungku kali beudoh pantah  
Neulangkah u keue cut banta  
Neucom jaroe bandua blah  
Neupumeu'ah po meukuta

Neusrah jaroe deungon babah  
Ngon bismillah phon neubaca  
He tuanku ikot titah  
Peuseum bah bak maharaja

Bak lon tuan neuwakilah  
Yue peunikah aneuk raja  
Neumat jaroe Kureh Pari  
Teungku kali le neumula

Keu tuanku hukom lon bri  
Ngon cut ti aneuk mbah raja  
Seulindang Deulima cut juhari  
Aneuk doli Ahmad Lila

Neupeutroh hukom Rabbi  
Akan doli po areuta  
Teuma seuot Kureh Pari  
Bungong giri milek hamba

Hana dua nibak kami  
Tuhan bri ka samporeuna  
Geucok linto teuma sinan  
Peukek rijang u istana

Ireng lingka ureueng inong  
Seupreuek bungong bandum rata  
Troph u dalam geupeutamong  
Yoh nyan inong karu raya

Geupeuduek le po samlakoe  
Rab ngon putroe atueuh geuta  
Jibeudoh le putroe sambinoe  
Jak seumbah nyoe linto teuma

Ateueh teuot jilhom jaroe  
Samlakoe neusambot lanja  
'Oh lheueh meu'ah keudeh keunoe  
Peuduek jinoe sapat dua

Hana tuto bandua droe  
Sambinoe maleejih raya  
Ureueng laen tahe keudroe  
Mata laloe ateueh raja

Patotkeu troh keunoe sampoe  
Sideh nanggroe dalam donya  
Meusambot rupa deungon budoe  
Ngon putroe sapeue lagoina

Rotdeh buleuen rotnoe uroe  
Cahya soebroe lam istana  
Teuma geubet le idangan  
Minoman seugala rupa

U keue linto peuduek rijang  
Buka teuman uleh maja  
Neumakeuen le banta analan  
Ngon intan putroe got rupa

'Oh lheueh banta makan nasi  
Neumakeuen le ranup teuma  
Deungon judo nyang ugahri  
Neungieng sabe di cut rakna

Dudoe teuma laen rawi  
Seugala be makeuen teuma  
Bandum abeh makeuen geubri  
Barangri ureueng nyang teuka

'Oh lheueh makeuen seukalian  
Teutap 'oh nan dilee haba  
Pioh bandum inong agam  
Cut intan neulop lam kama

Ka neueh banta analan  
Di dalam keuleumbu kaca  
Bak kaso geulabu intan  
Di sinan neueh bandua

Teutap linto dalam bilek  
Lon balek haba eelia  
Teungku Tamim neumeututo  
He raja e tadeungo hamba

Wahe raja bek le a-o  
Linto baro aneuk hamba  
Nyan aneuk lon banta indah  
Ka sudah areuta gata

Bek tadhot-dhot ngon tamarah  
Sayang leupah ngonjih hana  
Beu takalon pat nyang salah  
Beu tateugah meuhan beuna

Sebab ka lheueh lon jak intat  
Lon harap bak gata raja  
Untong-untong na meularat  
Taintat keudeh u donya

Ban nyang lon kheun bek syobehuat  
Lila Ahmad seuot teuma  
Ampon meu'ah lon raya that  
Meukeumat sampoe lam dada

Jeh puyoh lam cintra beusoe  
Cot uroe jimeusu tiong  
Lon harap meuribee katoe  
He teungku droe troh lam jantong

Cit u donya ulon puwое  
'Oh dudoe keudeh sajan lon  
Lheueh nibak nyan Tamim sidroe  
Beudoh neuwoe nyan u gampong

Neucinta saboh hekeumat  
Ngon siat uroe ka tutong  
Lam uroe nyan teuka asap  
Gadoh rakyat teungku payong

Meusidroe hana le mupat  
Ka seungap geundrang deungan gong  
Laen hana safan-safa  
Seungap haba 'oh nan puntong

Lila Ahmad ngon syeedara  
Ate suka han le tutong  
Lon seobot Kureh Keumala  
Bandua ngon po cut ampon

Kuku' manok teubiet faja  
Teubleut mata putik calong  
Neubeudoh sigo bandua  
Han le cahya bak boh idong

Neutren u mon bak teulaga  
Jak srah muka beude boh gong  
Deungan po cut sama sama  
Di cut rakna jak uet punggong

Hingga saci dum angeeta  
Beudoh gisa deelat ampon  
Hana panyang lon calitra  
Syeedara bek trep lam alon

Teutap sinan Kureh Pari  
Bak siti batee meuidong  
Malam uroe that beureuhi  
Lam dodi meuen lam ayon

Hana ingat deungan pike  
Han le ate woe u gampong  
Ka ladat ngon panyot kande  
Sijuek sabe troh lam jantong

Teuduek dilee saboh ayat  
Lila Ahmad ulon sambong  
Neupeugah bak adek sahbat  
Lon hajat kuwoe u gampong

Adat tatem tajak intat  
Bek lambat teuboh ngon duson  
Deungon putroe lon puwoe sama  
Keumuen gata aneuk di lon

Seureuta ngon banta muda  
Aneuk raja woe u gampong  
Beudoh laju yoh goh jula  
Yoh na pasa gohlom tutong

Bungong meulu puteh safra  
Bungong jeumpa mirah ujong  
Teuma beudoh raja Kaha  
Seureuta ngon deelat ampon

Neujak intat akan kakanda  
U donya neuwoe u gampong  
Ngon putroe Seulindang Deulima  
Nyang rupa miseue mam bang tren

Laen bak nyan soe-soe nyang na  
Rukon cut ma deungon ampon  
Putroe geuboh lam peuratah  
Rupa indah meuh teugulong

Deungon banta bungong mirah  
Neucok langkah woe u gampong  
Ngon rakyat le that barollah  
Dum meulangkah sajan geutren

Lila Ahmad ngui bajee droe  
Kasab reumboe deungon ie mbon  
Nyang laen rakyat sinaroe  
Mupadoe leumah lam alon

Padom malam deungon uroe  
Hana laloe leugat geutren  
Dalam awan riob bunyoe  
Matauroe han le tutong

Yoh masa nyan he teungku droe  
Troh sampoe bak pinto aron  
Peulheueh meusyen dum sinaroe  
Ngon putroe nyang wareh gampong

Di sinan mumat jaroe  
Rotdeh rotnoe peulheueh apon  
Kaha Pari batee Beusoe  
Bandua droe meuwa meucom

Deungon Ahmad ayah putroe  
Keudeh keunoe lakee ampon  
Cut ma rgon teh aduen adoe  
Meusoe-gumoe dum meuron-ron

Abeh keumah rotdeh rotnoe  
Matauroepi ka lambong  
Beudoh teuma dua adoe  
Woe u nanggroe wali karong

Kaha Pari Batee Beusoe  
Troh u nanggroe bak asai phon  
Laen pulang maseng sagoe  
Wadi meuntroe deungon kawom

Teutap 'on nan aduen adoe  
Kisah muwoe deelat ampon  
Sulotan Ahmad lon calitra  
Seureuta ngon aneuk jantong

Di gop nyanpi geuwoe lanja  
U donya bak kuta harom  
Han padum trep poteu raja  
Troh u kuta deelat ampon

Tamong laju u istana  
Seureuta ngon wali karong  
Kureh Pari raja muda  
Pioh sama ngon cut ampon

Han tom neujak meuulua  
Gadoh raya dalam ayon  
Deungon siat lulon sutra  
Lam istana neukek neutren

Raja Ahmad gaseh tuloe  
Keu samlakoe aneuk jantong  
Han neubri jak keudeh keunoe  
Meusiuroe han neubri tren

Seunang ate raja nanggroe  
Neueu bagoe aneuk tanglong  
Mangat ate wadi meuntroe  
Putroe putroe jiek harom

Bukon sayang bungong langa  
Lam ceumara tuan putroe  
'Oh nan abeh haba raja  
Laen teuma kisah muwoe

Muwoe kisah saboh donya  
Luah raya hana bagoe  
Raja sinan le lagoina  
Muplo bangsa jimat nanggroe

Maseng-maseng mat peurintah  
Nyang di bawah rayek sidroe  
Bak saboh thon troh beurseumbah  
Bak deelat syah Batee Beusoe

Keuhai putroe aneuk lidah  
Yoh neukeubah le ayah droe  
Bak gunong Peuranta Nila  
Di antara lam meuligoe

Bak watee nyoe laen haba  
Putroe muda ka na lakoe  
Jitueng bangsa manusia  
Uleh raja Batee Beusoe

Jideungo meunan gop peuhaba  
Aneuk raja ka na lakoe  
Jimupakat sabe raja  
Toh bicara dum geutanyoe

Nyang leubeh got jak udehta  
Taprang raja tatueng putroe  
Bahle tapoh manusia  
Si ceulaka meujih sidroe

Abeh pakat aneuk raja  
Yoh nyan masa bungka jinoe  
Sireutoh peuet ploh nyang keupala  
Muploh laksa wadi meuntroe

Deungon kapai bungka laju  
Han jeuet taeu laot ceukoe  
Hana pioh meusigeutu  
Jiplueng laju kapai beusoe

Lhee ploh uroe jimeusafara  
Goh meuhingga saboh nanggroe  
Hana pioh sikutika  
Sabe pasa hana paloe

Teuduek siat raja bungka  
Lon calitra laen nanggroe  
Muwoe haba u nanggroe raja  
Keu cut banta deungon putroe

## X PRANG MEUSEUNOH PUTROE

Amma bakdu nyoe nyang gura  
Kureh Keumala lon hareutoe  
Bak simalam ngon grak Esa  
Di istana ngon cut putroe

Neumeulumpoe raja muda  
Nyum teka cicem sinaroe  
Nyang ladom rot laot teuka  
Rot lam rim bapi na sampoe

Nyang peuet cicem cidah raya  
Nyang dua jisama putroe  
Meunan leumah Kureh banta  
Teuma jaga beungoh uroe

Sosah ate hana tara  
Bak ayahda le neupeutoe  
Neupeugah le nyan rahsia  
Lagee nyang ka leumah lumpoe

Seumbah ampon lon ayahda  
Patek hamba leumah meunoe  
Teuma seuot poteu raja  
He aneukda peue talumpoe

Seuot banta Kureh Keumala  
U bak raja neuhareutoe  
Lumpoe got that he meukuta  
Tapi hana lom lon muproe

Ulon lumpoe cicem teuka  
Pihak dua meunan bagoe  
Di laot deungon lam rimba  
Dum seugala tamong nanggroe

Lom ngon cidah hana tara  
Dum jisama atueh putroe  
Ulon hireuen kalon rupa  
Teuma jaga beungoh uroe

Jinoe pakri he ayahda  
Nyankeu haba lon nyang tanggoe  
Peue takbi cicem nyan teuka  
Peue rahsia ulon lumpoe

Jinoe harap bak ayahda  
Peugah sigra ubak kamoe  
Teuma seuot Lila Ahmad  
Takbi got that he aneuk droe

Lumpoeteu nyan na alamat  
Bak lon ingat he samlakoe  
Meunan takbi he aneukda  
E bentara jiprang nanggroe

Nyankeu raja nyang that meugah  
Jimeulangkah jak cok putroe  
Sebab dilee na geupeugah  
Nibak Basyah apa putroe

Jipeugah troh raja datang  
Jikheun jiprang jicok putroe  
Hajat jituen bungong peukan  
Jideungo intan ka lon puwoe

Pakri jinoe he buleuen trang  
Nyang reumbang wahe aneuk droe  
Raja nyan dum keunoe datang  
Nanggroe jiprang jituen putroe

Lon he aneuk tan beurani  
Teumakot gli geumpa asoe  
Raja neumoe hana sakri  
Troph le umi tuan putroe

Amane peren ukoq ubandu  
Kutay Kemarej Jon Julentoe  
Per seintuwu abeo tak tes  
Di jerasa lagon cut brtoe

Naumentuwu lela mung  
Nyatu tek' cewu siaboe  
Nyauj jepot lot jat jefra  
Rot tam timpaui us sumboe

Nanapeleter celan crispi lela  
Nyauj das liwana batote  
Muunuu lembap Kutay Putra  
Lsanca lasas putugon noca

Sorop ate jins tes  
Per seintuwu le lapeles  
Nyabungsi le lapeles  
I sage ubanu ka jemari jumpee

Semper ampon Jon dasina  
Patek pameu jumusti lienes  
Tomas setot bozen tes  
Ho tawangs base letambone

Sorot putre Krip Kurniawis  
U pesi liis dianisistus  
Tumoge seti tesi te wongso  
Japsi jins Jon jumpee

Lon jumpee cewu tes  
Pinse qan muanan paseo  
Di jocq dasudon iwu tifape  
Dau seungai sumore uambone

Tanyong pakon neumoe doli  
Lheueh nyan cut tipi ka sampie  
'Oh putroe eu neumoe abi  
Neutayong kri bak judo droe

'Oh dudoe troh Kilan Asyek  
Nyang ceureudek gaki jaroe  
Neueu raja ka mubalek  
Jibet tabek jicom jaroe

Jipubeudoh duek meusapat  
Meuhadap sinan limong droe  
Poteu rajapi ka seungap  
Raja deelat ngon aneuk droe

Cut banta Kureh Keumala  
Cumboi mintra mat u jaroe  
Neugisa le pantah sigra  
Leumah nyata jeuoh ngon toe

Nyang jeuoh deuh banta lihat  
Dua teumpat leumah bak droe  
Bandum leumah tantra rakyat  
Nyang beurangkat dalam nanggroe

'Oh abeh Kureh neulihat  
Banta deelat neukheun meunoe  
Ubak raja neupeuleumah  
Neukalon deuh tuanku droe

Raja Ahmad laju pandang  
Ngon cut intan tuan putroe  
Abeh leumah dum sibarang  
Dum abeh **trang** jeuoh ngon toe

Meunan leumah raja pandang  
Banpeuet sajan deungon putroe  
Ngon ma putroe kalon sajan  
Bandum pandang mangat asoe

Baro ate tan sosahan  
Deungon laheran leumah bak droe  
Nyang hukom Po sidroe Tuhan  
Di ulon tan laen bagoe

Meulaenkan buet aneuk badan  
Ban hajatan he aneuk droe  
Ka neuiem droe raja Ahmad  
Neuharap bak po samlakoe

Ban peurintah Rabbon 'Ibad  
Raja seungap duek ngon putroe  
Cumboi hekeumat banta gunci  
Po juhari nyang seureuloe

Raja Ahmad that beureuhi  
Neukalon kri buet aneuk droe  
Bak aron di bineh pasi  
Lam tuwi udeueng jipoh droe

On beuramoe ngon pucok pi  
Ubat ate aneuk kiroe  
Lon seubot cut Kureh Pari  
Po juhari lon hareutoe

Neucok tungkat saboh josan  
Neureugam laju ngon jaroe  
U laot neusumpom tajam  
Yoh masa nyan le jeuet keudroe

Saboh pulo jeuet di sinan  
Hana lawan he teungku droe  
Kuta saboh di dalam nyan  
Deungon manyang rab ngon uroe

Ngon teubai hana soe lumpat  
Ngon luah that ube nanggroe  
Lam kuta got that meuacak  
That gunjak saboh meuligoe

Lambong beliong joromo johi  
Tjeneran duhan ciri gitipi ka saumboe  
'Op bareng aneuhmoe sapi  
Mentasong kali pak lungo gile

On ngade top Kudu Asiek  
Naats centingek earti latece  
Mesan ijas ka tumpapek  
Tipet tapak hicon istos

Jilopenong gunak menzasti  
Mantababane amba firmone giles  
Poton lejedi ka senubed  
Raja deest jalou slantik giles

On pants Ratuji Kembawis  
Cintai minati mait n istos  
Nenise le batist giles  
Lemang labas jenop lagon joes

Masit jenop depur peruh giles  
Dan tembi jenompi jekutu klati  
Bendawen jenompi guna klati  
Nyus pesantang te deust tulungoe

On sepak kmen sahijis  
Batas jesset pentjungan meruwe  
Upper leis longenjungs  
Neuktion depur tuman giles

Ria Ambari jisi basideun  
Mou cari punu tana batote  
Apep jematis guna elpatans  
Dow srep lisan jenop lagon joes

Wetanu lembut jisa basideun  
Buraseni selia danungon prutose  
Ngon mis batiles kajol selen  
Bendawen bandung mungsi sare

Meuligoe nyan meuh ngon pirak  
Hu mubhak-bhak miseue uroe  
Saboh alam sinan beurdiri  
Ngon namapi mangat tuloe

Nan Keumala Kureh Pari  
Raja doli po meuligoe  
Meusurat nama di teupi  
Dum sipai jimat camcoe

Ngon pahlawan dum han sakri  
Lom ngon sakti ma teungku droe  
Sidroe pakeh di dalam nyan  
Ngon dendayang ceupet asoe

Dirui mangat hana lawan  
Jitren angen teuma dudoe  
Ateueh kapai jitren angen  
Bak masa nyan sang ka paloe

Bandum sosah bukan maen  
Sebab angen tajam tuloe  
Nyoe lon kisah kapai bungka  
Hana reuda malam uroe

Leumah saboh pulo raya  
Lom teuma jikheuñ meunoe  
Leumah jieu di hadapan  
Seukalian leumah asoe

Leumah gunong deungon alam  
Pulo Josan nan geupakoe  
Leumah jieu seukalian  
Ladom teuman takot tuloe

Ladom jikheun meunoe macam  
Kheundak Tuhan bak geutanyoe  
Ulee kapai keunan jiboh  
Banlhee reutoh kapai beusoe

Ngon teukeudi Tuhan utoh  
Angenpi troh le jitampoe  
Kapai bicah dum meuseupreuke  
Jeuet ngon riyeukek raya han soe

Yoh masa nyan he ma po cut  
Teuka hanyot dum sinaroe  
Kapai bungka bacut bacut  
Jiturot ho angen tampoe

Ateueh buket angen jitren  
Bak seunuron bineh nanggroe  
Malam uroe hana leueueng  
Yoh nyan jikheun wadi meuntroe

Dalam kapai dum beulisah  
Kapai bicah riyeukek tampoe  
Raja bandum sangat sosah  
Ate ugah dum sinaroe

Siploh uroe meunan ulah  
Bandum sosah kapai beusoe  
Bandum raja mubicara  
Aleh eelia di buket nyoe

Dilee kon han tom na rupa  
Nyoe aleh ka keunak paloe  
Bangon lagee sang eelia  
Nibak rupa lon eu bagoe

Jinoe got tapeumulia  
Mangat sigra napsu sampie  
Keumah pakat dumgeu rata  
Raja raja dum sinaroe

Bandum keunan jimeusapat  
Dum jiangkat dua jaroe  
Hingga bandum'ka jipeurab  
Ka meusapat dum sinaroe

Jibet jaroe le bandua  
He meukuta payong nanggroe  
Teuma pakeh beudoh rijang  
Neueu macam ulah bagoe

Raja raja peurab keunan  
Seumbah tangan dum sinaroe  
Tinggi kapai dum di sinan  
Teungoh rakan dum ngon meuntroe

Teungku pakeh jijak khadam  
Seukalian biek meusoe-soe  
Teuma pakeh karonyaan  
Bri hamparan dum sinaroe

Ban sireutoh peuet ploh sajan  
Sulotan nyang peugang nanggroe  
Dum geupeudeuk bak mejeulisan  
Bak intan keurusi pudoe

Meutatah mutu manikam  
Meuleueng tilam dum meusujoe  
Laen rakyat seukalian  
Dum hamparan wadi meuntroe

Teuma raja dum meukalam  
Ampon laman bandum kamoe  
Kamoe bandum seukalian  
Heu1 dak muprang raja sidroe

Meuheundak tueng putroe bintang  
Nyang mata ban matauroe  
Nyankeu hajat dum sibarang  
He sulotan tulong kamoe

Kru seumangat bungong lawang  
He intan tadeungo kamoe  
Adat jeuet bek bungong karang  
Keunan taprang tatueng putroe

Sebab judo ureueng landang  
Jijeumeurang jeuoh nanggroe  
Bitpi meunan homteu kadang  
Di lon kutham bek jeuet paloe

Lon gade bak teudong alam  
Lon he intan rindu han soe  
Lagi jeuoh tajeumeurang  
Ngon angkatan muploh katoe

Beudoh raja kaman tajak  
Ka lheueh peuingat nibak kamoe  
Raja beudoh teuma meugrak  
Seumbah ubak teungku sidroe

Idin teungku jinoe lon jak  
Beu troh heundak kamoe dum nyoe  
Teungku neukheun narit sikrak  
Ubak awak raja dum nyoe

Tulong Tuhan Ilahon Hak  
Taeu he nyak uroe dudoe  
Bak lon han peue do'a he nyak  
Sang meuhayak lon eu nanggroe

Raja beudoh le meukua'  
Kon teukeusyak lon teungku droe  
Ek lam kapai dum meulangkah  
Angen mubrah laju sampoe

Kapai bungka dum meubulak  
Keu cut nyak rindu raja nyoe  
Leupah pulo lham daratan  
Jitop awan matauroe

Seupot seupeuet klam nyum alam  
Pulo Josan gadoh keudroe  
Deungon pakeh beursamaan  
Troph u hadapan bungong uroe

Di hadapan Kureh Pari  
Teurjali wara'a sidroe  
Si nyak banta seumbah gaki  
He ya saidi ampon kamoe

Peue saleh na do'a syiah  
Neupeuseumbah datang keunoe  
Kru seumangat bungong awe  
Ka hampe raja sinaroe

Bek dilee taadu sakti  
Boh ate got taiem keudroe  
Seuot si nyak Kureh Pari  
Do'a beu le keu lon sidroe

Lheueh meututo bintang pari  
Gadoh syekhi cumboi jiwoe  
Hingga teuma bungong keumbee  
Ka neubri thee bak ayah droe

Neuyue pangge meuntroe wadi  
Bujang kali ureueng meusoe  
Yue peuase kuta beusi  
Deungan seukali ureueng jinoe

Takheun musoh keunoe ka trok  
Ka dalam lhok dum sinaroe  
Jikeunak cok bungong tajok  
Cut galok putroe sambinoe

Ban neudeungo le Lila Ahmad  
Neiduek seungap tahe keudroe  
Teiduek meutumpok tundok u nap  
Teukui ngon jap mandang keudroe

Lheueh ngon nafah mata mandang  
Teiduek ceukang raja nanggroe  
Geupeugah hai musoh tamong  
Agam inong sosah tuloe

Ase jithee dum sibarang  
Cut intan peuase nanggroe  
Dum jiseuot cit ka ase  
Tumbak beude ka u jaroe

Kamoe bandum mubloe mate  
Di yup gaki payong nanggroe  
Ngon tulong Po sidroe Allah  
Ngon afuwah tuanku droe

Dum ka ase keumah sudah  
Peukakah seugala bagoe  
Meuntroe wadi dum meuteuntee  
Bandum ulee meusoe meusoe

Dum pahlawan jigeudee-geudee  
Pok-pok ulee deungon jaroe  
Tan teukabo ube gutee  
Beuhareuem kee han le kuwoe

Breueh leukat peugot keu wajeb  
Neupeuek u gunong sala  
Haba banta 'oh noe ka seb  
'Ajaeb jinoe lon mula

Bak timon phang on timon phet  
Haba ka trep raja bungka  
Leupah laot troh u darat  
Teungoh leugat dalam rimba

Jijak sunggoh dum teudap-dap  
Atehjih that keuputroe muda  
Hingga troh bak saboh teumpat  
Pioh rakyat balatantra

Teuduek raja dum meusapat  
Peuet ploh eumpat nyang keupala  
Makeuen minom bandum rakyat  
Jimupakat raja raja

Pakri ban tapeuek surat

Keu deelat sulton Lila

Atawa keu Kureh Pari

Cuba akhi tabicara

Teuma seuot seukalian

Sang meunan bak lon nyang gura

Bek taprang hana tabri thee

Jikheun lagee tipee daya

Meunyo meunan ka meuteuntee

Got tabri thee ubak raja

Jipeugot le saboh surat

Nyoe ban ayat bak peurtama

He sulton raja Ahmad

Kamoe hajat ubak gata

Meuri kudeungo beusaran that

Meurtabat Kureh Keumala

Keunan sigo kamoe hajat

Rindu lon that lon ngieng mata

Tuto seungkoe rab saket that

Tan beureukat ube lada

Bak utosan jijok laju

Troh teungku bak Ahmad lila

Poteu raja sambot mupru

Neuploh laju le neubaca

Ban neukalon ate tunu

Neukheun laju bak aneukda

Wahe aneuk bintang timu

Di lon kuyu e bentara

Teuma seuot bungong meulu

Neumeusu Kureh Keumala

Tuhan tulong meuna umu

Ngon do'a guru teungku hamba

Ngon beureukat Baiton Makmu  
He po du lon lawan saja  
Utosan nyan neudrop laju  
Ka neupalu bak keupala

Di sinan ka mate teudu  
Di leuen leupu le teurhanta  
'Oh jieu ban hana troh woe  
Lom sidroe ka jiyue teuka

Nyanpi neupoh lom neukiloe  
Ka teupipoe mate dua  
Nyanpi jipreh tan meuriwang  
Lom pahlawan jiyue dua

Nyang teuga raya ngon panyang  
Tuboh mantong han troh tawa  
Troph 'oh pinto kuta dalam  
Sang deumam sulotan Lila

Ban neueu le banta intan  
Neutawan pahlawan dua  
Laju neupoh le neusimpan  
Neukuran lihe keupala

Troph peuet droe mate utosan  
Leuen kuta nyan cukop leungka  
Seulingka nanggroe Buradah  
Dum peukakah ka seudia

Teiduek 'oh nan saboh ulah  
Nyoe lon kisah raja bungka  
Peuet utosan hana jiwoe  
Sang ka paloe bak ri rupa

Beudoh bandum peukeuniah droe  
Wadi meuntroe beudoh ngaza  
Gambo-gambo suboh uroe  
Dumna bunyoe meusuara

Yup seurune peh keucapi  
Meundoli ngon sangkaikala  
Rakyat le that hana sakri  
Siulah ri sang ie raya

Ngon seunapang ka meuriti  
Jili seun-seun silaksa  
Meusu beude ngon meuriam  
Jibeudoh nyan siploh raja

Ka lheueh cukop peurjanjian  
Dum angkatan prang jingaza  
Leupah gunong teupi hutan  
Troh tuan lam naggroe raja

Jitet beude jipeh geundrang  
Jisurak ban riyeuk teuka  
Meualon han putoh reuntang  
Sang geulumbang laot raya

Meusu beude ngon meuriam  
Bangon karam nanggroe raja  
Ngon jisurak jihei sare  
Beuhe mate sunggoh raya

Hajat jitueng tanglong kande  
Jibloe mate jiprang kuta  
Jiek santeut sang boh pade  
Ngon su beude meugeumpita

Bangon karam nanggroe reule  
Kuyu ate soe eu rupa  
Jipot angen blah seulatan  
Jideungoran dum suara

Geudeungo bunyoe sang lakuan  
Deuh u dalam kuta raja  
Teuma marit Lila Ahmad  
Hai peue seungap diam saja

Tapreh troh keunoe jipeurab  
Han taintatjih u rimba  
Hoka meuntroe Kilan Asyek  
Goh tasidek bak keupala

Bek tabri troh keunoe jiek  
Beudoh reutek peudeueng raya  
Ban jideungo ulah meuntroe  
Beuet jaroe du lon raja

Idin keu lon namiet sidroe  
Nyang tuha nyoe dalam kuta  
Cok ngon peudeueng mat u jaroe  
Jiek sidroe ateueh kuta

Di likot nyan dum sinaroe  
Bujang meuntroe ngon bentara  
Reugam leumbeng cok ngon camcoe  
Di jaroe peudeueng ngon cokma

Com di teuot Kureh Pari  
Jak peureugi lawan ngaza  
Beu seulamat Tuhan neubri  
Nibak 'asi musoh teuka

'Oh lheueh idin nibak Kureh  
Teubiet abeh dum seugala  
Tarek alam hitam puteh  
Peulheueh bareh mula-mula

Jigrop keunoe tajo keudeh  
Meuseupeh guda pohlawa  
Jimeutak-tham meuen tangkeh  
Seuu abeh hana lia

Jipeh tambo deungon geundrang  
Ngon canang prang meusuara  
Hingga leupah kuta dalam  
Jisurak ban reudok teuka

Geunta bumoe sang ka karam  
Siulahan tupeuen raya  
Rotdeh geujak rotnoe geujak  
Meurumpak putroe ngon raja

Ban meuhadap dua pihak  
Prang meuhayak sali 'ala  
Rotdeh leumbeng rotnoe kapak  
Jisurak meutaga-taga

Su meualon deumpek surak  
Miseue umbak laot raya  
Ladom beude ladom busu  
That meulaku hana tara

Hana sapeue takot kuyu  
Han sigeutu ate lia  
Ngon meuriam tadeungo su  
Sang laku bagoe keunong sa

Aneuk beude tadeungo pra-pru  
Nyang busu han ek takira  
Reubah rakyat keunong laju  
Teudu-du dalam blang raya

Mayet teutiek dum meutabu  
Sulu-sulu tamon raya  
Nyang le mate ureueng datang  
Sebab rakan ladom lia

Hana ragoe bak jimuprang  
Kon miseue ban meuntroe raja  
Hingga troh ka bak lhee uroe  
Prang that tanggoe leubeh raya

Geumupioh rotdeh rotnoe  
Dum sinaroe kalon tantra  
Geupileh nyang rusak mate  
Laen sare dum geujaga

Rotdeh rotnoe rakyat mate  
Bak pike siribee dua  
Blah raja sulton Ahmad  
Lam hisab sireutoh dua

Meuntroe areh le amilan  
Jikheun padan ubak tantra  
Nyang jinoe bek le talawan  
Jih tapadan tipee daya

Takheun hai nyoe ban peurintah  
Keuheundak sah gata syeedara  
Lheueh jipakat nyan jipeugah  
Ingar pantah laen keunira

Jipeugot teumpat dalam tanoh  
Jipageue jroh siseun lingka  
Ngon pinto rot han tatu'oh  
Didalam soh jih di luar

Cukop leungkap pakat sudah  
Muwoe kisah **meuntroe raja**  
Jicok dawuet ngon keureutah  
Phon inilah nyang dimula

Lon waki bak sulton Ahmad  
Neuyue ngadap bak meukuta  
Droeneuh siploh neubeurangkat  
Meunan hajat bak sripada

Sebab ulon muprang bunoe  
Meunan neuyue le meukuta  
Keupeurasan raja nanggroe  
Woe bak putroe aneuk raja

Neuyue sambot tuan sampoe  
Ngon sinaroe balatantra  
Sinoe lon preh bak teumpat nyoe  
Peurab keunoe he meukuta

Droeneuh siploh bak lon sidroe  
Sang-sang putroe keunan jeumba  
Sebab Kureh na di nanggroe  
Peukara nyoe bek deuh nyata

Bek jeuet kiroh subra nanggroe  
Peukara nyoe bek deuh nyata  
'Oh troh keunoe bak lon tuan  
U dalam keudeh lon bawa

Lon peutamong bak sulotan  
Ka sampoe ban hajat pinta  
Meuteumee keumala intan  
Nyang elokan aneuk raja

'Oh lheueh meuntroe peugat surat  
Jiyue intat keudeh lanja  
Bak pahlawan nyang that hebat  
Jisrom surat dalam tantra

Ban jikalon surat datang  
Jiploh rijang le jibaca  
Ate mangat kon bubarang  
Bungong karang sang dapat ka

Jibeudoh le laju rijang  
Jipeuseunang siploh raja  
Tinggai rakyat dalam kimah  
Raja sudah masok kuta

Ngon pinto rot sit ka teuhah  
Meuntroe indah preh di lua  
Ampon tuanku patek seumbah  
Lon ka salah bak sripada

Teuma jinoe nyan bu meu'ah  
Harap seumbah bak meukuta  
Seuot raja insya Allah  
Ka lon meu'ah he peurdana

Deelat tamong nyan u dalam

Pioh kaman sikutika

Raja siploh tamong curam

Meuntroe sajan le seureuta

Hingga troh lam kuta tanoh

Han soe tu'oh seupot buta

Dum pahlawan ugoh-ugoh

Ka peunoh sep soe daya

Jireupah le kameh-kamoh

Yoh nyan jipoh sali 'ala

Jibeureukah jiboh taloe

Bak meuntroe teuma iibawa

'Oh meuhadap ban siploh droe

Bit kah meuntroe le bicara

Kakheun meudeh buetkeuh meunoe

Kamoe nyoe katipee daya

Lheueh nibak nyan meuntroe puwoe

Ban siploh droe dalam kuta

Hana riob balabagoe

Dum bunyoe han meusuara

Troh bak raja beuet jaroe

Ampon kamoe po meukuta

Ulon tuan jak meuramien

Dalam uteuen paroh rusa

Nyoepat lapoh ka meuteumeung

Taren lon theun di rot raya

Nyoekeu nyang na asoe uteuen

Meuteumeung daim beuluka

Meunyo ek tuanku makeuen

Neuramien meunyo na hawa

Lila Ahmad 'oh ban neungieng

Muka ureueng siploh raja

He peue lapoh lagoe ureueng  
Peue takheun nyang kon-kon haba  
Poteu raja sang teusinyom  
'Oh meuntroe kheun paroh rusa

Sang seulamat bak tapeunyum  
Teukhem siseun raja Lila  
Meuntroe areh raja neukheun  
Ka jiteumeung siploh raja

Bit meutuah meuntroe jameun  
'Oh·ban jikheum sabet beuna  
'Oh lheueh tilek raja pandang  
Taba rijang bak Keumala

Ubak si nyak tajak peutrang  
Peue mee kadang jatoh sabda  
Nibak lon nyoe pike hilang  
Han troh leumpang ngon bicara

Teuma meuntroe beudoh rijang  
Troph u hadapan raja muda  
Deungan jaroe jibet meulayang  
Seumbah laman namiet tuha

Nyoepat na sie saboh panggang  
Rusa agam roh lam kaja  
'Oh ban neueu le Kureh Pari  
Meuntroe ini le bicara

Teusinyom bintang juhari  
Akan meuntri tuto jiba  
Teuma seuot Kureh Pari  
Akan sie ini hawa raya

Meunyo meunan keudeh tabri  
Bak Nahawi nyang mat peunjara  
Tayue pasoe rusa ini  
Tayue gunci bak kong raya

'Oh meuntroe deungo sabda doli  
Tukang gunci meuhei sigra  
Peulop lam glap he Nahawi  
Suroh doli nibak gata

Teuma jicok le Nahawi  
Jigunci lam seupot buta  
Meuntroe wasiet bak Nahawi  
Asee gasi keunan kaba

Nyankeu putroe raja ini  
Lom mangat jimeusuka-suka  
Teutap lam glap raja siploh  
Asee droh meutaga-taga

Meuntroe Kilan riwang lom troh  
U kawoh Kureh Keumala  
Jibeuet ngon jaroe siploh  
Lom jitumpoh ngon suara

Harap ampon di yup kawoh  
Lon nyoe sunggoh ajai teuka  
Teuma seuot Kureh Pari  
Mara ini bek gli geunta

Gata bak lon pangkat tinggi  
Leubeh lagi nibak nyang ka  
Jinoe gata ulon rasi  
Meuntroe ahli pangkat beusa

Nyoe keu gata saboh lon bri  
Sakti nyang hana ngon sa  
Le meukeusud Tuhan neu bri  
Nyoe he meuntri saboh jeum ba

Sireutoh peuet peue sinoe hajat  
'Oh ta kasad ase cinta  
Jinoe gata prang takarat  
Do'a le that nibak hamba

Sion bulee gata reubah  
Meuhat darah di lon keulua  
Meuntroe sambot ngon ijadah  
Beudoh pantah ek cong guda

Bandum rakyat ka beh jikrah  
Ngon meudah-dah nanggroe raya  
Dum panglima meugah meugah  
Beusoe meuklah di keupala

Ngon teuga na siploh gajah  
Gunong jiplah sang meuleua  
Cukop ase rakyat sudah  
Meulangkah meuntroe bak raja

Troh bak kimah kuta tanoh  
Rakyat damoh dum sangat bha  
Dum meugrop meuseunoh-seunoh  
Pahlawan jroh teuga teuga

Makeun minom beursukaan  
Dum angkatan meusuka-suka  
Bah teuduek nyan saboh syahdan  
Laen tuan lon calitra

Di geurugok manok meutaroh  
Drop lapoh Geulumpang dua  
Tantra raja sireutoh peuet ploh  
Jimupioh trep ka lama

Jinoe teungku lon peugah troh  
Jideungo riox tan suara  
Teupike lam ate sidroe  
Hai peue bagoe sang di raja

Ka troh ubak keulhee uroe  
Hana sidroe lom meugisa  
Bak laku sang nyoe ka paloe  
Cuba keunoe jak pareksa

Beu sep alat peukeumah droe  
Tapasoe keumurah lila  
Reugam peudeueng le u jaroe  
Mat ngon camcoe dum mubanja

Rakyat keumah dum seuleusoe  
Bujang meuntroe ngon bentara  
Ase siat keumah sudah  
Jicok langkah nam ploh raja

Ka jisurak subhanallah  
Rasa beukah langet donya  
Ngon bunyian han peue peugah  
Rioh leupah dalam rimba

Han tatupeue peugah bagoe  
Seugala syoe meusuara  
Gam bo-gam bo suboh uroe  
Troh sampoe bak tantra raja

Bak teumpat duek raja siploh  
Rakyat teudoh hana haba  
'Oh troh keunan raja nam ploh  
He bioh ho poteu raja

Hom tuanku han troh ingat  
Siploh deelat han meuho ka  
Kamoe bandum meuduek seungap  
Tan ho hadap hana raja

Ho saleh ka po rimueng 'ap  
Kamoe nyoe rab mate fana  
Adat kon troh deelat payong  
Abeh untong kamoe bena

Raja nam ploh su meugulong  
Jak sajan lon meutan raja  
Beudoh rakyat bandum ceundrong  
Ngon payong keumang meugisa

Leupah uteuen dum jiarong  
Trok u gampong sampoe hingga  
Jipeh geudrang jipalee gong  
Meusong-abong rakyat teuka

Dum peurise jime tu dong  
Beude boh gong jimat rata  
Yup seurune peh geudumbak  
Jisurak meutaga-taga

Ngon ceuracap that meusigak  
Ladom likak ladom lila  
Ladom busu ladom kapak  
Puteh mubhak ujung mata

Su meualon deumpek surak  
Tamse umbak laot raya  
Deungan sunggoh prang jipeujak  
Hingga troh bak tantra nyang ka

Deungan meuntroe nyan meurumpak  
Jihayak tambo teumaga  
Jibeudoh le dum meuhalak  
Teudong nibak gaki kuta

Hingga meusu dumna bunyoe  
Rotdeh rotnoe tadeungo subra  
Rotdeh beude rotnoe beude  
Muprang sabé hana reuda

Rusak patah reubah mate  
Hana ek le tabileueng sa  
Miseue sungoe darah ile  
Boh beude ban kawan kadra

Hana saho kuyu ate  
Timang sabé bak ri rupa  
Raja nam ploh sunggohji that  
Prang jikarat lagee raya

Di likot jiparoh rakyat  
Jipeusapat peusak lanja  
Hana bacut jibri undo  
Jitajo lagee boh panta

Nyang mate reubah seulinteueng  
Jeuet keu naleueng layee rata  
Hana bacut jibri ruweueng  
Jiprang useueng nibak nyang ka

Tujoh uroe tujoh malam  
Prang nyan agam sangat that bha  
Hingga troh bak uroe lapan  
Nyum tiwasan meuntroe raja

'Oh jikalon nyan ka lukang  
Bak lakuan sang leumoh ka  
Sebab le that rakyat mate  
Sosah ate hana tara

Maken sunggoh jiprang sabe  
Su beude ban rijeuk teuka  
Asap beude seupot nanggroe  
Meuuroe hana deueh nyata

Mate reubah dum teupipoe  
Keudeh keunoe sangat that bha  
Matauroe bagoe sagop  
Asap seupot hana ngon sa

Banta Kureh 'oh ban neubleut  
Neueu sifeuet meulaen ka  
Keu meuntroe ate meutuep-tuep  
Neutren u yup teuma sigra

Banta neucok le dua beuheun  
Ngon peutheun musoh nyang na  
Kureh neudong teuma di leuen  
Neueu peukateuen prang ngon raja

Ka neupeuhah payong keurajeuen  
U mideuen keudeh neu yue ba  
Neujak ngon droe eu peukateuen  
Rakyat bandum ate suka

Pehah payong panca logam  
Deungon alam panca warna  
Rakyat patah mate karam  
Ba u yup nyan dum seugala

Bandum muwoe umu saban  
Beuhe na sang miseue nyang ka  
Yup surune peh bunyian  
Lom jilawan miseue nyang ka

Han le mata puleh karam  
Kheundak Tuhan muwoe ban na  
Kureh tanyong nibak meuntroe  
Ho taba nyoe nyan cumbia

Na tuanku bak lon sidroe  
Tuwo kamoe namiet tuha  
Taculok lam tanoh sikhan  
Saboh reugam tacok teuma

U manyang tasrom lam awan  
Hai Kilan meunan tacuba  
'Oh lheueh sabda nibak doli  
Teuma meuntri cok cumbia

Lam tanoh teuma neuwati  
Sireugampi ka neucok teuma  
U manyang laju neugeuti  
Kureh Pari teuma gisa

Troh u rumoh banta ahli  
Peuleumah kri bak tuan tha  
Banta neudong sinan di leuen  
Jitren ujeuen di antara

Ujeuen apui sangat tutong  
Lagee teupong meunan rupa  
Meuntroe areh that meuuntong  
Prang meukeupong sunggoh raya

Jiprang laju deungan sunggoh  
Rakyat nam ploh tiwah ngaza  
Sebab ujeuen seuuem angoh  
Tantra musoh meusurot ka

Bandum jiplueng ma teungku beh  
Apui pajoh bajee ija  
Lam uteuen jiplueng meugeucoh  
Jilet sunggoh hana reuda

Hingga troh u dalam gunong  
Mantong seuuem bak angeeta  
Abeh badan dum ka keumong  
Duroe keunong bak keupala

Troh bak gunong Guha Riton  
Teukeujot Milon dalam tapa  
Bak rakyat plueng dum meuron-ron  
Datok Milon teuma jaga

Teubleut mata lheueh ngon nafah  
Kayee reubah dum meureula  
Haro-hara deungan siat  
Gulita glap seupot buta

Angen tajam ngon teuga that  
Lom ngon kilat ujeuen raya  
Grak teukeudi bri halarat  
Meularat Kureh Keumala

Nafah Milon troh u nangg<sup>oe</sup>  
Keunong nyoe Kureh Keumala  
Teungoh neuduek bak bale pudoe  
Di cut putroe di istana

Ka keunong muda samlakoe  
Lupot barangsoe dum peukara  
Meulayang-layang laju jibapot  
Meubeuet gaki bandua

Tujoh nanggroe leupah aroh  
Teuma jatoh banta muda  
Nama nanggroe Keulabee Tamam  
Raja di sinan Gangga Beurama

Pakri rupa akan raja nyan  
Deungo laman lon calitra  
Geulunyueng dua raya han ban  
Leupah tuan gaki dua

Panyang siblah on geulunyueng  
Adat taleueng na ube tika  
Siblah jieh siblah jilimot  
Di Blang Sidahob duek lam tapa

Padum jameun han teukeujot  
Droe jibalot geulunyueng dua  
Aneuk saboh rupa canden  
Jih bangsa jen dalam rimba

Aneuk jitroh bak teumpat laen  
Di Galasen Padang Ubira  
Din Keumala nama putroe  
Lam meuligoe jitroh le raja

Jipeugot sinan lim ong meuligoe  
Nyang peuet toe-toe apet lingka  
Di tungoh nyan raya geutoe  
Lhee ploh bagoe lapeh rika

Lhee ploh lapeh meuligoe nyan  
Meutatah intan dum geupa  
Manyang leusoh dalam awan  
Lapeh tuan phon lon mula

Lapeh nyang phon beusoe inalan  
Teumaga nyang lapeh keudua  
Lapeh keulhee suasa nilam  
Keupeuet tuan meuh teuupa

Lapeh keulimong teuma intan  
Lapeh keunam silong nama  
Lapeh keutujoh nan beurlian  
Lapeh keulapan yakot ata

Lapeh sikureueng mata zamrut  
Keusiploh jeuet nan peurmata  
Lapeh keusiblah akek pualam  
Dua blah nyan rupa-rupa

Le that lapeh nyan meuligoe  
Han ek taproe teumpat raja  
Nyoe lon peugah haba nyang toe  
Jieh putroe bak lapeh sa

Dendayang duek bak lapeh peut  
Khadam po cut Din Keumala  
Putroe muda got that sifeuet  
Ate meuheut lakoe hana

Teuduek dilee cut ma ubon  
Deelat ampon lon calitra  
Kureh keunong nafah Milon  
Cut bintang lhon keunan teurhanta

Nibak lapeh nyang tujoh blah  
Lam peuratah ka teurhanta  
Ngon pakaian peunoh limpah  
Gohlom nafah nyan keulua

Bak uroe nyan putroe langkah  
Bak tujoh blah lapeh sara  
'Oh ban putroe peurab keunan  
Meugrop dapan dua deupa

Allah pane ureueng agam  
That budiman elok rupa  
Ho rot jiek teuka keunan  
Bak kamoe nyang ka han tom na

Saleh mate saleh udep  
Putroe 'ajaeb ingat pula  
Nyoe takbi lumpoe lon siblet  
Saleh' udep ureueng muda

Putroe jicok cawan beudak  
Ngon keulum bak gahru jeumpa  
Bee meudeungong sang meuhayak  
Reumpah cut nyak Din Keumala

Jipeurab le laju jijak  
Jiduek nibak teuntang dada  
Ban jiboh beudak kasturi  
Lom lagi ngon gahru jeumpa

Lom ie mawo ata Hindi  
Beudak wangi siram banta  
Di ulee sampoe u gaki  
Kureh Pari teuma jaga

Ban teukeujot banta ahli  
**T**eu bleut lagi deungon mata  
**N**eukalon le ngon meuligoe  
Deungon asoe laen rupa

Teuhah babah teukap jaroe  
Samlakoe Kureh Keumala  
Neueupi ka laen putroe  
Elok bagoe hana ngon sa

Sangat tahe po samlakoe  
Yoh nyan putroe jibeukata  
Marit putroe ngon manesan  
Sira intan khem teurtawa

Beudoh teungku muda seudang  
Neumeukalam ngon adekda  
Teungku ka sret dalam awan  
Kheundak Tuhan bak adekda

Putroe hireuen ate rawan  
Lom cut intan ate suka  
Si nyak putroe mat di badan  
Beudoh tuan duek bak tika

Banta Kureh malee sang-sang  
'Oh neupandang Dim keumala  
Teuma beudoh bungong karang  
Duek teusumpan banta muda

Teumanyong le banta Kureh  
Bak cut puteh nyang jroh rupa  
Nyoe lon tanyong cut tapileh  
Saboh lapeh nibak gata

Peue nama gata cut buleuen  
Bak lon takheun he adekda  
Peue nanggroe nyoe nama geukheun  
Soe keurajeuen peue nan raja

Peue buet sinoe bungong seupeueng  
Lon eu buleuen sidroe saja  
Din Keumala beuet jaroe  
Ampon kamoe po meukuta

Adat cicem tok beuragoe  
Lon sidroe meunan umpama  
Din Keumala nama kamoe  
Ayah lon nyoe Gangga Beurama

Keulabee Tamam nama nanggroe  
Ayah kamoe duek lam tapa  
Blang Sidahob padang luah  
Sinan ayah lon meukuta

Ulon sinoe nyan neukeubah  
Neupreh tuah soe me teuka  
Lapeh di yup dum jariah  
Dayang indah peuet boh jeumba

Peuet meuligoe lom di bawah  
Ayah keubah he meukuta  
Di tuanku pat daerah  
Cuba peugah bak adekda

Meunan tanyong bungong tufah  
Su meureundah hana tara  
Teuma seuot Kureh Pari  
He putroe ti Din Keumala

Bek tatanyong ngon tasudi  
Bangsa kanni manusia  
Nama nanggroe Anta Peurdani  
Juhan Ali nama bapa

Sikanda Lela nama umi  
Nama kami Kureh Keumala  
Ulon adek keunong sakti  
Deungan teukeudi troh bak gata

Teuma putroe jinoe pakri  
Lon beureuhi keu adekda  
Tameukawen buleh jadi  
Adek siti ngon kakanda

Teuma seuot putroe siti  
Bungong usi Din Keumala  
Bak lon tuan buleh jadi  
Cit ka janji dilee masa

Soe nyang troh keunoe peureugi  
Nyan suami di adekda  
Hingga malam seupot hari  
Kureh Pari putroe muda

Mayoh deundam bandua si  
Miseue nuri saboh cintra  
Bak malam nyan geumeucakri  
Aleh pakri ureueng dua

Han troh pike lon he akhi  
Hana ahli tupeue basa  
Beungoh uroe esok hari  
Putro siti ek lapeh sa

Seureuta ngon Kureh Pari  
Lom neusudi tanyong pula  
Jinoe Pakri pirak lipat  
Takheun leugat bintang kala

Kureueng seunang meujarak that  
Di lon nyopepat sinan gata  
Seuot putroe meuh lam lipat  
Neupreh siat po meukuta

Bahle lon hei sidroe utad  
Nanji meuhat Meurcu Lila  
Si nyak putroe peuhah tingkap  
Ka troh leugat Meurcu Lila

Sajan jime saboh surat  
Palakat wakilah raja  
'Oh troh keunan teuduek siat  
Neuploh surat le neubaca

Meunoe haba dalam surat  
Lhee boh ayat na lon baca  
Bahwa bit-bit bukon wayang  
Seureuta trang ngon cappi na

Wakilah raja nyang beussaran  
Sulutan Gangga Beurama  
Aneuk saboh putroe intan  
Din teursayang elok rupa

Nyang peutumeun soe nyang numpang  
Walee ensan manusia  
Walee bak jen biek edeurang  
Meuka datang jadeh saja

Tanda sunggoh alamat trang  
Tanda tangan poteu raja  
Lom teuseubot di ujung nyan  
Kamoe jangan peugoe jaga

Ban neukalon le Kureh Pari  
Beureuhi ate lam dada  
Mat le jaroe alem faki  
Nikah jadi sudah leungka

Meurcu Lila teuma gadoh  
Putroe jroh tinggai ngon raja  
Ate leukang sang-sang tijoh  
Meurawoh ate lam dada

Lop bilek tamong meusatoh  
Eh putroe jroh deungon raja  
'Oh nan abeh bungong jaloh  
Laen rawoh muwoe haba

Taek u gle takoh langa  
Peugot bahtra ngon jeumeurang  
Lon kisah Seulindang Deulima  
Ahmad Lila po anakan

Sosah ate bungong langa  
Sebab raja sudah hilang  
Masa jan ngon putroe muda  
Dalam banya sosah han ban

Deungon meuntroe nyang bahgia  
Laen teuma uleebalang  
Hoka saleh raja muda  
Dalam banya ka meu hilang

Rakyat peunoh dalam kuta  
Dalam lua dum sibarang  
Ate sosah hana tara  
Hana reuda uroe malam

Nyang sosah that poteu raja  
Ngon aneukda putroe bintang  
Jinoe pakri he bentara  
Nibak gata uleebalang

Kadang teuka keunoe musoh  
Lom jitudoh keunoe jiprang  
Meuhat jicok meuh seuneupoh  
Lom meunyo troh keunoe datang

Dum jiseuot tulong Allah  
Sigo nyoe bah kamoe muprang  
Han mubri ba bungong karah  
Meuna tuah bungong keumang

Teutap meunan pakat sudah  
Nyoe lon peugah cut Seulindang  
Cut Deulima that beulisah  
Apoh-apah geunap malam

Wahe teungku meuh keureutah  
Allah Allah gata hilang  
Dalam banya lon neukeubah  
Droeneuh leupah ho beurjalan

Alehpi lon kadang jiba  
Uleh raja dum sibarang  
Han troh e po lom meugisa  
Kadang lusa musoh datang

Untong talo ayah raja  
Lon ka jiba le musohan  
Meunan meunan putroe rika  
Ngon ie mata ro meukarang

Hana putoh atueh dada  
Suntok masa hana reunggang  
Teiduek putroe saboh leua  
Pihak raja ulon karang

Keuhai raja sireutoh peuet ploh  
Bandum sunggoh ka meuriwang  
Riwang bak plueng bandum pioh  
Kimah jiboh di teungoh blang

Jipeh geundrang surak riox  
That meugeucuh peurasan prang  
Tarek alam dum jilaboh  
Jipioh bak saboh padang

Teiduek siat 'oh nan pioh  
Hana lom troh bak teumpat prang  
Dum peurasan mantong riox  
Suara beh that meuguncang

Raja Ahmad ayah putroe  
Deungon bunyoe meusu geundrang  
Teuma neukheun ubak meuntroe  
Musoh keunoe ka meuriwang

Peusep alat peukeumah droe  
Aleh han nyoe timang pasang  
Meunyo meunan wahe meuntroe  
Gata jinoe pike nyang trang

Patot tahei u kayangan  
Tabri thee nyan dum sibarang  
Seuot meuntroe ampon meunan  
Sang patot nyan keudeh peutrang

Teuma meuntroe cok keumunyan  
Ngon idangan dalam dulang  
Di pinto kama peuduek yoh nyan  
Keumudian apui teupasang

Ban sare mubee keumunyan  
Troh le yoh nyan dum sibarang  
Lhee boh raja lam kayangan  
Teuka keunan dum seukarang

Deungon rakyat dum maseng ban  
Pahlawan ngon uleebalang  
Ban meuhadap lhee droe gop nyan  
Peue maenan tanyong rijang

Seuot meuntroe po junjongan  
Kamoe laman keunoe jiprang  
Le raja sireutoh peuet ploh  
Puteh leusoh sudah hilang

Tinggai putroe lam meuligoe  
Ngon doli kamoe sibarang  
Ka lheueh bak prang dua kali  
Kureh Pari sudah hilang

Lheueh jipeugah uleh meuntroe  
Ahmad sidroe bri hamparan  
Keu aduen deungon keu adoe  
Neubri jinoe minom makan

Dalam kuta rakyat ka doe  
Lhee boh nanggoe keunan datang  
Raja Lila Batee Beusi  
Kaha Pari Diwa Mam bang

Teuma raja Diwa Pari  
Maseng sakti panglima prang  
Rakyat pioh duek beureunti  
Lheueh khanduri dum angkatan

Raja raja bak keurusi  
Teuduek sunyi pakat reumbang  
Ladom ingat Kureh Pari  
Aleh pakri nyang jeuet hilang

Bak dilee takalon sakti  
Jinoe pakri jeuet keu irang  
Meunan raja dum meusudi  
Tapaban kri kheundak Tuhan

Yoh nyan meuntroe beudoh mari  
Seumbah jibri keu sulotan  
Jak mat jaroe dum barangri  
Karong wali seukalian

Riwang meuntroe duek bak tadi  
Teuma jieu le lam bungkosan  
Si nyak putroe buka gunci  
Teurjali cumboi manikam

Teuma jipeuhah uleh putroe  
Seugala syoe leumah dum trang  
Leumah lom nyang jeuoh nanggroe  
Leumah dudoe banta seudang

Meusangkot dalam meuligoe  
Mantong nyoe nyawong lam badan  
Hana got deuh nyata leumah  
Sang meugapah hana got trang

Si nyak putroe han that ramah  
Goh peureunah bak neupandang  
'Oh jeuet leumah mantong doli  
Suami mantong goh karam

Ate mangat bungong giri  
Nibak abi jikheun rijang  
Nibak karong dan bak wali  
Lom bak umi putroe kheun nyan

Deungo bandum haba siti  
Beureuhi ate lam badan  
Di meuntroepi ate mangat  
Laen rakyat dum sibarang

Teiduek dilee 'oh nan seungap  
Puteh lumat cut Seulindang  
Jinoe laen lon riwayat  
Hikayat lon balek batang

\*\*\*

## XI. KUREH PARI PEUTALO RAJA-RAJA JEN

Bukon sayang bungong geutoe  
Geunap uroe angen timang  
Anma bakdu teuma jinoe  
Keu samlakoe lon peuriwang

Kureh Pari lon hareutoe  
Ngon putroe rupa elokan  
Din Keumala po sambinoe  
Geunap uroe ate seunang

Si nyak banta leubeh dukhoe  
Ngon putroe rupa elokan  
Han le ingat seugala syoe  
Teungoh laloe lam ayongan

Teukeudi Po sidroe Allah  
Nyang peurintah uroe malam  
Kira malam poh dua blah  
Teuka sosah banta intan

Teuingat nanggroe Buradah  
Teungku ayah tinggai lam prang  
Ngon putroe rupa nyang indah  
Aleh sudah ka jitawan

Aleh talo nanggroe ayah  
Aleh leupah gop u dalam  
Kureh Pari that beulisah  
Apon-apah hana macam

Teuma jaga putroe cidah  
Nyang meutuah Din teursayang  
Jieu raja muka mirah  
He deelat syah peue sosahan

Pakon e po lon eu sosah  
Neupeugah bak lon seukarang  
Peue na meuhat he deelat syah  
Lon eu sosah hana macam

Meuna hajat laen ulah  
Neukheun pantah bak lon tuan  
Bak watee nyoe kri nyang leumah  
Bak ulon sah seunang han ban

Meunan jikheun putroe cidah  
Khem meuhah-hah lem sulton  
Kureh banta seuot pantah  
He cut indah deungo lon tuan

Si nyak putroe ka jiugon  
Sira jicom nibak badan  
Banta Kureh sang teujanun  
Ngon jicom le putroe intan

Puleh ate di tuampon  
Mubaro phon teubiet kalam  
Wahe po cut ate jantong  
Tadeungo lon he buleuen trang

Idin siat bungong sukon  
U gampong lon woe he intan  
Lon woe siat po cut ampon  
Idin keu lon dek buleuen trang

Dudoe lon cok bintang kutob  
Adat laot lon jeumeurang  
Meunan neukheun po raja cut  
Meukeuteuet-keuteuet ate cut intan

Si nyak putroe teuma seuot  
Mubek lupot teungku abang  
Beu teuingat nyan u likot  
Nyoe po cut han teungeut malam

Teuma seuot Kureh Pari  
He cut ti ngon deumi Tuhan  
Ulon tueng deungon meuseuti  
Ube janji lon keubah han

Teuma putroe bri bokeuti  
Keu suami asoe badan  
Saboh cumboi putroe jibri  
Nan geurasi Sila Mambang

Pruetjih raya ube guci  
Di bādanpi ubē kumbang  
Jiteurebang pantah sangat  
Deungon siat gadoh hilang

Bulee sayeuep su meuhuet-huet  
Meutuep-tuep 'oh jiteureubang  
Si nyak putroe bri keu lakoe  
Tuanku droe neuba sajan

Meuhan neutueng nyang lon bri nyoe  
Han neutueng kamoe di sulton  
Banta neumat nibak jaroe  
Bak putroe lakee idinan

Idin bak lon tuanku droe  
Sira jimoe com dibadan  
Allah Allah tuanku droe  
Ka neuwoe di teungku abang

Beu seulamat malam uroe  
Bek paloe di mana jalan  
Han jeuet lon eu aneuk meurak  
Jeh burak jitren di manyang

Di tuanku leupah neujak  
Di cut manyak apon badan  
Lon pabanbah 'oh noe kheundak  
Goh pueh galak ka neuriwang

Wahe teungku batee ulee  
Ija bajee abeh hitam  
Aleh pungo seudee-ratee  
Asoe pangkee han le sajan

Bungong jeumpa abeh layee  
Tan soe com bee le 'oh malam  
Tahe keudroe sinan lam juree  
Soe peulagee po jeh ka tan

Bukon sayang lon eu buleuen  
Peungeuh mideuen watee malam  
Jinoe di lon tinggai tuleueng  
Plok umpeuen hana le sajan

Geunap malam lon tho reukeueng  
Peukeu lon kheun Allah Tuhan  
He tuanku ayeuem jaroe  
Nyoe putroe got that sosahan

Sira jicom sira jimoe  
Si nyak putroe ka rab pangsan  
Banta muda neucok putroe  
Neucom bak dhoe neukheun sayang

Bek le sosah he sambinoe  
Tajok kamoe ubak Tuhan  
Bek le po cut tameurawé  
Cut kande bek turot syetan

Meunan neukheun pheuet meuuke  
Seungap ate putroe intan  
Nyang jimoe hana cit reuda  
He meukuta tajak riwang

Peulheueh meusyen bungong jeumpa  
Banta muda neu beurjalan  
Sakti si nyak me rot hawa  
Lam migia keudeh lam awan

Teungoh malam poh dua blah  
Troph sudah lam kuta dalam  
Lam kaso laju jikeubah  
Lam peuratah atueuh tilam

Di jih jiwoe laju leupah  
Deelat syah tinggai di dalam  
Si nyak putroe Seulindang bungsu  
Lam keuleumbu balek-batang

Hana teungeut meusigeutu  
Ate ragu that di dalam  
Lam jingat keu tuanku  
Han jeuet taeu muka hitam

Putroe beudoh teuma laju  
Jitet lampu le jipasang  
Meujeureulah peungeuh le hu  
Deuh meuseuu atueh tilam

Ka mubalot ulee iku  
Ya Tuhanku peue atra nyan  
Si nyak putroe jigrop laju  
Hai soe ro du atueh tilam

Putroe plueng ban saboh leupu  
Ngon jimeusu raya han ban  
Abeh ureueng yoh nyan karu  
Beudoh pra-pru dum dendayang

Poteu raja neuplueng laju  
Peue nyang karu he cut intan  
Teukeujot upah sidadu  
Tajo pra-pru mat seunapang

Jiboh aneuk han jan taeu  
Nyang cok busu mat geuliwang  
Pane ureueng lam keuleumbu  
Jieh sulu atueh tilam

Aleh sit jen aleh hantu  
Jijak du sajan lon tuan  
Poteu raja troh u leupu  
Tanyong laju bak cut intan

Si nyak putroe tunyok laju  
Jeh he abu ateueh tilam  
Hana soe jeuet peurab jak eu  
Kadang hantu jiek beuklam

Teungoh teungoh raja karu  
Bungong meulu balek rijang  
Buka limot Kureh Pari  
Neubeudoh le seumbah tuan

Karong apa deungon wali  
Seureuta umi putroe sajan  
Yoh masa nyan he ya akhi  
Karu kon le 'oh meukeumang

Geupeusijuek ngon khanduri  
Nibak Rabbi meuhajatkan  
Lheueh nibak nyan he puteh di  
Duek meuriti le meureuntang

Si nyak putroe Seulindang siti  
Bak pipi jicom sulotan  
Neupeuampon wahe doli  
Keu siti nyang asoe badan

Lam leumueng jieh putroe ti  
Kureh Pari neukheun sayang  
Raja Lila Kaha Pari  
Neumarit le ngon cut intan

Wahe aneuk idin tabri  
Esok hari lon jak u blang  
Seuot banta Kureh Pari  
He doli neupioh diam

Bahle ngon lon aneuk sawi  
Lon Cuba ci dilee muprang  
Droneu karong deungon wali  
Beureunti neueu peurasan

Lon gade bak kawoh doli  
Bah seukali aneuk muprang  
Hingga keumah meunan janji  
Dum beureunti uleebalang

Yoh masa nyan he ya akhi  
Jimeusu le ngon geundrang prang  
Surak deumpek hana sakri  
Lheueh le beude ngon seunapang

Neubeudoh cut Kureh Pari  
Neupeureugi u padang prang  
Seukalian bandum neume  
Nyang teungku bri dum neupulang

Troh u mideuen bungong giri  
Bak Rabbi neumohon rijang  
Neutiek saboh le malakat  
Ngon siat kuta meureuntang

Muploh lapeh ribee pangkat  
Cukop alat dum di dalam  
Ase beude deungon ubat  
Raja rakyat uleebalang

Jitoh ujeuen teungoh malam  
Cut intan pasoe lam gaca  
Teuhah payong panca logam  
Ngon alam teudong mubanja

Ija teuleueng dum hamparan  
Pulo Josan jadi rupa  
Euncien akek mat u tangan  
Yoh masa nyan banta cinta

Bunoe peungeuh ban saboh nyan  
Jinoe padam safan-safa  
Neutiek tungkat atueuh bumoe  
Jeuet le sungoe luah raya

Iejih tajam hana bagoe  
Miseue apui tutong raya  
Ladom sijuek putoh asoe  
Nyan bagoe bisa lagoina

Keumah ase dum lat-batbat  
Kuta leungkap troh lam hawa  
Bandum raja deungon rakyat  
Siribee peuet nibak bangsa

Kureh Pari han jitupat  
Nyang rakyat hana deuh rupa  
Leumah syukah ngon peukakah  
Hireuen dasyah soe eu rupa

Ureueng nanggroe dong meusiblah  
Teuhah babah tuto hana  
Deungon rakyat di kayangan  
Ngon sulton di antara

Ateueh Kureh bandum pandang  
Eu peurasan Kureh banta  
Hana sidroe teubiet kalam  
Ule guyang banpeuet raja

Si nyak banta Kureh Pari  
Ase jadi asoe kuta  
Teuma neuhei teungku meuntroe  
Tajak keunoe Kilan gata

Meuntroe Kilan ka jipeutoe  
Jicom jaroe raja muda  
Lheueh nyan banta neukheun meunoe  
Tajak kheun proe nibak raja

Bak raja sireutoh peuet ploh  
Keunoe beu troh tayue teuka  
Surat neutiek siat le troh  
Bak musoh sireutoh raja

'Oh ban jieu surat jatoh  
Raja musoh teuma buka  
Ka jiploh buka le rijang  
Di uram sampie abeh ka

Ate saket hana macam  
Geuancam Kureh Keumala  
Nak jituri aneuk agam  
Kujeumeurang jeuoh raya

Putroe kucok jih kureupang  
Lam seupot klam jadeh kuba  
Nyang ka jidrop raja siploh  
Ka jiboh dalam glap buta

Bak sigo nyoe nanggroe runtoh  
Kuparoh ban siseun lingka  
Jime peukakah bansireutoh  
Aneuk lhee ploh ka hu mata

Meuheu wadi deungon bujang  
Uleebalang ngon peutua  
Pahlawan ngon panglima prang  
Rakyat sajan muploh laksa

Peukeumah droe ikat pinggang  
Cok seunapang reugam cokma  
Beudoh antri panglima prang  
Rakyat sajan han teukira

Leupah rame he teungku beh  
Nyan plueng jeuoh ka jigisa  
Nyang ka talo raja nam ploh  
Yoh nyan jibloh rimba raya

Cukop rakyat ngon pahlawan  
Ka u badan alat ngaza  
Cok busu bleuet ngon geuliwang  
Cokma panyang ube-be pha

Ka jipeh deungon bonyian  
Hareudam deungon biula  
Jicok langkah dum sulotan  
Beurjalan rot padang raya

Rioh rame hana macam  
Jikoh padang uteuen rimba  
Trok u mideuen bak padang prang  
Leumah alam jieu rupa

Jiek laju ban boh sungkam  
Kiri kanan hiro hana  
Kureh Pari ban neupandang  
Ka datang raja ceulaka

Kilat bumoe banta reugam  
Teuma malam laju teuka  
Dalam uroe teuka malam  
Cut intan neugisa-gisa

Dumna raja sosah han ban  
Seubab malam seupot buta  
Bunoe peungeuh sigom alam  
Jinoe ka klam han leumah nyata

Lom ngon sungoe di hadapan  
Iejih tajam sang boh lila  
Rakyat le that peunoh padang  
Gohlom muprang sosah teuka

Ban sireutoh leumah undang  
Jihei rijang guree teuma  
Trok le keunan deungon rijang  
U hadapan aneuk raja

Jipeugah le dum jipeutrang  
Atoran prang jicalitra  
Kala Diwa nyang analan  
Dua sajan deungon raja

Jen meuree-ree lom ka sajan  
Lhee droe gop nyan nyang that pinta  
Sidroe jipet sidroe jibleut  
Lahe sifeuet meulaen ka

Peungeuh bandrang seupot-seupeuet  
Teuma lom jeuet saboh kuta  
Dalam padang Indra Syareh  
Dum meuseupeh Kuta Mara

Ngon manyang that tanggoe keudeh  
Leusoh abeh u antara  
Lam kutanyan rakyat peunoh  
Sakti gadoh peungeuh teuka

Gambo-gambo uroe suboh  
Jiekpi jroh muploh laksa  
Miseue gunong sama teungoh  
Padang peunoh troh lam rimba

Meusu beudeh lheueh meuriam  
Na nyum karam laen donya  
Na dua jeuem timang pasang  
Rotnoe rotnan sama-sama

Mate rusak han soe tuban  
Allah Tuhan sidroe kira  
Kureh kalon prang that guncang  
Saktian saboh neucinta

Neucok busu mat u tangan  
U manyang neupeulheueh lanja  
Teuka reudok ngon geulanteue  
Ujeuenpi kreueh nibak nyang ka

Lam ujeuen nyan rakyat peunoh  
Han soe tu'oh le lagoina  
Jimuprang meuseunoh-seunoh  
Teuka leumoh hana beda

Han jituri seupot beungoh  
Taeu jipoh rakyat raja  
Bangke teutiek seupot tanoh  
Jiprang beungoh nyang that raya

Tantra Kureh jen sinaroe  
Ureeng nanggroe kalon saja  
Teuduek dilee he teungku droe  
Lon hareutoe si nyak banta

Ban neukalon meunan bagoe  
Siblah jaroe neuteupok pha  
Na sikeujap teuma dudoe  
Angen sampoel laju teuka

Tajam bacut nibak beusoe  
Jitampoe seugala rupa  
Lam angen nyan rakyat peunoh  
Jen siteungoh deungon diwa

Cokma apui bandum alat  
Ngon teuga that hana tara  
Keudeh keunoe jipoh rakyat  
Ho jirapat peungeuh donya

Lom jibeudoh Keulabon Syah  
Ngon Juhan Syah sigo dua  
Lam tantra jilalo leupah  
Ngon juah sang rimueng bangka

Lungke tujoh lhee jiasah  
Lam babah apui meunyala  
Lam kawan jitamong pantah  
Jiheumpah rakyat meulaksa

Dum rakyat jen gadoh ilah  
Mate reubah le lagoina  
Rakyat Kureh bandum ugah  
That juah guree raja kra

Banta kalon meunan ulah  
Sakti leupah raja raya  
Neupeugot saboh hekeumat  
Teuka asap seupot mata

Saboh tungkat neupeulinteueng  
Jeuet ie paseueng dalam rimba  
Dalam ie nyan seudong biram  
Kala peusan dum mareuga

Bandum jipo dalam awan  
Jilet jicang musoh teuka  
Banta neubueut lom hekeumat  
Gaduh leugat Kurek raja

Neupoh rakyat dum teureuban  
Meutimphan mate meulaksa  
Guree raja abeh neudrop  
Neulungkop lam seupot buta

Limong ploh treuk raja tinggai  
Laen le jai abeh teuka  
Bandum neudrop nyan seunagai  
Lam kawan jai neusoh lanja

Sakti raja deungon guree  
Abeh paddee dum seugala  
Raja limong plueng jilayak  
Ka jijak bak saboh rimba

Limong ribee tinggai rakyat  
Laen sahabat ka binasa  
Teuma pioh musyawarat  
Pakri mangat he syeedara

Got tataklok ubak Kureh  
Meuhan abeh ube nyang na  
Geutanyoe rugoe rakyat abeh  
Buet meulanggeh salah raya

Seuot raja Biram Umbak  
Ngon Bahrom Gak sigo dua  
Bak lon nyang got meunoe padan  
Na pahlawan sidroe teuка

Nama geukheun Tokpang Sandang  
Beuhe tungang hana tara  
Tuah jalak keunong taki  
Kureh Pari lawan padra

Dalam Nanggroe Mideuen Tufah  
That meugah seugala donya  
Jinoe nyang got tapeuupah  
Sang jilangkah bak lon kira

Meunyo meunan hai tapeugah  
Cuba langkah jak peunyata  
Jibeudoh sidroe peureugi  
Jilari teureubang lanja

Teuduek dilee saboh rawi  
Kureh Pari lon calitra  
Gadoh musoh seungap bunyi  
Kureh Pari leumah nyata

Dalam kubah bak meuligoe  
Ngon rakyat droe balatantra  
Beursukaan malam uroe  
Ngon rakyat nyoe dan panglima

Aneuk pari meuen tangkeh  
Cut Kureh suroh keurija  
Dalam mideuen Padang Syareh  
Hitam puteh alam rata

Teuduek dilee banta Kureh  
Nyang got keudeh lon calitra  
Na dua jeuem jiteureubang  
Troph datang u nanggroe raja

Meurumpok le Tokpang Sandang  
Dalam padang Samon Kaha  
Mubri saleuem ngon horeumat  
Jimumat-mat jaroe dua

Hingga pioh duek bak teumpat  
Peugah leugat buettan raja  
Teuma jipeugah yue tulong droe  
Dum sinaroe jicalitra

Dum buet malee tuntut putroe  
Hareutoe ujung ngon punca  
Abeh bandum jihareutoe  
Akhe dudoe dum seumua

Kehai upahpi jipeugah  
Dan peunayah rugoe laba  
Meunyo tengku gaseh limpah  
Neumeulangkah sigo teuka

Tokpang seuot insya Allah  
Ngon afuwah guree hamba  
Ngon siri prang raya leupah  
Cuba peugah kudeungo nyata

Trok bak sare tapeuupah  
Goh peureunah dilee nyang ka  
Jiseuot le teuma pantah  
Jipeugah gura lagoina

Nama raja Kureh Pari  
Hana sakri beuhe raya  
Lagi utoh ngon beurani  
Le that sakti hana ngon sa

Tantra raja abeh lari  
Ka u pasi rimba raya  
Nyang mate han ek takheun kri  
Leubeh lagi ribee laksa

Meunan peuneugah dum jirawe  
Mula ngon akhe dum peukara  
Tokpang deungo Kureh Pari  
Ate negeri dalam dada

Tokpang marit teuma meunoe  
Pat nanggroe nyoe si nyak teuka  
Dileepi ka masa sinoe  
Rab mupaloe deungon hamba

Asai mula jituen putroe  
Sambinoe Beureuhi nama  
Raja yue prang teuma dudoe  
Trok sidroe teuka eelia

Adat kon na Tamim Ebni  
Prang ka jadi deungon hamba  
Sinoe han jeuet lon peugah kri  
Roh bak pakri tameudawa

Nyang got jinoe uleh kaman  
Tabeurjalan jak udehta  
Cukop ase ngon pakaian  
Teureubang laju bandua

Na limong jeuem jiteureubang  
Trok datang u teungoh rimba  
'Oh troh **keunan** geutren riang  
Sembah Tokpang ubak raja

'Oh sare lheueh minom makan  
Haba prang meututo lanja  
Hai peukara sekalian  
Beungoh malam uroe hingga

'Oh lheueh ase seukalian  
Hingga malam abeh haba  
Teuma raja hajat muprang  
Sebab Tokpang ka troh teuka

Beudoh raja dum sibarang  
Limong ploh nyan raya raya  
Nyang waki tandi ngon bujang  
Panglima prang ngon peutua

Lom di rakyat guda kandran  
Ngon alam limong ploh rupa  
Meugrak tantra dum angkatan  
Jak u padang Syareh Indra

Nyang jak di keue Tokpang Sandang  
Di beulkang aneuk raja  
'Oh ban sare troh u padang  
Peudong alam pioh rata

Seurune bangsi deungon gambang  
Lom hareudam ngon biula  
Ngon pupanji mirah hitam  
Ngon alam mubangsa-bangsa

Maseng surat cap bak alam  
Tokpang Sandang jiboh nama  
Hingga troh u teungoh padang  
Teudong alam dum mubanja

Teuma jipeh ngon bunyian  
Han sapeue tan meusuara  
Abeh tambo deungon geundrang  
Abeh canang ngon nukara

Teuduek raja pioh di blang  
Limong ploh nyan aneuk raja  
Banta Kureh deuh neupandang  
Pang Sandang nama bandera

Si nyak banta cinta rijang  
Neupeusan Ismu Bahana  
Abeh neubeuet isem 'adimi  
Neutatang bumi neugisa-gisa

Neubet tapak banta intan  
Teubiet sinan saboh rupa  
Han soe tu'oh peuseuladan  
Ngon badan hana soe peusa

Idong dua troh u gaki  
Ngon bibi luheh bandua  
Ngon mata hijo han sakri  
Ngon gusi leubeh u lua

Ngon boh kreh na ube guni  
Ube guci aneuks mata  
Sineuk pualam sineuk pudoe  
Deungon jaroe le lagoina

Ngon geulunyuengpi meusigak  
Deungon tapak na lhee deupa  
Nyang siblah meuh siblah pirak  
Ngon tangkurak tujoh cula

Nyang that gura watee jijak  
Meusipák-sipak meulumba-lumba  
'Oh jidong lagee gunong gak  
Teukeupak soe kalon rupa

Kureh Pari neumeukalam  
Meuntroe Kilan keunoe gata  
Nyoepat taba nyan peurasan  
Ba u padang keudeh lanja

Taboh di keue keu umpeuen jang  
Lagee nyan di gop ka teuka  
Di gatapi meunan ragam  
Ban reusam taturot saja

Beudoh bek trep laju tajam  
Tabeurjalan nyan u lua  
Jicok deungon pileh rakan  
Meuntroe jalan deungon lanja

Seureuta jipeh bunyi-bunyian  
Tambo geundrang meusuara  
Peulheueh di keue nyan sipulan  
Nyang peurasan bri le raja

Geujak laju geubeurjalan  
Rab geumakan aneuk lila  
'Oh jideungo meusu geundrang  
That guransang hana tara

Beudoh laju Tokpang Sandang  
Dum beurjalan meugrak tantra  
Jak dilikot uleebalang  
Dum sibarang raja raja

Tokpang Sandang jak di likot  
Bak geujalok troh ban pinta  
Han geutupeue payah geujak  
Apon tapak bak jigisa

Tokpang Sandang le meurantak  
Sira likak meujuara  
Na katuri manok jalak  
Kuantan pirak puteh mata

Jeuet ba sigo keunoe tajak  
Nyoe jalak manok kuneng pha<sup>\*</sup>  
Kuantan tuah dalam utak  
Bireng masak tuah lam mata

Pang Sandang peudeueng lam sigak  
Ka jikacak pura-pura  
Ngon atra nyan le meurumpak  
Nyang meusigak hebat rupa

Rakyat teudong rotdeh rotnoe  
Geukalon proe ureueng dua  
Hana muprang dum geuiem droe  
Kalon ujoe dilee mula

Tokpang Sandang sapa le nyan  
Atra nyan jaweueb le lanja  
Lheueh neupohjih bak seuot nyan  
Keunong Tokpang reubah lanja

Ka mubalek le seulinteueng  
Ka meuglueng-glueng Pang ceulaka  
Hirup nafah si aneuk nyan  
Ka roh Tokpang lam idong raya

Jikandong le deungon nafah  
Jipeugah bak raja muda  
Tokpang ka roh lam idong lon  
Seukalian peudeueng cokma

Teuma seuot Kureh Pari  
Kabuni dalam rahsia  
Raja limong ploh jikalon hi  
Atejih gli jimeung guda

Neumeutitah Kureh Pari  
Beudoh antri teungku raja  
Jibeudoh sama seukali  
Atra nyandi sama juga

Dum jisujud ubak gaki  
Ya saidi ampon meukuta  
Ban limong ploh hana lari  
Seumbah gaki Kureh banta

Dum seugala ham ba ini  
Seumbah gaki akan paduka  
Lon junjong seumbah ya saidi  
Seukali neuamponi deesya

Barang salah dilee lari  
Nya kami hamba paduka  
Lon seurah keupada doli  
Lom neugri hukom meukuta

Ho neusuroh kamoe langkah  
Beuthat payah han lon kira  
Teuma seot banta indah  
Han le salah nibak ham ba

Bak ulon hana le salah  
Bak Po tallah han troh duga  
Nibak ulon ampon meu'ah  
Tan u be drah le meudeesya

Si nyak banta le meulangkah  
Seureuta syah aneuk raja  
Banlimong ploh aneuk basyah  
Beudoh langkah sare rata

Ka neuwoe u meuligoe sakti  
Neuyue bri makanan dumna  
Raja raja dum barangri  
Maseng bagi atueuh kada

Meuntroe Kilan bri mufeuti  
Bak keurusi duek seugala  
Hingga sudah minom makan  
Dum sulotan mohon gisa

Lakee idin nibak juhan  
Jibet sajan jaroe dua  
Seuot banta neukheun nyoe ban  
Idin tuan jeuet tagisa

Lon harap bak gata rakan  
'Oh lon peusan beu troh teuka  
Insya Allah deelat makam  
Di yup kidam harap mulia

Si nyak banta bri salenan  
Keu raya nyan maseng kada  
Bandum neu bri sileungkapan  
Dum sulotan ate suka

Teuma jiwoe dum beurangkat  
Ka seulamat nibak mara  
Tuhan neubri troh u teumpat  
Beureukat Kureh Keumala

Maseng-maseng woe bak zeejah  
Nyang ka sudah han meugisa  
Haba nyoe hana le kisah  
Ka sudah abeh peukara

Si nyak banta rupa cidah  
Teutap dasyah lam istana  
Jinoe laen ulon kisah  
Keu ayah Kureh Keumala

'Oh ka talo musoh sudah  
Banta indah woe lam kuta  
Deungon rakyat dum barollah  
Nyang meugah seugala tantra

Troh lam kuta tamong sudah  
Mangat leupah ate raja  
Pioh rakyat dum jumeulah  
Rame leupah dalam lua

Nyang mupangkat Kilan Asyek  
Ceureudek hana saboh sa  
Seugala hai dum neusidek  
Bek mubalek roh meu tuka

Di banta ngon putoe cantek  
Nyang baek keumbang Ierupa  
Deungon ie on geupeureutek  
Bungong rubek uleh maja

'Oh lheueh banta teuma rakyat  
Seulamat bak musoh dumna  
Geupusunteng ngon bu leukat  
Ban adat nibak raja raja

Maseng-maseng woe u teumpat  
Cut ngon rakyat sama juga  
Dum panglima jiek pangkat  
Ban babat meuntroe bentara

Teutap nanggroe keuseunangan  
Sapeuepi tan teuka bala  
Dum syeedara ate seunang  
Lam nanggroe nyan maniaga

Nanggroe rame peukan makmu  
Meusyeuhu seugala donya  
Ureueng teuka barat timu  
Kapai lalu muploh laksa

Lila Ahmad ate seuu  
'Oh neueu Kureh Keumala  
Di istana dalam leupu  
Cut meulu ngon raja muda

Mangat ate kon sigeutu  
Di tuanku leubeh raya  
Nyang cut intan abeh laku  
Meusigeutu jarak hana

Han jeuet jarak meusigeutu  
Ngon tuanku pupueh asa  
Ma cut putroe galak ate  
Kureh Pari gaseh raya

Wahe aneuk tangke ate  
Ka meusampe bijeh mata  
Wahe e ma bek sosah le  
Troph janji Tuhan karonya

Ngon beureukat nama umi  
Allah bri ngon do'a bapa  
Ngon tulong Tuhanku Rabbi  
Ngon umi meuteumeung mata

Seureuta ngon do'a doli  
Grak Ilahi wahe cut ma  
Keudeh keunoe pujoe-muji  
Teukhem cut ti galak raya

Meucom meuwa bandua si  
Beureuhi leubeh bak nyang ka  
Akhe teuma padum lawi  
Teukeudi Allah Ta'ala

Bandum ureueng hate dasyah  
Galak leupah asoe donya  
Pade adang leuntek karah  
Nyang that cidah pade aka

Pala idang breuehjih mirah  
Nyang cidah raden keusumba  
Bak siuroe banta indah  
Ate sosah dalam dada

Teuingat keu teungku ayah  
Bandua sah deungon cut ma  
Lakee idin nibak tuan  
Bak sulton Ahmad Lila

Nibak putroe neumeukalam  
He intan deungo kakanda  
Ate ulon sang ka leukang  
Geunap malam teungeut hana

Wahe po cut nyawong badan  
Idin intan siklep mata  
Lon jak saweue ayah laman  
Aleh peue ban deungon cut ma

Meunan neukheun deelat makam  
Cut beurlian tahe raya  
Si nyak putroe seuot rijang  
He sulton po meukuta

Meunyo meunan deelat makam  
Udeh rijang bak ayahda  
Si nyak banta beudoh rijang  
Trok u hadapan raja Lila

Ngon putroe dua sikarang  
Bungong trang meusapat dua  
Seumbah ayah beuet jaroe  
Neukheun meunoe banta muda

Wahe ayah payong nanggroe  
Aneukteu nyoe siat bungka  
Nyoe leupeuepat si nyak putroe  
Ulon nyoe jarak di tangga

Meuna umu hana paloe  
Uroe dudoe troh lon teuka  
Hajat saweue ma lon putroe  
Bandua droe ngon ayahda

Sebab ulon trep ka jameun  
Tinggai mideuen deungon kuta  
Jinoe hajat lon woe siseun  
Nyan cut buleuen bak ayahda

Meunan kalam Kureh neukheun  
Tahe hireuen poteu raja  
Lila Ahmad seuot dudoe  
Ngo... bunda droe sigo dua

Bek takeubah si nyak putroe  
Sajan kamoe gata hana  
Leubeh seunang got sajan droe  
Malam uroe dalam jaga

Lon takot that teuka paloe  
Lupot kamoe ureueng tuha  
Bahle taba si nyak putroe  
Meuna soe taguen bu gata

Pat nyang salah tapeurunoe  
Harap kamoe dum seumata  
'Oh saket tabri thee keunoe  
Meujak kamoe saweue gata

Bak lon aneuk meunan pike  
Boh ate pike bak gata  
Lon tasaweue 'oh watee cre  
Kadang mate lon ka tuha

Beu le aneuk enseueh ate  
Sirungke gata bandua  
Kureh seuot kalam ayah  
Lon keubah ateuah jeumala

Harap ulon keu Po tallah  
Lon keu ayah hana lupa  
Meunyo meunan insya Allah  
Singoh leupah ulon bungka

Teuma seuot tuan putroe  
Nyang cut ma droe si nyak banta  
Lon meutanggoh meusiuroe  
Di kamoe gohlom ase na

Nyoe lon peugah bunda putroe  
Seureuta nyoe raja Lila  
Yue peuase dum makanan  
Peunajoh nyan aneuk bungka

Ase keumah sileungkapan  
Dumna rakan meungui sigra  
Na limong ploh droe dendayang  
Laen teuma sianeka

Si nyak putroe ase leungkap  
Ka lheueh alat bak angeeta  
Teuma raja Lila Ahmad  
Kheun bak rakyat tuha muda

Ubak meuntroe Kilan Asyek

Nyang lisek akai bicara

Neuyue intat banta cantek

'Oh tasek beuladeh rimba

Teuma beudoh meuntroe Kilan

Ngon rakan raja panglima

Meuntroe wadi troh u hadapan

Laen nibak nyan dum bentara

Dum seugala ngon peurasan

Ngon meuriam ube-be raya

Ladom tambo deungon geundrang

Ngon hareudam dan biula

Gajah guda dum geupasang

Meurumpan teudong mubanja

Meugeupreh tren Kureh Pari

Ngon cut ti putroe got rupa

Putroe teungoh meusyen umi

Lom lagi deungon ayahda

Yoh masa nyan Kureh Pari

Cut ahli neupeugot rupa

Bak pha uneun teupok seukali

Raueh jadi jalan guda

Jeuet tajak woe miseue jalan

Peungeuh bandrang pulo raya

Ban limong ploh troh u hadapan

Deungon angkatan balatantra

Limong ploh droe raja ka troh

U kawoh Kureh Keumala

Bri makanan ngon peunajoh

Ureueng jeuoh that mulia

Raja Ahmad nyang peujamee

Ngon meulintee sajan juga

Bukon sayang cicem pala  
Jipo dua baranggajan  
Neumarit le Kureh Keumala  
Lon kugisa wahe teelan

Teuma neutren banta muda  
Putroe sama nyang bangsawan  
Seumbah-meunyeumbah ngon ayahda  
Lom ngon po ma putroe intan

Troh u tanoh putroe muda  
Dum seugala su meuriam  
Keumang kayong reum boe sutra  
Raja guda beuh geuritan

Raja ngon putroe sapat dua  
Bak rungka keumala juhan  
Ireng rakyat dum seugala  
Laju safara taloe jalan

Han tatupeue peugah rupa  
Bagoe rasa kiamat sang  
Abeh gampong mideuen raja  
U kuala laju datang

Troh u pasi dum seugala  
Peiduek banta putroe sajan  
Di sinan peurasan raya  
Apet raja meuntroe Kilan

Simalam uroe di pasi  
Kuren Pari neukheun nyoe ban  
Bandum jinoe woe keumbali  
Bek le lanti lon beurjalan

Di lon kujak taloe pasi  
Meuneubri idin le Tuhan  
Beudoh bandum agam inong  
Saleuem sambong ngon cut intan

Ngon cut banta meunan bangon  
Lheueh nyan bandum beudoh riwang  
Seureuta po ma bunda po ti  
Woe keumbali seukalian

Abeh rakyat woe keumbali  
Kureh Pari lon peugah ban  
Teuma neukheun bak putroe ti  
Lon peureugi siat keunan

Bak du seubot dilee lawi  
Masa kami keunoe datang  
Seuot si nyak tuan putroe  
Sajan kamoe he sultonan

Ho nyang neujak tuanku droe  
Sajan kamoe meuikotan  
Bandua laju jak sama  
Sampoe teuma ubak ladang

Ubak keubon Leube Dayah  
Laju langkah banta intan  
U rumoh le neukek bagah  
Pinto teuhah ureuengpi tan

Leube Dayah dalam tika  
That nadeu'a hana macam  
Ban leumah Kureh Keumala  
Meusuara bacut sajan

Teuma meusu Leube Dayah  
Jeh keuneubah lon he intan  
Cok pusaka dum keuneubah  
He cut indah taba sajan

Lheueh nyan mate Leube Dayah  
Tanom bagah banta seudang  
Banta neutren bak teumpat nyan  
Beudoh sinan neu beurjalan

Troh u pasi uleebalang  
Neiduek sinan lhee meunet jam  
'Oh nan abeh haba banta  
Tan calitra le he intan

\*\*\*

## XII. JEUET KEU RAJA NANGGROE ANTA PEURDANI

Boh pisang klat lam ceurana  
Bungong jeumpa ubat tai  
Lon kisah Kureh Keumala  
Neucinta Keumala Janggi

Troh le deungon sikutika  
Ubak raja Kureh Pari  
Na kadeungo he raja guda  
Kilat Faja keu lon kabri

Ulonteu nyoe heundak gisa  
Ubak nisa Nuron Beureuhi  
Ban jideungo raja guda  
Deumpuk raya Keumala Janggi

Teubiet asap dum meubura  
Kilat Faja le teurjali  
Teudong laju sapat dua  
Neuek banta ngon putroe ti

Ateueh Janggi dua sama  
Kilat Faja bawa nasi  
Ban sare troh banta pasang  
Teureubang Keumala Janggi

Lam antara le meulayang  
Meurang-rang tadengo bunyi  
Han padum trep jiteureubang  
Troh datang pulo Baduri

Jisujud le guda indah  
Droejih reundah ubak bumi  
Banta neutren neumeulangkah  
U meunasah le neutiti

Sinan pioh banta muda  
Burong Diwata le peureugi  
Peurab laju ubak banta  
Jiseumapa burong nuri

Ampon tuanku po meukuta  
Sayuep dua lon bet tinggi  
Di tuanku ka na dua  
Plok kahwa seureubab wangi

Ka teukhem Kureh Keumala  
Neudeungo haba cicem nuri  
Teuma marit raja muda  
Bak Diwata le neukheun kri

Takheun ulon ka troh gisa  
Sajan lon ba bungong giri  
Meunan takheun po jroh rupa  
Beudoh sigra burong nuri

Keudeh ka troh siklep mata  
Lam kuta Nuron Beureuhi  
Ban neukalon cicem teuka  
Tanyong sigra putroe siti

Peue habaran keunoe kaba  
Lon eu gata that beureuhi  
Jiseuot le burong Diwata  
Sayuep dua jibet tinggi

Ampon po cut bungong jeumpa  
Ka troh gisa Kureh Pari  
Deungon putroe sajan neuba  
Elok rupa hana sakri

Nyang jeuet ulon keunoe teuka  
Suroh raja hamba ini  
Neuyue peugah ubak gata  
Seureuta bak raja doli

Ban putroe deungo kawoe banta  
Neuplueng lanja ubak umi  
Galak ate bungong jeumpa  
Khem be raya troh bak abi

Jidong di keue bunda ayah  
Jiseumbah bak teuot gaki  
Raja tanyong teuma bagah  
Peue na sosah jantong ate

Jiseuot le putroe cidah  
Ubak ayah le jikheun kri  
Ka woe tupon lon deungo gah  
Jipeugah le burong nuri

Sajan neuba putroe indah  
Jinoe dasyah di Baduri  
Sijak nyoe ban troh jipeugah  
Kon beurakah wahe abi

Ban raja deungo meunan ulah  
Ka beuna sah wahe nyak ti  
Hana buhong teungku ayah  
Ban peuneugah burong nuri

Han tom sigo jimeusulet  
Han tom siblet jimeucakri  
Ban jipeugah beutoi sabet  
Kon <sup>1</sup>sulet jijak rawi

Ban raja deungo meunan kalam  
Sulotan abeh neusudi  
Raja deungo haba bintang  
Beudoh rijang raja doli

Meuhei tandi deungon bujang  
Dum sibarang meuntroe wadi  
Troh le keunan dum sibarang  
Ngadap rijang raja doli

Ngon jaroe beuet meulayang  
Seumbah tuan raja neugri  
Keupeue tuanku lon neupangge  
Pat meuseke nanggroe siri

Neumeusabda Kaha Zaman  
Kon meunan he meuntroe wadi  
Lon meuhei gata bandum nyan  
Ampeueng tuan Kureh Pari

Taba rakyat ngon angkatan  
Laen nibak nyan guda taji  
Seubab putroe jiba sajan  
He tuan mulia tabri

Beu na deungon lom peurasan  
Rukon geundrang ngon napiri  
Taba usong nyang beusaran  
Bak duek intan putroe siti

Meunan neukheun le sulotan  
Seukalian jibeurdiri  
Ase deungon dum angkatan  
Ngon peurasan mula mari

Teubiet bandum seukalian  
Dong meureuntang santeut gaki  
Ladom gadoh bak peurasan  
Nyang pilehan ureueng meuri

Bunda putroe lom meuase  
Ngon bate ka siap isi  
Inong bandum sabé sabé  
Hu meugule gleueng di gaki

Ngon putroe cut lingka sabé  
Hanatom cre kanan kiri  
Bandum teubiet seukalian  
Inong agam jak meuriti

Tadeungo rioh su peurasan  
Geujak tajam hana lanti  
Hingga troh keudeh u padang  
Bak pulo Taman Baduri

Maken lom kubra han macam  
Di hadapan Kureh Pari  
Banta kalon meunan macam  
Beudoh intan deungon siti

Cut putroe Lindang Deulima  
Tajo lanja bak suami  
Com di ubon peumulia  
Allah raja ampon dek ti

Nuron Beureuhi beudoh sigra  
Cut Deulima com di pipi  
Hana beungeh masam muka  
Bandua rindu seukali

Teuma lheueh nyan beudoh ibu  
Neucom laju bandua si  
'Oh lheueh nyan geupuwoe laju  
Ngon madu Nuron Beureuhi

U juree geupeukek laju  
U leupu dalam meuligi  
Geubri teumpat ban nyang laku  
Cut meulu Nuron Beureuhi

Ban seulingka dum dendayang  
Mata mandang bak cut ahli  
Duek meusapat dum meureuntang  
Cut intan suka seukali

Lale di gop bak peurasan  
Lale tuan deungon nuri  
Di meuligoe duek poh rantam  
Neumakan sirih si nyak bri

Na sikeujap teuka idang  
U hadapan Kureh Pari  
Putroe makeuen banlhee sajan  
Kiri kanan bintang pari

Hikayat nyoe lon peurijang  
Bek that panyang gura han le  
Cut putroe leubeh that deundam  
Ngon sulton ban keumbali

Hingga uroepi ka malam  
Peurasan hana le bunyi  
Ka seungap gong ngon hareudam  
Han le geundrang ngon napiri

Hana le su macam-macam  
Maseng tuan woe keumbali  
Beudoh putroe jak tidoran  
Lhee sajan neulop lam puri

Wie ngon uneun si nyak putroe  
Ceupet asoe **amp**on doli  
Cut Deulima ate dukhoe  
Ngon adoe Nuron Beureuhi

Cukeh-mukeh keudeh keunoe  
Bandua droe rindu kon le  
Hana beungeh masam muka  
Neumeuseunda dalam puri

Keudeh keunoe neumuwa-wa  
Meupula ateueh syah doli  
Gatai asoe putroe muda  
Khem meubura ngon adek ti

Banlhee gop nyan teungeut hana  
Cut banta meuen keumidi  
Sigo saho neupeugisa  
Broek biula **ne**upeunari

'Oh lheueh adek teuma cut da  
Ek neudura di syah doli  
Bek jeuet beungeh 'oh tee jaga  
Timang raya neupadoli

Bandua cut ate suka  
Hana dawa meuseukali  
Nyankeu sebab po samlakoe  
Siat apo bri khanduri

Bak malam nyan bek lon peugah  
Meurinyah bandua bate  
Di bantapi cukop reuah  
Meuhah-meuhah troh lam ate

Banlhee gop nyan sama reubah  
Han le nafah sang ka mate  
Beungoh uroe faja gajah  
Jaga pantah ban sirungke

Neutren ampon le bantiga  
Neujak upa aneuk beude  
Di cut ampon sigo dua  
Ngon kruet tuha neusrah bate

'Oh lheueh suci han le leuta  
U istana neukeumbali  
Banlhee sigo raja muda  
Rumeh raya teukhem sabe

Bak keurusi ateuah tahta  
Bantiga neuduek meurungke  
Na sikeujap idang teuka  
Raja muda neumakeuen le

Meukhem meukhak meuen seunda  
Bandua peuturot ate  
Han tom neujak meuulua  
Gadob raya meuen sabe

Mangat asoe aneuk raja

Dua-dua hana tom cre

Cit makanan lale raya

Ibu bapa han ingat le

Bak siuroe Tuhan kada

Si nyak banta leumah pike

Ingat nanggroe ayah bunda

Lam dada meurawe-rawe

Neumeututo ngon adekda

Bandua sinan meurungke

Wahe adek cahya mata

Adekda boh jantong ate

Idin keu lon he cut putroe

Lon woe u nanggroe saweue umi

Lon jak kalon ayah kamoe

He putroe aleh cit pakri

Nyankeu narit he sambinoe

Uroe nyoe hajat peureugi

Ban putroe deungo meunan haba

He meukuta neuba dek ti

Ulon tuan sajan neuba

He raja rela that ate

Meunan neukheun putroe muda

Si nyak banta neuseuot le

Meunyo meunan he adekda

Bak ayahda jak peugah kri

Meunan neukheun raja muda

Beudoh lanja jipeureugi

Bandua sigo ngon banta

Bak raja ayah si nyak ti

'Oh troh ubak poteu raja

Bandua neuseumbah doli

Lheueh nyan dudoe seumbah bunda  
Seureuta Nuron Beureuhi  
Raja tanyong teuma meunoe  
He aneuk droe ho peureugi

Lon eu dua tajak keunoe  
Peue talumpoe he boh ate  
Seuot banta nyang got rupa  
Jaroe dua neubet tinggi

Deelat ampon nyang ayahda  
Kon rahsia lon he doli  
Hajat ulon keumeung gisa  
Bak ayahda woe u neugri

Seubab ulon trep lam bungka  
Ayah cut ma aleh pakri  
Nyankeu hajat po meukuta  
Putroe muda tinggai sini

Meuna umu rijang gisa  
Meunyo hana ulon mate  
Meunan neukheun Kureh Keumala  
Zaman Kaha neuseuot le

Meunyo aneuk tameung gisa  
Putroe muda han jeuet tacre  
Bek takeubah sajan hamba  
Akhe masa sret bak cre-bre

Ka lon idin bijeh mata  
Bandua ngon jantong ate  
Beu seulamat troh ban pinta  
Barang bala bek keunong le

Wahe aneuk bungong geutoe  
Jak tajak woe saweue umi  
Meuna umu uroe dudoe  
Saweue kamoe e boh ate

Meunan neukheun raja nanggroe  
Beudoh putroe woe keumbali  
'Oh sare troh u meuligoe  
Peukeumah droe ampon doli

Dum beukalan ka seuleusoe  
Hana adoe panyang rawi  
Got bak watee reumbang uroe  
Samlakoe guda neupangge

Troh keunan Janggi Keumala  
U keue raja sit teudong le  
Banta peugah teuma sigra  
He seutia guda Janggi

Lon uroe nyoe heundak gisa  
Bak ayahda saweue umi  
Tameuhei si Kilat Faja  
Beu troh teuka dalam jeuem ini

Ban jideungo raja guda  
Kilat Faja laju jise  
Deungon siat ka troh teuka  
Kureh banta neumarit le

Wahe guda Faja Kilat  
Nyoe lat-batat gata me le  
Si nyak banta neubet tungkat  
Teuka rakyat han meudum le

Puteh-puteh bungong riwat  
Ateueh jeurat timoh langa  
Neumeutu to pirak lipat  
Deungon rakyat nyan ban teuka

Lon uroe nyoe kubeurangkat  
Woe u teumpat bak ayahda  
Gata bandum tajak intat  
Jangan teulat satu apa

Ngon peurasan beu got cakap  
He rakyat jadeph lon bungka  
Ban jideungo sabda deelat  
Bandum rakyat ate suka

Hingga teuma haba nyang toe  
Samlakoe beudoh neubungka  
Ateueh Janggi neukek lhee droe  
Dua putroe sidroe raja

Neucok langkah po samlakoe  
Seugala syoe meusuara  
Rot lam awan neuteureubang  
Neupasang Janggi Keumala

Banlhee droe sinan neupasang  
Nyang me beuban kilat faja  
Geujak laju rot lam awan  
Meucrang-crang lam awan miga

Jimeusu geundrang ngon canang  
Di manyang nanggroe lam hawa  
Saboh bangon pula pisang  
Saboh macam peh nukara

Nyang jak di keue uleebalang  
Di likot nyan dum panglima  
Blah rot uneum meuntroe bujang  
Rot wie teuman dum bentara

Tujoh uroe tujoh malam  
Troph datang u nanggroe raja  
Geutron laju keunan curam  
Ngon angkatan balatantra

Hingga troh bak ulee peukan  
Pioh sinan siklep mata  
Ureueng sinan deuh jipandang  
Jiplueng rijang dalam kuta

'Oh troh keudeh bak sulton  
Jibet manyang jaroe dua  
Deelat ampon raja doli  
Kureh Pari ka neugisa

Ban raja deungo jipeugah kri  
Tan seukali buhong gata  
Ampon deelat payong neugri  
Tan seukali lon doseuta

Ban raja deungo meunan bagoe  
Bak putroe neuyue bri haba  
Yoh masa nyan wahe adoe  
Karu tuloe dalam kuta

Poteu raja mumang keudroe  
Tuan putroepi rab gila  
Peue nyang mumat lheueh bak jaroe  
Lam-lam sagoe ka neuraba

Neupreh dilee tuanku droe  
Lam nanggroe jiek ie raya  
Jeh di putroe pungo keudroe  
Ka mupok dhoe deungon bara

Hingga teuma haba nyang toe  
Raja putroe keumah lanja  
Neubeudoh le bandua droe  
Sinaroe rakyat panglima

Jak meuhudom seupot nanggroe  
Jikiloe tambo nukara  
Juhan Ali teubiet rijang  
Ngon guda plang neupohlawa

Di putroe gajah balohan  
Bak tangan bate ceurana  
Sinoe geujak sideh geujak  
Meurumpak di pinto kuta

Ngon peurasan leubeh gunjak

Dua pihak ngon meutaga

Kureh Pari po samlakoe

Neueu sampoe ayah ngon ma

Ka neupeugah bak judo droe

He putroe ka troh ayahda

Ban neudeungo meunan bagoe

Banlhee droe tren di cong guda

Nyang rotdehpi meunan bagoe

Buet putroe Lela Sikanda

Meuteumeung le rotdeh rotnoe

Tuan putroe neucom neuwa

Kureh Pari bungong uroe

Seumbah nyoe teuot ayahda

Seureuta deungon cut ma droe

Po samlakoe ro ie mata

Han meuho le rotdeh rotnoe

Meusoe-gumoe meuhue hila

Ka meuron-ron dalam uroe

Samlakoe ayah ngon cut ma

Di putroe neucok meulintee

Neupangkee neutingkue lanja

Han èk neume bungong keumbee

Lam abee reubah bantiga

Neucok saboh tinggai saboh

Han le meu'oh aneuk dua

'Oh reubah maken neubeudoh

Neucok saboh han mumada

Lheueh nibak nyan raja nanggroe

Neukheun meunoe bak judonya

Puwoe aneuk nyan banlhee droe

U meuligoe lam istana

Duek bak geuta nyan banlhee droe  
Di tengoh nyoe banta muda  
Geubri makeuen ban sinaroe  
Ban adat droe poteu raja

Peurjamuan yoh masa nyan  
Dum makanan indah han sa  
Abeh bandum bri makanan  
Lakee tuan bandum gisa

Tinggai banta di meuligoe  
Deungon putroegeu bandua  
Bukon sayang bungong geutoe  
Putoh taloe dalam dodi

Abeh leupah rakyat dum woe  
Meuntroe meuntroe deungon wadi  
Teutap banta di meuligoe  
Bandua droe putroe siti

Mangat ate raja putroe  
Bandua droe bunda abi  
Raja bri saboh meuligoe  
Keu putroe ngon banta ahli

Teutap sinan malam uroe  
Cut putroe ngon Kureh Pari  
Suka ate hana bagoe  
Raja putroe that beureuhi

Lop bilek jeh ngon bilek nyoe  
Dua putroe kanan kiri  
Guroe seunda malam uroe  
Ngon putroe meurak meunari

Teuduek siat po samlakoe  
Jinoe muwoe keu Juhan Ali  
Mangat ate neueu meulintee  
Hana lagee mangat kon le

Teuka rakyat dum meuree-ree  
Wareh sukee Kureh Pari  
Judo bujang deungon meuntroe  
Sinaroe peurumoh wadi

Me haluan dum barangsoe  
Ureueng nanggroe jime ruti  
Dum jak kalon tuan putroe  
Baro neuwoe di nanggroe pari

**Ureueng agampi meunan proe**  
Jak eu ka woe Kureh Pari  
Troph lam kuta dum sinaroe  
Seumbah dum nyoe raja doli

Duek meusapat muda gantoe  
Sinaroe di yup meuligi  
Juhan Ali neukheun meunoe  
Ubak meuntroe deungon wadi

Bandum gata bek dilee woe  
Hajat lon nyoe meukhanduri  
Beudoh jinoe wahe meuntroe  
Jak sie lum o ngon bubiri

Takhanduri tameujamee  
Tayue lakee do'a sare  
Taboh raja batee ulee  
Bungong keumbbee Kureh Pari

Meuntroe pubuet ban surohan  
Tuan tuan rata geubri  
Lheueh khanduri seukalian  
Tabai intan Kureh Pari

Juhan Ali seuot nyoe ban  
Wahe intan gantoe abi  
Gata lon boh keu sulton  
Ngon pakaian pangkat doli

Banta meungui yoh masa nyan  
Ban atoran raja neugri  
Tren u baroh banta intan  
Lam usongan peuduek sare

Lhee seun saho meuhue ulang  
Ampeueng sajan tet ngon beude  
Peuduek atueh batee tabai  
Nyang phon awai beuet jari

Lheueh geutabai teuma geudeelat  
Bandum rakyat seuot sare  
Meuhei bandum timu barat  
Bri thee meuhat seugala be

Kureh Pari lheueh geudeelat  
Woe u teumpat seumbah abi  
Raja neukheun meutuah that  
Beu seulamat Tuhan neubri

Bu meutuah batee ulee  
Bu meuteumee lom bak titi  
Teutap keurajaeun bungong keumbee  
Nanggroe mubee raseuki

Mangat ate dum sinaroe  
Dalam nanggroe meuntroe wadi  
Di istana dua putroe  
Lam meuligoe meuh kasturi

Juhan Ali neuduek keudroe  
Deungon putroe Sikanda Diwi  
Uieueng ngadap saban uroe  
Hana sunyoe dum peureugi

U kawoh Kureh Keumala  
Geunap masa troh keumari  
That meusyeuhu dum seugala  
Raja muda got mufeuti

Deungon sakti meugah han soe  
Jipujoe banta juhari  
Raja muda murah jaroe  
Dua putroe kanan kiri

Malam uroe ate hireuen  
Hana peue kheun suka kon le  
Padum lawet lam keurajeuen  
Rame mideuen han soe tukri

Teukeudi Po Rabbon Kade  
Teuma mate Juhan Ali  
Tinggai sidroe putroe kande  
Bungong pade Sikanda ahli

Neutanom le banta muda  
Ureueng teuka han soe tukri  
Uroe malam hana reuda  
Dum peundita bak khanduri

'Oh lheueh peuet ploh uroe sudah  
Abeh keumah lheueh khanduri  
Maseng rakyat woe barollah  
Banta indah lheueh khanduri

Deungon putroe rupa cidah  
Nyang meutuah hana sakri  
'Oh takalon hana tiwah  
Bant'ua blah timang sabe

Teutap banta ngon u cut indah  
Nyoe lon peugah laen rawi  
Troph meuntroe deungon peurdana  
Dan mama Alkeh meuntri

Nyankeu bunda Bahrom muda  
Tanyong hoka aneuk kami  
Banta peugah hana gisa  
Deungon hambar laen rawi

Asailiah neuhareu toe  
Yoh masa roe di dalam gle  
Ngon teukeudi Tuhan sidroe  
Ka paloe bandua han le

Lon geukeubah sidroe jatoe  
Bandua droe geupeureugi  
Han meusampe tinggai nanggroe  
'Oh watee woe lon seundiri

Hingga abeh neuhareu toe  
Bak bunda droe Alkeh meuntri  
Yoh nyan bunda ka neupoh droe  
Pulang-paloe hana sakri

Neutren sinan laju neuwoe  
U teumpat droe maseng diri  
Tinggai banta lam meuligoe  
Jeuep-jeuep uroe that beureuhi

Teuma hame tuan putroe  
Po samlakoe that juhari  
Ka na aneuk bungong uroe  
Nibak putroe Nuron Beureuhi

Aneuk inong cidah hansoe  
Nama nyoe Cahya Angkari  
Seulindang Deulimapi hame le  
Mangat ate raja doli

Aneuk agam teuma lahe  
Cidah mise hana sakri  
Soe nyang kalon mangat ate  
Nan geupangge Juhan sakti

Hingga teuma laju raya  
Aneuk raja Kureh Pari  
Hingga umu lapan thon ka  
Bak syiah lanja neujok meungaji

Yoh masa nyān teungku syiah  
That neupapah aneuk doli  
Malem laju rancak babah  
That meutuah hana sakri

Sikhan hitam ujung lidah  
Sang-sang ulah cumboi sakti  
Nyankeu bak sang gantoe ayah  
Nibak ulah taeu dali

Hingga rayek laju bagah  
Ngon afuwah bunda abi  
Teuduek siat 'oh nan kisah  
Banta dasyah lam meuligi

Sajan ibu deungon ayah  
Dalam papah malam hari  
Haba Jameun muwoe kisah  
Nyoe lon peugah Kureh Pari

Kheundak Allah Po lon sidroe  
Kisah muwoe raja neugri  
Bak simalam neumeulumpoe  
Leumah putroe dalam mimpi

Na nyum jikheun uleh putroe  
Meunan bagoe nibak doli  
Bit tuanku lon han neutueng  
'Oh noe Jameun goh keumari

Han neutueng on sipot baplueng  
Han neutueng lon ampon doli  
Neukheun dilee 'oh neuriwang  
Lon pandang beurapa lawi

Han lom teuka teungku abang  
Ulon sayang hana sakri  
Lom ngon saket bungong mancang  
Han ek makan le meuruji

Din Keumala bungong asan  
Makeuen dalam jantong ate  
Hana leupah minom makan  
Meunan macam lumpoe doli

Ka teukeujot deelat makam  
Nyang sulton Kureh Pari  
Ngon ie mata ile sajan  
Teusumpan teuduek seundiri

Rugha ate han peue kheun ban  
Di dalam jantong kaleubi  
Beudoh putroe tanyong pakon  
Neuseuot han narit siti

Lhee peuet limong jitanyong lom  
Neubakhom hana padoli  
Lalu neumoe bungong peukan  
Ka troh keuman Nuron Beureuhi

Dua lhee go cut tanyong proe  
Cit neuiem droe ampon doli  
Putroe tanyong cula-culoe  
Bandua droe nyan seumudi

Rot wie sidroe uneun sidroe  
Sira jimoer putroe siti  
Peurab aneuk lom dua droe  
'Oh jieu proe neumoe doli

Hingga teuma haba nyang toe  
Beungoh uroe pagi hari  
Sosah bujang deungon meuntroe  
Bentara nyoe geusyik waki

Di po jeh hom di po nyoe hom  
Hana mufom ubi sawi  
Abuh keunan dum meuhimpon  
Meuron-ron dalam meuligi

Yoh masa nyan sidroe basyah  
Nyang meugah geunaseh doli  
Taleb Jakfa nan geupeugah  
Nyang di atueh bak barangri

Jiek laju u meuligoe  
Jak deelat nyoe raja neugri  
Taleb Jakfa peurab bak toe  
Seumbah jinoe ujung gaki

Limong go jibeuet jaroe  
Teukeujot nyoe raja doli  
Ban neueu rame meuligoe  
Neukheun meunoe peue nyoe 'a-'i

Teuma seuot tuan putroe  
Tuanku moe hana lanti  
Nyankeu sebab trok ureueng nyoe  
Sinaroe bujang ngon kali

Taleb Jakfa seumbah datang  
Ampon laman sampie neubri  
Wahe Taleb nyang singgahan  
Lon hajatkan idin tabri

Ulon meung jak siat jalan  
Blah seulatan lon peureugi  
Na mutiara saboh makam  
Ngon pualam intan biduri

Lom zameurut deungon intan  
Lon pandang 'ajaeb seukali  
Hana dapat peukabaran  
Patah kalam bak teurawi

Gadoh lancok deungon tajam  
Ujong uram hana meuri  
Gadoh bijak deungon cangklak  
Lam umbak silong biduri

Gadoh areh deungon bijak  
Cahya umbak lam hayati  
Siat tabri jinoe lon jak  
U pucak meuligoe cut ti

Lam nanggroe Keulabee Tamam  
Raja jimeunan Gangga Beurami  
Nyanpat nanggroe putroe sajan  
Lom dua nyan aneuk kami

Meuntroe rakyat seukalian  
Tapeugang ube mufeuti  
Meuna umu lon beurjalan  
Besok tuan lon peureugi

Taleb Jakfa seuot nyoe ban  
Ngon angkatan ampon doli  
Raja muda seuot meunoe  
Sidroe kamoe lon peureugi

Ngon Janggi Keumala ragoe  
Jeuet dua droe lon he meuntri  
Haba raja ulon peutoe  
Bek that rampoe hana meukri

Singoh beungoh teubiet uroe  
Raja nanggroe neuhei Janggi  
Teudong u keue po samlakoe  
U leuen meuligoe le teurjali

Raja neucom tuan putroe  
Rotdeh rotnoe kanan kiri  
Lom bak aneuk bandua droe  
Neukheun meunoe rayek bagi

Ateueh Janggi raja neupek  
Putroe cantek moe meu'i-i  
Ka hana le pheuet meuculek  
Raja baek geupeureugi

Yop mewa uwan sirogo payas  
Nyauw tenebari bantengai hoi  
Taleb joko diaqoqo  
Nyauw di isteng pak perawati

Jitik joko u merupike  
Jitik geset u doce lida mawis  
Taleb joko diaqoqo pak roe  
Semupen liwon ulong sayi

Tilmon do jipeter isole  
Tapeugang ujoe leis goji  
Bau uction tuwu uhenigoe  
Nyukheun meuligoe base ujoe

Tembu setot tuwu purtoe  
Jinrik moe punc jemu  
Nyajiton seupap top mawis ujoe  
Siwatoe pulung ujoe kali

Taleb joko diaqoqo gabab  
Amanu isemun samboe nusipi  
Wise Taleb joko diaqoqo  
Indet nini nini

Ujon wengah juk sinj jalin  
Bijit seufitton lou bentenan  
Ma mutera sasopu bayekan  
Mogn boetson mina pidihut

Iton sumenan deungon intan  
Lou biogebus'jepe sumpani  
Hana qebut bentenan  
Patep kisem pak jentawi

Gagob iuscop deungon telis  
Ujung mewa-deungon cengkep  
Gagoh pije deungon cengkep  
Iton tupek sialon piheti

Teutap putroe Jimoe rugha  
Lon calitra guda Janggi  
Na siploh jeuem jipo guda  
Leumah rupa le meuligi

Leumah pucak dalam miga  
Meunyala intan biduri  
Deungon kande leumah meunyala  
Deuh cuaca dalam hari

Teuma jitren keunan guda  
Marit sigra yoh nyan Janggi  
Tuanku ka sampoe sudah  
Pioh payah dilee kami

Neuseu ot le sulotan syah  
Ka sudah pioh beureunti  
Guda jidong ateueh pucak  
Meulikak ngon eumpat gaki

Meuligoe yoh nyan meuhayak  
Miseue umbak bineh pasi  
Si nyak putroe le teukeupak  
'Oh meuhayak nyan meuligi

Teubleut mata puan pirak  
Mublak-blak sang bintang pari  
Saleh pakon nyoe meuhayak  
Nyoe saleh grak nibak Rabbi

Meukon meunan pane layak  
Meulimbak seubagoe ini  
Seungap tuto bungong meurak  
Meugisa bak ampon doli

Jimarit guda analan  
He sulotan Kureh Pari  
Jak neutamong nyan u dalam  
Bak intan si nyak bungong pi

Banta tamong le rot tingkap  
Meuhadap ngon bintang pari  
Bak watee nyang got that ceupat  
Cut kasab bak lapeh tinggi

'Oh ban sare ban meuhadap  
Putroe ubat seumbah gaki  
Ngon ie mata ro meudrap-drapp  
Banta neumat e putroe ti

Han meuteumeung peugah ragam  
Laju pangsan bandua si  
Bandua blah sigo pangsan  
Na dua jam bak laku ri

Puleh keudroe gaseh limpah  
Cut indah ngon ampon doli  
Hingga malam laju sudah  
Bandua blah makeuen nasi

Duek meuhadap poh beurakah  
Cut indah ngon ampon doli  
Meudeh meunoe le neupeugah  
Neukisah banta peugah kri

Rotdeh ile rotnoe limpah  
Sang ka bicah plok cut putri  
Bak malam nyan putroe muda  
Sang syeuruga masok cut ti

Muwoe tuboh jiek cahya  
Bak ie muka mubhak dali  
Teutap sinan Kureh banta  
Ngon Keumala Din ugahri

Nyoe ho laen muwoe haba  
Ubak nyang ka dilee rawi  
Cit u nanggroe Kureh banta  
Putroe dua ulon rawi

Seulindang Deulima leubeh rugha  
Bandua Nuron Beureuhi  
Meusajan ngon aneuk dua  
Lam beurcinta malam hari

Seulawet tan nyan paduka  
Hana reuda neumoe sabe  
Han ek peuiem Taleb Jakfa  
He cut rakna bek le 'a-'i

Po cut ampon bek that rugha  
Deelat raja troh keumari  
Seuot putroe cut Deulima  
Seureuta Nuron Beureuhi

Masa dilee yoh di nanggroe  
Tuanku droe kayem buni  
Kayem gadoh keunong paloe  
Nyang jeuet kamoe leubeh ngeuri

Masa gadoh yoh saboh roe  
Leumah kamoe kalon dali  
Deuh meusangkot cong meuligoe  
Lheueh nyan neuwoe neukeumbali

Teupike lon nyankeuh putroe  
Nyang neulumpoe malam tadi  
Kadang cit ka lheueh meukawen  
Kadang meusyen seutot janji

Meuri ka trep rindu kayem  
Bungong usen meulhok gaki  
Meunan putroe dum meuteuoh  
Neumeurawoh sabe cut ti

Teuduek 'oh nan bungong jaloh  
Muwoe teuoh raja doli  
Muwoe kisah amma bakdu  
Adek teungku got that tari

Kureh banta sunteng meulu  
Keunan laju kisah rawi  
Marit banta bak siuroe  
Nibak putroe elok budi

Lon meuhajat woe u nanggroe  
Neukheun meunoe bak si nyak ti  
Wahe adek bungong masak  
Hajat heundak lon he e ti

Gata lon ba ho nyang lon jak  
Walee jarak lon peureugi  
Seuot putroe le meuleupak  
Meuidin bak Allah Rabbi

Breueh raden peunajoh cut nyak  
Nyang leumak eungkot keurisi  
Bak lon e po saja lon jak  
Napi nibak hajat dek ti

Seubab sinoe tan geulantoe  
Ayah kamoe goh keumbali  
'Oh woe ayah ulonteu nyoe  
Ban suka droe ampon doli

Lhee uroe treuk ayah neuwoe  
Lheueh prang nanggroe Biram Sakti  
Neucok pulang po ma putroe  
Bunda kamoe Kasom Diwi

Tinggai ayah dalam nanggroe  
Ulonteu nyoe seutot doli  
Seungap banta bungong uroe  
Neudeungo putroe meunan rawi

Santalia neungui cut nyak  
Bee meuhayak hana sakri  
Tinggai Kureh bak cut manyak  
Hingga troh bak tujoh hari

Salju indred salutti grahamed  
Sedang mewu subusad  
Edu. Jume noem neugatu?  
Kebutu gatutu gatutu

Wahe adek bungong masak  
Dolot emangku emangku  
Dolot emangku emangku  
Dolot emangku emangku

Wahe adek bungong masak  
Dolot emangku emangku  
Dolot emangku emangku  
Dolot emangku emangku

Wahe adek bungong masak  
Dolot emangku emangku  
Dolot emangku emangku  
Dolot emangku emangku

Wahe adek bungong masak  
Dolot emangku emangku  
Dolot emangku emangku  
Dolot emangku emangku

Wahe adek bungong masak  
Dolot emangku emangku  
Dolot emangku emangku  
Dolot emangku emangku

Wahe adek bungong masak  
Dolot emangku emangku  
Dolot emangku emangku  
Dolot emangku emangku

Wahe adek bungong masak  
Dolot emangku emangku  
Dolot emangku emangku  
Dolot emangku emangku

Neudeungo nanggroe that meuhayak  
Bagoe umbak bineh pasi  
Gangga Beurama nama raja  
Nyan ayahda tuan siti

Neubeudoh di dalam tapa  
Neuprang kuta Biram Sakti  
Raja beudoh le teureubang  
Neubangkang u gunong Jambi

Subra donya that meuguncang  
Jeuet ribot sang guyang neugri  
Troh u nanggroe Sakti Biram  
Neucok pulang nyan esteuri

Gala Diwa keunong hekeumat  
Raja ingat saboh sakti  
Dalam teulinga nyan neubalot  
Neuhirup ngon dua bibi

Neuhapit le asek ulee  
Ateueh batee dong beurdiri  
Neuhapit ngon abeh kuat  
Raja deelat sret lam tuwi

Lhee uroe jak keudeh ka sret  
Teuma ji'uet uleh bumi  
Abeh hayat mate sudah  
Neucok zeejah woe keumbali

Seugala dum na rampasan  
Puwoe intan ngon lahuri  
Raja neuwoe laju tajam  
Troh u makam teumpat diri

Putroe deungo deuh meutaga  
Neuthee teuma ka keumbali  
Neumeuase putroe muda  
Deungon raja Kureh Pari

Peuduek bantai deungon tika  
Ateueh meja ngon keurusi  
Beudoh neudong le bandua  
Neupreh teuka raja doli

Na sikeujap troh le sampoe  
Bandua droe deungon umi  
Laju keunan u meuligoe  
Taklem jinoe laju neubri

Seumbah ayah bunda sajan  
Bandua nyan mayoh ate  
Raja pioh duek teusumpan  
Cut intan teuma peugah kri

Wahe ayah nyang sulton  
Salah jalan aneuk doli  
Ulon tuan ka meukawen  
Deungon canden banta ugahri

Nyan leupeuepat pandang baten  
Bek mireng jeuheut bak doli  
Napi bangsa bukon bak jen  
Ensan canden umat nabi

Seuot raja hana salah  
Ateueh wajah makna dali  
Teutap sinan meukuta syah  
Raja dasyah lam meuligi

Jitren rakyat that barollah  
Jak seumbah raja syah doli  
Peunoh kuta ka meudah-dah  
Sarat leupah kuta doli

Gangga Beurama le meutitah  
Neupeugah bak Kureh Pari  
Wahe aneuk tadong sinoe  
Nyoepat nanggroe ulonteu bri

Gata aneuk mat hukoman  
Ube geunggam nanggroe kami  
Ulon han le duek sulton  
Lon meung riwang bak usalli

Kureh seuot kru seumangat  
Ngon beureukat kalam doli  
Ulon ayah lon woe siat  
Ngon cut ubat sajan kami

Seuot raja teuma pantah  
Insya Allah tulong Rabbi  
Jeuet hana peue aneuk lidah  
He meutuah woe keumbali

Napi beu got nyan tapapah  
Cut indah cantek juhari  
Teuma singoh uroe sudah  
Hajat langkah Kureh Pari

Deungon putroe cut Latifah  
Nyang cidah Kasmi Diwi  
Neuyue intat uleh raja  
'Oh hawa antara bumi

Teuma jipo dum seugala  
Lam hawa hana tatkri  
Kureh neukheun sep 'oh noe ka  
Jak neugisa geusyik waki

Rakyat teuma dum jigisa  
Deungon raja mumat jari  
Lom sajan ngon putroe muda  
Seubot sapa abeh janji

Teuduek 'oh nan rakyat gisa  
Jinoe haba Kureh Pari  
Ngon putroe cut po lam hawa  
Ka troh sigra teuma u neugri

**Neutren laju dalam kuta  
Rakyat kubra hana sakri  
Jikheun ka woe raja muda  
Sajan neuba bungong usi**

**Neuek laju u meuligoe  
Neuduek jinoe bak lahuri  
Teuma teuka wadi meuntroe  
Sinaroe bujang ngon tandi**

**Lom ngon Basyah nyang singgahan  
Laen teuma geusyik waki  
Jak meuteumeung ngon sultonan  
Dong meurumpan hana sakri**

**Teutap sinan minom makan  
Bak sultonan nyang juhari  
Teuma jinoe di sultonan  
Beurtidoran alam syahi**

**Suboh uroe laju siang  
Dum sibarang woe keumbali  
Raja teutap lam meuligoe  
Lhee boh putroe saboh doli**

**Nyang dua ka na aneuk droe  
Nyang saboh nyoe gohlom jadi  
Banalhee putroe meugaseh that  
Hana siat takalon cre**

**Dalam dasyah raja teutap  
Lam ibadat suntok sabe  
Dalam nanggroe seunang amat  
Meusyeuhu that seugala be**

**Dalam banda rame liwat  
Ureueng meukat bandum take  
Keurajaan ade sangat  
Makmu teumpat sampoe u gle**

Jeuep-jeuep gampong teupujoe that  
Sebab deelat hukom ade  
Tulong Tuhan Rabbon 'Ibad  
Mudah sangat le raseuki

Kureh Pari 'oh noe teutap  
Abeh tamat he boh ate  
Kakeuh abeh ulon surat  
Ngon beureukat do'a dum le

Tunong baroh timu barat  
Ka seulamat lon boh ate  
Po hikayatpi lon surat  
Kadang silap singoh 'oh cre

Nak neuturi uleh sahbat  
Untong hajat na meuate  
Jeuet neulakee meusikeujap  
Haba mangat tuto ganje

Teungku deungo bandum beu trang  
Teungku Hasan eumpunya ri  
Muara Dua Gampong Kandang  
Geusyik sinan gop nyan jadi

Lhok Seumawe nama posan  
Sepkeuh 'oh nan lon pumeuri  
Walee neuba laen makam  
Neupeuriwang keunoe bak si

Nibak dua buleuen Muharram  
Teutop kalam calitra ini  
Keuhai hejurat lon peugah ban  
Thon tujoh ploh lapan tamat rawi

Juem ngon meunet hana lon tuleh  
Payah abeh bak meurawi

T A M M A T



PN BALAI PUSTAKA — JAKARTA

